

25413

BOSTON PUBLIC LIBRARY

Maria Whitney Fund



Digitized by the Internet Archive
in 2015

<https://archive.org/details/vitamirabilisetm00hans>



Ms. 18-12



VITA MIRABILIS
ET MORS PRETIOSA
VENERABILIS SORORIS
ROSÆ DE S. MARIA
LIMENSIS,

Ex Tertio Ordine S. P. DOMINICI,

AD SANCTISSIMUM D. N.
ALEXANDRUM VII.
PONTIFICEM MAX.

Excerpta & collecta

Per P. M. F. LEONARDUM HANSEN
Prouincialem Angliæ, & Socium Reueren-
dissimi P. Magist. Generalis Ord. Præd.



ROMAE, Typis Nicolai Angeli Tinassij M. DC. LXIV.

Superiorum permissu.



THE UNIVERSITY OF CHICAGO



*ERA ac secura SS. Pontificum la-
titia est, si Ecclesia vernet Sanctita-
te, si pace floreat. Et ecce ROSAM.
Vsque ab Indorum mari Pacifico
pacem, ver, letitiam adhalat noui
Orbis nouus hic flosculus: num es
sanctitatem? id verò Sanctitatis Vestrae infallibili
oraculo decernendum præstolabimur, ne fallamur;
nam scitè Paschasius, aliæ (: inquit) sunt Rosæ, quæ in pf.
44.
Christi sanguine intus pinguescunt & rubricantur
vt semper floreat, aliæ quæ in terra radican-
tur, vt citò floreat & postmodum arescant, Credide-
rim equidem non his sed illis accensendam fore hanc
Rosam Peruanā, utpote quæ nec humi serpsit, nec ter-
rena radice aut succo sed Christi sanguine pinguis ac
rubens, prodigijs sæper florere pergit, eiusq; Vita, mors,
gesta palam clamitant, Christi bonus odor fumus.
Denique hanc DEI Filius Rosam cordis sui di- infra
Cap.
XI.
gnatus est appellare. Verumtamen priuatum sileat
meæ exilitatis præiudicium, ubi publicum S. Sedis iu-
diciū expectatur. Mihi sat fuerit paruisse, ac Su-
periorum nutu ex iuratis Processibus mirabilem Rosæ
Vitam historico subnodio collegisse in Synopsim; car-
ptim quidem, at non sine compunctione.*

*Porro, vt quidquid hoc est tenuissima opellæ Ale-
xandro Pont. Max. auderem inscribere, mihi solus*

*is autor fuit qui solus me tenet Roma lateri adlectum
 suo Generalis totius nostri Ordinis Moderator, nem-
 pe ratus, eductam Peruvia gleba aurea Rosam ijs de-
 beri manibus, quæ Auream Rosam quotannis sancti-
 fican, dum quarta esurialis Quadragesima Domini-
 ca fideli populo ait: Lætare. Sanè ut ista Dominica, ita
 illa Dominici Rosa est, utraq; floridam apta spirare
 lætitiâ, digna utraq; Summi Sacerdotis benedicente
 manu exaltari in candelabrum, ac inde donum fieri
 Catholicorum Principum supplici pietati.*

*In it (: fateor:) hodie Autumnus, quo deberi solent
 non flores sed fructus; at vicissim à Rosa Sponso reso-
 nat Echo: flores mei fructus. Opportunè; simul
 quippe in hac Rosa & fructifer autumnus vernat, &
 floridum ver fructificat, quinimò hic primus est me-
 ridionalis America flos & fructus, quem ubi Sancti-
 tas Vestra (uti fore speramus) in primitiarum aram
 solemni honoris & honestatis apotheosi eleuarit co-
 ram Domino, toti Ecclesie non minùs fructuosum
 quàm floridum lætare intonabit.*

*Penè exciderat, nobis Germanis Rosam in laque-
 ribus pingi solitam ritu vetustissimo, ut Harpocratici
 silentij admoneat hospites. Itaque hic silebo, tacitisque
 precabor votis, tam prosperè nobis Valere Sanctita-
 tem Vestram, quàm verè suo throno porta inferi non
 praualebunt. Roma, ix. Cal. Octobris M. DC. LXIV.*

S. V.

FR. IO. BAPTISTA DE MARINIS

Sacræ Theolog. professor, Ord. Præd.

humilis Magist. Gen. & seruus.

TEnore præsentium, nostrique autoritate officij facultatem concedimus Admodum R. P. Magistro Fr. Leonardo Hansen Prouinciali Angliæ socio nostro, seruatis seruandis imprimendi librum cuius titulus est *Rosa Peruana, seu Vita mirabilis, & mors pretiosa venerabilis sororis Rosæ de Sancta Maria ex tertio Ordine S. P. N. Domini- ci*, iussu nostro à duobus Theologis recognitum, & approbatum. Dat. Romæ in Conuentu nostro S. Mariæ super Mineruam die 24. Augusti 1664.

Fr. Io. Baptista de Marinis

Magister Ordinis

Reg. fol. 78.

Fr. Antonius Gonzalez
Magister, & Socius.

Approbatio Theologorum Ordinis Prædicatorum.

Synopsin hanc admirabilis vite Sororis Rosæ de S. Maria Peruana descriptam ab A. R. P. Mag. Fratre Leonardo Hansen Prouinciali Angliæ à me visam de mandato Reuerendiss. P. Magistri Generalis Fratris Io. Baptiste de Marinis, & à me repertam omni ex parte vernantem floribus elegantissima eruditionis, iudico nihil continere, quod possit impedire ne secundum Sacros Canones, & Concil. Trident. & Constitutiones Apostolicas imprimi possit. Et in fidem &c.

Fr. Petrus M. Passerinus Procur. Gen. Ord. Præd.


De mandato Reuerendiss. P. Magistri Generalis Ordinis Prædicatorum Fr. Ioannis Baptiste de Marinis, vidi librum, cui titulus Synopsis admirabilis vite, morum, operum, & felicissimi transitus Sororis Rosæ à Sancta Maria Peruana ex tertio Ordine S. P. Dominici, ab admodum R. P. Magistro Fr. Leonardo Hansen Prouinciali Angliæ eiusdem Ordinis compositum; vidi, & in eo miratus sum hominem non hominis stylo, sed Angeli penicillo depingentem Rosam. E Gaspare de Floribus Leonardus noster Sororem Rosam depinxit natam; & de Leonardo nardum factam, Rosam iam mundus odorat, en redolent omnia dum progenitoris floribus scriptor addit flores. Miramur in flore colorum venustatem, odoris argutiem, auctoris artem. Hansen, has en tibi lector in libro hoc prærogatiuas offert, si venustatem desideras, venustus liber hic, elegansque totus, si argutiem optas, arguto liber hic expolitur ungue, si artis industriam quæritas, ardua liber hic expeditur arte. Quid ultra? Sertum tanto operi amas? Laus tua sit sertum, ut sit certum librum sic floridam, floridam venire ad palmam, auream ruere in coronam. Sic censeo Romæ apud Sanctam Mariam super Minervam.

Fr. Vincentius Ferre Ordinis Prædicatorum, Magister, & Regens.

PROTESTATIO AVCTORIS :

CVM Sanctiss. Dominus Noster Urbanus Papa VIII. die 13. Martij anno 1625. in S. Congregat. S.R. & Vniuersalis Inquisitionis Decretum ediderit, idemque confirmauerit die 5. Iulij anno 1634. quo inhibuit imprimi libros hominum, qui sanctitate, seu Martyrij fama celebres è vita migrarunt, gesta, miracula, vel reuelationes, seu quæcumque beneficia, tanquam eorum intercessionibus à Deo accepta continentes, sine recognitione, atque approbatione Ordinarij, & quæ hætenus sine ea impressa sunt, nullo modo vult censeri approbata. Idem autem Sanctissimus die 5. Iunij 1631. ita explicuerit, vt nimirum non admittantur Elogia Sancti, vel Beati absolutè, & quæ cadunt super personam, bene tamen ea, quæ cadunt super mores, & opinionem, cum protestatione in principio, quòd ijs nulla adsit auctoritas ab Ecclesia Rom. sed fides sit tantum penes Auctorem. Huic decreto, eiusque confirmationi, & declarationi obseruantia, & reuerentia, qua par est, insistero, profiteor me haud alio sensu, quidquid in hoc libro refero, accipere, aut accipi ab illo velle, quàm quo ea solent, quæ humana dumtaxat auctoritate, non autem diuina Catholicæ Romanæ Ecclesiæ, aut Sanctæ Sedis Apostolicæ nituntur, ijs tantummodo exceptis, quos eadem Sancta Sedes Sanctorum, Beatorum, aut Martyrum Catalogo adscripsit.

PROTESTATIO AVCTORIS




Imprimatur, si videbitur Reuerendiss. Patri Magistro Sac. Palatii
Apostolici.

O. Archiep. Patracen. Vicesg.

Imprimatur,

Fr. Hyacinthus Libellus Sacri Pala-
tij Apostol. Magist. Ordinis Præ-
dicatorum.





SYNOPSIS

ADMIRABILIS VITAE , MORVM , OPERVM ,

Ac felicissimi transitus

SORORIS ROSAE A S. MARIA PERVANÆ

Ex tertio Ordine S. P. Dominici.



Prolepsis ad pium Lectorem.



Tiq; miraberis in tota hac Synopsi tam sterile *Miraculorum* silentium : at precor sustine , prodibit & horum appendix vbertas , mox vt ex lege *Sacrorum Rituum* licuerit . Interim solius *Vitæ* historiolum accipe ex *Remissoriali* (: quem vocant) *Processu*, iuratisq; testimonijs fide bona extractam , quæ & plenior foret , nisi Virginis Rosæ ingeniosa , & cauta humilitas (: de qua infra cap. v.) sic pleraq; studuisset abscondere , quòd neq; familiarium intimis , neq; domesticis curiosè oculatis , nec ipsi deniq; peruigili Matri innotuerint , præter paucula ista , quæ pene furtim & quasi per rimulas notari subinde potuerunt . Itaq; non nisi comperita hîc damus , quæ in his Capitulis tametsi totidem videbuntur manipuli , spicilegium non excedunt .

A

CAPVT

C A P V T I.

Rosæ patria, natales, cunabula.

Lima, meridionalis Americæ, quâ mari Pacifico lambitur, nobile emporium Regniq; Peruani metropolis hanc nouam in Orbe nouo enixa est Rosam anno Virginei partus M.D.LXXXVI. mense Aprili, qui quod erupturis floribus terram aperiat, ab officio nomen traxit. Huius mensis vigesimus dies Beatæ Agneti de Monte Politiano Virgini Dominicanæ à *cœlesti rore, ac diuersis repente enatis floribus* notissimæ sacer est, idemq; Rosæ huic natalis fuit. Itaq; vernant hic omnia, siquidem & Progenitores Virgini fuere *Gaspar de Floribus, Maria ab Oliua*, ille ex Insula Hispanorum oriundus cui à *Portu diuinitatis* nomen est, hæc *Lima* nata; vterq; stirpe non ignobili, sed opibus permodicis, nisi quod ingentis opulentix loco fuerit tali filiola cælitus ditari. Nascenti Rosæ Paterna domus obrigit in vico *S. Dominici*, ac ponè quidem iuxta *Aedem S. Spiritus*, vt vel ipse locus videatur futuræ tum sanctimonix tum instituti signasse præsagium. Iure iurando testata est genitrix (: in Processu Remiss.) sibi fuisse hunc partum vt felicissimum ita facillimum, minimèq; obnoxium illis angoribus, quibuscum solebat in parturitione reliquarum prolium dirissimè consistari. Nec minùs adstupuit obstetrix, vt vidit hanc infantem secundarum inuolucris prodire grauem, & quasi penulatam: Nimirum sic nascuntur Rosæ, congenitis integumentis vndiq; velut amictu paludatæ. Ipso dein festiuissimo Pentecostes die (: qui Hispanis *florum Pascha* dicitur) baptizata est Rosa, primoq; rore cœlestis gratiæ permaduit, nec tamen Rosæ nomen tunc ei impositum, sed Isabellæ siue Elyzabeth; nimi-

nimirum ab auia materna Isabella de Herrera, cui inter
 fustrales aquas videbatur is honor deberi humano more.
 Porro vt Rosæ nomen diuinitus Soboli destinatum post
 trium mensium ambages demum erumperet, prodigium
 expectabatur, quod tale fuit. Quiescebat in cunis tri-
 mestris paruula, quando cum ancillula & filiabus accita
 Mater conspexit filiolæ vultum vndiq; opertum repanda
 sed paulò post disparente rosa. Obstupuere omnes; at ce-
 teris altius icta spectaculo Mater subito complexu tene-
 risq; osculis diffuauiauit paruulam, *mihi* (inquiens) *tu de-*
inceps Rosa diceris & eris, nec alio post hac nomine te compel-
labo; quasi cum Præcuroris Matre protestaretur his Am-
 brosij verbis: *habet vocabulum suum quod agnouimus, non*
quod elegimus. Rem tamen indignè tulit auia, doluit suum
 nomen in tenera nepte sic obliterari ac ferè despici, vnde
 placando huic iurgio nec annorum lustrum satis fuit, do-
 nec tandem controuersia finem imposuit. Sacramentale
 Chrisma, quo Sanctissimus Limensium Archipræsul Turi-
 bius in Parochia loci *Quini*, dum Rosæ illiniebat confir-
 mationis signaculum, omisso Baptismali nomine Rosam
 pronunciare maluit, cuius fortasse iam tunc fragrantiam
 fenserat in spiritu, quo plenus erat. Sanè videbatur eum
 vnctio docuisse de omnibus, vt neq; errare posset in Ro-
 sæ nomine cur exinde pariter & auia adqueiuit. Verum,
 tamen lapsis aliquot annis de Rosæ nomine aliam indixit
 litem ipsamet Virginis pauida conscientia, nimirum vt ita
 præberetur occasio locusq; cælesti oraculo quo Rosæ no-
 men vltimò erat confirmandum. Res ita euenit. Creue-
 rat puella, iamq; suimet per ætatem compos vt rescuit, se
 neutiquam in Baptisterio sed in cunis traxisse hoc succe-
 daneum nomen, suspicata est pro solo vanitatis lenocinio
 forsitan hoc sibi inditum fuisse nomen, quo vultus sui
 commendaretur forma ac venustas. Itaq; hoc scrupulo
 faucia & animo inquieta facellum DEI Genitricis in Aede

FF. Prædicatorum Sanctiss. Rosario dicatum adiit, illic lachrymosè procubua Misericordiæ Matri angorem suum exposuit, remedium poposcit. Nec *Virgo Rosa mystica* Virgunculam Rosam distulit consolari, siquidem in alto sed inexplicabili intimæ illustrationis radio pauidam affata docuit, mirè hoc suum nomen probari Diuino quem gestabat Puerulo, se verò de suo pte nomine hoc insuper adiectum ei velle auctarium, quo Rosa à S. MARIA in posterum cognominaretur. Sic quæ trepidabat in nomine, firmabatur cognomine, secuta & læta quòd vtrumq; cælitus datum possideret. Habent quidem hoc (: Ambrosio teste) Sanctorum merita, vt à Deo nomen accipiant, sed qui vltra nomen etiam cognomen è Cælo accipiant, raros puto. Admisit insperatæ nomenclaturæ gratiam puella non sine excelso intimi dulcoris sensu, adeò, vt die quadam à SS. Communione domum reuertens ardore insolito obtestaretur Matrem, vnicum hoc gemini fauoris nomen Rosæ à S. MARIA sibi quàm creberrimè repeteret, ac frequentius occantaret, illo se mirificè posthac delectari, mulceri, colliquescere. Hærebat parens mirata nouitatem, at subiecit Virgo: Nunc nunc redire se à pedibus Magnæ Deiparæ, huic rem cordi fuisse, huius benedictione, & materno auspicio suam animam transisse in Rosam florido IESVLO Nazareno sacram: proinde si aliquando suspectum sibi fuerat Rosæ epitheton, iam illud in tuto esse, vtpotè diuinitus approbatum; ideo frequenti huius gratissimæ compellationis auditu velle se sui tum nominis tum officij sapiculè admoneri. Reliquum quod sibi in illa S. Communione acciderat, Virgo humilis verecundè subticuit, Matriq; sat fuit, Rosæ nomen quod infanti prima imposuerat, Cælo placuisse.

Rosæ crepundia, indoles, educatio Votumq; Virginitatis.

S Catarinæ Senensis infantia ac pueritia tam dulcis omnibus ac blanda fuisse legitur, vt non Catarinam, sed Euphrosynam pleriq; caperint appellare. Eadem infanti Rosæ fuit indoles quieta, suavis, lepidula, & continuo serena, vt commune dumtaxat gaudium totius domus videretur. Obseruarunt domestici, numquam in fascijs paruulam voce querula, aut stridulis vagitibus ædium turbasse silentium, numquam plorasse, nisi quòd semel, cum Mater nobilem Matronam visitans foras extulisset Rosam, compesci à planctu non potuit quoadusq; ex aliena in propriam domum referretur, quasi iam tunc nosset publicum fugere, & auersari, vnde ex tunc constituit parens infantem placidissimam deinceps cum exeundum foret, secum non exportare.

Trimula erat, quando in tenerrima indole promicare cœperunt supra ætatem robusta virtutum specimina. Et primum quidem tolerantia fuit animiq; inter dolores impauidi, fortis, tranquilli, vt liqueret Rosam esse quam spinæ nec terrent, nec terunt, aut deiiciunt. Accidit, quòd prægrandis arca dum incautè properèq; clauditur, dextrum Rosulæ pollicem fortuito corripere. Aduolauit turbata Mater, sed dissimulabat tranquilla filiola dolorem, abscondit manum, donec post dies aliquot putresceret sub vnguiculo emortuus sanguis. Aduocatur Chirurgus, isq; vt læso articulo tumidum pus educeret, acribus remedijs totum penè vnguem absumpsit, demum & vnguiculi residu-

residuum lento, ac violento forfice radicitus auulsit. Vidisses immotam sub his cruciatibus Rosam ac si non suus esset pollex, cui toties ferrum insauebat. Obstupuit præ alijs Ioannes Perez de Zumeta (: id erat Chirurgo nomen) haud capiens vnde tantillæ Virguncula tanta in ijs tormentis obduruisset constantia, nam toto illo acerbissimæ curationis tempore nec gemitum ediderat, nec vnquam expalluerat ad styli, sanguinis, nouorumq; vulnerum aspectum.

Nondum Rosa quadrimula erat, cum mordax suppuratio in eius auricula succreuit. Rursus igitur Chirurgi manu, ac post lene emplastrum deniq; & ferro opus fuit. Rosa, dum exesæ cartilaginis pars vitiata præscinditur, eavultus animiq; firmitate vulnus excepit, qua nec intueri adstantes poterant, fulcantem nouaculam. Fluebat sanguis in humerum, nec Rosa exhorruit tincturam suam.

Quadriennium viuendo expleuerat, cum summam capitis sui cutem species quædam impetiginis cepit obcrustare. Mater obuio sed imperito suasa consilio modicos pulueres insperfit effectu planè improspéro, nam ij vtpotè olentes Hermeticam pyxidem affectas partes caustica sua acrimonia rodebant ità immaniter, vt certis interuallis toto corpusculo tremuisse puellam tacitè notarint domestici: Nec tamen hic iugis, & acerrimus dolor ab ea, vel minimum potuit exprimere gemitum aut molestiæ indicium, nisi quòd à Matre interrogata de dolore, cum totum negare non posset, modicum ac toleratu facilem esse respondit: sicq; in ijs tormentis cum sua Matre pernoctauit silens, immota, quietissima. Sed anxia parens postridie reuulso leniter cataplasmate inhorruit, videns filiolæ verticem hinc bullis turgidum, indè fossulis profundè vlceratum, & ô (: inquit) misera, siccine totam hanc transegiisti noctem sub huiusmodi cruciatus voraci ardore? tacuit Rosa, nec vrgenti aliud vnquam replicuit, quàm sterisse

intra

intra mediocritatem suos dolores . Accitus deinde Chirurgus plagæ sanandæ nouæq; cuti inducendæ quadraginta duos continuos insumpsit dies , tormento vix mitiori quàm quo prima nox Virginem lancinarat . Sed neque tunc Rosæ defuit par dolori tam moroso constantia, quantum ab illa imò ab vlla ætate sperari posse Chirurgus diffidebat .

Idem Rosæ iam sexennis patuit robur sub eiusdem Chirurgi forcipe, cum sibi ex intimo nare eximendus fuit phæseolus , tertio demum tractu erutus . Dixisses hanc indolem vni patientiæ natam . Sed rudimenta hæc erant ac tempestiua præludia animi corpusculum proprium ceu alienum tractaturi . Superest quòd reliquam eius pueritiam cursim delibemus .

Rosæ quinquenni & adhuc inter pueritiæ infantiaq; confinia constitutæ , notitia ac timor DEI se se insinuauit modo prorsus admirabili; quia inter ludos. Res ità cõtigit: lusitabat cum ea natu maior germanus frater , isq; (casu an studio, incertum) luto imbuuit rutilam pulcherrimamq; innocentis puellæ casariem . Locus erat, ac puerilis ridenti materies , at non ità placuit Virgunculæ , quam non contemptus sed sordes offendebant . Itaq; ludum abrupti, cui mox frater: hem (: inquit) soror mea, si te deturpati capillitij tui iniuria tam seriò affligit, scito, cultos puellarum cincinnos Inferni rudentes esse , quibus illaqueantur iuuenum incautæ animæ , vt in gehennam æternam detrahantur . Ergo puta exosos Dîo capillos, quos tu amare videris . Hæc ludibundus puer gestu velut concionatorio profatus repetebat ludum, at puellæ animum, altius hæc verba, quàm pro dicentis impetu suæ ætatis modulo penetrarunt, nec verba erant sed tonitrua, nam, repente mens illa capacissima simul immensum concepit horrorem Inferni, simul apprehendit vastitatem æternitatis, simul Diuinam attentius reuerita maiestatem ponderabat

bat secum omnis peccati foedam infelicitatem : Hinc subito in se reducta capit odisse suosmet capillos, firmare animum aduersus omnes offensas DEI, detestari occasiones quaecumq; Inferno militarent, deniq; ordinato agmine tunc immigrarunt alta DEI æstimatio, filialis timor numinis, cura salutis, abominatio peccati. Quis tot tamq; seria exspectasset è ludo ac luto ? Verùm sub eodem radio progressa vltèriùs Rosa limpidè agnouit, DEI auxilium sibi fore & necessarium & iugiter implorandum. Hinc statim exarsit in ipsa conatus orandi, qui & formulam dictauit iaculatoriam, hanc videlicet. *IESVS sit benedictus. IESVS mecum sit, amen*. Dulcescebat exinde in labellis in corculo Virginis hic precandi modus, vt ab ea frequentanda nec dormiens cessaret, vsq; adeò nimirum DEI præsentia iam sensus Rosæ interiores vndiq; occuparat.

Demum sub hac tam præmatura ac sublimi DEI notitia quinquennis Rosa sensit apertiùs trahi se ac præparari ad S. Catarinæ Senensis excelsa tyrocinia, siquidem huius exemplo confestim & ipsa Virginitatis votum emisit inter hæc primula tenellæ ætatis crepuscula, quinto nimirum ætatis anno : quin & postea eiusdem Seraphicæ viraginis imitatione sibi met capillos ad viam vsq; cutem inscia, Matre præscidit, ne quid superesset funium quibus contra iuratum Virginitatis propositum aut traheret, aut traheretur ad nuptias, iam enim satis didicerat ex ludicris, luti inquinamenta suo capillitio quandoq; etiam seriò posse insidiari. Hic igitur puerilis sui lusus & crepundiorum exitus fuit vt mirabilis sic felicissimus, nam rarus est hic gratiæ tractus, qui Rosam ab innocentibus iocis vnico subitoq; passu deduxit in illam maturitatem iudicij, quo simul nossæt æstimare DEI celsitudinem, æternitatis pretium, & virginei Floris arcanam prærogatiuam. Vnum hic prætereundum non est, quòd qui deinde Virginis conscientiam moderati sunt, prudenter coniecere, superna hæc gratiæ
allecta-

allectamenta ipsi obligasse sub illo primo vsus rationis diluculo, quo iuxta verio- rem Theologiam quilibet in DEVM finem vltimum sese tenetur conuertere pro suæ capacitatis modulo. Vt ut sit, Rosæ non tam diluculum fuit quàm meridies, dum sic illustrata præferbuit & viam elegit quam debuit; attamen longè maius fuit à via quam elegerat numquam postea vllius noxæ grauioris admissione per totam vitam exerrasse, quod ut ijdem sui Confessarij concorderiter asseruerunt, ita patulum fiet ex ijs quæ sequuntur.

C A P V T III.

Rosæ erga Parentes mira obedientia, pietas, sollicitudo.

IN concursu duorum præceptorum, quo simul honorare Patrem, & Matrem, simul Deo magis quàm hominibus obedire iustum iussumq; est, Rosæ frequenter ingenio & solertia opus fuit, vt neutrum offenderet. Trahebat cælestis Sponsus electam sibi Virginem per arcanas sanctimonix ac perfectionis semitas: Ex aduerso trahebat rudis & cruda Mater Filiam morigeram ad pompas nugasq; seculi, ad vanos corporis ornatus, ad Mundi commercia. In his biuijs plusquàm humanæ artis fuit, incolumi vtrinq; obedientia neque à Sponsi ductu vel latum vnguem deflexisse, nec tamen abiuisse vinqum à maternis præceptis in Sponsi sequela.

Accidit, quòd coram honestis Matronis Rosa præsentè Genitrice importuniùs rogaretur suo capiti circumdare, textum è floribus sertum, quod illie fortè odoris gratia in medio positum cunctis arridebat. Verecundè renuit mo-

desta Virgo, instabant molestæ feminae, quibus complacitura Mater iussit edicto parere Filiam. Quàm putas luctabatur hic cum obedientia vani ornatus pudicus horror! Vicit nihilominus Rosæ ingenium: nam ferto clam ab ima parte suffixit oblongam acum, sicq; corollam latenter aculeatam suo Capiti non tam imposuit quàm impressit validèq; impegit, vt sibi non nisi tormentum esset quod ornamentum alijs videbatur. Nimirum obediuit Matri, at simul currebat in odorem Sponsi spinis coronati. Latuisset perpetuò nobile hoc strategema, nî postea manu aliena sat operosè extrahenda fuisset acus quæ sub florido blandimento profundè sæuierat; incertum tamen, acus an ornatus exosi circuli dirius pupugerit Rosam spinis quàm fectis amiciorem.

Aliud. Affectabat muliebri studio Mater Filiae manus vanè poliri ad delicati candoris elegantiam ac nitorem. Huic vsui singulare genus suaueolentium chirothecarum emerat, vt ijs more femineo Rosa saltim gestatione nocturna cogeret suas manus in adscititiam venustatem. Dixisses, non Virgini chirothecas sed victimæ sartagines, & ignem apparari, adeo exterrita dirigit, ingemuit, hæsitauit, donec ferocius materno compulsa imperio obtemperauit munusq; inuisum admisit. Optabat numquam fieri noctem, ne sibi lectulus adeundus esset cum tali manuum obuolucro. Adrepsit tamen necessaria dormitionis hora, extinctum est lumen, & pauida Virgo primum soporem vix libans quas chirothecas induerat pyrothecas sentire, cepit, videbantur sartæ mulcibero, nec videbantur solum, sed reipsa vrebant, torrebant, assabant vtramq; manum. Adstupuit nouo huic frixorio inexperta Rosa, gaudebatq; adesse licentiam qua manus tormento tam noxio eximeret. Exemit, viditq; luculentas è chirothecis promicare flammæ; his deniq; totum collucere cubiculum, imminere palam incendium: at ijs procul abiectis mox ardor,

flamma,

flamma, cruciatus euanuit, & Rosa miræ suauitatis refrigerio cœlitus perfusa dulcissimè conquieuit. Mane facto crudeles chirothecas Matri placidissimè restituens totam rei seriem candore simplici exposuit, manus fibratim am-
 bustas ostendit, ac ne deinceps ad huiusmodi reuocaretur supplicia obnixè rogauit. Verùm incredula Mater dum-
 pium hic Filix commentum suspicatur, curiosius vtramq; inspexit manum, quas vt reuera pustulatas, vstulatas, tor-
 ridas comperit, vt contrectauit, demum adtremuit, desijtq; in posterum Filiam obedientissimam ad eadẽ incendia durius inuitare.

Verùm tamen induciæ fu erunt istæ, non sincera pax, nam Mater ad alias artes breui conuersa nunc tentare Filiam, vt puellari vsu se comeret, vt collo monilia, brachijs armil-
 las vultu cerussam pro more regionis admitteret, nunc in-
 stare seueriùs, vt saltim formosam (: qua tunc rutilabat adhuc) cæsariem erigeret calamistris, vt bysso, fimbrijs, cæteroq; cultu nonnihil sese ampullaret, fuco ac lini-
 mentis roseam oris pulchritudinem gratiosè accenderet, gestu, habitu illecebris natiui decoris iuuaret honestatem; demum obiurgare, percellere, cedere innocentem quòd rudis, incompta, & incompressa supino ac nimio mundi muliebris neglectu abiret à seculi genio, quòd infra cœ-
 qualium sortem vilissima singularitate descenderet, quòd spem opulenti splendorisq; matrimonij quòd ipsam natura formæq; præstantia vocabat vltro hypocrisi abiectionissima corrumpere, sordidèq; præfocaret. Sed Virgo memor
 propositi, ac suæ pulchritudinis obtundendæ quàm acuen-
 dæ sollicitior hæc omnia defixis humi oculis excipiebat inuieto silentio, & quotidianam hanc crambem vsu ac dis-
 simulatione surda concoquere assuescebat, quoadusq; vltima materni præcepti violentia decrat, cui refragari aut
 lentiùs parere æquale nefas putabat. Visum hoc Matri
 opportunum compendium quidquid vellet extorquendi;

proinde cum quadam vice obtrusisset Filiæ gestandam calanticam aureo sericoq; reticulo interfulgidam, vnà præceptum addidit, vt obediendi religionem iniiceret obliuiscaturæ. Hic Virgo inops subitanei consilij tantillam impetrauit dilationem, dum adiret Confessarium, cui anxie protestata est, nisi præceptum reuocaretur, se non posse non morem gerere Matri hoc gestamen imperanti, mallesse huic quantumuis exosi ornatus redimiculo suum illigare verticem, quàm resistendo soluere ius quo Matris obligabatur imperio; subuenit ergo cordatæ Virginis pietati simul ac nodo prudens Confessarius, ac Matrem è vestigio conueniens grauitè dehortatus est, cessaret tandem pretiosæ vanitatis inutili molestia tentare perplexam Filiam quam ab infantia Diuinus Spiritus præparauerat secretissimis instinctibus ad raram altioris sanctimonix sublimitatem. Extimuit Mater, sicq; & iste fluctus ne fluctuaret obedientia spontè detumuit.

Excogitauit tandem ingeniosa Virgo rationem idoneam, qua deinceps & Matris subfaret imperio, & nihominus reliquam de corporis sui cultu vexam redimeret. Itaq; tenerrimis blanditijs Genitricem obsedit, donec permissionem eliceret, qua decolorem rudemq; saccum ex obuia viliq; materia assumeret pro amictu, quod vestimenti genus nec immodestum est nec inusitatum foeminis, quæ à pompis & nuptijs alienæ sub simplicissimo cultu solitariam nituntur sectari deuotionem. Hoc itaq; castissimo schemate obarmavit se Rosa, vt illius præsidio à se longiùs repelleret omnem secularem muliebris ornatus vanitatem. Nec fefellit euentus, nam sub eiusmodi luteo nullaq; tinctura infecto corporis sui tegumento Rosa tutissimè latuit vsq; ad vigesimum ætatis annum, quo tandem ad Dominicanæ togæ candorem subleuata facile perrexit reliquas eludere pomposi luxûs insidias. Semel ergo sic abdicato exclusoq; mundo muliebri haud visum

Rosæ

Rosæ difficile , in ceteris quamquam arduis Parenti obedire . Vnicum huius paradigma dabo , vnde coniiciatur de reliquis .

Canta in Regno Peruano locus est metalli fodinis percelebris, at putris soli exhalationibus , & algore tetro admodum insalubris . Huc iussa Rosa cum parentibus secesserat , nec multò post noxijs illis frigoribus impar cepit in manibus, ac pedibus dira neruorum attractione laborare . Mater vim morbi præsentissimo (: vt putabat) remedio depulsura quorundam animalium illic frequentium hispidas pelliculas arctè circumposuit patienti Filiæ , sed addito iussu ne iniussa illas à se reuelleret , aut quoquo modo submoueret .

Quatriduum effluxerat , quando applicitæ curæ recordata Mater silentem Filiam interrogauit quì valeret , quidue egisset de pellium inuolucris ? respondit ægra , se quidem nihilo meliùs ac antè valere , pelles autem ita vt Mater adstrinxerat , immotas adhuc sibi adhærere . Mirata simplicitatem parens dum pelliculas dimouet , videt harum mordaci ardore pustulatim Virginis carnem vesicatam, accensam, & turgidis vndiq; tuberculis vlceratam . Tum verò attonita , vt quid (: inquit) tot dies noctesq; exegisti sub his cruciatibus , nec abiecisti pelles quæ sic te excarnificabant ? replicuit morigera Filia: & nonne discretè vetueras Mater , ne illas absq; tuo nutu deponerem ? obediui .

Aliquando Mater exploratura tam accuratè obediëntie prinitatem mandauit Filiæ , quòd sericos flores , quos tunc fortè pingebat acu , præpostero florum ductu formaret contra omnem artis idæam rectumq; ordinem . Paruit Rosa , obliquauit opus , flores absoluit . Tum Mater velut substomachans , eya inquit non flores sed monstrorum florum . Quid egisti ? itane oscitasti somnolenta dum has ineptias tam deformes tua imperita segnities abortiret ?

buc

cui

cui illa respondit mitissimè, pariter quidè & sibi quamquā indoctæ visum fuisse talem pingendi modum oppidò peregrinum ac deuium, nec tamen ausam aliter quàm Mater præscripserat acum filumq; ducere, aut proprio arbitratu conari in aduersa, sese nihilominus esse paratissimam sue-
re ac dissuere quacumq; iuberet Mater.

Quoties sibi per diem ad nendi, suendi, texendiue labores redeundum erat, numquam è serinio semper è manu parentis acum, fila, colum ceteraq; opificio necessaria demissè postulabat, credens id deberi filiali Matris reuerentiæ. At hæc importunitatem rata, interdum cum bile, ac nausea reiciebat filiam ad muliebris officinæ domesticum armarium, vociferans tot interpellationibus opus non esse, familiaris officij instrumenta vltro patere foeminis laboraturis. Cui Rosa, malebam (: inquebat) obsequij debito adiungere lucrum explicitæ obedientiæ, & materni respectus humile tributum vnà cum penso dependere. Tanti nimirum faciebat etiam leuiores parendi occasiones.

Triennio circiter ante felicem Rosæ obitum contigit, eam ab Illustri Matrona D. Maria de Vfatégui consorte Regij Quæstoris D. Gundisalui de la Massa è paterno domicilio inuitari ad suarum Aedium gratuitum contubernium. Obtemperauit Virgo, quia parentes iuebant, imò vt Gundisaluus & vxori in omnibus morigeram se exhiberet imperabant. Hic igitur non mutata sed duplicata fuit obediendi occasio, siquidem humilis Rosa paterno tecto at non subiectione exemptam se reputans qua promptitudine domi propriæ eadem alienæ parebat, nec solum mandatis Gundisaluï aut vxoris, sed ad nutum quoque filiarum, domesticæq; familiæ, vsq; ad infima domûs mancipia. Huius insigne specimen habes infra cap. 5. §. *Testatur*. Vbi leges Rosam in ipso mortis articulo morigeram Gundisaluos.

Sed longè mirabilior obedientia vltra mortem. Post Virginis obitum ancillula in Limensi S. Catarinæ Monasterio argenteum cochlear per incuriam perdiderat. Fundatrix eadēq; Cænobij tunc Præfecta iusserat omnes perquiri angulos, excuti scrinia, lustrari singula, sicubi amissum pignus inueniretur; quæsitum vbiq; & diu, geminatur cum quæstione anxietas, turbantur omnia, inuentum nihil. Neq; iam de argento sed de fama cruciabatur sollicitudo, nam periculum erat ne qua innocens temerè infurti suspicionem veniret. Itaq; Præfecta Lucia de SS. Trinitate ad pendulam illic Rosæ iam defunctæ imaginem conuersa, sub ingenti cogitationum tumultu erupit in hæc verba: audito Rosæ benedicta, tibi ego præcipio sub illa obedientia quæ mihi in hoc Cænobio debetur ab omnibus, faxis inueniatur argentum quod perdidimus, in sancta veritate protestor tibi ò Rosæ, tuum erit hanc curam suscipere, vt præstò sit cochlear dum à vesperis redeo. Rediit, quæsiuit circumspexit, & ecce cochlear propalam in mensa cellulæ vbi decies fuerat quæsitum. Nempe de obedientia Rosæ iam prædefunctæ remanserat, tam celebris apud omnes conceptus, tam alta præsumptio, vt crederetur, vel post mortem obeditura superiori cui numquam in vita subfuerat, videbaturq; sat esse ad imperium, quòd sua illic hospitabatur imago.

Ex his quilibet facillimè æstimârit, quàm accuratè suis Confessarijs obtemperarit Rosæ adhuc mortalis, nam ex quo vestem S. P. Dominici assumpserat, ab ore suorum Patrum spiritualium pendebat tota, & quidquid hi vel obiter innuissent, id Virgini nō mādaturum sed cœlestæ oraculum videbatur. Quondam post lachrymarum proluxa diluua capitis exinanitione languebat non sine discrimine, nec tamen solitis moderabatur vigilijs; admonitus Confessarius mandauit, à media saltem nocte horas omnino quatuor somno tribueret. Conabatur ad amissim parere

rêre Virgo, sed aliter assueta præscriptum horæ punctum seu dormiendo seu euigilando attingere non potuit, idq; fat fuit vt vehementi scrupulo torqueretur, velut rea violatæ obedientiæ. Notarunt hunc Rosæ spiritum domestici, & quotiescumq; roganda erat vt fomenta suo corpusculo admitteret, aut requiem captaret, aliaue se ratione sineret indulgentiùs haberi, subiiciebant ita mandasse Confessarium, statimq; Rosa sine replica planè infantiliter obediebat.

Sed redeamus ad Matrem. Quòd Rosa bibendi vices in triduum aut quadriduum differre sit solita, ex eo patuit, quòd legem sibimet indixerat, dum parentibus cohabitabat, numquam bibere nisi quoties veniam rogata Mater expressè annuisset, quodsi licentia in experimentum virtutis negabatur, plerùmq; in aliud triduum fraudabat sitim, non priùs bibitura quàm Mater annueret: imò & quæsta est, ab ea sibi hanc veniam non crebriùs denegari.

Porro reliquam ipsius erga parentes obseruantiam, amorem, pietatem nulla satis capit historia: quàm sollicita iugiter faterget vt genitorum suorum inopiæ provide-
ret ex labore suarum manuum, quàm officiosa vt iisdem, ex morbo decubuis ministraret, adlisteret, pharmaca ceteraq; necessaria compararet, quàm deniq; attenta ac sedula, vt domesticas illorum præuerteret offensas, placaret animos, mitigaret afflictiones, singulę propemodum testantur paginæ in iurato Processu. Quæstor Gundisaluus (: de quo supra, & frequentius infra) tacitus mirabatur exhaustam viribus Rosam, ac diurnis operibus extremè lassam nihilominus in mediam vsq; noctem labori manum insistere: Quæstoris coniux, vt semel infirmam vidit fatiscere, totòq; latere imbecillem ac stupidam vix trahendo spiritui sufficere, grauitè hortata est, labanti corpusculo tunc saltem ab ijs laboribus tantillum vacationis indulgeret. Reposuit operosa Virgo, se parentum suorum
neces-

necessitatibus absq; scrupulo deesse non posse . Mirabilius est , quòd Ludouica Vrtado de Bustamante vidua Bartholomæi Alphonfi de Lombrera vexilliferi affeuerat in Processu , Rosam tot Sanctis exercitijs interdium noctuq; districtam , tot affatim morbis impeditam , tot supernis raptibus crebrò absorptam , vnico tamen die tot laborum pensa solitam absoluerè , quot alia quæuis etiam celerissima ac peritissima vix integro quadriduo absoluisset : & ne putemus ob tantam festinæ Rosæ velocitatem (:vt fit) hiulca , manca , imperfecta prodijisse opera , affirmat præ alijs testis LXVIII. illa singula tam consummata fuisse perfectionis, elegantiae, curæ, vt plerumq; metas humanæ artis & industriæ viderentur excedere .

Neq; hic stetit anxius amor ac sollicitudo filiae conantis omni ingenio parentū egestatem subleuare . In dome stico horto areolas discreuerat fatiuis violis cura sua manūq; excolendis, quas simul vt maturuissent, fasciculatim collectas ancillæ dabat vñum exponendas; lucellum qualecumq; illud Matri afferebat . Interrogata aliquando à Viro religioso (: teste XXI.) quantum commodi suis parentibus ex tenui isto flosculorum mercimonio accederet, respondit, illud quidem permodicum esse, nī Sponsus cœlestis aliundè miris at arcanis modis suppleret .

Si quando Patrem aut matrem deiecisset corporis agritudo , nil Filiae antiquius nil sanctius nil solemnius erat quàm sepositis omnibus decumbenti seruire , medicinas conquirere, suis manibus parare, inferre, bolatimq; porrigere esculenta , refrigeria adaptare , applicare lenitiua . Tunc noctes transigebat insomnes, affidebat lectulo, stratum componebat , agebat omnia , præteribat nihil quod solatium adferre posset . Interim precibus, gemitibus, suspirijs pulsabat ad Cœli fores; neq; incassum . At hoc commodius miraculorum historiæ referuetur . Vnicum istud singularissimæ pietatis erga Matrem & extremæ commise-

rationis specimen fileri hîc minimè debet. In ultimo vitæ iam iam fugiētis articulo Rosa dolentem Genitricem iuxta se conspicata, neq; ignara quàm immahiter hanc examinaturus esset proximus ex Filiæ morte dolor, rogauit Sponsum, (: isq; vltimus precantis anhelitus fuit :) Matrem immodico mœrori imparem ac facile succubituram robusto firmaret solatio, adq; fatalem hunc ictum miseram obduraret suauipotenti manu. Factum est ac abundantius quidem, quàm moribundæ Filiæ sollicita pietas flagitârat: simul enim vt Virgo spiritum reddidit, Matrem supernè tanta solatiorum diluuiâ inundarunt, vt sub iuramento fassâ sit, diu cor suum capiendæ huic dulcedini angustum laborasse sub quadam tempestate gaudiorum, ac velut pectoris intersepta perrupturum anhelis subsultasse tripudijs, ita quòd in eodem Rosæ morientis conclau

quærendus sibi fuerit secretior angulus, in quo liberius sub tantæ lætitiæ suauissima diuulsione

palpitans respiraret. Cum verò in vicinum

inde cubiculum vocaretur siue à cada-

ueris tristi dimouenda spectaculo, si-

ue vt cum alijs videret Aloysiam

tunc fortè rigentem in extasi,

ire distulit, ne angulum suum

tanti iubili conscium præ-

maturè desereret.

Numquam sanè

officiosissi-

ma

Rosæ pietas aut solici-

tius aut lautius re-

fecit Ma-

trem.

C A P V T IV.

Rosa B. Catarinæ Senensis vesti-
gijs ad sequelam prouocata
tertium S P Dominici Or-
dinem amplectitur.

Variæ ac sine numero sunt viæ, anfractus, itinera, quibus Aeterna Sapientia selectas animas in sublimæ perfectionis cacumen facit eluctari. At eidem placuit electam Rosam de S. Maria peculiariter per Seraphicæ Catarinæ compendia ducere; quando vel maximè humana prudentia (: plerùmque in idonea Spirituum ponderatrix :) importunè Virginem ad alias vocationum semitas diuertere conabatur.

In primis haud absurda spe tumida Mater iam à teneris filiolum nobili atque honestissimo connubio destinârat: nec abludebant proposito egregia formæ venustas, acre iudicium, suauitas erectæ indolis, moresque ad omnem ciuitatis gratiam apprimè tum facti tum eruditi. Ex aduerso credebat innocens Rosa, tempestiuo (: de quo supra) capillorum excidio, ut quondam S. Catarina de Senis, amputasse spem Matris ac nuptiarum tendiculas, nec segniùs interea pergebat sui vultûs roseum decorem ieiunijs deterere, eximiam corporis habitudinem sacco pannofo deformare, publicos conspectûs fugere, & ne hominum placeret obtutibus domi latere, adeo quòd toto illo quadriennio quo cum parentibus in *Canta* morabatur, nec pedem ultra domicilij limen extulerit, nec vicinum deliciarum.

hortum videre dignata fuerit, nisi quòd semel dumtaxat ibidem ad inuisendas Indicarum operarum molas iussa fuit Matronarum Filias comitari; quò vt peruénit, vnico semper angulo immota confedit, nullo abrepta famosæ curiositatis spectaculo. Verùm ne sic quidem effugere, sat potuit, quin complures tum celebri virtutis opinione, tum pudici vultûs maiestate in sui admirationem, mox & honesti thalami ambitum inuita accenderet. In his Matrona quædam genere & opibus clara vni Filio suo Rosam coniugem sibi nurum vehementer optabat, utiq; felici commercio plus bonorum adeptura quàm datura cum hærede Filio Placuit vtrimq; tam lauta conditio, præsertim quòd Rosæ parentes vt facultatibus tenues, ita graues erant multitudine prolium, nam xi. numerabantur. Solus deerat consensus Virginis, quam voti sui memorem omnis mentio nuptiarum exanimabat, nec tamen impedimentum quo lubens-volens tenebatur, austeræ Matri audebat detegere. Inde quos quantosq; insultus, quæ domestica prælia, probra, conuicia à parente, fratribus, agnatis sustinuerit æquanimis at inermis Filia, nemo ad viuum propius aut comprehendit aut æstimârit, quàm quisquis ad S. Catarinæ Senensis historiam respexerit, vbi Lapæ Mater tenacem propositi Virginem inclementer obiurgat, premit, exagitat, nisi quòd in Rosam vltra verba etiam verbera, calces, alapæ sænierint. Præualuit tamen apud constantissimam puellam idæa Seraphicæ Magistræ suæ (: ita Virginem Senensem appellare consueuerat :) quam à teneris elegerat statu, habitu, moribus imitandam, prout disertè in Processu testis LXVIII. asseuerat.

Videbantur in hoc vnum conspirasse omnia, ne Rosam Tertiariarum assequeretur habitum, quem tot votis ambiebat, tot suspirijs, tanto lachrymarum sumptu licitabatur. Nam ecce alia oblata est religiosi instituti via, quæ quidem Rosæ displicere neuiquam potuisset, nisi vnicè ad

S. Cata-

S. Catarinæ Senensis alta vestigia fuisset coelitus destinata. Consurgebat illis diebus Limæ nouellum S. Claræ Monasterium, totius sanctitatis, rigoris atq; obseruantię Sacramentum, auspicante Illustriss. D. Maria de Quiñones, cui auunculus erat ille-ipse famigeratissimus Dei seruus Limensium Archiepiscopus tunc superstes, D. Turibius Alphonsus Mogreuejo, de quo supra, neq; huius incomparabilis Viri admiranda Sanctitas, Pastoralis zelus, numerosa miracula ignorantur Romæ in Sacro Rituum Senatu, vbi de illius apothecosi pridem ac strenuè agitur. His inquam auspiciis formabatur recens Monasterium, & vltro inuitabatur velut ad dignissimum tali flore Plantarium Rosam inter primas eiusdem fundatrices nominatim electa, censa, approbata. Quod vbi certius rescituit, ante omnia fategit explorare Diuinæ voluntatis beneplacitum, suæq; vocationis mysterium supremo Arbitro cernua commendauit, non recusans pro asylo suæ virginitatis & coquo sibi strictioris vitæ desiderio arctissimam oblatis Cænobij clausuram arduumq; viuendi genus amplecti; maximè quòd experimentis iam didicerat vix aliter se importunas procorum molestias, parentum, fratrum, domesticorum adsultum, mundi, immundi conspectum posse euadere. Sed en arcanum coelestis prouidentię ! obstaculum à Matre fuit. Putabatur hæc prima omnium consensura, siue ob tanti Archiepiscopi reuerentiam, siue quòd onusta prolibus Filiam sine dote posset decentissimè accommodare. Obstitit tamen, causata domus inopiam, quam Rosa manuum labore sustentabat. Obstabat simul ætate morbisq; fatiscens auia, cui decumbenti vnica à fomentis erat, assiduq; ministerio. Obstabant demum alia, prouidente Numine, quod florido S. P. Dominici viridario hanc Rosam incomparabilem per tot ambages reseruabat.

Hoc vt magis innotesceret, binis è Coelo prodigijs opus fuit; primum hoc ordine euēnit. Qui Rosam viderant
adeo

adeò cœlestium auidam, adeò spiritalibus exercitijs, solitudini, macerationi corporis addictam, & seculi pertasam, suadebant idemtidem alicuius Monasterij ingressum quo liberiùs vacaret Deo . Idem probauere demum Confessarij, vrserunt Viri graues & spirituum magisterio spectabiles , quorum concordia iudicio vt suum Rosa humiliter submitteret, conscia & annuente auia successum tentauit per germanum fratrem, Diuino interim (: vt supra) arbitrio se remittens . Iam in SS. Incarnationis Monasterio, (: quod sub regula S. P. Augustini militat :) à Sanctimonialibus Rosam exoptantibus admissionem locumq; inter-nuncia fratris industria impetrârat, nilq; decrat, quàm vt relicta paterna domo clam sine pompa ac strepitu ad Cænobium rectâ pergeret valuis patulis admittenda , candidisq; ibidem lilijs interferenda . Ergo proximâ Dominica die ad pium hoc sui furtum electa in viam se conijcit, vnico germano suo lætissimi itineris assumpto comite , ac ponè iuxta S. Dominici vicinam Ecclesiam transiens in eam diuertit cum fratre, vt illic in Diuæ Virginis Sacello (: cui à Rosario nomen & cultus est) maternam Augustissimæ Deiparentis benedictionem , velut opportunum suæ profectionis viaticum præsumeret, exinde reliquum viæ alacriùs decursura . Caterùm vix ad orationem humi genua fixerat , cum sensit pauimento sese immobiliter acclauatam . Sic hærentem & yltra conditum morosius cunctantem interpellauit frater, eundi tempus esse, longiori orationi commodius in Monasterio spatium fore . At Rosa, quòd loco-mouere se neutiquam posset erubescens, vnâq; dissimulans tentabat subinde, si quo modo se tanti prodigij secretissimo retinaculo explicaret . Interea bis , ter ab Ecclesiæ porta reuersus frater cunctantem increpuit, moræ periculum exaggerauit, surgere conanti brachium subiecit : conijuntur ambo , sed in cassum . Rupem dixisses adnatam solo, aut ingentem plumbi massam, nulla trochlearum

learum vi attollendam. Intellēxit Rosa mysterium, nempe ex decreto celestis Sponsi non esse quod ipsa populofissimi illius Monasterij optato receptaculo furtim sese abderet, aliud de genere sui instituti prouisū esse in secreto Aeternitatis consilio, deniq; summa rei erat quod solius Catarinæ Senensis vestigia Rosam exspectabant spinis sepiendam. Igitur vt erat immobilis, ad S. Rosarij clementissimam Reginam conuersa, promitto inquit Tibi, me rectā ad Matrem hinc redituram, ædesq; paternas quoad iusseris habituram pro Asceterio. Mirum dictu! repente quæ plumbum fuerat, se plumam sensit, nemine adminiculante surrexit, domum repetijt, Matri ingenuē rem vt erat detexit, proq; monastica aliud clausuræ genus (:quod cap.X. referetur) de consensu parentis adinuenit.

Alterum prodigium. Limanus ager vt psittacos ita papiliones gignit colorum varietate ac elegantia planè mirabiles, vt ferè de vtriusq; gloria hi cum illis certare videntur. Fortè Rosa in Seraphicæ Magistræ suæ bicolori habitu attentius defixa secum de capeffendo Dominicani Ordinis amictu deliberabat anceps, cum ex ijs papilionibus vnus solo nigro alboq; colore pulcherrimè striatus leni sed minimè fortuito allapsu Virginem festiuē circumuolauit, illa confestim rapta in mentis excessum perspicuē intellexit quod animo dudum agitārat, nempe Diuinum id esse responsum de tertio habitu Prædicatorij ordinis tandem assumendo.

Nec fefellit euentus iam securam, nam paulò post obstaculis vndiq; submotis facta est voti compos, inq; Rosariano Deiparæ Sacello vbi quondam immobilis hæserat, solemni ceremonia de manibus P. Magistri F. Alphonsi Velasquez Ord. Præd. sui tunc Confessarij (:cui id P. Prouincialis commiserat:) induta est veste bicolori quam in Senensi Magistra dilexerat. Contigit hoc anno salutis MDCVI. ipsa S. Laurentij Martyris festiua die, cui haud
absur-

absurdè aptaueris illud Tibulli: *lib. 2. Eleg. 6. At Laurus bona signa dedit, gaudete . . .* Sanè gauisa est Rosa, vt se vidit circūamictā varietate, cūq; Laurétio nouis ardebat ignibus, liquecebat in dulci iubilo, nouaq; Tertiaria reputabat se plus quàm nomine *Beatam*; Nimirum cū infante creuerat hoc desiderii, siquidè à quinto suæ ætatis anno S. *Catarinæ Senensi* iam sese addixerat, quod ex ore ipsiusmet Rosæ affirmant se percepisse testes. II. & XXII. in cit. sæpius Processu. Vbi verò Seraphicam eiusdem vitæ historiam domi per capitula legi audiuit, attentissima tamquàm soli legeretur sibi, medullitus se sensit inflammarī ad sequelam, non quietura, donec & foris in habitu, & intus in fimbrijs aureis tantæ heroinæ ac Magistræ discipula conformaretur.

Verùm si Rosæ perarduum fuit vigesimo demum ætatis anno per tot obstacula eluctari ad Sacrum habitum, vix minori lucta ipsi constitit, eundem vsq; ad mortem retinere. Retinuit tamen, quamquam variè tentata vt alium assumeret: neq; enim cessabat humana prudentia Diuini ignara consilij diuersa suadere, offerre, ingerere quasi meliora ac digniora. Ex his duo referam quæ victrici eius constantiæ validius incubuerunt.

Quæstor Gundisaluus, vir optimus, quiq; apud Virginem sibi concreditam valebat autoritate imò & domestico imperio, seu sponte seu aliundè inductus fuggerebat reformatam Sacri Carmeli Regulam quam Rosæ genio credebat aptius conuenire, instabat utiq; decentius in celebri Excalceatarum Virginum parthenone quàm foris inter vltimas Tertiarias militaturam Deo, vacaturam spiritui, inhæsuram contemplationi. Quod autem idonea careret dote, replicabat Quæstor, se curam hanc totam sibi deposcere, acturum se omnia, vt à religiosissimo Monasterio haud grauatè admitteretur. Robustus hic fuit aries ad pulsanda Rosæ præcordia, maximè quòd ipsa quoq;

Mater

Mater cui res angusta domi contenta iam erat, pluriumq; seruorum Dei conspirabant arbitria. Rosa tametsi vocationis suæ tenax & certa, noluit tamen aut cerebrosa videri, aut palam tot peritissimorum beneuola iudicia immodesto supercilio aspernari. Itaq; vt aliàs vsa ingenio, selectis ex Ordine Prædicatorum quatuor præstantissimis Theologis rem permisit examini, pollicita id amplecti quod ipsorum potiora suffragia diffinirent; vtpotè secura, Deum non permissurum, quòd consonis horum calculis euocaretur ab humilioris instituti electa semita, quam Seraphica Magistra de Senis felicissimè præcalcârat. Voto respondit euentus, nam operante Numine supradictus Theologorum quaternio paribus vtrinq; votis pependit semper immobilis, stupuitq; neutri partium occurrere pondus quo sese à tam constanti æquilibrio tandem explicarent. Vicit ergo constantia Virginis, quæ exinde fidentior Gundisaluum aliosq; suasores modesto ac graui responso interpellauit; se quidem reffloridis oblatis Carmeli desertis mirificè & capi & affici, verùmtamen solius Diuinæ non humanæ inspirationis proprium id opus ac munus esse, Spiritum vbi vult spirare, aptam regularis statutum electionem tum commutationem non esse volentis neq; currentis sed miserentis Dei, sibi deniq; alios supernè impulsus non obtigisse hætenus præter eos quos habitu protestabatur, viuendum sibi moriendumq; esse sub charo S. Catarinæ Senensis schemate ac magisterio, adfore tamen aliquando tempus, quo huius nominis atq; instituti nouum Limæ exsurgat Monasterium, at nondum se scire, num forsitan illi diuinitus sit reseruata. Certè dignus erat hac Rosa Carmelus, digna Carmelo Rosa, nisi hanc Ordini hortulano Rosarij altior zephyrus commendasset.

Eliso igitur hoc ariete superfuit alius, at omnium importunior quia subtilior, nam per ipsos humilitatis cuniculos infernè adactus quatiebat Rosam vnius commotio-

ne scrupuli, qua patuit via cogitationi pauidissimæ, nimirum se sordidam peccatricem illo niueo Senensis Catari-
 næ velamento nimis indignam esse, plùs eo vestis candore promitti foris quàm latèret intus, vni sibi deesse omnia
 quæ extimo nitori probè respondeant, proinde habitum,
 qui Seraphicæ Magistræ fuerat protestatiuum virtutis ac
 religionis symbolum, in se nonnisi laruam esse publicūq;
 vsurpatæ sanctimonix mendacium. Duplicabat angorem,
 quòd alba vestis humano plausui videbatur ansam adi-
 tumq; vltro concedere, nam Virgo gliscentem sui nomi-
 nis celebritatem auersata dolebat ex candido indumento
 ab alijs fœminis internosci in publico, eminus se venien-
 tem monstrari digitis, notari oculis, laudari à prætereun-
 tibus, ipsiq; S. Catarinæ Senensi nonnumquam ab obui-
 js comparari. Tormenta hæc erant, quæ Sacram illi ve-
 stem reddere exosam poterant, ac primò verecundè oc-
 cultandam deniq; & seponendam suggerebant, vsq;-adeo
 vt suum familiare asylum (: facellum dico SS. Rosarij, in
 quo Rosa habitū assumpserat:) cursim adierit quasi denuo
 illic firmitate immobili radicāda, solitoq; Magnæ Deiparæ
 præsidio tentationem molestissimam depulsura. Euēnit vt
 sperauerat; nam ad Aræ crepidinem defixis humi genibus
 inter orandum placidissimo animi deliquio sensim dirigit.
 Notarunt precantis vultum circumstantes eiusdem tertij
 habitūs Sorores, videruntq; Rosam à Sacræ Imaginis ob-
 tutu supplici diu pendulam initio quidem exalbescere
 pallore niueo, post interuallum decora suffusione rubesce-
 re, deniq; tota facie lucescere ac scintillatim radiare.
 Coniectarunt subitò quod erat, permagnum aliquid acti-
 tari, velut sub iride Rosarij, cuius mysteria triplici hac tin-
 ctura distinguuntur. Et verè sic erat, nam Rosa sibi ac ge-
 nuino vultūs colorī demum reddita erupit in iubilum vi-
 ctoriæ: *Eya inquit Sorores, laudandus est nobis Deus, qui nps*
Tertiarias communi solida charitatis vinculo sibi dignatur
adstrin-

gere ac perpetim sociare . Obscurum ænigma perfacile capiebant, quotquot præiij conflictus conscia fuerant . At Virgini pœana hæc erant debellatæ tentationis, quam ita fregit vt numquam redierit .

Tanto constitit victrici Rosæ candidum Seraphicæ Catarinae habitum & obtinere & retinere constantissimè . Porro quàm plenè cum illo Magistræ suæ virtutes induerit (: quamquàm id seqq. Capitibus reponamus :) ad coronidem huius Capituli vnicum id argumentum esto, quòd semel tacitè spectanti mirantiq; Confessario visa fuerit Rosa specie, vultu, lineamentis sic transformata, vt viua similitudine ipsissimam S. Catarinae Senensis effigiem referret.

C A P V T V.

Rosa præiacto solidæ Humilitatis
fundamento secure inædificat
reliquarum virtutum molem.

IN suo Nihilo cominus ac penitissimè agnoscēdo quàm profundè iugiterq; Rosa perstiterit occupata, omnis humillimæ suæ vitæ clamat actio . Pauca hic è plurimis compendio substringemus . Parùm ei videbatur, quòd domi Filiam se oblita ancillæ domesticæ vilissima quæq; ministeria occupabat, nisi & infra ancillam sese dmitteret. Mariana quædam seruiebat in Rosæ paternis ædibus, Inda genere, agrestis conditione. Hanc sæpius in secreta domûs parte orauit, exorauit, adegit Rosa, vt se deiectâ humi nunc pronâ nunc supinam calcaret pedibus, ac velut contemptibile peripsēma studiosè plantis detereret : quin flagitabat

superaddi sputa, calces, verbera, nihilq; omitti quod extremi contemptus saperet vilitatem. Quòd si Mariana conabatur parcere, aut nonnisi obiter imperata exequi, acrius instabat supplex Rosa, nec nisi voti compos humo se attollebat. Quotiescumq; ob singularitatem vitæ à fratribus aut Matre proscindebatur iniurijs, credebat se ijs imò & decuplò grauioribus tam dignam esse, vt etiam vltro quæ sibi imputabantur ad culpam, soleret in maius attollere, suumq; reatum amplificare, ne præter aut vltra meritum videretur affligi ac despici, quæ tantopere ambiebat vbiq; succumbere & conculcari.

Assueuerat morborum suorum (: quos in ægro exhaustoq; corpusculo sustinuit crebros, & sæuissimos) celare magnitudinem, ne quis subueniret. At quando præ nimio aut cōuulsionū laniatu, aut per symptomatū periculosam violentiam dissimulari non poterant, ingenuè quantis distabesceret cruciatibus fatebatur, at ea dumtaxat spe verborumq; artificio, vt ex dolorum suorum immanitate, æstimarent homines quàm foret Rosa coram Deo enormis ac fœda peccatrix, quæ videlicet assiduè tot scelerum iustissimis vindicijs ab irato Numine meruisset flagellari. Hoc de se credebat ipsa, hoc itidem credi ab alijs peranxiè cupiebat.

Inde est, quòd sæpiùs coram intimis ac familiaribus suis timida frequentabat huiusmodi voces: mirari se, cur Deus nondum horribili abyssò demerferit infelicem Mundum qui tantam ferebat peccatricem. Item, suis demeritis illum apud Inferos deberi locum, qui omnium sit infimus & summè infamis. Vilissimum se terræ pondus, abominabile generis humani carcinoma, purulentam sentinam ac fœcem esse, indignam cui luceant Cœli, cui aspires aer, cui tellus dorsum substernat, suo contagio inquinari elementa, suis piaculis grauari solum, amarescere Oceanum. Quoties improspere quidpiam aut domi aut foris
accide-

accideret, non dubitabat suis id imputare delictis; cūq; tā ferio ista & sētiret & diceret, ferre nō poterat, quod eius innocentiae gnari talia credere recusarent; grauius dolebat si replicarent, ex mera humilitate similia dici; his regerebat, utiq; sibi quae sola se nosset fidem habendam esse. Verū si eò procederent, ut refellendis huiuscemodi vituperijs encomia Rosae laudesq; opponerent, expauescebat misera, ac velut fulminis ictu perculsa tremebat, pallore, silentio; gemitu maestissimè protestans se torqueri.

Accidit quod Gundisaluū Quæstorem Michael Garzes Canonicus familiariter domi suae inuiseret; hīc ille inter amica ut sit colloquia delapsus ad varia coepit narrare perfunctoriè, quae Rosae (: tunc ijsdem ædibus cohabitantis :) mirabilem vitae sanctimoniam, castigationem corporis, operumq; & morum præstantiam commendabant. Fortè de proximo conclauī hanc inuita percipiebat Rosa, confabulationem, sed laudum suarum nauseam non ferens exiliit præ dolore, inq; cubiculum interius ubi filiola Quæstoris Michaela erat, sese proripuit; ibi mox liberrimo eiulatu ac lachrymis suam amarissimè sortem incusans verberabat innoxium pectus, despuebat laudationis suae cramben, caligabat pudore sui, utq; cruciatum cruciatu simul pelleret & vindicaret, pugnum crebrius impegit capiti ubi densioribus aculeis spinea corona (: de qua infra cap. VIII.) tempora clam obsederat. Quae sic vulnerabatur ex laudum molestia, qua putas animi iucunditate exceperit contemptum, probra, conuicia? Sed pergamus.

Quoddam perarduum heroicæ virtutis opus ad S. Catharinæ Senensis imitationem Rosa tentauerat, perfecerat, quod cum ipsius valetudini summè noxium & exitiale crederet Domina Isabella Mexia, horrore pio stimulata, P. Magistrum F. Alphonsum Velasquez Confessarium, Virginis admonuit, ut acerba reprehensione factum velut excessum temerarium improbaret, ac Rosam à similibus

ultra

vltra vires tentandis abstergeret. Increpuit ille Virginem, vtpotè nondum ex circumstantijs tunc assequēs, quid laudis illa potiùs meruisset. Verùm humilis Rosa velut culpam in opere sanctissimo agnosceret veniam deprecata, spondit emendationem, lata ibi se obiurgari, vbi maximè plausum vanamq; gloriam metuerat.

Quandocumq; ad Confessariorum pedes in suimet accusationem procumbebat, ita mox obruebatur lachrymis, interpolabatur singultibus, dehiscerebat profundis ex imo corde suspirijs, vt credidisses nonnisi enormium flagitiorum ream esse quæ sic plangebatur. Comparebat velut altera in Ciuitate peccatrix, verecundabatur, tundeat præcordia, trepidabat quasi iam-iam erebi ritu absorbenda; nec tamen in tanto humillimæ contritionis apparatu sufficiens materia semper adfuit in quam tutò proferri posset Sacramentalis absolutionis sententia. Certè hoc postea vno ore facti sunt Confessarij, pluries laborandum sibi fuisse, vt in tanta innocentissime vitæ puritate scrutando reperirent quod ad poenitentiae forum certò spectaret. Et contra non segniùs laborabat Rosa, vt minimos quosq; defectus in immensum exaggeraret, serioq; ploratu ac gemitu posceret medicinam. Neq; his contenta, præter frequentes in hebdomada exomologeses insuper quotidianam sibi coram S. P. suo Dominico indixerat Confessionem, qua velut in Capitulo correctionis eidem culpas suas minutim exponebat, veniamq; & remedium ab eius suffragio humiliter postulabat.

Testabatur Gundisalui Quæstoris vxor D. Maria Vfatigui, quòd eius in ædibus dum triennium vixit Rosa, adeò sese omnium reputârit infimam, vt non soli Patrifamilias & Coniugi, sed tenellis quoq; filiabus, imò seruis, ancillis, mancipijs domesticis subiecta ad nutum, singulorum æquè placita velut imperia exceperit, fauorem arbitrata, si quid sibi ceu precariò in domum receptæ heriliter mādabatur, vnde

vnde & pro modico aquæ haustu flexis poplitibus à Gundisaluo (: si fortè aderat) libandi facultatem sibi exorabat. Grandia sunt ac prolixa quæ circa mansuetissimam Rosæ humilitatem notauit edixitq; Gundisalui domus, sufficiat hoc postremum. Decumbebat agoni proxima, cum in ultimo vitæ suæ horario quadrante offertur ei pro conformatione cordis pretiosus liquor sorbendus è cyatho; negauit ægra se posse: verùm audito quòd ipse Paterfamilias iusserat, se subditam recordata paruit, sumpsit, exhausit, tenui voce adijiens: ite nūciate Gundisaluo Domino meo, me quod reuera non poteram, ipso iubente potuisse, nec in ipsa mortis ianua me fore immemorem quid hero suo debeat subdita. Qua verò animi demissione tunc ad circumstantes conuersa petiuerit condonari sibi quidquid forsitan in eam domum aut familiam seu prauo exemplo, seu tetricis ac inofficios moribus deliquisset, longiorem exigeret periodum, nisi ad reliqua foret properandum.

Diu nesciuit Rosa, quidquam vel minimum in se reliquum esse quod laudi patèret, aut pulchrum æstimari posset, donec foemina quædam obiter manus Virginis conspicata (: vt est muliebre ingenium ad similia lynceum & insigniter oculatum:) commendauit in ijs candorem, decentiam, proportionem. Exhorruit Virgo ad improuisam tantilli præconij vanitatem, arreptaq; viuæ calce cruciabiliter manum vtramq; deformauit, vsque dum ardore mordacissimo pellis vndiq; finderetur in rugas, bullulisq; sparsim tumesceret, eo quidem dolore ac damno, vt per dies 30. & ampliùs vestire se ipsam Rosa nequierit, vnde ancilla Mariana in opem sibi aduocanda fuit: hæc verò post Virginis obitum rem totam vt gesta fuerat manifestauit, quam Rosæ humilitas (:vt alia maiora & plurima:) de more occultasset.

Pridem studuerat humilis Virgo omni arte nativam speciosissimi vultus sui gratiam abolere, ne qua posset mortali-

tali-

talibus oculis placere, idq; non solum iugi inedia dirisq; macerationibus, sed & aqua gelida creberrimè toti corpori superfusa videbatur iam affecuta, dum in exangui facie, præter obscurum pallorem & maciem cauernosam nihil conspicuum apparebat. Verùm vt comperit, his paulatim indicijs omnem austeritatem suorum ieiuniorum à curiosis deprehendi, æstimari, extolli, plus sibi à vanæ gloriæ laudumq; tinea quàm ab eximiæ formæ præstantia timendum rata cõfugit ad solitum orationis præsidium, anxijsq; precibus impetrauit à Deo talem sibi aptari vultum, qui saltim abstinentiæ suæ rigores ac tot ieiuniorum extima signa mortalium oculis non venditaret. Mirum dictu. Mox redijt genis detritis viuidus color, reddita faciei corpulentior plenitudo, fronti nitor, luminibus vigor, vt prope modum iurari potuisset, Rosam quid sit ieiunium penitus ignorare.

Inde lepidum obuênit quibusdam Argis per otium curiosis, qui in feria sexta Parasceues fortè in Templi vestibulo confabulantes obseruauerant Rosam cum Matre domum ab Ecclesia redeuntem. Transfegerat Virgo totam illam Quadragesimam solo pane & aqua, sed præsertim illis hebdomadæ Sanctæ postremis diebus vix micatim aliquid cibi admiserat: insuper à summo manè præcedentis feriæ V. (: cui nomen à Cœna Domini:) continuò vsq; ad istius feriæ VI. meridiem immota perstiterat in eodem S. Dominici Templo, vigiliis agens coram Sacrosancta Hostia tunc de more in S. Sepulchri arculam solemniter illata, nec bolum aut aquæ guttulam toto illo. 30. circiter horarum interuallo sumpserat. Dum igitur supradicti congerrones inde ad proprias ædes cum matre redeuntem vident roseo vultu instar auroræ subuiuidam, aspectuq; vegetam, amœnam, & minimè decolorem, temerè suspicati sunt, Virginem venire ab epulis ac lautitie, sonoreq; ac liberè in prætereuntem iocati, en (inquiunt) monialem
opipa-

rè habitam, en quàm splendide proficitur vultu, se cupidij ab aliquo dapsiliter hodie refectam! Siccine ieiunant Beatæ! Displicuit Matri ineptissimæ censuræ temeraria di-
cacitas: at mirè placuit humili Rosæ sic sua latère ieiunia,
etiam vsq; ad tam ridiculam saginæ ac ingluuiei calumniâ:
Aculeus erat qui Rosam non læderet sed oblectaret.

Par ei sollicitudo & cura fuit abscondendi reliquos suo-
rum charismatum thesauros ne humanis laudibus patêrēt
in prædam. Hinc factum est, quòd pleraq; illustria eius
opera, visiones, & arcanæ Spiritus deliciæ sic delituerint
sub taciturnæ humilitatis abstruso inumbraculo, vt Matris,
Sodalium, Confessariorum assidua sagacitas vix ad pauco-
rum notitiam potuerit vniquam penetrare. Quædam Spi-
ritu ac religione apprimè celebris persona flagrabat anno-
so desiderio penitus Diuinæ gratiæ magnalia explorandi
quæ in Rosæ prato celari iam ex toto non poterant. Itaq;
omni alio catoscopio desperato Virginis Confessarium au-
toritate qua valebat induxit; vt ipse per anfractuosa quæ-
stionis obliquas ambages si quæ posset vel ab inuita eli-
ceret. Diu recusauit; diu cunctatus est Confessarius, haud
ignarus quàm sibi id arduum futurum esset. Tandem op-
portunitate seu facta seu arrepta testis interrogationibus
eminus circumiuit Virginem, at ipsa quò illæ tendebant
eelerrimè prægressa occupauit indaginem, hisq; mitissimis
verbis abruptit molestiam: scito (: inquit) mi Pater, me
vsq; à teneris ardentè orasse Deum, ne sinat ulli mortali-
um innotescere si quid altissima sua Misericordia cœpe-
rit forsan intra animulæ meæ penetralia dignanter opera-
ri. Annuit voto meo Inspector cordium, proinde cessas
scrutari, nec inutili conatu me teq; lassaueris; secreti hu-
ius beneficium quia concessit Dominus non auferat mini-
ster. Nihilominus vbi semel iterumue sub graui onere
conscientiæ tum à Confessarijs tum à Doctore Ioanne de
Castillo (: vt infra Cap. 12.) Spiritus examini subiecta

fuit, grandia ac miranda detexit quia debuit : attamen ultra interrogata ne quid responderet, cautelam, & parsimoniam verbis suis appendit in trutina. Vnde quæ tunc verè recundè inuita aperuit perpauca ac penè vulgaria crediderim, si conferantur ijs quæ Rosa sub Diuino Secreti beneficio ac humilitatis sigillo retinuit obfignata.

Fauit mirabiliter huic virtuti Deipara humilium idæa, siquidem ipsamet adiunxit Rosam instrumenta suæ mortificationis humiliter occultantem. Res ita se habuit. Ecclesiam S. Dominici de more precatura adierat, cum illic existentem subita consternauit recordatio vnius ex varijs instrumentis domando corpusculo adaptatis quod ipsa domi fortuitò reliquerat loco patulo vbi facile ab aliquo domesticorum absentis cubiculum ingressuro videri poterat. Expalluit confusa Virgo, timens hoc indicio deprehensum iri, quantum exercitijs poenitentiae soleret incumbere. Confestim igitur ad Virginem Matrem obsecrando conuersa rogauit anxie, periculo succurreret, ipsumq; instrumentum in altero locorum quos ipsa mente designabat recondere. Statim euanuit metus, abscessit pauor, & Rosa ab oratione domum regressa instrumentum suum reperit non vbi reliquerat, sed vbi illud à Matre Gratiae recondi flagitarat.

Tantam eius humilitatem indiuulsè comitabatur suauissima mansuetudo, placida affabilitas, mite supercilium; mirati sunt quotquot eam nouerant, numquam ab illius ore excidisse verbum duriusculum, obstreperum, criticum, numquam auditum sermonem iactantiae, fastus, ostentationis, nihil in moribus aut motibus apparuisse tetricum vel subtriste quod acida saperet austeritatem. Tota serena, comis, benigna, de se nesciebat altum sapere, sed tantum subijci omni humanæ creaturæ. Negasset Rosam esse quæ adeò carebat spinis, at sustine, nam in semetipsam tota spinosa fuit, quod ex varia corporis sui castigatione proxima. 4. Capitula fusè docebunt. CA-

CAP V T VI.

Rosæ mira abſtinentia, prodigioſi
ieiuniorum exceſſus.

Fundamento tam profundo, lato, ac ſolido dignum fuit ac tutum, prægrandia, excelsa, ponderoſa ſuperſtrui faſtigia. Sanè vim narrationis tranſcendunt quæ de Roſæ ieiunijs ieiunè ſatis innotuerunt, nam vt diximus, latent plurima. Hoc ſummariè conſtat, Virginem per S. Catharinæ Senenſis veſtigia gradatim abſtinendi, ieiunandique uſum fermè ad ipſum uſq; inedia culmen mirabiliter pro-
duxiſſe. Suo ordine diſpiciamus ſingula.

Nondum infantix pannos & annos pupula exceſſerat, eum ſibi (: quod illi ætatu læ peregrinum & graue eſt) omni fructuum eſu interdixit. Sæpe obſtupuit attenta Mater, paruulam ſuam nulla talium cupedarum aut ſuaui-
tate aut varia pulchritudine capi, nam fructus ſibi datos mox alijs donabat, numquam vel primis labellis admo-
uebat. Sexennis feria IV. VI. & Sabbatho (nî Mater aut Medicus ad aliud cogerent) omni prorsus abſtinebat ob-
ſonio, nil præter panem & aquam deguſtans. Anno æta-
tis quintodecimo votum emiſit, toto vitæ ſuæ decurſu ab-
ſtinendi à carnibus, quoad permetterent ij quibus obedi-
re teneretur. Hoc in tenera puella canæ prudentiæ mo-
deramen fuit, quo ſic corpusculo ſuo detractum voluit vt
ſimul alieno in ſe iuratq; imperio nil detraheret. Inter-
rim cautæ filiolæ ingenioſa non deſuere ſtrategemata qui-
bus Matri diu occuleret hunc ſeuere abſtinentiæ teno-
rem, ne ab ipſa valentioribus edulijs veſci cogeretur. In-
terdum nobiles Matronæ deuotionis ergo Matrem cum

Filia in suas ædes inuitabant, epuloq; sobriè instructo rogitabant vtramq; secum vnà accumbere. Durissimum id erat frugali Rosæ quam vel odor carniū offendebat. Sed parentis Matronis quàm Filia complacendi studiofior iubebat hanc omnino carnibus vesci ne inurbana singularitate adstrictioris parsimoniae videretur Mensæ honorem profanare. Parebat mæsta Filia, sed maximo inasueti stomachi supplicio, nam quidquid carniū reluctanti ingererat, paulò post captato secretiori angulo totum superne reddendum erat non sine miserabili cruciatu. Quòd si aliquando æger ventriculus buccellam exosam nulla vi potuisset eluctari, paroxysmus erat in foribus, ac nauseantem ardentissima febris inuadebat. Nec mitiori successu obediēbat Medicis, si quando aut languentem aut lentius conualescentem tentabant esu carniū ad vires pristinas reuocare; tantum enim aberat isthoc genere alimenti iuuari infirmam, vt etiam à bolo velut à toxico recidiua magis debilitaretur, morboq; redintegrato non ægra sed ægritudo vires acciperet. Semel ex morbo sat ancipiti emerferat, vtq; citius instauraretur, ex præscripto Medici pauxillum carnis pauenti eius stomacho obtruserant, cum ecce repentina totius corporis lassitudo, mox tremor & deliquium prostrauit miseram, subitumq; pectori ac pulmonibus asthma incubuit, pressit, ac respirandi facultatem interclusit. Vix pluribus horis hac sese angustia Virgo explicuit, ac per aliquot dies nec passum progredi nec plantis consistere potuit, donec restituta sibi consuetae abstinentiae potestate sensim & ipsa restitueretur sibi. Iam penè conualuerat, & denuo inuitam ad carnis ferculum compulerunt: denuo item rediere prædicta symptomata, nec remedium nisi ab vsitato panis & aquæ pastu superfuit.

Laborabat frequenti ischiade, ac plerumq; ea dolorum vehementia, quæ stomachi fundum euerteret. Sub hoc

tormento integros quandoq; cum noctibus dies sine cibo transigebat: verum sedato nonnihil cruciatu mox instabat domesticorum pietas vt è carnibus iusculum admitteret. Ipsa hoc vrbaniſſimè recusato potiùs deposcebat familiarem sibi adferri dapem, panem & aquam; his allatis velut pollucibiliter deliciatura panis medullam intingebat frigida, eâq; sumpta post modicum surgebat è lecto quasi refecta satisq; opiparè recreata. Quæstor Gundisaluus domi suæ bis terue hoc medicamine non anaretico sed planè anachoretico vidit Rosam conualescere, protestans nequiquam se capere, vnde huic ieiunio vis nutriendi inesset.

Ibidem alia vice obseruatis in Virgine manifestæ debilitatis nimijs indicijs voluit idem Paterfamilias, quòd ex ala coctæ auiculæ quid modicum sumeret quo labentem stomachum nonnihil erigeret. Rosa tot iam edocta malis attamen vrgenti conabatur obtemperare. Vix bolum glutuerat, cum præsaga periculi comiter mensam reliquit; in vicinum conclauis Oratorium se proripuit, valuas ad duxit; cumq; de more sub seram noctem pallidula inde prodisset, Quæstori & Coniugi subtrepidè fassa est, minimum abfuisse quin exiguum id quod ex auicula gustauerat morte lueret, præ dira pectoris obstructione quæ miseram prope suffocarat.

Impulerunt cruda hæc experimenta commiserantem Quæstorem, vt Virginis Confessarios, Medicos, parentes; sigillatim ac penè adiuratò obsecrauerit, ne deinceps imperato carniū esu Rosam in vitæ discrimen adductam vellent, sufficere tot euentuum tragica specimina in testimonium promptæ vltra vires obedientiæ, crudele ac Deo palam ingratum fore quidquid vlteriùs tentaretur ad oppugnandam Rosæ abſtinentiam, à qua tam perspicuè illius vita pendebat. Audebat & Rosa sub tali aduocato liberius præoccupare Medicos ne quam sanam vellent, car-

nium

nium edendarum obiectu trucidarent, imò & alia quæcumq; vegetioris succi esculenta se admissuram negabat, ita visum esse Numini, cui ipsæmet naturæ leges famulantur ad nutum. Alludebat forsitan supernæ quam recolebat visioni, qua Christus increpanti blandienti q; medius Rosam docuerat, velle se ab ipsa tam rigidis abstinentiæ exercitijs constanter honorari, sibi illius vitam ac valetudinem curæ cordi q; fore, nec diffidendum, quin ille qui pro ea suam in Cruce vitam prodegerat, qui extrema fusi preciosissimi sanguinis gutta ipsam tã carò emerat, qui in eius animam tot Gratiæ thesauros tantamq; cœlestium donorum opulentiam congefferat, demum & terreno suo corpusculo id præstiturus sit, iamq; præstiterit, quo carnis edulio carere possit.) Ergo cedat Aesculapius, quiescite o Medici, nam Diuinum est mysterium hoc quod cernitis.

Tardiùs Matri persuasum fuit, vt Filix tam seueram tenuissimi victûs ratione formamq; æquanimiter indulgeret. Quoties aut nimiam in exangui vultu maciem, aut vires infra mediocritatem deiectas notabat, vnâ hanc rigidâ castigatissimæ parsimoniæ dixtam instar atroçis delicti vocabat in crimen, vociferabatur impatiens, ac penè illismet quibus olim in S. Catarinam Senensem Lapa Mater, tonabat verbis, singularem, obstipam, ac sui ipsius carnificem proclamitans. Cumq; nec sic proficeret, imperiosa præcepit, quotidie secum deinceps accumberet communi mensæ cum familia, visura demum, quid quantumq; manducaret. Vicissim à parente Filia supples impetrauit, saltem ea sibi permitti ac parari fercula quæ non modò ingerere sed & digerere posset. His vltro citroq; velut ex pacto mutuo constitutis prudens Filia culinariam ancillam Marianam suarum partium fecit. Huic dextrè ac sub fide silentij extorsit, vt sibi in singula prandia solam pararet offam ex panis frustis & herbarum pugillo, at sine sale & condimento, simplici aqua decoctam, pauculis dumtaxat

vuis passis nonnumquam inspersis, vt Matri in singulos bolos attentæ videretur genialiter obsonare ac dulciter, vbi rarus bolum augebat acinus. Sed diuersissimum erat quod reipsa gerebatur, nam herbæ quas sibi Virgo in pastum singulari cura selegerat, amarissimæ erant, & agresti saporis malignitate torquebant palatum. His delicijs mulcebat gustum, quibus ne simile condimentum abesset, persæpe cineres admiscebat.

Audierat in vicina sylua pronasci herbam insigniter præ ceteris amaram: hanc sibi clam adferri, ex ea deinceps insipidum pulmentarium sibi iussit apparari, & ne tam exquisitæ prouisionis annona deficeret, herbam eandem suo hortulo implantauit, suis manibus sollicitè coluit, persuadens Matri, valere in vsum medicinæ. Semel curiosa Parens in horti sepimento vasculum reperit felle veruecino plenum; statimq; suspicata id quod erat, Filiam interrogauit, cur eo loci id abscondisset, aut cui bono? Rosa deprehensam se videns simpliciter respondit illo se vti ad offulam suam inspergendam. Egregium sanè stimulandæ orexi proritamentum. Innotuit postea (: reuelante ancilla Mariana) Rosam omni ferè diluculo quo Sacra Synaxi reficienda non erat, austero hoc fellis promulsidario in Dominicæ Passionis memoriam os totum imbuerere solitâ. Præcipuè tamen sextis ferijs velut ex acetosa spongia cum Christo in Cruce pransura ex eodem felle & panis crustula sibi componebat electuarium mordaci aceto & copiosis lachrymis stillatim superfusis; suo idiomate *Gaspachos* appellitabat hoc genus embammatis quia frigidum sumebatur. Deficiente fellis copia succedebant in vicem folia quædam amarissimi fruticis quorum sucu & masticatione Christi in morte sitibundi hyssopum malè iurulentum, faucia cogitatione recolebat.

Fruticat in illo occiduarum Indiarum fertili tractu plânta mirabilis, *Granadilla* vernaculis dicitur, Latinis rei tam serò

ferò visæ proprium adhuc deesse nomen crediderim, nisi quòd supplente periphrasi *Elorem Passionis* vocitet fidelis Europa. Hic mirifico naturæ lusu pleraq; Dominicæ mortis nostræq; redemptionis instrumenta velut in exigui proscenij compendium sese conspicuè explicant, nam inter foliola cruentis maculis venustè dispuncta assurgit columbula flagellati Dei statumen, huic infernè spinea corona circumiacet, supernè tres clavi infixi prominent, foliorum ambitum quasi filatim pendula flagella interstinguunt, medium sinum aceruatim implent granula eximij saporis. Itaq; Rosæ in cibum placuerunt huius benedicti floris non grana quia dulcia, sed pampini quia amarissimi: his decoratis vesceretur libentiùs, quòd & succi amaritudine & floribus sui cognatione aptiùs Parasceuen quàm prandium repræsentarent.

Transseundum nunc ad ieiunia, tametsi dubitari haud immeritò possit, ab ipsa esurie an à talibus cibis durius esse tormentum potuerit. Monuere, qui de Rosæ virtutibus post obitum solemniter testificati sunt, duplex ieiuniorum ei fuisse genus, ynum commune quo semel in die pertenuem panis & aquæ libabat refectiunculam at non nisi sub noctem; alterum verò appellabat suum, quo per totum diem noctemq; penitus gustabat nihil. Primum, tametsi prope quotidianum esset, præsertim vltimis vitæ annis quos in Gundisalui Quæstoris ædibus consummauit, peculiare tamen quotannis ad normam Dominicani instituti septem illos continuos menses obseruabat, qui festo Exaltatæ S. Crucis & Paschati Resurrectionis interfluunt. Ordinis ieiunio consecrati. His igitur mensibus etiàm herbarum panisq; diminutione accuratiùs se macerabat, donec ineunte Quadragesima omnem sibi omnino subtraheret panem, solis malorum aureorum seminibus parcissimè victitans, nam ex ijs non vltra quinq; sumebat sextis feriis adiecto solo veruecini fellis haustu, vt hac lautitie quinq; plaga-

plagarum Christi acerbiter præsentius ruminaret. Residuo anni tempore panis mensuram tam sibi curtam indixerat, ut quod vnicæ diei sat esse credebatur, integro vix octiduo totum absumeret. Dum Rosa adhuc domi propriæ suum de quo infra Recluserium inhabitabat, Gundisalui Quæstoris vxor ei hebdomadatim mittebat rudioris panis octo placentulas, ut dietim vna ad minus necessario victui tota impenderetur. Sed euoluta septimana, ac superueniente totidem recentium panum demenso inueniebatur, Rosam ex octo panibus permodicis vnum dumtaxat cum dimidio per totam illam hebdomadam comedis, restitutis nimirum sex reliquis cum dimidio qui in penu superfuerant.

Nescio, ieiunium an planè *inediam* appellauero quod sequitur. Obseruatum fuit, Virginem cum pane vnico illoq; sat exiguo & aquæ vasculo integram dierum quinquagenam transēgisse absq; omni alio cibo aut potu nimirum à Paschate Resurrectionis vsq; ad Pentecosten. Item alio anno totam eiusdem quinquagenæ intercapedinem decurrit prorsus sine potu, ne guttulam aquæ forbens. Vbi verò Quæstoris eam domus contubernalem excepit, nil nouum fuit, si complures continuos dies absq; vllō omnino alimento transmittebat: plerumq; etiam feria V. solebat ibidem se domestico Oratorio includere, nec inde se mouere vsq; ad Sabbathum, ita quòd infra hoc triduum planè insomnis non modò carebat omni cibo potuq; corporali, verum etiam (: quod Quæstorem Gundisaluum maximè rapiebat in admirationem) toto illo tempore remanebat vni affixo angulo, ut neq; ad momentum pro quacumq; necessitate ab illo discederet. Nempe corpusculum ex inedia vacuum sustentabat pinguedo Spiritus, cui cœlestium meditatio sagina erat.

Aliquando Communicanti solæ species Sacramentales tantum roboris contulerunt, ut in fortitudine cibi illius

totò ostiduo nullum aliud nutrimentum admiserit. Semel extra consuetum tempus quid modicum sumere coacta, cum illud stomacho retinere non posset, reddidit, ac velut intemperantiæ rea seipsam decem dierum rigida inedia damnavit.

Deniq; vel in simplicis aquæ potu adinuenit, quo siue biberet siue abstineret, gustum fraudaret: nam vt faucium ardori leuamen ac refrigerium subtraheret, integras hebdomadas transigebat sine potu, bibitura verò non frigidâ sed calentem sorbebat lympham, metuens. in aqua subgelida tantillum inuenire deliciarum; Causam rogata, aliam dabat, nimirum hac ratione se mederi somnolentiæ, quam aquæ præsertim frigidæ haustus prouocaret. Alia minora præterire hic liceat, cum putem ista sufficere, vt de inimitabili huius Virginis frugalitate victûsq; parsimonia nil vulgare conijciatur.

Longè mirabilius fuit, quod notarunt domestici, Rosam plus viriû semper hausisse à ieiunijs & longa inedia quàm à cibo corporali; verum (: vt infra narrabimus :) etiam hoc ipsi cum Magistra sua S. Catarina Senensi commune fuit, quòd os famelicum vulnerato Christi lateri applicuerit, siquidem extra hunc fauorem & fauorem tam discipula quàm Magistra non nôrant aliud quo saturari possent.



C A P V T VII.

Rosa tenerum corpus cilicijs, flagris, catenis domat.

MIrum in arido totq; ieiunijs extenuato corpusculo superfuiffe locum qui flagella exciperet, sanguinẽ qui verbera sequeretur . Nihilominus Rosæ tantus inerat castigandi corporis ardor ac studium, vt ei per Confessarios modus fuerit imponendus . Initio, cum S. Catarinæ de Senis gestare cepisset habitum, non contenta vulgaribus funiculis, duas sibi catenas ferreas aptarat in flagrum, hisq; ad imitationem S. Patris sui Dominici per singulas noctes tam durè ac dirè sibi dorsum & scapulas cruentabat, vt riuus sanguinis in parietibus, in pauimento, in subligaculis fuerint notati . Credebat innocens Virgo se suis peccatis has debere vindicias . At præterea publicarum, misera calamitatum, satagebat his modis ad exemplar suæ Magistræ placare Numinis iram, mitigare iustitiam, vnde nunc pro ærumnis totius S. Matris Ecclesiæ, nunc pro angustijs periclitantis Reipublicæ cruentam sese victimam cadebat inclementissimè, vt clementiam impetraret, plagisq; plagas auerteret . Si qua aut Regno Peruano, aut Vrbi Limensi patriæ suæ flagella diuinitus imminebant, suis conabatur flagellis diuertere : nec animarum in purgatoriijs flammis bullientium immemor duplicabat ictus catenarum in noua cruoris profluvia quæ rogi partem extinguerent . Pari sumptu connitebatur Agonizantibus impetrare subsidia pro illo tanti momenti supremo momento à quo pender æternitas . Caterum pro culpis alienis, pro compensandis Peccatorum in Dei Maiestatem iniurijs, pro

eorumdem conuerſione ad frugem meliorem dici non potest quot flagellorum fulcis, quot vibicum liuoribus ſeipſam in dies exarârît, nesciebat ferias quotidianus ferendi labor & dolor, quem ſic diſpenſabat per diuerſas corporis partes, vt dum vnus plagis detumescendi & coaleſcendi dabantur vices, tranſiretur ad alteram, ab hac verò poſtridie reditus fieret ad priorem vix dum coalitam; porro hæc verberum alterna ſed cruda viciffitudo tantò diutius cruciabat, quantò acrior ſenſus inerat partibus pridie læſis. Aſſueuerant domeſtici (: quamquam inſcia Virgine) ex ædium parte ſecretiſſima per ſingulas noctes audire hos diſciplinæ iſtus, at ſemel vltra ſolitum cohortuerunt, dum Roſa nullo iam læſarum aut illæſarum partium diſcrimine vehementiùs ac diutiùs in ſe totam deſæuiebat plagarum ſtrepitu latè ſonoro. Occaſionem dederat popularis quædam in Limana Ciuitate turbatio leuibus (: vt aſſolet) orta principijs. Vir Apoſtolicus, ac Seraphici Ordinis iubar eximium Venerabilis P. F. Franciſcus Solanus in vita & poſt mortem conſtanti fama Sanctitatis ac prodigiorum gloria clarus, pro concione obſcuriùs fortè nonnulla protulerat, quæ Limenſium vulgus præuè intellecta detorſerat in ſenſum prorsus alienum. Hinc ſubitus pauor totam peruaſit Vrbem quaſi ex publico P. Solani vaticinio terræ hiatu proximè abſorbendam, quod tamen ille nec dixerat, nec ſomniarat. Roſa periculi admonita quo tum Sancti Viri celebre nomen tum marcentis Limæ nutabat tranquillitas, mœſta indoluit, noctemq; illam horriſonis flagris in ſua carne depurpurauit, vt proprij ſanguinis hoſtimento ſopiret communem populi ſui turbationem quæ cordatis periculoſior quocumq; terræ motu videbatur.

Magiſter F. Ioannes de Lorézana Confeſſarius Virginis cum hunc diſciplinæ rigorem imbecillitati corporis paulò æquiùs cenſuiſſet attemperandum, Roſa maximis ab-

eo pre-

eo precibus extorsit, quo saltem liceret sibi intra certum dierum spatium verbera quinquies mille sibi infligere quippe creditur esse numerus ictuum quos in sua crudeli flagellatione Christus excepit. Hac permissione obtenta æquè sollicita erat Rosa, ut eum numerum non transliret, quàm ut impleret. Siquidem ne transliret, nouam à Confessario permissionem toties exorabat, quoties aut aliqua proximorum necessitas, aut causa publica videbatur peculiarem ab ea succursum exigere. Ut autem impleret, obseruabat attentissimè quot diebus subinde ex infirmitate decumbens ab usu quotidianæ disciplinæ fuisset impedita, subductoq; diligenti calculo ubi conualuisset, ita in proximam dierum periodum diuidebat omissorum ictuum portiones, ut compensatione facta permissum numerum 5000. exactè adæquaret, nec segnè numerum præsentis dierum periodo tunc respondentem vnà absolueret. Pari obedientia suo Confessario adqueieuit, quando nimiam ferreæ catenæ atrocitatem in aliud ex filis contortum at nodosum asperumq; flagellum præcepit commutari, ut sui Ordinis communiori vsui humilius sese conformaret. Proinde Rosa ferreum hunc scapularum vomerem sanctiusne posuerit an sumpserit, in medio relinquo.

Porrò quàm auidè in pœnitentiæ exercitia propenderit Rosæ genius, iam inde fermè ab infantia serijs præludijs abundè ostenderat. Quadriennis erat, cum tenellos humeros (: quibus flagellandis tunc adhuc deerant rudi puellæ funiculi :) incepit vexare nunc crudorum laterum ponderibus, nunc grauis trunci onere, velut ex tunc conata baiulare Crucem post Christum sub infamis ligni molestia laborantem. Mariana ancilla domestica horum arcanorum sola aliquamdiù conscia, sola Virgini à secretis erat; hanc itaq; nunc in remotiorem horti angulum nunc in solarium domus seuocatam flexis humi geniculis precabatur, ut (: quod fuisset ipsa manibus tenella nondum poterat

poterat) humerulos suos vi laterum ibi sparsorum oneraret; sub ea mole , grauiq; obtritu durabat paruula in oratione proluxa & laboriosa; tandem innuebat ancilla, sine strepitu pondus auferret; ne fortè superueniens Mater furtiue deuotionis turbaret scenam, aditumq; similia iterandi præcluderet.

Alijs vicibus sub eodem silentio rogabat sibi grauari scapulam informi trabe, collectisq; exiguis viribus conabatur obnixa sufferre durissimam sarcinam dum præculas suas bene longas absolueret. Aestuabat impar oneri, gemebat, obluſtabatur, donec interdum victa premeretur vsq; ad solum. Rudimenta hæc erant seuerioris militiæ, quam ætas maturior vt promittebat animo sic corpori minabatur.

Nondum quartumdecimum annum egressa fuerat, cum notari cœpit inter alia pœnitentiæ opera, quod noctu perambulabat hortum nudipes imposita sibi oblonga Cruce, quam dum liuidis gestabat humeris, semetipsam crebris genuflexionibus terræ allidebat, amarissimam Caluarie viam a quis tum passibus tum suspirijs dimetiens; nec vlla malignantis auræ intemperies, non horrida obscuritas, non frigora, non turbines ventorum insuaues erant Virgini vndequaq; suo corpusculo quidquid incommodorum poterat accersenti.

Inhibitum ei fuerat (: vt supra attigimus) ne ampliùs ferream catenam in vsum flagelli adhiberet. Ipsa rem sic interpretata est, non vt omnino sibi catena parceret, sed tantum non caderet. Itaq; hanc lumbis suis triplicato circumductu fortissimè adstrinxit, extremis commissuræ anfulis seram immisit, clauiculam abdedit vbi recuperare nec ipsa posset. Occultissimum hoc erat tormenti genus, quodq; vel diù vel fortè semper latuisset vniuersos, nam Rosa vel ipsam operum suorum Secretariam Marianam huius insciam voluit, sed noluit Deus; vnde sic demum patuit:

patuit : Nocte concubia Rosam in strato acutissimus co-
 xendicum dolor inuaserat, sentiebat afflicta totum à cate-
 na malum esse, velut quæ per extrittam pellem hinc inde
 carni nervisq; profunda incumbibat, vnde renes & latera
 ferri alior in atrocissimi doloris consensum attraxerat.
 angebatur Rosa, quod se sola nec rumpere noxiam cate-
 nam, nec sine claue seram diffibulare poterat. Crescebat
 interim sub indissolubili vinculo atrox Ischiadis cruciatus
 qui demum inuitæ Rosæ post longos gemitus etiam mise-
 randos eiulatus extorsit. Euigilans Mariana prosiliit, agrâ
 subleuatura accessit, obsequium quodcumq; in rem foret
 obtulit, simulq; de morbo ac morbi causa perplexè inter-
 rogauit. Hic misera Virgo secretum suum prodere debuit,
 vt ab ancilla consilium modumq; exquireret, quo soluatur
 catena priusquam experrecta Mater in auxilium vtriq; ac-
 currat. Tentarunt ambæ quid possent, alternabat vices
 lucta & consultatio, sed neutri cedebat tenacis seræ firma
 contumacia. Meminerat ancilla, eiusmodi seras valida
 confusione nonnumquam aperiri, dum igitur abijt quæsi-
 tura saxum, anxia Rosa Matrem aut vocari aut sponte mox
 affore timens ad orationem confugit, quæ instar clauis &
 Coelum, & seram penetrauit. Mira res, cum saxo re-
 diens Mariana audit sonoro crepitu seram spôte diffilien-
 tem, laxatur sensim catena, diducitur, abstrahitur tota, sed
 passim auulsione opus fuit, quam cutis & cruor sequeba-
 tur. Hoc agone defuncta Rosa quietem repetijt vt eam-
 dem ancilla repeteret, ac manè facto velut nil graue passa
 ad consuetos labores properauit.

Vix laceratæ cutis vulnera coierant, quando Rosa ad
 suam catenam redijt, pristinoq; ferri tormento se rursus
 incinxit, donec tandem (: incertum quibus indicijs) rescui-
 uit Confessarius, qui continuò præcepit Virgini, catenam
 vt erat sine mora sibi transmitteret. Paruit illa, catenam
 denuo carni adnatam à lumbis reuulsit, pannoq; diligen-
 ter

ter vnâ cum fera obuolutam Sacristæ F. Blasio Martinez tradidit rectâ ad Confessarium deferendam. Sacrista ex pondere suspicatus aureos inesse torques aut pretiosa monilia, digressus à Virgine explicuit inuolucrum, ac dissimilimum auro thesaurum reperit, catenam recenti imbutam sanguine, quam frustillatim adhærescens caro & pellicula varijs locis conspicuè satis interpunxerat. Huius aliquot ansulæ seu circuli post Rosæ obitum apud D. Mariam de Vfatégui aliquamdiu asseruati mirabilem at omnibus peregrinam spirarunt suaueolentiam, testes nimirum pœnosi sudoris quem de Rosæ corpusculo imbiberant.

Neq; pulpæ brachiorum ab eiusmodi vinculis immunes erant, his enim Rosa ad cruciatum arcta quædam ligamina circumdederat quæ perpetim torquebant complicatos musculos, at tum vel maximè vexabant lacertos quoties aut aliquid de terra leuandum, aut brachia sursum extendenda erant. In his nexibus clam dolorosis meditabunda vinctum in horto Gethsemani Sponsum comitabatur ad ædes Caiphæ, Annæ, & Pilati. Nec adeo has alligaturas quamquam strictissimas pellis obduxerat, quin videre eas potuerit Mariana, quando medebatur laceris Rosæ scapulis, nam sæpè postulabatur hoc genus officij, eò quòd iugiter in Rosæ dorso patebant scissuræ, quibus ex interuallo iussa Mariana inspergebat ignotos pulueres, ne saniem conciperent, chartaq; bibula obducebat repetitis postridie tunsionibus renouandas. Porro dum brachia & lumbos vincula neruiq; arctabant, manipulatim vrticæ ac minutuli sentes morflu creberrimo vexabant pectus, axillas, latera, ne qua pars vacaret à cruciatu, dum fortè cilicium adhuc deerat præ inopia. Sic nempe Rosa in sentibus configurabat se lilio inter spinas.

Verùm vbi pro ingenti munere ditatam se vidit breui cilicio, quasi purpuram, byssum, trabeamue nacta, sibi suaq; tremulæ carni gratulabatur de nouo pœnitentiæ baltheo,

baltheo , rigoris paludamento . Initio quidem illud tametsi asperum, minùs tamen quàm Virgo optauerat, latum sinuosumq; videbatur , vtpote quod vix duorum palmarum mensuram excedebat . Sed paulò post aliud successit ex religiosæ personæ liberali dono, quod Rosam vndeque contentam reddidit . Manicatum hoc erat, atq; à collo & humeris infra genua propendebat; hispidum, ex crassioribus equorum setis prædensè contextum vix non lorice grauitatem æquabat . Ponderosa hæc asperitas vt suapte grossitie ferè implicabilis ita duritie implacabilis cuius robustiori poenitentix alumno sufficere potuisset ad summam austeritatem , nec tamen Rosæ sat fuit , nam infixis , vndiq; breuissimis acubus hirsutam interulam diligentius in se armauit . Herinaceum credidisses, non Rosam , Virgini tamen hæc rudissima Gausapina non tam cilicium, quàm abolla videbatur , eaq; per complures annos est vsa, donec ob frequentem sanguinis vomitum alieno coacta fuit imperio noxiam hanc exuere cataphractam .

Aliam tamen ipsa adinuenit castigandi corpusculi rationem quam priori clam substitueret, minori forsan valetudinis damno at nō leuiori molestia . Saccū villis crassissimis grauem sibi in formam indusij aptauerat , & ne posset deprehendi pilosa ruditas, extremis manicis carbassina integumenta obduxerat . Sub hoc pondere æstuabat, rigebat, lassabatur extenuata viribus Rosa, incessu nonnisi difficillimo gradum promouebat, & siue confederat, siue genua humi fixerat, ægrè se attollebat in pedes, poena erat quicumq; motus, languebant artus velut sub sarcina, sibiq; videbatur plumbeo magis quàm cannabaceo stromate subuculata . Infimæ dumtaxat pedum supererant plantæ , quas neq; cilicium nec disciplinæ verbera attingebant; nihilominus reperit sollicita carnis suæ domitrix, quo & illis propriam dispensaret cruciatuum portionem . Igitur quoties domi coquendis panibus accendebatur clibanus, præ-

fabat occasionem Rosa, nudatisq; plantis calcabat immorta summum fornacis orificium vbi vis ardoris vehementior erumpebat. Meditabatur illic sensu acerrimo diragehennæ incendia, quæ sibi deberi plus quàm serid autumabat. Sic demum à planta pedis vsq; ad verticem capitis nil ei residuum fuit quo voluntarios cruciatus exciperet.

His blandimentis Rosa demulcebat tenue illud corpusculum cui aliàs à crebris infirmitatibus sat pœnarum erat, vt infra suo loco videbitur, neq; animus illi deerat tentandi etiam his maiora, nî prudentes Confessarij vtuissent; qui idemtidem interposito moderaminis præcepto discretam virium rationem habendam occlamitabant. Sanè quàm corpori suo Rosa amica non fuerit, supremum hoc paradigma esto, quòd Virgo cautissima nec delicias Spiritûs vsq; ad corporis solatiû exundare sinebat. Per paucis Dei amicis id curæ fuisse legitur, de vnico Gregorio Lopez Mexicano id Rosa legerat, statimq; sibi imitandum sumpsit. Igitur vsq; ad hanc subtilissimam diuisionem carnis & Spiritus elegerat conformari Sponso crucifixo quatenus ille nec gloriam animæ in suum adhuc mortale corpus, nec gaudia partis superioris in inferiorem deriuari permisit ne passionem impediret. Sentiebat & Rosa ex mirifico cœlestium sapore ac prægustu suum dulcescere Spiritum, inebriari mentem, saginari animum, sed interim cauebat & (: quoad potuit) obstabat, ne in talium epularum quantulacumq; communionem aut sympathiam admitteretur miserum corpus, quod soli passioni & cruciatui destinarat: & si eam Rex introducebat in cellaria sua, ipsa suum corpus iubebat foris stare. Existimo rarum hoc diuortium sublimioribus Rosæ operibus posse accenseri.

CAPUT VIII.

51

Rosa capiti aculeatam coronam
circumdat, imprimit, infigit,

DEcebat charam B. Catarinae Senensis discipulam in Schola patientiae ad Magistræ suæ prototypum laudari. Mira hæc Sanctorum est ambitio, qua malunt Christi spineam quam auream coronam in huius vitæ exilio circumferre. At Rosæ præcipuè nec tutum nec decorum est, spineo carere sepimento. Verum ad rem.

In ipso adolescentiæ ac pueritiæ confinio Rosæ corculum acerbissimè compunxerat deuota ac tenerrima compassio ex auidissimo obtutu piæ imaginis quæ muto præconio clamitabat *Ecce homo*. Hærebat in illo plexili senticeto quod Christi verticem cruentè infederat, pudebat sub spinoso Capite se membrum videri delicatum. Itaque primam sibi tunc coronam (: de secunda ageretur paulò inferius :) ex ductili stanno complicit, quæ seu funium seu virgularum mutuo implexu contortarum spiram effigiebat. Huic per certa interualla nonnullos indiderat clauiculus introrsum præacutos, eoq; diademate clam sibi caput non sine vulnere obcingebat sub vittis victima coronata.

Annos complusculos durauit & induruit pia Virgo sub hoc oneroso capitis spineto, verum id nonnisi puerile fuit tyrocinium robustioris tormenti quod ex secunda corona aculeis nonaginta & nouem armata imminebat. Hanc posteriorem decimo circiter ante obitum anno, hoc est paulò post quam Dominicani Ordinis togam sumpserat, sibi imposuit, nec nisi cum vita deposuit; Nimirum ut cæperat

attētiùs contemplari spineam sui Redemptoris coronā in caput S. Catarinæ Senensis mirabiliter translata, minime sibi quiescendum duxit, nisi eandem pariter in suum inde verticem æmulatione qua posset religiosiori accerferet, nec sibi videbatur totum Seraphicæ Magistræ induisse habitum, nisi & spineam illius induisset coronam.

Nouo igitur ardore, ac patiendi desiderio lamellam argenteam sibi flexit in circulum, huic ab intus ex eodem metallo tres infixit aculeorum ordines, ita vt quælibet series triginta & tres contineret aculeos videlicet pro numero annorum Christi quos mortalis pro mortalibus expleuit in terra. Certè nil excogitari potuisset aut pro capitis (: vt appellant Medici :) *pia Matre* magis pium, aut *dura Matri* durius, nisi hanc duritiem ipsa pietas suggessisset. Porro ne capilli, qui post rescissionem breuiores succreuerant, profundiori obstarent aculeorum impressio, ad viam vsq; cutem nouacula crinem omnem submouerat, aliquid tamen inculti cincinni relictum in fronte quo corona interdum obtegeretur, vt Matrem latēret. Quāquam permodici huius capillamenti in sincipite residui alius quoq; vsus fuerit, ad noua dolorum incrementa. Verum de hoc in seq. capitulo, vbi ad Rosæ vigiliis transibit succincta narratio.

Dentatum hoc sertum quā dirè momorderit, quā cruciabiliter omni ex parte pupugerit velatum sacre puellæ caput, cui torquendo vnica sat fuisset acicula, ex eo fas est conijcere, quod spinæ non simul omnes, sed aliæ post alias binæ, ternæ, pluresue successione molestissima nudatam inuadebant cutem, proq; occasione ac varietate motuum singulæ obliquabantur in singulis vulnerum angustijs. Compertum est, sub hoc densissimo pungentis metalli vepreto ipsam loquelam Virgini fuisse dolorificā, quid si rursi concutiebatur pectus, si sternutatione exonerabatur miserum caput, aut alia fortius excreandi impor-

tuna necessitas vultum orisq; habitum violentius commouebat ?

Verùm hæc Rosæ ludicra videbantur & artis digna succursu , quo læuissent inclementius . Itaq; vbi Coronæ seu bractæ extrema coibant , decussatim tæbias innexuit , quarum attractu non solùm cohibebat cuspidatum hunc circulum, ne aut loco exerraret, aut sponte laxaretur , verùm etiam quoties lubebat dolorem intendere , tæbiarum capita strictius adducendo ipsi tormento suo vim faciebat: præcipuè verò sextis feriis placebat Virgini hoc pœnarũ epimetron in memoriam Sponsi sentibus coronati . Maluisset pro conformiori similitudine gestare coronam ex veris spinis agrestibus , eaq; de re seriò tractauerat cum Confessario , at is dissuasit, quòd vereretur facile sub putri aculeo grauem in Rosæ capitæ purulentiam posse succrescere . Adquieuit & ipsa , considerans eiusmodi coronam nec sub velo sat commodè celari posse, punctis sine ordine prominentibus , nimiumq; suo conciatui decedere , si non omnia vsq; ad vnum acumina introrsum vergerent . Idcirco lamella vtendum fuit , eaq; argentea, quòd & solidius adiaceret vulnerandæ cuti , & infixas spinulas tenaciùs retineret . Nec fefellit euentus , nam post Virgini obitum Aurifaber, cui iniunctum erat aliquot bracteolæ spinas euellere , (forsitan vt deuotis personis eas flagitantibus in donum vsumue cederent) adhibitis forcipibus adeo singulas inuenit firmas, vt extrahi nulla potuerit, quamquam ad ferri tractum huc illuc inflecterentur . Vt intelligas tam suas Rosæ patienti non cessisse spinas, quàm his non cessit illa .

Nec tamen contenta hoc quotidiano cruciatu modum reperit quo noua in dies vulnera aperiret; nam coronam manè circumdatura capiti numquam eodem figebat loco quo pridie steterat , sed mutato paulisper situ in aliam aliamq; partem transponebat redimiculum , vt alterna va-

riatio-

riatione immitiùs pungeret, atq; in intacto dolorem renouaret. Porro qualibet sexta feria hoc addebat in cumulum, vt vsq; ad auricularum cartilagine inumq; occiput coronam demitteret, quò tempora (: vbi caro mollior, sensusq; delicatior) prædensa stimulorum obsidio & molestiùs incingeret, & profundius sauciaret. Idem Sabbatho repetebat, compassura Virgini Matri, cuius animam in morte Filij doloris gladius peruaserat.

Diu familiares, domesticos, ipsamq; Matrem latuit hoc tam cruenti pectinis vepretum, quis enim sub vitta ac velo cautissimæ Virginis aut notasset aut quæsiuisset tam fennale supplicium? ipse Confessarius, qui Rosæ arcanum hoc poenitentiae genus permiserat (: nam citra illius nutum Virgo morigera nihil aggrediebatur vel minimum) obiter dumtaxat aculeati gestaminis conscius neq; coronam viderat, neq; vel tenui suspitione attigerat peregrinas inuentiones, quibus hanc Rosa in se consueuerat atrociùs irritare. Sed tandem Numinis providentia rem diutiùs occultari non fuit, effecitq; vt tantæ virtutis exemplum in plurium opportunam notitiam promanaret. Casus erat: germanum Rosæ fratrem ob puerile delictum Pater quærebat ad virgidemiam; interiecit se blandiusculè Rosa Patris iram propitiatura; is verò dum Filiam sibi obstantem impetuosè dimouet, fortuito manûs errore impexit leuiter in caput Virginis ea parte qua tecta corona sauebat: mox improuisum ictum tres sanguinis riui secuti frontem innocentis Filiæ decursim purpurarunt, manifestò satis indicio qualis herinaceus sub candido eius tegmine clam nidularetur. Hic Rosa magis se proditam quàm percussam dolens dupliciter erubuit, conata tamen dissimulare quod erat, cautè in secretius cubiculum se subduxit, coronam festina seposuit, cruorem quasi ludibunda absterfit, impositisq; panniculis qui fauciae plagæ stillicidium imbiberent, caput solitis velamentis confestim operuit.

operuit. Verum hac solerti fuga trepidam Matrem nec
 fefellit nec effugit; cum Mariana ancilla è vestigio Fi-
 liam secuta de vulnere interrogat, causam cur leui ex ta-
 ctu sanguis eruperit sciscitatur, deniq; excusante Rosa &
 ne quidquā deprecante suspicacior vittam solui, caput
 nudari imperat, quod vt vidit in orbem vndiq; immani-
 ter dispunctum, facile coniecit, vnde hæc signa tam
 cruento inessent zodiaco. Verum tamen siluit, haud igna-
 ra Filiam si spinetum suum prodere aut abijcere cogere-
 tur, facile alia & quidem longè truculentiora mox adin-
 uenturam, quibus verticem pergeret diuexare. Itaq; tunc
 velut inscia mysterij calente vino caput filix leniter ab-
 luit, quantum læsis partibus sat fore ad medelam aut cre-
 debat aut credere simulabat, aliud interim aduersus ip-
 sam coronam remedium excogitatura.

Nec mora: delata fuit rei series ad eum qui certiùs co-
 ronæ vsum Virgini prohiberet, nempe ad vnum ex Patri-
 bus spiritualibus quorum ductui Rosa obtemperabat. Is
 erat R. P. Ioannes de Villalobos Rector Limensis Colle-
 gij Societatis IESV, Vir sanctimonia ac religione celeberrimus,
 & animarum per tutiora compendia perfectionis
 deducendarum auriga peritissimus. Huic vt innotuit
 quod gestum erat, extemplò mandauit Rosæ, quidquid il-
 lud esset quo caput suum hætenus spinosè discrucianerat,
 sibi adferret. Attulit illa coronam suam, ne quidem tan-
 tillo sibi indulto spatio quo notas sanguinis inter cuspi-
 dum acumina satis abstergeret; Allatam prudens ac pius
 Pater non sine horrore & commiseratione intuitus rigi-
 diorem esse censuit, quàm quæ illi sexui ætatisq; teneritu-
 dini conueniret. Proinde rationibus adortus est Virginem,
 vt omnino seuerissimum crudelis instrumenti vsum dissua-
 deret. Illa aduertens ratione non imperio secum agi, suas
 vicissim rationes humiliter opposuit; demū in hoc vtrimq;
 conuentum est, quòd poscenti sua redderetur corona sed
 mitiga-

mitigata . Sicque prouidus ac discretus Pater arrepta
 lima hinc-inde prominentiores coronæ aculeos hebeta-
 uit , obtudit , defricuit , si non satis attamen nec parum
 hoc temperamento se putans affecutum . At Rosa pluris
 faciens coronam quàm Regnum gaudebat hanc se recu-
 perasse saluo spinarum numero , ac saltim non nisi modicè
 ea castigatione exarmatam . Igitur respexit denuo ad
 pristina dolorum supplementa , iamq; pœnoso taniarum
 attractui etiam hoc addebat , vt interdum illiso pugno
 coronam tunderet quò altiùs in caput penetraret ; neque
 enim diligens lima , sic detriuerat aculeos vt suo non
 fungerentur cruentandi officio . Patuit hoc vice quadam
 cum Rosa fortuito in terram lapsu caput leuiter ad vici-
 num pluteum impegit , vbi confestim ob coronam vertici
 validiùs impactam copiosus sanguis defluxit in humerum .

De Christi ferto spinco canit Ecclesia : *felix spina, cuius
 aculei vires frangunt regis tartarei* . Rosa nostra idipsum
 experiri meruit & in suo : nam quotiescumq; hostis tarta-
 reus appropinquabat Virgini suggesturus fœda ac fordi-
 da , alijs ad eum procul abigendum catapultis opus non
 fuit, quàm quòd vigil Rosa ter digito pulsaret suam coro-
 nam in SS. Triadis reuerentiam . Tympanum erat , cuius
 leui tactu perculsus Dæmon fuga turpissima declinabat
 certamen . Suauius, ac fortè mirabilius est, quod de huius
 coronæ virtute post obitum Virginis compertum est . Qui-
 dam religiosissimus Dei seruus paulò post elata Rosa ex-
 quias domum Gundisalui Quæstoris adierat , eo dumtaxat
 animo vt instrumenta quibus Rosa virgineam carnem vi-
 uens domuerat, deuotè contrectaret . Oblata ei cum anu-
 lo fuit corona spinis horrida, vixq; his manus applicuerat,
 cum repente æfluare cœpit inusitato quodam Diuini amo-
 ris incendio, colliquefcere in intimo fundo spiritûs, dulce-
 scere gustu admirabili supernarum deliciarum , tamquam
 ex illismet spinis Paradisi vuas , ex tribulis ficus colle-
 gisset

gisset in animæ palatum . Verum de hoc prodigio commodior redibit tractatio infra Cap. XI. cum de pronubo Rosæ anulo agendum erit : hîc sufficiat innuisse, quàm seriò ac festiuè Cœlum ipsum huic coronæ applausit, quando in honorem tam rigidæ compunctionis vincti-
nem distillauit tam suauem ac pretiosam . Non pigeat, hîc denuo reflectere oculos in spiniferum S. Catarinæ Senensis prototypon, quod Rosa nostra spinis coronata sic imitari visa est vt plenè id ipsum non tam expresserit quàm in se transtulerit . Paucis accipe huius rei notabile argumentum quod in Rosæ funere obseruatum est . Dum defunctæ cadauer prostabat in feretro, disposuerat cœlestis illa (: cui nihil fortuitum) Prouidentia, vt deesset florida corolla quæ de more caput virgineum circumdaret ; instabat hora funeris ad sepulturam efferendi, at videbantur fugisse terreni flores velut indigni qui Rosam coronarent iam cœlestem . Ergo in confusa illa trepidaq; hinc vrgentium inde cunctantium perplexitate recurrendum deniq; fuit (: non sine instinctu Numinis) ad coronatam S. Catarinæ Senensis imaginem, quam Rosam viueret ornare consueuerat ; huius itaq; sertum proprium omnibusq; publicè notum tantisper transfertur in Discipulam, sub hoc Rosa effertur Gundisalui domo ad tumulû, vt quæ viua Seraphicâ Magistrâ ad viuum expresserat gestamine senticoso, eamdē & mortua repræsenteret euidentius sub communi vtriq; corona . Probarunt factum quicumq; mysterium agnouerant, certi non ab humano studio sed necessitatis fortunato potiùs quàm fortuito consilio hoc singulare virtutis testimonium Virgini obtigisse .

Huc demum & illud videtur pertinere, quòd dum mortualis pompa sic Rosam coronabat in terris, ostento non absimili Beatorum curia eamdē coronauit in Cœlis ; vt vtrinq; deprehendatur successisse in ipsammet S. Catarinæ

Senensis coronam. Res ita innotuit : mox à felici Rosæ transitu persona quædam eximæ sanctitatis ac nominis in visione imaginaria conspexit inter Angelorum myriades gloriosam SS. Virginum cateruam rectâ gradientem ad thronum Sanctissimæ Trinitatis ; in medio agminis fulgebant Rosa palmam manu præferens , niueoq; candicans amictu , sed nondum ut reliquæ coronata , siquidem ad Diuini illius Throni crepidinem stabat Virgo Deipara , coruscantem in dextera coronam tenens, qua Rosam suis ipsa manibus inauguratura solemnem hanc Virginum processionem expectabat . Nimirum simillimo ritu olim S. Cararina Senensis excepta fuerat in Cœlis, cum reliquit terras , ut sic inter Magistram ac Discipulam à spinea usq; ad auream coronam nulla superesset difformitas . Felices spinæ , quibus de tali manu tale successit in Cœlis diadema .

C A P V T IX.

Rosæ lectulus , ceruical , nocturna Vigilæ.

Tanta ei corporis macerandi cura fuit, ut nec pauculas nocturnæ quietis horas tormento vacuas esse permiserit : hinc strati sui voluit eam esse duritiem quæ somnum abigeret magis quàm vocaret : quin & eò tandem processit ars atq; industria , ut qui dormitura lectulus idem & equuleus esset . Ita nimirum nec indulgebatur quidquam afflicto corpori, & demebatur somno quod orationi accederet . Suboluit tempestiuè attentæ Matri quò Filia tenderet, nam pene ab infantia utrumq; & durius

rius cubandi & austeritatem dissimulandi studium notarat in puella, vnde aliquamdiu hanc secum eodem in lectulo accubare iussit per noctem, vt arte artem deluderet. Paruit Rosa, sed eo ingenio quo nihilominus obediētiae ac poenitentiae merita in illomet lecto materno dexterimè coniungeret: vix enim obrepserat Matri sopor, cum Virgo culcitrae partem cui incubuerat sensim remouebat, donec substratae tabulae corpusculum exciperent, capiti verò liguum aut prope absconditus later cervicali subducto succederet. Idem S. Catherinae Senensi cum Lapa Matre certamen, idem strategema fuit. Leta successu Rosa pergebat securior non tantum nudare sibi tabulas quibus indormisceret, sed & rudius saxum circumspicere quod ceruici supponeret; verum post longas ambages tandem interrupit Filiae solertiam expergefada Mater, ac velut deprehenso immani facinore puellam increpuit, adiecto calidae obstinationis conuicio, si sic ei constitutum erat Matrem fallere, iret porro, sibiq; deinceps suoapte arbitrio lectum quem vellet contabularet, dum tamen capiti saltem humanius cervical concederet, ipsiq; tabulis vnicum simplicis straguli induceret operimentum.

Ad hanc vocem tripudiabat Rosae animus, maternam permissionem tametsi iurgio ac bile acidam pro dulci blâdimento arripuit, conditionem auida manu acceptauit, Matriq; pro tam liberali indulgentia gratias egit tenerrimas. Exinde mox conquisitis & in sui cubiculi capaci angulo compaginatis tabulis rude stragulum iniecit, bina insuper puluinaria in speciem imposuit, paruoq; labore grabatum vti genitrix permiserat absoluit. Verum quoties nox appetebat, remotis puluillis succedebat truncus vndiq; impolitus, ac lapilli in hunc vsum interdum sub lecto absconditi disponebantur sub stragulo, vt ea inaequalitate offenderetur corpus, cui praedura tabularum planities in delicijs fore timebatur. Quantum hæ scruporum sub stra-

gulo extantium distitæ cotes iacentem Rosam dispunxerint, facilis coniectura est, sanè in ipsis solidis asseribus conspicuè apparuerunt impastinata lapillorum vestigia, ipsæ tabulæ scrobiculatim hinc inde extritæ protestabantur satis, quàm molliter his incubuerit macilenta Rosa.

Ceterum lapilli sparsim ac mobilitè dispositi facile cedebant moli, quoties in aliud latus vertendum erat corpusculum. Igitur addenda videbantur tum duriora tum stabiliora in equulei supplementum. Nempe tria ligna, tortuosa, indolata, nodosa tabulis imposuit, ac inter commissuras tenuioribus paxillis firmavit sub stragulo ne cederent. Attamen per diem hosce truncos exemptiles seorsim occultabat sub thoro, ne Mater aut ex inæqualitate straguli hos deprehenderet, aut palam expositos traheret in legitimæ suspicionis argumentum. Vnica demum Mariana ancilla secreti conscia fuit, quam validis obtestationibus adegit Rosa ne proderet, & si cubiculum euerrendum esset, hæc ligna suo loco vel immota relinqueret, vel ætutum reponeret. Diu placuit feruèti Rosæ crudelis hæc supinæ torsionis catasta, placuissetq; diutius si fuisset atrocior, hoc est si acutiùs & omni ex parte sæuiisset, nam inter lignorum vacua spatia nil erat quod incubuam satis cruciaret.

Subijt ergo noua ac postrema lectuli dirissimè asperandi cogitatio. Tabulis arctè commissis ligna omnino septem instrauit iustis interuallis, quæ ne laxarentur, bubulis loris aptè distrinxit. Porro singulas distantium lignorum intercapedines præacutis regularum fragmentis, coetiliū patinarum frustulis, testarumq; fractarum triquetris sic impleuit, vt singulorum pars mucronata obuertetur corpori, ac ea, quidem confertissima densitate qua nutare aut cedere nulla posset, cum infernè sat prohiberent subiecti asseres ne quæ excideret, costasq; obsiderent ligna ne laxaretur phalanx. Quis credet videri deniq; potuisse dignum

dignum huiusmodi pratum in quo Rosa quiesceret? nec defuit strato tam nobili dignum ceruical; sed de hoc infra. Eidē coaptatę lodices, at cilicinę, setosę, instarq; subcer-
 niculi aut cribri, vt simul & ipsę pungerēt, & testarū pun-
 cturas non impedirent sed obiter absconderent. Insuper
 ad huius lectuli caput occultē ampullam felle plenam ap-
 penderat, nec ante ad somnum sese componebat, quā
 isthoc sorbillo amaricasset fauces, in memoriam Sponsi
 felle ac myrrha potati. Aliquando fassa est Rosa, in lectu-
 li sui aditu hoc felleū libamen sibi non adeo cum sumeret
 quā si citiūs euigilabat, fuisse molestissimum, tunc enim
 sentiebat palatum vsq; ad tonsillas & epiglottidē aruisse
 penitus, linguam prę siccitate vix non immobilem, gut-
 turis bronchos vndiq; accensos, ita quod siccatis fauci-
 bus supplicium esset ipsa respiratio. Proinde nil mirum,
 si (: quod postea innotuit) Rosam ceterā intrepidam sæ-
 pius horror pauorq; medullitus peruaserit ad vnus sui
 tam immitis lectuli cogitatum, tremebat, æstuabat, suda-
 bat misera priusquam vel spondam attingeret, memor
 quales ipsam expectarent ibidem plumę, quot minaces
 cristę arrigerentur illic in suam lanienam, quo sibi crucia-
 tu distabescendum quoties in alterum latus reuoluendum
 esset lassum corpusculum, deniq; sciebat inde se neuti-
 quam surrecturam absq; omnium membrorum gelido stu-
 pore, ac velut ex ossifragio coxis, humeris, cruribus, bra-
 chijs miserrimē diuaricatis; vnde cuidam Matronę post
 annos complures familiariter interroganti, quomodo le-
 ctum adeo horribilem & arduum potuerit vel nocte vni-
 cā tolerare, respondit cum lepore (: vt solebat) & gratia,
 talem se ex eo accubitu dolorem capere, quantus vtiq;
 sufficere posset in satisfactionem pro quāuis amicissima
 persona Deo offerendam.

Contigit subinde, Rosam velut iusto pauori pene im-
 parem diutiūs harere in ancipiti, lectumne tot poenarum
 ferti-

fertilem inscenderet ; Verùm dubitanti & prope exanimi subuenit Christus visibili blandaq; specie se Virgini obijciens , ipsamq; placidissimè his verbis compellans : *emento Filia , longè duriorẽ , angustiorẽ , horribiliorem fuisse lectulum Caluaria , in quo mortis somnum pro te cepi . Nosti quid fellis ibidem propter tui amorem exhausserim , scis quæ illic non testæ sed ferreae cuspides mihi manus pedesq; terebrârint , donec ipsam mihi extunderent dilectam animam . Hæc recole , hæc pænali strato tuo in tratina oppone , & videbitur tibi sub charitatis dictamine lectulus noster floridus .* Mirum , quàm altè Virginis animum hæc verba penetrârint , quantum ei roboris constantiæq; affuderint , ne ab horrido illo patientiæ exercitio resiliret ; Sanè per ipsos decem & sex annos in huius agonis acerbissimo tormento inuicta perseuerauit , & (: quod mireris amplius) conscia demum atq; inuita sed tamen conniuente Matre . Conata quidem hæc fuit semel iterumq; Filiam à tantæ austeritatis excessu diuertere , & lectum immanem frustatim dissipare , sed immisso diuinitus conscientiæ stimulo nec manum ausa est adhibere nec imperium . Maluit itaq; per Confessarios tentare successum , verùm & hi velut in magnæ perplexitatis negotio videbantur trepidare , nec certi quidpiam resoluebant ; idq; perspicuum satis indicium erat , Deo sic placitum esse , in asperrimi lecti tolerantia electam Rosam dilecto suo Sponso concrucifigi .

Dicendum nunc de cervicali . Tentabat Rosa gradatim abiectis mollioribus ad exemplum S. Catarinæ Senensis eò pertingere vt in scia Matre demum informe saxū capiti dormitura supponeret , vnde initio grossioris panni incommodum volumen in cervicali adhibuit , deinde paulatim crudum laterem , deniq; petram polygonam & vndiq; scabram ; Verùm hanc Mater vt animaduertit sustulit , filiaq; puluinar obtrusit lanâ vacuum , sed cum iussu vt illud farciret . Tacuit Rosa , puluinar suscepit , infarsit , sed non

lanâ

lanā vti credebat Mater : vim segmentorum collegit quæ de fabri lignarij dolabra excidunt, his puluinum impleuit, impleto indormiuit ; Nec tamen diu latuit Matrem solertia, fartum corripuit, lignea inde retrimenta proijci, lanam substitui, lanam ingeri disertè & cum clamore præcepit . Obediuit Rosa sed non vltra literam , cervicali in-far-sit lanam at non solam , quia inter lanam extimumq; pannum vbi facies decumbentis excipienda erat , tortiles iuncos clam occuluit quos veteris sportæ fragmento in hunc vsum detraxerat . His Rosæ dormientis vultus immodicè dispungebatur , adeo quòd Mater in genis ac fronte Filix persape notarit extemporanea hæc stigmata , nec tamen originem diuinare poterat iam secuta de lana quæ cervicali impleisset ; donec fortuito casu manum cervicali incuriosè imponens contrectauit hostem in latebra, iuncos deprehendit, extraxit . Vidisses hic denuò Lapam Matrem, Filix Catarinæ probra, conuicia , criminationes acervantem ; vix temperatum à verbere . Sic Rosa quòd dura sibi quæreret, durissima sufferre debuit . Exinde Mater in virtute sanctæ obedientiæ præcepit Filix , rursus vacuaret suum cervical , lanamq; reponeret , at lanam solam . Iterum obedit Rosa , sed vltra literam , nempe duplicauit lanam , arreptoq; bacillo tantam eius copiam non tam ingessit quàm impressit cervicali, vt hoc suberis tandem duritiem exæquarit . Sic videbatur sibi rediisse ad ligneum illud puluinar , quod pridem sibi Mater subtraxerat . Fuerat is truncus ex arbore quam illic *Pacay* vocant indigenæ, excavatus in medio vt caput Virginis collumq; exciperet . Huic per edictum maternum proscripto successerat nodosorum stipitum fascis in extremitate funibus collectus . Verum & hunc Mater abegerat . Tandem vt in postremum hoc merè lanceum cervical incidit , vltioris inops consilij sic Filiam affata est : Sanè paruisti Rosa mea, paruisti, siquidem hic modò nil nisi lanam reperio .

Satis

Satis est, imò plus quàm satis, nam tibi & lanam in lanienam sciuisti conuertere; quid vltra imperem? ne Matris præceptum flocci-fieret, hos floccos condensasti in solide petrae duritiem. Age vt vis, nec si tibi mortem consciueris, te ampliùs interpellabo.

Demum aduénit Matri tempus optatissimum, quo sibi de PP. Confessariorum permissu licuit poenosum Rosæ lectulum manibus auidissimis dissipare. Qui conscientiae Virginis præerant, tribus circiter ante illius obitum annis considerauerant, ipsam viribus nimium attenuari, corpusculum tot flagris, ieiunijs, morbis exhaustum arduo tam asperi lecti supplicio non ampliùs par fore, & si fomenta illi persuaderi nequeant saltim tormenta debili aut subtrahenda esse aut moderanda. Itaq; Rosæ lectulum, ærumnis trium lustrorum grauem cupidæ matri dedunt in direptionem ac prædam. Quo animo id acceperit Filia poenitentiae quàm Vitæ studiosior, non facile dixerim: at alacris Mater velut signo ad assultum dato sciuissimam illā catastam non aliter ac hostilem arcem inuasit, truncos, ligna, tigna disiecit, luxauit asseres, & non sine præcipiti manuū offendiculo testacea fragmēta sublegit, sparsit, tandemq; in vicinum Vrbi fluuium ne ad vsum redirent abiecit, priùs tamen eorum numerum inire voluit, reperitq; acuminata frustula parùm abesse à trecentis.

Ergo aliter post hæc Rosæ iacendum, & dormiendum fuit, vix tamen blandiùs aut commodiùs, nam tabulas suas asseresq; repetijt, his sine culcitra paleae simplex ac detritum peripetasma instrauit, sicq; vocato somno exanguia membra deinceps composuit ad soporem. Attamen & pauper hic thalamus ei videbatur sapere delicias, vnde postremis vitæ annis quos in Gundisalui Quæstoris domo exegit, in humili sella collecto corpusculo sedentaria noctes suas transegit, capite paulisper reclinato ad columnam lecticæ in qua Gundisalui minorēnes filiola acquiescebant.

ſcebant . Ità breuiſſimum ſomnum Roſa libabat magis quàm capiebat , præſertim hyberno tempore , quo plerumq; ex nocturnis frigoriſus ſic tremebat , rigeſbat , ſtupēbat, vt ſurgens pedibus conſiſtere vix poſſet. Interdū nimio algore excitata roris marini ramuſculis ad ellychniū accenſis obiter hoc fumo tantillum fugitiui caloris quo ſe foueret, nitebatur concipere . Nouercali corporis odio nec vigil inſidere uſquàm puluino voluit, ſed vel ſtans peragebat labores ſuos quouſq; poterat, vel cum neceſſariò ſedendum erat, duro palo utebatur pro ſellula .

Interim prioris ſui lectuli memor & cupida, aſſiduè tūdebat Confellariorum aures , querebatur ſe vitam ſuam, otioſè perdere dum à priſtinis pœnitentiæ exercitijs inuita cogebatur feriari, omni ſe patientiæ meritò vacuam ex tanta Patrum indulgentia remanere, S. Patri ſuo Dominiſco indies occantari titulum *Roſa patientiæ*, ſe verò adempta ſibi patientia nec Roſam eſſe nec tanti Patris Filiam , deniq; ſinerent eam quæ nil boni ageret ſaltim mala pati, corpusq; affligere . Tantum effecit, quòd vnus ex Confellarijs indulſit Virgini , vt per totam illius & proximī anni (: qui Roſæ poſtremus fuit) quadrageſimam ex priſtini rigoris forma denuo ſibi lectulum inſtrueret è lignis, teſtis , tegulis conſtipatum . Fecit conſeſtim Roſa vt ſibi permiſſum erat , ſummæq; curæ ſummum adiunxit ſecretum, adeo vt neque poſt ſuum obitum (: nam tunc primum res innotuit) ſecundus iſte pœnarum lectulus uſquam potuerit inueniri . Credibile eſt , ipſammet ſtatim vt cum Quadrageſima expirarat vtendi facultas , ultro ſoluſſe cataſtam , diſperſiſſe teſtarum fragmina, proieciſſe paxillos & ligna, ne quid innoteſceret , quamquam diligens perquiſitio vtrobiq; tum materna tum Quæſtoris in domo non defuerit .

Sed nec Roſam morti iam vicinam deſeruerat hoc penè coæuum, duriffimè cubandi deſiderium . Semianimis in

fuo illo extremi doloris extremo lectulo dolebat altero illo se carere lectulo extremè dolorifico: at quis tam crudelem equuleum apparasset innocentulæ iam iam morituræ? Saltim optabat ex illo cui incumbibat humaniori strato humi deponi, ac nudo in pavimento mori. Verùm vt neq; hoc se impetraturam à domesticis intellexit, adstantem germanum fratrem vltimis affata verbis rogauit, cervicalia vt submoueret; his in partem retractis gaudebat moribunda, quòd se lecticæ tabulis sentiret occipite humerisq; acclinem, mirificèq; contenta quòd crucifixo Spōso qualitercumq; commoreretur in duro ligno, felicem spiritum paulò post in manus Creatoris placidissimè exhalauit. Nec defuerunt, qui in morientis pallido vultu notarint ipsissimam Christi in Cruce expirantis effigiem, quod alio loco, & tempore in S. Catarina Senensi itidem lecto decubua fuerat obseruatum.

Porrò quisq; ex tanta vsualis strati duritie haud difficulter intelliget, quantum Rosa vigilijs dederit, cui ipse inet lectus soporem adimebat. Passa est aliquando Seraphica Catarina B. Raymundo Confessori suo, cum nullo hostium æquè vt cum somno operosius sibi fuisse configendum, quem eo tandem reduxit, vt horis omnino duabus contentus esset. Rosam Catarinæ Discipulam idem certamen exercuit, eadem victoria cohonestauit, nam & ipsa somnum suum intra duarum horarum angustias coercuit, & aliquando etià minus spatij indulsit importuno exactori. Vnde sic diurnum nocturnumq; tempus distribuit, vt ex utroq; duodecim horas vniuersim orationi seponeret, alias decem impenderet labori manuum, quo Parentes sustentabat, reliquas corporis necessitatibus & breui quieti deputaret. Hanc vigilandi facilitatem iuuenre longæ inedia, cilicij lectiq; carduetum, frigida omnisq; potùs diutina abstinentia, profunda meditatio & applicata mentis ad superna tenax defixio. Nec tamen suas artes

res partesue omisit vērſutus hoſtis , quā Virginem tunc maximè quando ad nocturnam orationem ſurrexerat, moleſtiſſimè niteretur reuocare ad ſomnum. Roſa per magno ſteterè hæc prælia , nam ſiue genibus humi fixis inchoabat preces, videbatur ineſſe plumbum grauatis palpebris , ſiue erecta ſtabat, capiti vertigo ponderoſiſſima obtinniebat languidam ſomnolentiæ cantilenā , ſiue paſſis brachijs procubuiſſet in terram, adgliſcebat ſoporiferi torporis ſuaue blandimentum . Pudebat Roſam aduerſario ſuccumbere tam ignauo, pugnabat etiam cadendo, illidebat ceruicem parieti, tundeſcit ſibi latera, ſi quo modo extunderet irrepentem lethargum; vincebat tandem at nō ſine agone, triumphabat, ſed in Cruce: nimirum proſtabat in Virginis cubiculo par humanæ ſtaturæ Crux lignea, è cuius brachijs vtrimq; prominebant clauī fortes ac ſolidi, vt ſufficerent corpori ſuſtinendo . His igitur ambas manus applicabat in ſomnum pugnatura , ab horum tenaci complexu pendulum librabat corpusculum dum Deiparæ Virginis officiū abſolueret, his cuncolis ſindebat impetum ſomni, erudiebatur ad excubias, cruciſſigebat hoſtem , nec niſi victrix obrigidos lacertorum tendines retrahebat à charis victoriæ manubrijs, ſic palmam obtinebat ſed palmis calloſis .

Inuenit & aliū pugnandi modū. In cellulæ pariete oblongū fixerat clauū paulò altiore, quiq; Roſæ verticem, palmi ferè interſtitio ſuperaret ; Huic aduerſus ſomni infidias modicum id capillitij quod obtegendæ coronæ in fronte reſiduum ſuperfuerat, impleſcebat ſtriſtiſſimè, eoq; tormento accerſebat vigiliam, recitabat preculas, ſomnolentiam ſtrangulabat . Ne tamen ſic pendula paucis capillis totam corpusculi molem committeret, vtcumq; ſummis pedum digitis inſiſtens tangebat terram , ſed ægrè ſatis, ac per alternas ſucceſſiones nutante lubrico fulcimento . Colligito lector ex tam atroci remedio, quā fuerit

iuenculæ importuna somni vexatio : in lecto muricibus ac tribulis , foris autem clauis pugnandum fuit , & Rosæ seu dormire vellet, seu vigilare tormenta subeunda erant .

C A P V T X.

Rosæ domestica solitudo , fuga
publici, cellula perangusta .

VT olim S. Catarinam Senensem adhuc pusillam solitudinis amor vsq; ad speluncæ quæstionem abripuit , sic Rosam vel à prima infantia docuit solitarios angulos domi quærere, Mundiq; commercia deuitare . Conueniebant ad eam è vicinis domibus paruulæ , at lusitandi gratia , quod illius ætatis primum est studium : afferbant singulæ suas pupas , quibus vestiendis , comendis , ornandis fœmellarum pueritia cõmunissimo sexûs genio addicitur . Has innocenti æmulatione ostentabant silenti Rosæ , hortantes vt & suam promeret aut formaret . Negabat illa se pupam vel habere, vel etiam contrectare velle , quòd audisset , Malignum aliquando per pupam (: fortasse idolum fuerit :) garritum edidisse . Mox puparum luscoæqualibus relicto abdebat se in secretum angulum , quasi arcanis cogitationibus quietiùs vacatura : illic interdum deprehenfa à fratre ac interrogata , quidni mallet puerulis festiuè nugantibus colludere quàm in puluerulento , ac pulcibus referto angulo desidere , verbis supra ætatem sensatis respondit : *Sinito hîc me delitescere solam cum Deo, nam illic inter pupas an pariter adsit Deus quis nouit ?*

Cum annis crescebat latendi studium , vnde in horto
vmbro-

umbrosas platanos muro proximas conspicata locum elegit, vbi auxiliante Ferdinando fratre, oratoriolum ab omni domesticorum prospectu semotum efformaret. Illic plerumque ramorum, palmitum, virgultorum circumductu modicum inclusit spatium, ac supernè frondosis arcubus affabrè concameravit. Intus humile altariolum muro applicuit, Crucem ex densiori charta flosculis plumisq; versicolore impoluit, & quidquid Sacrarum Imaginum conquirere poterat in hanc suam Basilicam sollicitè comportabat. Videbatur huic angello Rosula vniuersas suas inclusisse delicias, adeo totos in eo hærebat dies solitaria, illuc velut ad orandi, meditandiq; secessum à prandio, à lectulo, à cæna properabat, ibi domesticis se subducebat tumultibus, iocis, fabulis, vni sibi Coeloq; vacans, extra hunc Paradisum nusquam ei benè esse poterat, adeo vt domi abiret in prouerbiū: *Hortum adeas si Rosulam quæris*. Verum quia isthoc solatio non nisi interdiu licebat frui, paulò grandior facta impetrauit à Matre aliud intra ædes cubiculum, in quo seorsim à ceteris prolibus solitaria pernoctaret. Tempestiua hæc fuere in tenella indole præludia, vt quid maturior esset molitura, ex his præambulis conijceretur.

Paulatim eò statura & ætas Rosam prouexerat, vt idonea esset honorario comitatu stipare Matrem foras egressuram, maximè cum inuisendæ erant digniores Matronæ. At Filiæ suam vnicè eremum amanti molestissimum erat tam videre, quàm videri in publico; Vnde nunc prece, nunc lachrymis ambiebat Matrem obsecrando ne secum se abduceret. Stupebat ista, nondum assequens vnde idipsum quod reliquæ iuuentulæ ultra modum exambire solent, vni Rosæ tam exosum esset. Itaq; inuitam aliquoties adegit imperio, certa edicto sine replica obedituram. Semel cum à Matre inuitaretur ad secum obeunda foris vrbis salutatum officia, Virgo iuxta domesticum furnum

furnum transiens saxum à clibani orificio studiosè sibi attraxit in pedem; eoq; vulnere & cōtusione obtinuit, vt non fictè claudicans residere domi sineretur . Et verius & venustius hoc vulnere pedis rubuit Rosa nostra Peruana, quàm quod de Rosis Cyprijs fabulata est antiquitas, nimirum has non ante rubuisse, quàm ex Cypriæ Deæ sauciato calcaneo fortuitus eas cruor aspersisset.

Porro & aliud Virgo excogitauit strategema, vt solitudinis amans redimeret vexam prodeundi in publicum. Quoties à Matre præsensit se inuitandam ad visitationis obsequia, clam indico pipere quod mordacissimum est cilia palpebrasq; sibi oblinebat, quo quidem affricu mox ardebant oculi, rubebant, stillabant, velut si acris è capite defluxio eos suffudisset . Ità dum Mater egressura vocabat Filiam in comitatum, sufficiebat ostendisse fluidos noxioq; pruritu tumentes oculos, tamquam perferendæ apertæ luci tunc minimè pares . Vnde miserata parens ne affectis luminibus liberior foris noceret aer, indulgebat Filia optatissimam solitudinis ac latibuli facultatem . Durum sanè effugium : at Rosæ præ ipsa pupilla oculi charior erat sua anachoresis, longoq; tempore ipsi valuit hæc solertia, donec tandem suspecta frequentia rem prodidit genitrici, quod ità accidit . Condicto mutuo Domina Ludouica Vargas Caruaial cum Maria de Oliua statuerât, assumptis vtrimq; filiabus vehi ad celebrem Diuæ Virginis stationem cui à *Monte Serrato* nomen est; Venit præfixa dies, & rheda cum D. Ludouica eiusq; Filia Isabella Alexia substitit ante fores . Præparata Mater aduocat Rosam, at hæc prodit turgentibus rursus oculis, palpebrisq; subtristi rubore inflammatis, vt facilè constaret, visum ea defluxione accensum & nimio dolore nictitantem auræ solisq; pericula neutiquam laturum; Hic demum in se reflexa Mater, postquàm se Ludouicæ comiter excusarat, penitare cœpit attentius, quid sibi velit, quòd Rosæ oculos
tunc

tunc potissimum obsideret importuna ista defluxio, quandoque honestarum Matronarum visitatio aut domi excipienda aut foris exequenda instabat. Hinc in Filiae vultum curiosius intenta vidit non fingi quod apparebat, nam & ruboris incendium, & doloris acrimoniam crebra stillicidia tacite affirmabant. Denique maternâ licentiâ propius os nareq; applicuit, odorem sensit, exsertaq; lingua mordacitatem, sæuissimi collyrij, lambendoprehendit. Quis enarret scommata, clamores, diſteria, quæ tunc in Filiam detonuit Mater? quorū (: inquit.) hæ fraudes? cui bono tam ineptæ præstigiæ? si libuit Matr̃s oculos deludere, at ludere cum proprijs oculis quale nefas, quantum periculum! tam citò oblita es, nuperrimè Ferdinandi Perez mâcipium simillimo abusu allij & piperis omnino visum vsūq; oculorū perdidisse? breuiter ac modestè respondit Virgo: *Satiùs foret ò Mater, & me cecam esse, quàm vana & secularia affatim videre.* Ista responso genitrix permisit Filie quantum vellet latere domi, tantum ne amplius sibi oculos periculoso hoc defricu obpiperaret. Tam carò constitit Rosæ optati secessus tarda licentiâ, quâ illo pretio perpauca sibi emptam (: pleraq; ademptam) vellent.

Vsq; adeo Rosæ placebat desertum, displicebat publicum, vt non solum priuata palatia, communiaq; Urbis spectacula mordicus deuitarit, Verum & generales celebrium Processionum circuitus, ac populosas supplicationes curiosè spectare defugerit. Fatebatur, sibi permolestum ac graue esse inter fœminarum colloquia cernere pomposas vestes, pallia fasciasq; pretiosas, interesse otiosis fabulis, distineri reciprocis tot inanium vrbani-tatum ritibus; præcipuè tamen dolebat, se neq; in domestico sui recessus asylo tutam à visitationibus liberamq; esse. Iam desierat Matrem ad eiusmodi officia foras comitari, sed ne ipsa domi visitaretur, effugere cupiebat nec poterat.

poterat . Mansuetudo, comitas, modestia Virginis trahebatur notas foeminas, ut specie honoris dum accedebant ad Matrem, postularent videre & Filiam, quam suavis odor virtutis, honestas indolis, admiratio sanctitatis quam plurimis etiam illustribus commendarat inuitam . Neque his facile accessus poterat denegari quantumcumque se Rosa absconderet, deplorans iacturam pretiosi temporis . Et quamuis sermo non nisi de Deo esset, protestabatur, utilius sibi ac iucundius semper fore, cum Deo quam de Deo loqui.

Igitur aspirante Numine sublimiorem speculata est viam qua sese ab ijs impedimentis viriliter explicaret: parentes verecundè supplex orauit, permitti sibi in extremo horti angulo locum solitarium pro architectanda cellula, quam cupiebat vnicae dumtaxat staturae suae capacem, cum exigua fenestella quae lumen exciperet, ostioli clauem sola (: si vellet) Mater teneret: ibi se labori manuum, orandi meditandique studio, & collectioni spiritus absque vlllo minimi temporis dispendio vtilissimè vacaturam . Addebatur rationes solidas ac ponderosas quas Coelum ac zelus diuini obsequij dictarant. Verum negabat Mater se permittituram Filiae, quod tali sepulchro viam se abderet . Post cassas preces, & obstinatas repulsas Virgo de more confugit ad Coelitarum auxilia, Deum in primis Deique Matrem, assidue inuocans, ut maternum sibi consensum potenti afflatu elicerent: nec dubitabat exaudiri, verumtamen altius mota in certitudinis experimentum coelitus arrham quasi pignoratitiam exspectauit, & obtinuit, quae talis fuit: habebat in paupere thesauro coronam precariam ex corallijs, hanc prompsit, ut in sacello SS. Rosarii imaginem Diuae Virginis speciosus hic torques ornaret. Ergo notum Religiosum adiit, coronam porrexit collo. Imaginis quantumcunque immittendam Neglexit ille quod scala sibi deesset qua ad sublimem in Ara imaginem pertingeret. Postridie

ad facellum Virgo redijt missam auditura, cumq; notasset suam Imagini coronam deesse, magnis precibus maiorem (: quem vocant) Sacristanum exorauit, vt tandem ipse coronam Imaginis collo circūdaret, sua interesse plurimum, vt id fiat, velle se pretioso hoc vinculo suauiter captiuare Matrem-Virginem, vt ita Filiolus vadem seu fideiussorem se interponat . Postrema hæc verba ænigma erant, quod tunc quidem Sacristanus non satis assequebatur, fecit tamen quod Rosa petijt, scalâq; applicita coronam haud sine labore circumdedit collo Imaginis, ac scalam remouit. Aduit demum statuta dies, qua Rosa obtentæ gratiæ Fideiussorem intuitura festinauit ad Ecclesiam S. Dominici : & ecce SS. Rosarij facellum ingressa vidit coronam suam, à collo Diuæ Virginis solutam pendere palam de manu paruuli Iesv . Idem viderunt quotquot promiscuè aderant in Sacello, at mysterium ignorabant, quòd supponerent, coronam per ipsummet Sacristam è collo Deiparæ in digitos filioli fuisse translatam . Sacrista prodigij admonitus venit, vidit, adstupuit, certus nec se nec suorum vllum attigisse coronam à die, qua collo Diuæ Virginis circumducta fuerat. Sola Rosa conscia miraculi, signiq; tacita interpres exultabat arcano iubilo, sat intelligens quòd ista spectarent ; nempe Regina SS. Rosarij supplici Rosæ gratiam, quam optabat sponsonderat, Filius tandem Fide iubeat pro Matre, sicq; corallinum illud sponsonis vinculum ab exsoluta Matre in se transtulerat .

Rosa ex hoc mirabili ostento iam sui voti secura ac penè compos, grauem ac honorificam adornauit legationem ad Matrem, hanc obierunt Magister & Cathedraticus P. F. Ioannes de Lorenzana, Gundisaluus de la Massa Quæstor Regius, & Quæstoris Vxor Maria de Vfatigui . Festus erat dies Beatissimæ Virginis in Templo purificatæ, quando internuncia hæc trias Mariæ de Oliua gratulando magis, quàm flagitando exposuit Rosæ suæ constans deside-

rium fabricandi sibi cellulam angustam ac solitariam, in qua sine Confessarij permisso nullius admitteret conspectum aut alloquium. Mater, quæ in illam usque horam ad eiusmodi voces apenninis cautibus durior fuerat, statim ut cera liquefacta cessit, nec vel momentum temporis aut deliberationi aut dilationi in re tam ardua deposcens. Nimirum sic exoluit promissa Fide-iussor Deus, qui non minus parentis cor quam coralium Filiae gestabat in manu sua.

Porro obtenta hac permissione, quam putas festiuo dulciq; gaudio diem illum transegit Rosa? videbatur in se quadrare id, quod canebatur de iusto Sene: *Responsum accepit Simeon*. Audebat cum eodem cantillare iucundum hoc celestina: *Nunc dimittis*, velut quæ portum suorum desideriorum iam penè attigisset, fruitura deinceps secretis amplexibus infantis sponsuli, qui ducit in solitudinem, locuturus ad Cor. Deniq; sentiebat Rosa se compellari primo illius diei Responsorio: *Adorna thalamum tuum Sion*. Certè non nisi thalamum pollicebatur cellula, quam sibi designabat Rosa, longumq; putabat expectare diei sequentis diluculum, quo opus inchoaret. Nec mora, postridiè adornauit thalamum, comportauit in hortum tabulas, intraq; pauculos dies perfectum stetit solitariae deuotionis breue, arctum, humile Sacrarium. Tuguriolum erat quinque pedes longum, quatuor pedes latum, dixisses arcam potius aut cistam grandiusculam, nisi modica ad latus fenestella esse domunculam clamitasset. Vnus ex Confessarijs Virginis obiter habitaculi angustiam perstrinxit, cui Rosa lepidè replicuit, tantum inesse spatij, quantum sibi Sponsq; coelesti abundè sufficeret. Nempe ut dicebam, thalamus erat, quem Virgo Filia Sion adornarat. Nacta hanc Eremum felix Rosa, hoc sategit, ne quis illic temporis punctus sibi efflueret sine fructu, hic totos hærebat dies addita maiori noctis parte, hic aptissimè per varia pietatis exercitia dispensabat horas, hic liberrimò contempla-

tionis.

tionis vsu ascensiones in corde suo disponebat propemodum ignara in corpore an extra corpus degeret. Huc postquam se recluserat, cuidam probatæ Sanctitatis Matronæ in raptu visa est sub specie ac figura lucidissimæ Stellæ, cuius radios & quaquauersus scintillantem claritudinem opaca parietum angustia cohibere nequaquā poterat. *Lima* alio nomine dicta *Ciuitas Regum* debuit & suam habere *Stellam*, ad arcæ Saluatoris cunabula tacitè inuitantem. Obiter hic attigerim, quod in Rosa dum vixit plurimi obseruarunt, mirificè oblectatam fuisse aspectu sereni Coeli, adeo vt puella omnis Astrologiæ penitus ignara magnam interdum noctis partem immota soli siderum spectaculo dulciter inhæreret: nimirum noua *Regum Stella* amabat Sphæram suam, eò anhelabat, hanc vnice deperibat sideræ indoles, nec faciliè à cœlestium flammularum nocturno obtutu auelli poterat mens Coelo nata; fatebatur, Coeli siderumq; diuturna contemplatione se instaurari ac refici, quin & alijs suadebat, clarum sereni firmamenti aspectum inter potiora quæ spiritum eleuant allestamenta posse numerari. Vsque adeo non aberrauit religiosa Matrona, quæ Rosam stellis amicam in Stellæ figura agnouit, cui tunc pro firmamento exiguum cellæ latibulum erat.

Qui Virginis in templa & res sacras ardentem affectum nouerant, mirabantur ipsam iugiter suo Reclusoriolo sic adhærescere, vt ferialibus diebus vix aliquando Ecclesiā adiret, proinde à nonnemine interrogata fuit, quomodo cor eius pientissimum sufferre posset, quòd non saltim ad interueniendum Missæ Sacrificio tantisper omni manè turguriolum suum relinqueret mox repetendum? audi candidissimæ simplicitatis responsum & obstupece. Subiecit Rosa: neutiquam id suo Reclusorio imputandum, sed quia Mater (: quacum sola iusserant Confessarii primis annis Ecclesiā adire) domesticis impediabatur curis, ne omni die ad Missam exiret: sibi tamen diuina bonitate prospe-

etum esse, vt in Cellula residens non vnicam sed complusculas quotidie Missas videret audiretq; . Quæsitum de modo, & compertum, id supernè datū fuisse Virgini, quòd spiritu (: non secus ac si corporaliter præsens adfuisset) intererat quotidie Missis singulis , quotquot in vicino S. Spiritus xenodochio legebantur; nec solum istis , sed & ijs quæ procul celebrabantur in dissita S. Augustini Ecclesia , quæ non minùs quatuor aut quinque platearum anfractu seu interiectu distabat à Rosæ domicilio . Reclusæ Virginis arctissimæ solitudini magnum id, prodigiosumq; fuisse solatium nemo ibit inficias .

Aliud Rosæ iam solitariae priuilegium à culicibus fuit , imò obsequium . Vbi anachoretica Virginis cella constituerat, soli humiditas & arbuscularum frequentia infinitam culicum multitudinem aut gignebat aut trahebat in amicum suo generi vmbraculum . Molestum hominibus animal si quod aliud, nam vnica sua proboscide & tubicinem agit & militem , cum non minùs feriat tubo , quàm tuba, ac bombo sopitos infestet: Horum examina. & agmina, immigrabant Rosæ tugurio , præsertim quando vel per diem siccantes radij solis , aut sub vesperum serenæ noctis algores tenuissimis corpusculis imminebant . Nec tamen in tot culicum legionibus vel vnicus fuit , qui Rosam in sua Cellula vmquam attingeret . Scatebant his vndiq; parietes, personabat ostiolum, implebatur fenestra perpetuo commeantium refluxu , sed cauebant singuli ne Rosæ infiderent , ac velut ex condito suæ parcebant hospita . Accidit, quòd vel Mater, vel ex permissione Confessarij nonnullæ religiosiores personæ Rosam in angusto suo habitaculo de Diuinis collocuturæ inuiferent ; has verò, mox vbi ad ianuam aut fenestellam confediscent , hostiliter inuadebat culicum exercitus, his faciem & manus obsidere festinabat importuna societas, repellebatur vnus, succedebant quaterni, & plerumq; ex insidijs etiam incautorum sanguinem

nem hauriebant, relicto pruritûs ac tuberculi vestigio. Mirabantur sub ægyptia hac plaga Rosam integros dies immotam consistere, at stupebant magis, postquam obseruarunt, in eius vultu ac manibus nec minimum huius cruentæ molestiæ signum apparere. Subrisit Virgo, Matriq; & alijs respondit: quando huc intraui, cum culicibus amicitiam pactumq; iniij, ne vñquam me turbarent aut affligerent, vicissim in nullo me ipsis nocituram. Stetimus vtrimq; pactis, nec solum communi hoc tecto fruimur sine hostilitate, sed insuper ijdem in decantandis Deo laudibus strenuè pro modulo suo me iuuant. Planè sic erat: nam quotiescumq; Rosa primo diluculo referabat cellulæ portam, & laxabat fenestellæ valvulas, culicibus quotquot intus ad parietes densi pernoctarant, præcipiebat: eya amici, ad laudes omnipotentis Dei; confestim illi concentu lenissimo erumpebant in bombos, sparsiq; in gyros variè miscebant arguta murmura, phalange tam ordinata ac in se flexibus aptissimis retorta, vt credidisses aut chorum aut choreas esse quibus ratio dux præfideret. Hoc perfuncti officio euolabant ad pactum similiter vbi ad Solis occubitum reperebant hospitem domunculam, rursum instabat Rosa, vt priusquàm se quieti darent, secum tantisper ferotinas laudes communi depangerent Creatori. Mox hilares susurri certatim implebant angulos, organiq; pneumatici modulos gestiebat æmulari volatilis harmonia, donec iubente Rosa simul omnes conticescerent velut sub vna lege nocturni silentij. Tantum in vilissimas bestiolas imperium statui Innocentiæ reservatum fuerat, quem quidem Rosa tam prope attigit, vt in solitudine cellæ versaretur, tamquam in Paradiso.

Soror Cätarina de S. Maria tertij Ordinis S. P. Domini-
ci, ac D. Eleonoræ de Castro annosa contubernalis Rosam in sua eremo visitabat, sed culicum insolentiam non ferens, vnum qui sanguine iam turgebat, manu occidit.

Rosa

Rosa miranti similis, quid agis (:inquit) charissima Sorore meos mihi hospites trucidas ? at Catarina : dic potius hostes , non hospites , ecce enim quàm sanguine meo plenus sit iste culex . Replicuit illa : quid verò magni est tantillum animalculum nostro pauisse sanguine , dum eius conditor nos suomet toties pascit cruore ? ergo ne perrexeris meos interimere culices, & ego vicissim tibi spondeo quòd æquè tecum vtì mecum pacem colent . Factum est , nam nullus deinceps ibi culex Catarinam punxit aut fuxit . Idem Matri, Quæstori Gundisaluo, huius consorti , alijsq; accidisse constat , ne dubitari posset de innocentis Rosæ in domesticos sibi culices admirando imperio . Paulò aliter id experta est Soror Francisca de Montoya itidem S. P. Dominici alumna Tertiaria . Hæc inter sacra cum Rosa colloquia viso tot muscarum famelico assultu nonnihil extimuit . Quod vbi aduertit Rosa , ne (:inquit) metuas Soror, ad SS. Trinitatis honorem soli tres hodie culices te pungent , deinceps vt ego immuniseris . Contigit, prout Virgo prædixerat, Franciscam ter culex adrosit, exinde illo die semperq; in posterum libera ab his fuit præsentè Rosa . Quòd hoc miræ immunitatis priuilegium successus ille solitarius è Cœlo possederit , bene est, quòd verò id ibidem alijs Rosa communicare potuerit , singulare fuit.

Vltimo vitæ suæ triennio in Gundisalui Quæstoris domo paris ferè solitudinis desertum sibi Virgo diffinierat, totosq; cum noctibus dies vel in domestico Oratorio latebat abdita, vel in vltimo ædium cubiculo arcis sese cancellis iugiter cohibebat , omnia præstruens omnia interponens, vt inutiles visitationes deuitaret . Nonnumquam de Confessariorum ipsiusq; Gundisalui permissu maternā adibat domum , vt pristinæ cellulæ suauis eremo per aliquot dies frueretur , ac sæpè coram intimis grauissimè quæstæ est , iugi se dolore affici , quòd sexûs ac seculi conditio

ditio sibi non permetteret in asperrimos montes procul secedere, ibiq; cauam rupem inquirere vbi remota ab omni humano commercio vitam degeret: Laudabat assidue priscorum eremicularum felicissima tempora, suspirabat ad omnem Nitriæ ac Thebaidis mentionem, & vt verbulo absoluam, migrarant in Rosam ignita S. Catarinæ Senensis desideria quibus olim antra deserti haud perfuntoriè depoposcerat.

C A P V T XI.

Rosæ mira cum Christo desponsatio, pronuba Augustissima Imperatrice Angelorum.

EX Historia Vitæ B. Catarinæ Senensis Rosa didicerat, Virginem Seraphicam adhuc mortalem Christo Sponso fuisse mirabiliter subarrhatam. Currebat & ipsa per huius Sponsæ vestigia *in odorem Sponsi*, sed inter *adolescentulas* vt sibi videbatur, neq; enim illa animi sui profunda demissio permittebat, quòd vsq; ad singularem Sponsæ dignitatem tantæq; celsitudinis titulum auderet ultrò aspirare. Et tamen in Rosæ thesauris eminebant virginea puritas & abyssalis Humilitas, quæ propriam his nuptijs dispositionem parant, dotemq; constituunt, quo fit, quòd raris eiusmodi hymeneis peculiari iure præsideat Augustissima Angelorum Imperatrix, vtpote supremæ tum Puritatis tum Humilitatis priuilegio *Virgo singularis*, quæq; vt in ceteris ita celebrius in his duobus nec primam similem visa est nec habere sequentem. *Humilitatem*
Rosæ

Rosæ iam Cap. V. vtcumq; tractauimus; *Puritas* hic tractanda foret ante coelestes nuptias, verum de hac nobis ad compendium sufficiat concors depositio Confessariorum; quotquot generalem Virginis exomologesim exceperunt; hi fuere XI. nimirum VI. ex Ordine Prædicatorum, V. ex Societate Iesv, singuliq; seorsim velut vno ore ac sub fide iuramenti testati sunt, Virgineum Rosæ candorem ea semper nituisse puritate, vt neq; veniali macula vllius lasciuiæ vmquam fuerit attaminata, nec in tota ipsius vita vel semel ei obrepserit foeda aliqua cogitatio. Nempe hyblæam Rosam non tangit scarabæus.

Itaq; tam rarum pudicitiae donum, tam humilis ac pura Virginitas à primo atatulæ suæ quinquennio iam Christo sacrata per votum flos simul & dos erat futuro Sponsi Nazareni connubio, sed Rosa quantum amabat *Lilium inter Spinas*, tam abiectè sentiebat de seipſa, vnde prodigijs opus fuit, quibus à longè prepararetur ad mysterium, erigeretur ad consensum. Primum (: ex ijs quæ innotuerunt) hoc fuit: quando bicolor ille Papilio, de quo supra Cap. IV. supernè aduolans infedit Rosæ, notatum est quòd aliquamdiu per sinistrum Virginis latus reptando oberrabat donec rectà è regione cordis constitisset; illic videbatur morosius & amosius occupari, nam instar apis fauo construendo intentæ vertebatur in breues gyros quasi penicillo quidpiam delineans. Expleto opere disparuit, & ecce cordis effigiem plenè ac scitissimè formatam in veste Rosæ, quam à Papilione ibi depictam relictamq; conspicuè obseruarunt puellæ quotquot in eodem conclaui laborabant: at hæ ignorabant arcanum symbolum cordis virgineo cordi inaratum, sola Rosa sentiebat (: sed obscurius adhuc) clamantem eminus Sponsum: *præbe mihi cor tuum*. Coniectabat se à variegato Papilione nō solū vocari ad concolorem Senensis Catarinæ habitum, verū etiam insigniri eodem emblemate cordis quod olim cum Sponsa

Senen-

Senensi Sponsus æternus permutârat . Nihilominus remotiora hæc erant , quàm vt tanti Thalami spem certam, inuergerent , & tamen (: vt postea claruit) eminus ista felici Sponsalitis præludebant .

Paulò apertiùs alterum, quod sequitur . Post assumptam tertij Ordinis candidam vestem nocte quadam in somnis ostensa fuit Rosæ pulcherrima ac decéntissima Viri species : penè suggerebat animus cœlitem quemdam esse , imò ipsummet speciosum forma præ filiis hominum , nisi quòd habitus latomum fingeat, seu marmorum cædendorum nobilem artificem . Et reuera is erat , sed tunc festiùs & amans venerat , tamquam Virginem illic Sponsā sibi quæsiturus . Rosa, cui nec per somnium vlla vnquam placuerat nuptiarum cogitatio , sentiebat intus , vno isto coniugio nihil felicius in tota sibi vita posse obtingere . Gratix sympathia hæc erat , quæ Rosam docebat amare, *Secreta quæ non nouerat* . Annuit ergo oblato fœderi castissima turtur , ac data vtrimq; maritali fide gratiosus ille Sponsus tamquam necessarium iter peracturus discessit ; priùs tamen nouæ suæ Consorti aliquot ibidem marmora certo numero incidenda , formanda , polienda commisit dum peregrè rediret . Quòd verò coniugum sit relinquere Patrem , & Matrem , vt sint duo in carne vna , monuit Rosam suam Neonymphus , alendorum parentum curam posthac ipsa deponeret , aliundè se illis prouisurum ne quo egeant . Visus deinde ab itinere rediisse Sponsus , at Rosa quæ interim opus suum lapidarium ex toto nondum absoluerat , pudore suffusa , multis excusare se conabatur , quòd necessitatibus parentum impedita , quòd rudis adhuc illius artis quæ tam inusitata esset fœmineis manibus lino dumtaxat ac lanæ assuetis . Hic Sponsus subridens , ne credideris (: inquit) Dilecta mea, solam te in fœminis esse, quam duris hisce laboribus occuparim : statimq; proximi conclauis ostio latissimè diducto ostendit Rosæ lapidariam

dariam officinam peramplam ac spatiosam, quam solæ implebant Virgines arduo labori gnauiter intentæ; his pro acu malleus & scalprum, pro lana durissimi lapides & saxa erant, his tundendis, æquandis, & ad normam affabrè conquadrandis instabant totæ, secabāt, excauabāt, læuigabant, defricabāt, & vt ferramēta citius durior lapis admitteret, hunc affatim emolliebant crebro suarum lachrymarum stillicidio. Quodq; sat mirabile videbatur, inter hos impolitos saxorū cumulos & puluerulentas operas vestis erat singulis virginibus non plebeia ex more opificij, sed pretiosa, fulgida, solemnis, quæ nuptiale conuiuū, aut publicā theatri pompā saperet, magis quā sudoriferā officinā. Mirabatur Virgo Virgines operi tam insueto implicitas, at significabatur virtus occupata in arduis; circumspiciebat singularum artificum marmora iam elaborata, absoluta, seposita, quorū nulli ad perfectionem exactissimam quidquam deerat. Tandem Rosa, nictu fortuito in se reflexa, vidit eodem quo reliquæ ibi Virgines splendidissimo amictu se pariter circumdatam inclariuisse, & quæ illa tenus suo dumtaxat habitu Dominicano simpliciter canduerat, repente seprehendit in cyclade gemmis & auro distincta, vt ad easdem illic operas se quoque nosset auctoratam. Quot quantaq; mysteria ex vnica hac visione didicerit Rosa, particulatim apparebit in sequentibus; hinc ad solius cum lapicida depacti sponsalitij euentum festinat historia.

Iamq; post eiusmodi præambula supererat vltimum, quod demum hic Sponsus manifestè ac palam se insinuaret virgini Rosæ, & exuto latomi schemate Virginem ad connubialem thalamum apertiùs inuitaret. Ità accidit, & quidem hoc ordine: Dominicā Palmarum annuo ritu peracta benedictione distribuebant Ramos Sacristæ per chorum, & Ecclesiam dum adornatur solemnis Processio: interea cum alijs Sororibus, tertiarijs expectabat ibidem & Rosa
palman

palmam suam, geniculata in Rosariano Diuæ Virginis sac-
 cello. At siue incuria, & errore properantis Sacristæ, siue
 (: quod potius crediderim) singulari Numinis consilio ac-
 cidit, quòd hac Vice Rosa sine ramo fuit, omnino qui-
 dem præter morem, nam annis superioribus in palmarum
 distributione (: utpotè Filia Ordinis) præterita numquam
 fuerat. Hac igitur nouitate confusa Virgo, ut assolent te-
 neriores conscientiæ extimuit, ne aliquo forsan obliquo
 animi motu indignam se reddidisset illius ramiferæ Pro-
 cessionis consortio. Circuiuit tamen cum reliquo fideli
 populo, at mæsta & verecunda, peractoque circuitu rectà
 Sacellum Rosarianum (: suum portum) repetijt, ibi ad pe-
 des Deiparæ Virginis cor suum effudit per vndantes la-
 chrymas, seipsam reprehendens si fortè palmam benedi-
 ctam aut nimis ambitiosè concupierat, aut per inertiam
 non quæsierat. Deinde in vultu Augustissimæ Deiparentis
 intenta, ut vidit hunc sibi serenum & solito dulcius adblā-
 dientem, resumpsit animum, iamq; complacebat sibi in eo
 quo fuerat contristata, & absit (: inquit) quòd à mortali
 manu palmam accipiam, tu Domina, tu *Palma exaltata in*
Gades me ramo ditabis immarcescibili. Ad hæc verba
 mox vidit Cœli Reginam vultu exporrecto & hilari con-
 uerti in paruulum quem vlnis gestabat Filium, ac inde
 velut à fausto oraculo suauius respicere in Rosam; hæc
 ignoto perculsa gaudio vertit oculos in paruulū, ipsumq;
 similiter arridentem sibi conspexit. Inter hos duos melli-
 fluos vultūs æstu reciproco oberrabat Rosa; festinabat ab
 vno ad alterum, deliciabatur in alterno spectaculo, & quò
 sæpius ad alterutram redibat faciem inueniebat dulciore.
 Pluries in eadem S. Imagine (: ut infra narrabitur) demul-
 serat huiuscemodi suavis annictus orantem Rosam, at nū-
 quam eo quo tunc dulcedinis excessu, ea familiaritatis au-
 ra ac gratia, illo reconditi fauoris singularissimo fulgetro;
 ita quòd sentiebat iam in animæ suæ fundo, magnum ali-

quid secum agi, nec suum procul abesse lapicidam. Affectus erant, quibus nondum inuenit nomina inops mortaliū ruditas.

Quid multa? erupit tandem puerulus *Iesus* in hoc canticum dramatis: *Rosa cordis mei! tu mihi Sponsa esto*. Penetrarunt medullas Rosæ hæc verba, & velut ictu improuiso exanimis in se recidit, breuiq; lucta confusorum, affectuum simul & dehiscebat tremula in abyssum sui nihili, & natabat sublimis tumore latitiæ, nec tamen succumbens tantæ dignationis miraculo animus inueniebat quid responderet, nî succurrissent verba Humilitatis purissimæ: *Ecce ancilla Domini*. *Ecce* (: inquit) *ancillam, ecce mancipium tuum à Rex Maiestatis aternæ, tua sum, tuam me profiteor, tua ero*. Plura parabat dicere, sed continuò reuoluebatur in eandem paræmiam sobria liquefcentis animulæ ebrietas, & infans amor quod eloqui non poterat, balbutire gestiebat. Certè non errauit, *quicumq; ille fuit puerum qui pinxit amorem*. Sed quæ olim in Cana Galileæ nuptijs interlocuta fuerat Virgo Mater hic minimè tacuit, eò vel maximè, quòd sola ipsa huius Sponsalitij paranymphea aderat, sola Rosam promouerat, Filiumq; pronuba exorârat. Itaq; & ipsa nouellam Sponsam affata, *Vide* (: inquit) *ò Rosa eximium fauorem quò te Filius meus dignatus est*. Epithalamium id fuit, quod non Davidis plectro, sed ore proprio Sponsi Mater accinuit. Laborabat sub gaudiorum mole, nec se capiebat Rosa, experta, verissimè dici: *Sit licet ignis amor, non leue pondus habet*: Aestuabat, ardebat iam palmæ oblita Virgo, pro qua successerat *Lilium conuallium* tam speciosum, tam pretiosum. Deniq; iucundissimum ipsi erat, quòd eodem die ac loco & palmam & Rosam amiserat, utpote post hoc connubium non ampliùs sua.

Subsecuta deinde opulentissimi Sponsi nuptialia antidora: nam ut in examine (: de quo infra Cap. XIV.) fateri

teri compulsa fuit) de intimis Gratiae thesauris rara quædam Seraphici amoris incendia descenderunt in Rosam, secumq; traxere longo ordine diuitias inæstimabiles variorum charismatum, quibus animam Sponsæ ditabat, illustrabat, ornabat profusa tam nobilis Sponsi magnificentia: pignora erant, & monilia, dataq; fidei pretiosi arrhabones humanis verbis inexplicabiles, vnde & Virgo de his à suo examinatore pressius interrogata, nec negare ausa, simplicissimè per solam vocabulorum inopiam se excusauit.

Porro vt iugiter tanti beneficii Mnemosynon versaretur ante oculos, domum reuersa cœpit extemplò cogitare de constando connubiali anulo, quem cordis digito in nuptiarum suarum gratam memoriam gestaret perpetuam ac palam; aduocatoq; in consilium vnico germano Fratre paucis desiderium suum explicuit, mysterium celauit. Ille arrepto circino iustam anuli formam delineauit in charta, debitæq; proportionis addidit palam figurâ circuli cui Virgo paruulum *Iesum* optarat insculpi. Supererat vt de lemmate quod anuli conuexo inscriberetur per gyrum, conuenirent. Hic Rosa Fratrem intuita exspectabat quid ille decerneret. Is nil moratus, veluti si arcanis Rosæ nuptijs arbiter interfuisset hæc eademmet verba circumscripsit anulo: *Rosa cordis mei, tu mihi Sponsa esto*. Obmutuit, stupuitq; repentino gaudio Rosa vt vidit non de liberatione sed impetu raptim incidisse Fratrem in symbolum, quod vnica ac propria totius negotij erat periocha, in lemma quod Christus ipse dictarat & ore proprio gratiosè expresserat: sciebat, illud humanitus non potuisse aut Fratri suo aut vlli mortalium innotescere, altioris id instinctus fuisse dictamen, proinde nouo iubilo subsultans in dulcissimo prodigio ludentem Sponsi manum tacitè adorabat. Anulum deinde ex hoc iam chariorem eiusdem maioris hebdomadæ feria V. in Ecclesiâ detulit, magnisq; preci-

precibus à P. Sacrifia impetrauit eidem locum in arcula, quæ illo triduo SS. Eucharistiæ repositorium est & sepulti Redemptoris monumentum. Illic volebat suum hoc amoris pignus tantisper cum Sponso mortuo tumulari, vt cum eodem resurgente pariter rediret ad lucem, sic protestabatur amabili Sponso, se nec illo defuncto solutam esse à lege Viri, cum quo & mortis thalamum cupiebat sortiri communem. Denique solemnī die Paschatis hic anulus ex triduano Dominici sepulchri contubernio iam sacratior gratiorq; ad Rosam redijt, & coram illamet Diuæ Virginis Imagine Rosariana vbi contractum fuerat S. Connubij foedus, cordialem Rosæ digitum inclusit, non sine nouo prodigio, nam ceremonia tam secreta fuit, quòd nec proximè Virgini adgeniculans Mater quidquam vel minimū aduerterit, quamquam ad omnia Filix intentissima.

Post Virginis obitum vnà cum reliqua ipsius permodica supellestile anulus remansit penes Vxorem Gundisalui Quæstoris, istudq; memorabile accidit anno 1618. mense Februario in dicti Quæstoris ædibus. Vir ille sanctitatis fama conspicuus (: de quo supra in fine Cap. VIII.) dum Rosæ defunctæ coronam spineam deuotionis ergo contrectarat, diutiùs hæsit in anulo, quem vt sibi à D. Maria de Vfatégui porrectus fuerat, modicæ chartæ inuolutum, stringebat intra pugnum. Et en, quidquid sentire ex attractu coronæ coeperat, longè validiùs sensit ab anulo, supernos attractus præpotentes, dulces, delicatos, lumina inusitata, excelsa, pretiosa; ardores Spiritûs vsq; ad animæ liquefactionem efficaces, blandos, subtiles. Videbantur analecta esse nuptialis cōuiuij quo Rosa cum Sponso fruebatur in Cælis. Paulò post hic seruus Dei velut internis stimulis impar erupit in voces: *Benedictus Deus, qui tam mirabilis est in Rosa sua. Laudetur SS. Trinitas cui in excelsis Gloriæ fastigio inter præcipuos Paradisi Cines assistit Rosa. Rosa dilecta! Rosa praelecta! Rosa candidissimi Agni Spōsa!*

magna

magna es, sublimis es, gloriosa, præfulgida, incomparabilis es in Triumphali Sanctorum agmine. Per multa similia ru-
 etabat idem talem corde pleno, affectu suauissimo, at cor-
 pore prorsus immobili, nam intus ille iubilis ut linguam
 & os sedentis laxauerat, ita reliqua membra ligarat, adeo
 quod nec valebat de sella surgere nec brachia aut crura
 stupore obrigida mouere. Dextra manus quæ anulum im-
 plicauerat, sedis costæ laterali innitebatur, at fixè, velut ac-
 clauata. Sinistram cordi apposuerat contra immodicam
 palpitationem exundantis lætitiæ, sed & illa insolubiliter
 videbatur adglutinata: conabatur semel iterumue fortu-
 natus homo se excutere de sedili, disjungere tibias, aut
 brachia saltem attrahere, nec quidquam horum poterat.
 Interim pergebat lingua, quæ sola mobilis erat, prosequen-
 batur nunc Dei nunc Rosæ encomia, dum simul persona
 tota cum nimia interni sui gaudij, vehementia luctabatur.
 Quæstoris vxor deuoto spectaculo iam diu oblectata ma-
 ritum aduocat quasi ad perfunctoriæ salutationis debitum
 officium, nam hospes qui confederat illis in ædibus notis-
 simus & charus erat. Accedens Quæstor Gündisaluus ho-
 minemque comiter salutans vidit hunc minimè assurgere,
 mox vidit nec posse. Hic resalutandi pariter & excusan-
 di formulas tentabat proloqui, sed frustra, relabebatur
 enim in eadem Dei & Rosæ præconia, inde querula su-
 spiriorum dulcedine accusabat violētiam gaudiorum quæ
 felicitis Rosæ anulus ingerebat: ô (: inquit) *amores ! ô qua
 flammule ! qui feruores ! quam torrent suauiter, quam re-
 punt tenerè per medullas ! ô ignes, ô delicia, ô anima astu-
 antis vincula tenacissima, nexus perincondi, amplexus inelu-
 etabiles !* Gündisaluus commiserantis & gratulantis affe-
 ctui medius rogabat, num placeret anulum (: unde hæc
 lætitiæ tormenta erant) manu-mittere, ut illo sedilis &
 gaudij se carcere expediret ? tacuit homo, demum annuit,
 sed explicare manum implexosque exserere digitos nequa-
 quam.

quam potuit. Auxilium offerebat Quæstor: admittit. Mirum dictu; brachium Viri Gundisaluus obstipum reperit ac inflexibile, dexteram algido sudore madidâ vt in mortuis solet, digitos circa anulum ita contortos, implexos, nodosq; incuruos, vt vi ac morâ opus fuerit qua sensim explicarentur. Hinc itum ad sinistram, quæ vt pectori auelleretur, pari anhelitu laborandû fuit. Sic deposito anulo cessarunt gaudia cesserunt vincula, surrexit liber è sella qui paulò ante tenebatur in captiuitate lætitiæ nuptialis. Videbatur anulo restituto simul exuisse manicas & pedicas, quâquâ fateretur, longè melius sibi fuisse in illo deliciarû compede, quàm in miserantis Amici præpropera solutione. Deniq; fidem silentij obsecrauit & abiit. Quòd si in aliena manu tanta potuit nuptialis Rosæ anulus, ipsamet nuptiæ quid non potuerint in Sponsæ anima?

C A P V T XII.

Rosa perpeti orationis studio miram assequitur cum Deo vnionem.

SI, qui adheret Domino unus Spiritus est cum eo, I. Cor. 6. fas erit inde conijcere, quàm sublimem vnionis Diuinæ gradum Rosa attigerit, quæ orationis familiaritate iugiter soli Deo inhærebat. Adhuc infantem interna vnctio Spiritûs orare docuerat, feruorem indiderat quem plerumq; nec ipsa nocturna sônia distrahere ad alia obiecta potuere. Hinc sepius per noctem audita est dormiens numeratò totidemq; verbis reddere precatiunculas

quibus per diem prolixius inuigilârat. Crescebat cum ætate religio, cum staturâ corporis eleuatio mentis in Deum, nam & pueriles ipsius annos exercebat seria meditando frequentia, subitîsq; & præcocibus incrementis excelsa contemplationis peritia eò maturuit ac pertigit, vt circa duodecimum ætatis annum deprehensa fuerit iam conscēdisse illum Orationis gradum, quem *Vnitium* mystica Theologia appellat. Sic compertum in examine de quo infra Cap. xiv.

Porro duplici assueuerat orandi modo: prior isq; præcipuus erat, quando exoccupato simul tum corpore tum animo quietissimè se totam collegerat ad loquendum cum Deo; alter, quando inter labores manuum externasq; occupationes mentem immobiliter fígebat in Deum. Priori (: vt supra attigimus) cuiusuis diei naturalis horas non minus. 12. seposuerat. Posterior ei continuus erat, & quantum nostræ mortalitatis via permittit, nulli interruptioni obnoxius, nisi dum ad horam patiebatur visiones de quibus Cap. seq. Rarum hoc & singulariter admirandum in Virgine donum fuit omnipotentis dexteræ, quòd siue dormiret Rosa siue vigilaret, numquam & nusquam mentis suæ oculo elabebatur cœlestis Sponsi præsentia; dum nebat, texebat, suebat, dum sericos acu pingebat flores, dum alijs colloquebatur, dum comedebat, legebat, ambulabat, in templo, in horto, domi, foris, in platea, in cellula, ubiq; obuersabatur interno obtutui cominus (: at velut in speculo) amabilis illa Maiestas cui seruiunt Angeli, cuius pulchritudinem sol & Luna mirantur. Et, quod omnem tum rationem tum admirationem supergreditur, occupabat. Diuina hæc præsentia interiores Rosæ potentias sine notabili abstractione à sensibus, ità quòd dum Deo loquebatur intus, absq; impedimento simul alia quæq; necessaria cum domesticis tractaret foris, respondebat ad interrogata seriatim, appositè, ordinatè, conuer-

fabatur expedite, disponebat agenda, agebat disposita, facilitate, attentione, promptitudine qua solent qui vnicè negotijs exterioribus intendunt. Nempè in S. Catarina Senensi simillimum gratiæ paradigma præcesserat, quando streperis culinae officijs damnata construxit in intimo animæ recessu felicissimum illud imperturbabilis quietis cōclauē quò nulla exteriorum tumultuum importunitas penetrabat. Sic Rosa tota foris & tota intus, dum exterius satagebat circa frequens ministerium, simul in secretissimo cordis thalamo deliciabatur cum Sponso. Hinc pluries in ipsa obseruarunt Quæstoris filiola, quòd cum inter suendum Rosa filum & acum trahebat sursum, vnà cum brachio videbatur & animus eleuari in extasim, breuiq; morula in sublimi suspensa manus redibat ad opus, nec aberrabat acus à puncto quem reliquerat.

Aliud æquè mirabile huic dono accessit in cumulum, quòd inter orandum non facilè mouebatur, obiectis quæ ad ipsam minùs pertinebant, tamquam si ad hæc sola obtorpuissent Rosæ externi sensus. Hinc sæpè in ea notarunt religiosæ foeminae, quòd sicubi in populosissimo Templo angulum occuparat è regione maioris Aræ attentius precatura, sedebat per horas immota, defixis in Aram oculis, nec prætereuntes videbat, nec ad repentinos circa se strepitus descedebat obtutum; imò si quid videbatur rectà incurrere in pupillas non attrahebat noctu cilia, non clauderat palpebras, non declinabat vultum; vt putasses cæcam esse, quandò vel maximè aquila erat acie irretorta suum admirans solem. Hinc & illa Virginei sui corpusculi rupea immobilitas dum in Templo, in Sacello Rosarij, in domestico Oratorio fundendis precibus vacabat: nam quo loco situsq; ad orandū initio se cōposuerat, eodè post horas, post diem integrum, post solidum cum die binoctium reperiabatur omnino inuariata. Sic Gundisalui vxor quandoq; pomeridiana hora quarta inuenit Rosam eodem genicula-

niculatam angulo quem in puncto meridiei ad meditationis exercitium occupârat . Sic in Ecclesijs, vbi aut 40. horarum supplicationi , aut aliàs SS. Eucharistiæ Sacramentum prostabat adorandum , Rosa quem summo manè infederat loco velut impetrata durabat in vesperam sine refectione, sine motu . Sic in Quæstoris domestico Oratorio, cum sese occludebat Rosa à manè feriæ V. vsque ad Sabbathum (: nonnumquam & vsque in Dominicam) primò rogabat D. Mariam de Vfatèguì , ne toto illo temporis interstitio euocaretur quidquid demum occurreret, si vel ipsa Rosæ Mater veniret Filix locutura : causam rogata candidè respondit, se toto illo temporis spatio immobilem de pauimento surgere in pedes non posse, ne quidem ad Oratorij ianuam aperiendam si quis fortè pulsaret ad limen .

Tres dietim horas selegerat , quas sigillatim manè, meridie , vespere solis gratijs Deo reddendis insumebat . In his affectu tenerrimò relegebat singula Dei in se beneficia, mirabatur eius erga se dignationem, adorabat munificam prodigamq; tot donorum , gratiarum, charismatum liberalitatem ; & sanè habebat quotidie noua quæ ex pugillaribus attentissimæ gratitudinis recitaret . Familiare quoq; sibi effecit quoddam orandi genus altissimum, luminosum, ignitum , quo nominatim gloriosa Dei attributa mente peruoluens , singulis proprium latriæ cultum exhibebat . Verùm-tamen vt in his alieno potiùs quàm suo fideret ingenio , pium doctumq; è Societate Iesv Theologum adiit, Diuinorum epithetorum sinceram è Sacris Paginis nomenclaturam sibi in epitomen colligi flagitauit . Obsecundauit ille, collegitq; pluscula, sed Virgini pro affectûs magnitudine videbantur pauca, fascem cupierat non fasciculum; itaq; à P. Magistro F. Ioanne de Lorenzana grandius supplementum obtinuit , donec summa numeri ad . CL. pertingeret . Hæc ordine aptissimo in XV. decades secreuit, vniciq; decadi versum subiecit : *Gloria Patri &c. Si-*

ut erat &c. Porro affirmabat hanc orandi formulam terro-
ri esse dæmonibus ; utiq; numquam id affirmatura nisi ex-
perimento suo comprobasset . Deniq; in his Dei attribu-
tis pene tota mouebatur sui cordis systole atq; diastole ,
tantumq; in ijs profecerat , ut modeste aliquando fassa sit ,
etiam inter nendum ad singulas acûs puncturas nouo se
Deum encomio compellare .

Insuper notatum fuit, adeò Virginem orationi adhæsisse,
ut familiares sermones quibus erga alios utebatur , simul
vim orationis plerumq; continerent , quodq; interrogan-
tibus responsum dabat simul idioma erat mentis in Deum
eleuatæ ; exempli gratia , si cum alijs foeminis hortum in-
tranti operosius laudabatur viridarij amænitas , responde-
bat comiter : *Venustus ac pulcher est hortus , Deus illi flores
adaugeat* . Verum ipsa præcipuè indigitabat hortum ani-
mæ , cui à Deo precabatur florida augmenta virtutum :
sicq; ingeniosè vni paræmiæ duplicem sensum includens
altero satisfaciebat alloquenti , altero Deum alloqueba-
tur ipsa . Obseruatum id crebrò, inq; diuersissimis materi-
js, quarum vix vlla effugiebat hanc spiritualem & sanctam
æquiocandi solertiam , ne quid Rosæ ori excideret quod
non esset oratio .

Accidit quòd die quadam ab Ecclesia domum rediens,
ut sensit malè sibi esse , pulmentum sibi ex aqua tritoq; pa-
ne obiter parare constituerat , utq; focum accenderet , ar-
dentem aliundè titionem fuerat mutuata . Dum reuertitur,
audit è pergula canoram auiculam . Substitit Rosa non
dedignata volucrem auscultare tantisper utpotè Dei lau-
des (: ut sibi imaginabatur) modulo suo cantillantem . Per-
gebat auicula modulari , variabat lepida vocis argutias ,
duplicabat gargarysmos ; at Rosa subito pudore in se re-
ducta obiurgauit seipsam : *quid?* (: inquit) rudis ista
bestiola meum suumq; Creatorem laudat pastûs sui obli-
ta , & ego parando mihi cibo occupabor ? quantulum est
quod

quod huic donauit animalculo naturæ Autor, & en totis præcordijs totis viribus ei rependit laudis tributum, ego verò de pastu cogito, nec sollicitor quid retribuam Domino pro omnibus quæ retribuit mihi! Hinc conuersa ad titionem quem manu gerebat, vnde quaque extinctum vidit, mirata se tanto tempore illic substituisse, dum totus paulatim extingui titio potuerit: credebat, se nec dimidium horæ quadrantem in auiculæ musica hæsisse attentam, & forsitan horæ integræ effluxerant. Proinde in se denuo retracta, capit & ipsa laudare Deum, eo feruore qui sensim Rosam abripuit in extasim, nec ab ea vsq; ad vesperam sese explicuit, cum manè tribus circiter ante meridiem horis auiculæ melodiam cœpisset auscultare.

Paradoxum foret, si Rosa quod alijs tanto conatu suadebat, sibimet ipsi non æquè seriò persuasisset. Quidquid hortabatur proximos, quidquid inculcabat, vnum orationis studium erat. Ad huius exercitium Scholamq; inter alios Ferdinandum germanum suum fratrem nitebatur allicere, promittens laborem exiguum, fructum eximium, atq; inæstimabilem fore. Ille de fructu nil dubitans laborem difficultatemq; maiorem credidit quàm Soror aut prædicabat aut credi vellet; quidquid de saluberrimi exercitij facilitate iactabat Virgo, meras ipse hyperboles fœminæq; simplicitatis fabulas interpretabatur: nec tamen destitit Rosa docere fratrem, qua methodo ac ratione inter medias seculi occupationes animum teneret in oratione defixum. Pari sollicitudine pios libros, quotquot de Oratione peritiùs tractare nouerat, & legebat ipsa & legendos alijs facunda efficacitate consulebat. In his eminebant Ludouici Granatensis erudita Opera de Oratione ac meditatione, quibus assiduè euoluendis reuoluendisq; Rosa hebdomadam diuiserat, varijsq; colorum signaculis quid sibi quoquo die legendum distinxerat. Nec minore cura PP. Confessarios quotquot adire poterat, monebat, rogabat,

bat, obsecrabat, vt suos poenitentes omni suadela & arte inducerent ad mentalis orationis subeunda gymnasmata, aduerterent magnam hanc esse pharmacopeiam omni aduersus peccata antidoto instructissimā, orationis vsu purgari spiritum, alligari animarum vulnera, hac aperiri cellam Sponsi vnguentariam, omnisq; ceromatis apothecam. Nec Rosa his contenta, ipsos quoq; Diuini Verbi præcones frequentissimè compellabat, suos auditores ad orationis exercitamenta inflammarent, vsum piarum meditationum populariter inueherent, disciplinæ huius vtilitatem, suauitatem, præstantiam omni argumentorum vi, totoq; facundiæ suæ connisu priuatim ac publicè commendarēt. Peculiariter afficiebat Rosam Parthenici Rosarij deuota recitatio, at sub eo ritu ac norma, qua illam primitus ex instructione Deiparæ tradiderat mundo S. Pater Dominicus, hoc est cum innexa decadatim consideratione mysteriorum nostræ Redemptionis. Amabat hanc precandi formulam, quòd in ea coaluissent mentalis simul & vocalis oratio, singulaq; huius partes & affectus, petitio, vox laudis, gratiarum actio &c. Hinc Rosa velut armillam brachio circumligarat paruum ex minutissimis orbiculis Rosariolum, cuius granula occultè trahebat ad singulas salutationes Angelicas, etiam vbi alloquijs & conuersationi se reperiebat implicitam. Profuit sanè permultis hoc exemplum Rosæq; ardens hortatio, vt frequentandis Dei laudibus familiaritèr adluescerent.

Quinimo hic orandi affectus in Rosa tantæ energiæ fuit, vt vel ipsas insensibiles plantas, stupida ligna, mutoq; stipites ad laudem, reuerentiam, adorationem Deo exhibendam mirabiliter inclinârit. Rem adfero inauditam. Matutino crepusculo Rosa de more ad cellulam suā anachoreticam reditura, simul vt horti ianuam pandebat, eminus conspectas arbores, virgulta, herbulas omnes inuitabat vt secum benedicerent Creatori : *Benedicite vniuersa
germi-*

germinantia in terra Domino. Et ecce, moueri subito in euphoniā & concentum ramusculos, collidi frondibus frondes, plaudere omni ex parte streperos foliorum susurros, motitari humiliorum plantularum capita; ipsa legumina, flores, frutices, corymbos agitatione varia quodāmodo animari in placidā hymnidici murmuris harmoniam. Neq; id satis: ipsa simul arbuta flectebant ramos in terram velut osculatura solum in Conditoris sui reuerentiam. Accidit, quòd mane quodam probatæ fidei persona se Rosæ hortum adeunti comitem adiunxerat; vix intrarant, cum ad solitum Rosæ inuitatorium vidit certatim incuruari arbores, adeo quòd summitatum cacumina terram attingebant lentèq; verrebant solum, velut profundæ adorationis solemniſſimo ritu. Obstupuit Socia, præsertim quòd videret id Rosæ peregrinum aut nouum non esse, nam aliundè quoq; innotuit huius prodigij conspicua frequentia, vt illud Virgo nec celare conata sit, nec negare potuerit, subiungebat tamen: vide, num amari dignus sit ille admirabilis mundi artifex! vide an laudari, coli, adorari mereatur à nobis illa æterna Maiestas, cui terrenum, hoc germen, rudes trunci, cuncta vegetabilia modo quo possunt laudis canticum adfusurrant, pronæ venerationis tributum pendunt?

Aliud suppar, & finio. Anno qui Rosæ vltimus fuit, per totam Quadragesimam Sole occiduo aduolabat propè aduersus Rosæ cubiculum auis paruula sed mirè vocalis ac sonora, ibiq; vicinæ arboris frondem occupabat, quasi dato signo eruptura in cantum. Rosa conspecto hoc suo vespertino choraule sese & ipsa parabat ad laudes Deo modulandas. Exin quasi tessera data inuitabat auiculam metro quod hunc in vsum composuerat, ferè hoc sensu.

Laxa fibras philomela, dulce prome canticum,
Pangat hymnum vox anghela, collaudemus Dominum.

Tuum

*Tuum lauda Creatorem : meum ego Salvatorem
Deum vtriusq; nostrum collaudabo . Pande rostrum ,
Pande guttur cantillando . Alternantes concrependo
Melos demus vocibus .*

Confestim auicula tractu vocis lenissimo inchoabat argutulam cantilenam, ac sensim vocalior assurgebat in epiphonema, multisq; flexibus sinuosam absolvens Oden, Virgini cedebat vicem . Tacenti auiculæ succedebat Rosa , ac voce qua præstabat tinnula suauissimaq; prosequebatur Diuinas laudes ingenio ad miraculum fœcundo ac prompto : Mox conticescente Rosa ex abrupto carmen suum resumebat auicula, duplicabat intercisiõnum minutias, tremulis arteriõlis volubiles confundebat accentûs , deprimebat, eleuabat, torquebat facillimas lubricæ vocalæ argutias, & repente velut ad pauas signum interquiescebat . Subintrabat continuo æmula vox Rosæ , instaurabat iubilum , magnificabat ineffabiles perfectiones altissimi Numinis , attollebatur vrgente spiritu , languescebat facundis suspirijs, demum prærupto suo silentio antiphonascum suum reuocabat ad cantum . Ita in Dei laudibus alternabat Rosa & auicula, idq; non perfunctoriè, sed integro labentis horæ spatio, tanta lege ac ordine , vt canente auicula ne quidem mutiret Rosa, & vicissim Rosâ modulante auicula attentissima nec pipiret; tandem in puncto horæ sextæ pomeridianæ quasi perfuncta officio auolabat, postridie ad idem reditura . At Virgo piorû rythmorû extempore ferax Odæi prosceniû claudebat hoc ferè epilogo.

Vt amem te ò Rex me cuncta stringunt iura ,

Cum tu Creator sis , & ego Creatura .

Deinde ad adstantes socias lepidè conuersa subdebat :

Auicula me deseris, fugit succentor meus ,

At semper mecum permanens sit benedictus Deus .

Latine

Latinè hæc satis efferri non possunt , quæ in Hispano Rosæ idiomate proprijs numeris venustius illigabantur . Sat esto , quòd Rosæ ea Orationis vis fuerit, qua volucres coeli, qua terræ germina sibi attraxit in alternam adorandi societatem .

C A P V T XIII.

Rosa desolatorijs visionibus exercetur , ac horrendas alterius vitæ pœnas degustat .

QUod auro fornax, id iustis & electis tribulatio : præcipuè vbi obuiandum periculo ne magnitudo reuelationum extollat . Hæc Paulo hæc Rosæ fornax diuinitus obtigit, sed diuerso igne . Illum stimulus carnis subiecit colaphis, hanc carbones desolatorij coxerunt in internæ derelictionis pœnali sartagine . Vterq; præ angustia clamauit in cœlum, vtriq; responsum cœlitus : *Sufficit tibi gratia mea , nam virtus in infirmitate perficitur .*

Ad rem . Vsq; ad gradum perpetis cum Deo vnionis Virgo ascenderat, simulq; coepit in dies singulos atrocissima pati mentalium obtenebrationum interualla, quæ non obiter sed solidis plerùmq; horis eò deprimebant miseram, vt sæpè nescierit in gehenna esset, an in Purgatorij duro carcere, vel quibus in ergastulis retrusa caligaret . In ictu oculi se inueniebat illic, vbi nulla suauissimi Numinis memoria, nullus Diuinæ præsentiae gustus, nullum cuiuscûq; solatij aderat vestigium, umbra, mentio . Desertum erat obscuritatis, languoris, hebetudinis; regio mortis, nox

deliquij, antrum ultimæ calamitatis; in eo quàm longinquus Virgini Deus, tam procul ipsa sibi. Iacebat sub tenebrarum immani pondere gemens Rosa, nec ad obiecta supernaturalia, imò neq; ad naturalia sese valebat attollere. Conabatur intellectus vel minimas Deitatis arripere, stricuras, sed omne lumen diffugerat, cupiebat voluntas amare, sed congelata obtorpuerat, laborabat memoria è multis aliquam saltem præteritorum fauorum imaginem, menti adducere, nec poterat. In pænarum cumulum recordabatur velut in nebula, aliquando se nouisse Deum & dilexisse, at sentiebat se nunc eundem nec nosse nec diligere, vtpote quem velut peregrinum, absentem, alienum, extraneum, vixq; de fama notum eminus, raptim, tenuiter adniçtabat. Hoc verò omnium molestissimum erat, tam procul exulare à Dilecti notitia. Tentabat deinde, saltem per vestigia illum quærere in creaturis, sed nec illa nec istæ apparebant sub lineamento quo solita analogia repræsentarent Creatorem. Interea terror & angor strenuè obibant partes suas. Vociferabatur cor afflictum, *Deus Deus meus, ut quid me dereliquisti?* Sed in vacuo animæ exinanitæ respondebat nemo, nec echo quidem. Redibat ad luctam conatum, sed consopitus erat omnis affectuum, calor, obtusa omnis ratio, omnem vndiq; pietatis sensum profundissimus obsederat lethargus. Quid ageret sub his tormentis Virgo tam diuulsa in se, quàm auulsa à Dilecto?

Verùm præcipua dolorū pars erat, quòd hi faciem præferebant quasi æternum duraturi, nec finem vllum promittebat vasta miseria, nusquam patebat huius labyrinthi exitus, videbatur quasi muro adamantino obstructum effugium: vnde perplexa Rosa non reperiēbat quo ab infernali *pæna damni* hanc suam infelicitatem secerneret. Conabatur inde venari tristissimum solatium, quòd putabat sub his cruciatibus se sensim interituram, neq; enim videbantur

bantur tales , qui sine totali destructione fragilis creaturæ subsistere diu possent ; at tunc ei importunè occurrebat animæ suæ immortalitas quam nulla poenarum vis interire nullus infernus extinguere sufficeret . Interdum prope erat , vt inconditos clamores ederet imploratura auxilium , at reprimebat cassos impetus , memor neminem posse calamitati tam inexplicabili succurrere , sibiq; deesse verba idonea quibus eam proximis vel tenuiter adumbraret , sed neq; in orbe toto reperiri Doctorem adeo disertum , profundum & eruditum , qui huius poenæ gravitatem aut speculatione assequi , aut animo complecti posset .

Per ipsos quindecim continuos annos quotidie minimum semel in hanc desolationis caliginem demergebatur pauens ac tremens Rosa , nec minus horâ integra (: quandoq; diutiùs) palpitabat sub hoc agone ; tantùmq; absuit quòd vlla hos terrores mitigârit affuetudo , vt penè adauxerit : nam vbi postridie Virgo relabebatur in idem chaos , denuo sub eadem luridæ æternitatis larua recurrebât horridi pauores , nec mærenti suggererat ligata memoria , quòd inde pridie emerfisset . Vnde iterum anima eius in malis tæbescibat , iterum diffugiebat omne euadendi solatium , iterum exanimem abyssi operiebant , & Rosa tota iam spinea imò spina rigebat in ima voragine tribulationum . Attamen quibusdam diebus velut per rimulam irrepebat afflictæ lentum tantillæ spei crepusculum , quo vtcumq; suspicaretur hoc animi supplicium sine nō cariturum , sicq; videbatur Purgatorij magis quàm inferni ærurnam sustinere . Nihilominus & tunc sæuissimè vrebat Sponsi morosa absentia , affligebat durissimi exilij cruda relegatio , contristabat amarissimæ viduitatis longum diuortium , & quod reliquam superabat molestiam , tunc quoq; conabatur & nosse , & amare , sed neutrum poterat ; cæcutiebat mens confusa , oberrabat , palpabat , impingebat orbata lumine , quærebat , pulsabat , gemebat spiritus contribulatus nec

audiebatur, exaruerat cordis fundus, distabuerat vigor, nulloq; vitali motu, nullius affectûs sapore Diuinis afficiebatur. Denique tantus fuit istarum figurarum horror, tanta horroris acerbitas, quòd Rosa tametsi ad quiduis sufferendum à teneris impauida vnicum hunc amaritudinis calicem à se transferri enixè petierit tamquam suis viribus omnino superiorem ac simpliciter intolerabilè; vnde rogabat Sponsum, dignaretur potiùs ipsam deducere per vias ordinarias suorum electorum, nec vltra permitteret sic amantem dehiscere ad ima profundì, vbi non est substantia. Et reuera, vt durum sit animam separari à corpore, durius reuelli à semetipsa, durissimum fuit reuelli à Dilecto post experimentum vnionis ac suauissimorum amplexuum, siquidem Augustino teste quod corpori est anima hoc amanti animæ Deus, illiq; minor est poena ab amando quàm ab amando desistere aut repelli. Nihilominus Rosa vt agnouit sic placitum esse ante Deum, virili planèq; heroico spiritu amplexa tormentum, *non mea* (inquit) *voluntas fiat sed tua*. Sicq; constanter ad securæ diei similem equuleum sese præparabat, numquam secuta in quam horam is pauidam exspectaret.

Tam abstrusa, monstifica, ignota erat harum desolationum figura & natura, vt vix demum reperti fuerint Theologi perspicaces & gnari, qui de illarum crasi quidpiam certi præsumerent diffinire. Initio Rosa diuersos adibat Confessarios, si quid fortè remedij, leuaminis, aut saltim consilij dare nossent: at illi nec satis assequebantur quid Virgo dicere conaretur, nec peregrina tot ænigmatum, inuolucra cogitatu sat capaci adæquabant. Vnus respondebat, aut deliria esse, aut insomnia. Alius rem ad lemures & spectra imperitè reijciebat. Non defuit qui nugas, aut sanè dæmonum præstigias & vana terriculamenta suspicaretur. Aequiores fumantis melancholiæ seu atræ bilis esse paroxysmos interpretabantur, quòdq; cerebrum
inedia

inedia ac vigilijs attenuatum nimis patēret horridis lūridorum phantasmatum incurfibus, ex aduſtione vitiati ſplenis, aut fœculenti ſanguinis corruptione. At Roſa, quòd certò ſciret hanc calamitatem non eſſe à corpore, triſtabatur grauius, neminem ſe inuenire qui vel morbum intelligeret, vel in tantæ perplexitatis charybdi cynoſuram aliquam oſtenderet. Ingemiſcebat deinde rudirati ſuæ, quòd præ inopia ſterilis (: vt putabat) ingenioli ac loquendi inſcitia non poterat afflictionem ſuam idoneis vocabulis explicare. Sic ergo incurabilitatis ſuæ culpam imputabat totam ſibi. Vnum ſupererat exile ſolatium, quòd Mater ſicut auxiliari non poterat, ita hos Filix terribiles agones penitus ignorabat, turbanda aliàs & turbatura ſi reſcuiſſet. Verùm & hoc Virgini tandem nouæ vexationis auſtarium fuit : nam vt aliquoties in vultu Filix notarat parens, eam ſtatis horis interdiu expalleſcere, angi, palpitare, ac mortuali ſudore propemodum congelari, importunè quod repentinæ ægri tudinis id genus eſſet, curq; diſſimularet rogabat, & quò minùs Filia quid pateretur eloqui poterat, eò vehementiùs miſeram vrgebat mater, inſtabat, adiurabat, quaſi internum tormentum alio tormento inueſtigatura. Excusabat puella, ſeiſam non ſatis habere, compertum quid in anima ſua pateretur, ſed Mater ſonticum morbum ſuſpicata (: præſertim quòd eadem nonnullorum Confeſſariorum erat ſeu criſis ſeu imperita credulitas) Medicum aduocat, eiſq; curæ inutili ſuam tot vndiq; tribulis vexatam Roſam commendat. Proteſtabatur innocens Virgo, incaluſum huiuſmodi ſumptùs, labores, tempus diſperdi, malum ſuum nequaquam in corpore ſed intus in ſpiritu ſeuire ac dominari ; ſed audita non fuit. Proinde videns fruſtra ſe repugnare, nec fidem ſuis diſtis haberi, tacuit ac medicinæ ſe ſubiecit quam ſciebat nil profuturam. Nempe hoc vnum adhuc defuerat tantæ ſuæ calamitatis faſtigio, quòd inſuper cogeatur velut

malè

malè sana ad nauseam catapotia , pharmaca , phlebotomias admittere .

Nitebatur subinde Rosa , vbi de hac suæ desolationis fornace fidentiùs loquendum erat, adinuenire similitudines quibus vtcumq; rem adumbraret , sed mox fatebatur se actum agere . De igne hoc nostro elementalì aiebat ridendam esse comparationem , quia is nonnisi *pænam sensus* quam vocant infligere aptus est ; Videbatur aliquid huius attigisse Augustinus, quando inuenit se longè à Deo *in regione dissimilitudinis*: aliquid item in se percepisse Rex citharædus ps. 54. quod appellauit *pusillanimitatem spiritus, & tempestatem*, vel quod Paulus emphaticè vocat *anathema à Christo*. Sed plura sentiebat in se Rosa , quàm verba ista exprimerent , aiebat terrores illos horridasque imagines talem sibi inferre dolorem , qui millies & milles sufficeret cor , vitam , animam eripere , nec se illi sustinendo parem vnuquam fuisse , nisi quatenus prodigiòsè manu Omnipotentis conseruabatur in vita . Fuit qui putarit Virginem deduci à Deo per scrupèas vias S. Antonij Eremitæ, quem inferni monstra formis terrificis agitarunt . Verùm is conflictus erat non afflictio , aut fuga roboris . Creditur S. Catarinam Senensem aliquando idem quod Rosa passam esse ; de B. Henrico Susone id velut comperitum tradit historia . Visa est ad huius doloris aliquam similitudinem aut proportionem assurgere ille què à mordacissimis scrupulis patitur mens delicata , cum Cœlum sibi vèctibus clausum, Deum hostiliter auersum, infernum rictu immani patulum suspicatur anima sibimet ad modicum derelicta . Deniq; viuaciùs hunc Rosæ cruciabilem horrorem effigiabat Christi in supremo Iudicio vultus asperatus, rugosus, ipsiq; dæmonibus terribilis , dum cogitatur velut iam-iam dicturus horrendum illud: *Ite maledicti*. Has rugas, hoc tonitru, hunc pauorem videbatur sibi experiri mæstissima Rosa dum laborabat sub hora sui deliquij,

quij, adeo quòd post varias at numquam sat æquas comparationes effari aliud non poterat quàm : *dolores inferni circumdederunt me, præoccupauerunt me laquei mortis.*

Bis Virgo compulsa fuit edicere alteram huius scenæ partem, videlicet qualis sibi soleret post huiusmodi nubila illucescere Phœbus; fieri enim non posse quin Sponsus ille dulcissimus post tam diram ac tenebricosam eclipsim insigniter recreet ac reficiat animam tot doloribus humiliatam. Ad hæc verba maluisset Rosa aut tacere, aut arte, ac dissimulatione sermonem aliò deflectere, sed vt vidit euadere se non posse, ingenuè candidèq; falsa est (: quantum per congruorum vocabulorum penuriam potuit) magnalia Dei, quæ sibi post tristissimam ærurnam obtingebant, vt in momento se videbat repositam in vnione qua exciderat aut se excidisse putarat, vt repente sentiebat totam simul animam collucescere & inflammari. Verùm de his opportuniùs in descriptione examinis Cap. seq. Libeat interim mirari lusum Aeternæ Sapientiæ, quæ ad fructum vberiore electas animas sic *mortificat & viuificat, deducit ad inferos & reducit.*

C A P V T XIV.

Rosa Doctorum examen subit;
vt probetur spiritus an ex
Deo sit.

ARcanum Gratiæ lumen quod ab infantia Rosam deduxit per vias rectas, simul reflexu admirabili certitudinem indiderat attractûs verè Diuini minimèq; fallacis,

cis, ita quòd de rectitudine semitæ per quam ibat, ambigere non posset, quàmuis hanc parùm tritam, verisque & obscuris vestigijs vix notabilem comperisset. Nec tamen (quantùmuis certa) videri volebat quod erat, vnde humillima Rosæ modestia graue, serium, perq; interualla repetitum examen suæ vocationis ac spiritûs recusare non præsumpsit. Inter alios præcipui quos bona sors huic subtilissimæ explorationi destinauit, fuere Doctor Ioannes de Castillo & P. Magister F. Ioannes de Lorenzana, cui in Rosam totum vsq; ad extrema competebat imperium. Fuere & alij, at succedanei, quiq; ex occasione dumtaxat penitentiae Sacramentalis interdum studiosius intimas eius animæ latebras peruestigarunt. De primis duobus pauca hic præfari necessum est, vt ex horum sanctitate & peritiâ vis, pondus, fides maturrimi examinis aptius innotescat.

Doctor Ioannes de Castillo professione Medicus, statu quidem Secularis, at exercitio, conuersatione, spiritu planè religiosus, Limæ illis diebus inter selectos Dei seruos eximius habebatur. Philosophiæ ac Medicinæ studijs ad summum apicem eruditus, insuper in omnia Metaphysices adyta summo ingenij acumine penetrarat; celebris ob id in Scholis, in exedris, in doctissimorum virorum congressibus, præsertim quòd mira perspicuitate conceptus sublimes & altissimos proprijs terminis nosset explicare. Vita ipsius merum erat pietatis speculum, ita quòd putaretur virtutes singulas in gradu heroico possidere. Mysticam Theologiam non nudis speculationibus sed viujs & altissimis experimentis exactè didicerat, suisq; principijs, regulis, & capitibus methodicè digestam egregiè callebat, adeo quòd famosus ille nostri Seculi Mystagogus Didacus Alvarez de Paz Soc. Iesv in Peruano tunc Regno Prouincialis, dum suas de Oratione, Meditatione, & Contemplatione præclarissimas lucubrationes apparabat, hunc Virum in plurimis sibi duxerit consulendum, ipsumque

Tomo 3. de contemplatione Lib. 5. circa punctum *an voluntas ferri possit in incognitum*, suppresso nomine (: siquidem adhuc in viuis erat) allegat, velut Orationis ac solidæ perfectionis Magistrum, tantumq; digito intento non demonstrat. Scripsit iubente Didaco Aluarezio Castellus iste nobilem Tractatum de ijs, quæ sibi inter contemplationum radios ac lumina occurrerunt. Vidit librum & obstupuit Myrensis Archiepiscopus talium rerum scientissimus, illumq; transcribi fecit Romano Pontifici coram offerendum. Hæc de Doctore Castillo tunc superstite post alios iuridicè testatus est Petrus de Ortega Sotomayor ex Limensi Cathedratico primario, Canonico Magistrali, Archidiacono Metropolitano, & S. Officij consultore Episcopus Truxilli, dein Arequipæ, deniq; Cusci. Addebat, plura de hoc Viro ac grandiora se prolaturum in publicum, dummodo ultra illum superuiuere contingat. Nunc (: sed breuius) ad alterum.

P. Magister F. Ioannes de Lorenzana Ord. Præd. testante eodem Illustriss. Præsule eundem cum D. Castillo, aut saltim non inferiorem obtinebat sanctimoniam publicæq; opinionis gradum. Eminebant in ipso certantq; de primatu excelsa vitæ perfectio & Scholasticæ Theologiæ profunditas : concurrebant ardens contemplandi studium & actiua gubernandi dexteritas, vis perspicacis ingenij & alta iudicij maturitas, fuga seculi, & vsus negotiorum. Hinc successiue tot siue Scholarum siue Cœnobiorum ac Prouinciarum in eum confluxerant Præfecturæ, nam Regiæ Vniuersitatis Limanæ matutinus erat Cathedraticus Theologiæ, quam primus inuexit Regno, & in Peruano S. Inquisitionis tribunali censor quem vocant *Qualificatorem*; item Conuentûs Limensis Prior, deinde Prouinciæ S. Ioannis Baptistæ Vicarius Generalis, tandē Prouincialis & Visitator, æquè in rebus tum Ecclesiæ tum Reip. versatissimus; omni hominum ordini, summis, medijs, infimis charus &

admirandus, ad quem velut ad commune vrbis oraculum ardua quæq; negotia certatim adferebantur ex consilij Antistitum, ex Regio *Audientia* (: vt vocant) Senatu , ex Consistorijs, Iudicijs, Dicasterijs, ex interno extimoq; foro, quia donum Consilij mirificè in tanto Viro eminere sentiebant omnes . Porro quantus fuerit Lorenzana in ea quam iure *Scientiam Sanctorum* dixeris mystica Theosophia, quantus in sapore & experimento rerum cœlestium, quàm exercitatus in altissimæ contemplationis disciplina, quàm oculatus ac Lynceus in prudenti spirituum discretionem, hoc vnum (: si reliqua deessent) indicio sufficeret, quod Diuina prouidentia singulariter ipsi spiritum Rosæ commiserit gubernandum . Vnà hîc commemorandi forent laude non multùm impari P. Didacus Martinez Soc. IESV, Patres Magistri F. Alphonfus Velasquez, F. Ludouicus de Bilbao, & F. Ioannes Perez, at primorum duorum examen tot ac tanta complectitur, vt ex reliquis nil addi possit . Modò ad rem pressius . Assedêre primo examini honestatis gratia Rosæ Mater & D. Maria de Vfatégui. Coram his D. Castillus integro trium horarum spatio Virginem in domestico cellulæ horto velut indagine cinctam, per varias quæstiones distinxit, animæq; venis diligentissimè pertentatis omnia sana ac salua inuénit . Primò interrogata, à quanto tempore cœlestes stimulos & tranquillū orationis spiritum concepisset, respondit simplicissimè, temporis quidem se non meminisse, eò quod à prima pueritia se repererit fundendis precatiunculis apprimè deditam, ac tota mente ad serios meditandi conatūs erectam, vt nihil occurrere sibi dulcius potuerit, quàm Deo loqui, Deum cogitare, inhiare supernis . Non puduit fateri ista coram Matre, quæ quàm vera diceret, nimis conscia erat . Interrogata de successiuis in hoc studio profectibus, an pari semper applicatione animi, facilitate, collectione, ac imperturbatæ mentis serenitate orauerit? respondit, vsq;

ad

ad duodecimum circiter ætatis annum se varia inter orandum temperie, difficultatum subinde vicissitudines percepisse at breues & modicas, plerumq; animo libero & quietissimo perrexisse in Deum, at interdum quoq; cum imbecillitate corpusculi, cum somnolentia, & distractionibus luctandum fuisse, verum ab illo tempore in posterum expeditius se orare, eò quòd inter initia sentiret mirabiliter à Deo introrsum attrahi totam animam cum singulis potentijs, gustuq; indicibili intellectum, voluntatem, memoriam Diuinæ pulchritudini sic intus affigi, vt nec sponte se phantasmatum intercurfu diuellere, nec occupationibus sensuum externorum distrahi possit à complexu & admiratione præsentis in anima dulcissimi Numinis. Instabat Doctor, an non suæ Imaginatiuæ vim aliquam adhiberet, dum reliquæ internæ potentiæ sic inhærebant saporì Dei, an & quo quantouè connixu, labore, fulcro in hac suspensione dulcissima se sustineret? negauit Rosa laborè, vim, connixum adesse à parte sua, vltro ad tractum quasi magneticum potentias sequi & suo centro obuerti cum suauitate, cuius vel vnica stilla infiniti Oceani amaritudinem corrigeret ac dulcoraret; Inde notabiliter in cor suum descendere calores & æstus periucundos, quos explicare non possit. Hinc radiare continuò in animæ suæ fundo præsentiam serenæ, amabilis, propitiæ Diuinitatis, hæc certò se illic deprehendere, nec alio oblectari se posse, quam quòd experimentalì hac certitudine sentiret intra se Deum. Quæsiuit Doctor, num fortè de mystica theoria, libros legeret, qui aut methodum artemq; huius introversionis docuissent, aut saltim illius naturam, signa, proprietates, effectus dissertando exponerent? Negauit inops Virgo talium librorum sibi adesse copiam aut vsum, in his solam experientiam & praxim sibi fuisse pro codice, ideoq; se intima animi sui sensa vtì vellet appositè efferre non posse, ruditati suæ ne nomen quidem si quod proprium ex-

taret huius intuitiue orationis, innotuisse.

Tunc Castellus, ut erat in hac Schola versatissimus, aggressus est proprijs notionibus explicare Virgini secretam huius excelsæ illustrationis hieraticam, nempe asceticæ disciplinæ Magistris hoc genus contēplandi *orationem unionis* dici, hic intellectum formari specie non acquisita sed supernè infusa, neq; conuerti ad corporea phantasmata sed imaginibus vacuum spiritualis formæ luminosa puritate imprægnari: hic Deum immediato intimoque illapsu implere sacrarium fidelis animæ, hic partem affectiuam increati Amoris decidua flamma igniri & candescere, atq; in palato voluntatis felicem beatæ fruitionis prægustum inchoari. Plura addidit ex mysticæ Theologiæ aphorismis, de simplicatione cordis, de cynosura purificatæ intentionis, de nuditate affectuum, de indifferentia resignata, de arcanis introductionibus, de abyssu luminis, de sopore omnis discursus in intuitu cœlestium, de fonte vitæ, de alijs, quæ Rosæ talium capaci & placuere supra modum, & profuere deinceps ut suis Confessarijs ex hoc vocabulario se nosset clariùs atque significantiùs explicare,

Perrexit Doctor, & studiosè in viam purgatiuam resiliens quæsiuit, quàm diu, quibus industrijs, quanto sudore pugnandum sibi fuerit in prauas animi inclinationes, in vitiorum armata latibula, in mórbos indomitarum effrœniumq; passionum? Respondit, vix se meminisse talium certaminum, ab infantia se magno Dei fauore sensisse faciles & summè connaturales propensiones in virtutem, absq; vlllo tumultu passionum, à prima Dei notitia repletam se fuisse timore & horrore peccati, & si quis motus indeliberatus aduersus rationem nitebatur assurgere, repente ex apprehensione Diuinæ præsentiae citra conflictum euanuisse. Interrogata, quid solatij captaret ex creaturis, si contingeret animum contemplandi labore fessum non-

nihil

nihil remittere, aut per eutrapeliam tantisper relaxare? Respondit, nulla re creata recreari se posse, in hoc solo & vnico omne suum oblectamentum consistere quod tantum cum certitudine sentiebat in anima sua præsentem Deum, quem si vel ad momentum è conspectu perderet, id sibi acerbius omni iactura, diuisius omni gehenna videri. Petijt Doctor, quandoquidem in eum gradum non nisi per tribulos & spineta ascenditur, num saltim aliunde persecutiones & ærumnas passa fuerit? annuit Virgo, sed ob reuerentiam Matris illic præsentis ad singula non descendit, contenta dixisse generatim, se à domesticis ob vitæ singularitatem varias molestias, insultus, vexationes tolerasse. Verùm ab ijs opportuna digressione incidit in horrendas illas visiones, figuras, pauores, de quibus Cap. superiori actum est, magnisq; precibus exorauit Doctorem, vt sibi illius desolationis ac supplicij naturam, originem, critica, propriamq; interpretationem doctè elucidaret. Non recusauit Castillus edicere quæ sentiebat: quando (inquit) in illa obtenebratione videbaris tibi exitum finemq; sperare posse, scito animarum in carcere Purgatorij lugentium dilationes pœnosissimas te delibasse; at quando nulla tibi affulgebat spes euadendi, & quidam æternitatis fumus peruadebat horroris caliginem, ipsissimus Inferni typus erat. His pœnis eruditur anima ad sui notitiam, dum in lucis ac tenebrarum vicissitudine discit experimento sui nihili, quid à seipsa, quid à Deo habeat, quidq; inter illa & ista intersit. Huius antibari molestissimo pondere teneatur spiritus in suo æquilibrio, ne extollatur in donis Altissimi. Eclipsis hæc docet æstimare Diuinæ familiaritatis præstantiã & dignationem purè gratuitam, sufflaminat Timoris donum. Hac fornace probatur aurum, nitefcit charitas, loriquatur mascula virtute robustus amor, assuefcens diligere non tam delicias Dei quàm Deum. Memini (inquit) de nonnullis præcipuis ac Sanctissimis Dei amicis

(: quo-

(:quorum nomina publicis Ecclesiæ tabulis adscripta sūt) eadem legisse quæ de te commemoras; neq; defuere ex ijs qui rogarint Dominum, vt ab huius terroris atroci tormento ipsos demum immunes vellet, libenter se quoduis aliud pœnarum genus subituros. Deniq; huc respexisse Dauidem cum gemeret: *dicitur mihi quotidie, vbi est Deus tuus? anima mea sicut passer solitarius in tecto; ad nihilum redactus sum, & nesciui, &c.*

His cursim explicatis vicissim rogauit Virginem Doctor, post illas inferni tenebras & horrores qualiter sibi fuerit? Hic Rosa exterrita, quasi colubrum pressisset pede resiliuit, expalluit, obmutuit, probè conscia si respondendum sit, quanta & rerum copia & verborum inopia sibi foret laborandum. Vrgebat interim Doctor, instabat bis, ter, at nihil elicuit. Tandem seueriùs attracto supercilio, aduertito (:inquit) ò Rosa híc tergiuersandi ac silendi locum non esse; tua res agitur: si quid dissimulaueris si quid celaueris in examine, Dei beneficium negasti; ni totum quod exquiro dixeris, nec ego te nec tu me quantum sat est intelliges; & figurarū quas partim explicui partim explicaturus sum ænigmata sensumq; integrè non assequeris. Paruit humilis Rosa, cui metus & pudor totum verecundo ruborè vultum accenderat, veniamq; præfata si quod paradoxum rudi, & incautæ excideret, sic orsa est: dum in ima caliginosæ derelictionis voragine absorptam me puto & lugeo, en repente in ipso pristinæ vnionis meridie velut in Sponsi brachijs me deprehendo, restitutor quasi numquam excidissẽ, sentio auidos liberrimi amoris imperus, vt cum rapidi amnes disruptis obicibus non fluendo sed ruendo sese euoluunt per cataraetam; aspirat mox gratiarum placidus Auster & fluunt aromata: immergitur anima Diuinæ bonitatis immenso pelago, & metamorphôsi ineffabili à se desciscens transformatur in Dilectum, fitq; vnum cum illo. Iussa vltteriùs dicere, nouo pudore hæsit, rubuit,

rubuit, titubauit, attamen subiecit: inter hos fauores ar-
 &tiſſimæ. Vnionis ſe ſibi videri immobiliter radicatam in
 Deo, ſecuram in eius amicitia, confirmatam in gratia, ſen-
 tire donum quoddam inexplicabile, fundamentale, ſolidū,
 quo reputabat ſe impeccabilem, vt ille qui ſidenter aiebat:
quis nos ſeparabis a charitate Chriſti? certus ſum, quia neq;
mors &c. Verū tamen hic proteſtabatur Virgo, numquā
 ſe vlli mortalium hoc dicere auſam, & ne nunc quidem id
 dicturam fuiſſe, niſi coegiſſet rigor præſentis examinis, &
 ſi fortè erraſſet in phraſi locutionis, quam neceſſitas om-
 nia efferendi expreſſerat, cenſuram correptionis demiſſè
 ſagitabat. Laudauit ſimplicem obedientis Roſæ cando-
 rem Doctor, præcepitq; ne trepidaret, nihil hætenus erra-
 tum eſſe, tantū ad reliqua procederet. Proceſſit Roſa,
 dixitq; voce humili ac intercifa: plerūmq; poſt illas horren-
 das tenebras conſpicuè ſibi oſtendi Humanitatem Chriſti
 nunc virili nunc infantili aut puerili facie blandam, for-
 moſam, affabilem; ſæpius & Virginem Matrem decoram,
 amabilem, dulciterq; familiarem. Interrogata de modo
 & qualitate viſionis, imaginaria ſit an intellectualis, diu-
 turna an momentanea, facie ad faciem an obliquè per trā-
 ſparitiones? Reſpondit, propria illa differentium viſionum
 nomina ſibi quidem adhuc ignota eſſe, at glorioſam Chri-
 ſti humanitatem exhiberi ſibi in tranſitu quodam vicino &
 claro, ſicut cum fulgidum aliquod ſidus moroſo tractu
 procurrit in cœlo; nec totam illius videri ſtaturam ſed ſo-
 lo vultu, & pectore-tenus. Attamen maiestatem Deiparæ
 paulò diutiùs obtutui ſuo ſolitam indulgeri. Vnde
 ſubintulit Caſtillus imaginarias eſſe viſiones, petijtq; vlti-
 riùs qua igitur forma apprehenderet Diuinitatis præſen-
 tiam? Laborabat hic Roſa vt verba reperiret idonea, ſed
 tandem per ſolos terminos remotionis, eminentiæ, & cau-
 ſalitatis vtcumq; ſe explicuit, inſinuans lumen eſſe abſque
 figura, meſura, ſine (: vnde patuit ex ea parte viſionem
 purè

purè intellectualem esse) incomprehensum & omnia comprehendens , subtile , stabile , mundissimum , summè multiplex summèq; vnum , summè distans & summè propinquum , intimum & ambiens , nobile , excelsum & nulli prorsus creaturæ vel tenuiter comparabile , quodq; magis in vitalium quarundam effluxionum mirandis & immediatis effectibus quàm in suamet substantia deprehendi possit ab anima . Sed quinam hi effectus ? teneritudo (inquit) robusti gaudij super omne gaudium imaginabile , cognatio filiationis Diuinæ , interior renouatio vetustatis in ipsa animæ essentia , impletio sinuum voluntatis , vita & alacritas omnium affectuum , firma , sancta , lepida , & demum vnde quaq; ineffabilis .

Videbat sibi Doctor satisfactum in eo quod maximè scrutabatur , haud ignarus , in materia Vnionis quò plura dicuntur minus dici . Vnde ad faciliora effatu prudenter digrediens inquisiuit de exercitijs mortificationis ac poenitentiae . Rosa , quòd putaret in hoc genere se pauca & admodum vulgaria præstare , obiter de suis ieiunijs , cilicijs , disciplinis , & reliquis austeritatibus nonnulla edixit absente Matre , quòdq; in his non suo sed Confessariorum arbitratu modum ac mensuram constituisset . Deniq; post multa vltro citroq; de sui dissidentia , de ardore fidei , de securitate spei , de stimulis superni amoris ventilata & sagacissimè explorata conclusit Doctor , sinceram ac tutam esse viam qua Virgo ambulabat , nullam hìc subesse vaferrimi demonis imposturam , tales affectus , effectus , lumina ab illusione aut principe tenebrarum nequaquam esse . Pluries deinde Virginem non tam examinaturus quàm collaturus fidenter conuénit , noua semper inueniens quæ miraretur & approbaret ,

Idem Patri Magistro de Lorenzana sensus fuit , postquàm crebriori & per partes interciso examine spiritum Virginis diligentissimè explorauit . Prolixum foret singula

membratim persequi, vnum hoc superioribus addidisse sufficiat, quod vbi Rosam in via illuminatiua probare cæpit, adstupuit responsis puellæ simplicis atque illiteratæ, cum de arcano SS. Trinitatis mystério, de hypostatica Verbi vnione, de Sacramento Altaris, de gloria Beatorum, de libro vitæ ac prædestinationis, de natura Gratiæ, alijsq; Fidei ac Theosophiæ secretis interrogata promebat axiomata tam profunda ac solida, conceptus tam acutos ac sublimes, sententias tam perspicuas, breues, fœcundas, ac ponderosas, verba tam propria, apposita, clara, succincta, vt alijs examinators non dubitârit fateri ingenuè, numquam se in tam luminosum & perspicax ingenium incidisse, laudabatq; Patrem luminum; qui tanta sapientibus ac prudentibus abscondita, humilibus, paruulis, indoctis reuelabat. Idem hoc deinceps admiratus est in methodo confitendi qua Rosa utebatur, ea sermonis tum perspicuitate tum proprietate ac circumspectione, vt sibi videretur Lorenzana non fœminam audire sed annosum vtriusq; Theologiæ professorem, tanta erat verborum proportio, gravitas, ac mensura, sine parergo, sine circuitu, sine confusione ac superfluitate. Hinc fuit, quod vocatus ad excipendam Virginis confessionem, dicente Sublacrista, in templo ipsum expectari à *Rosula* seu *Rosella*, velut irreuerenter locutum increpuit, tibi (: inquit) Rosula videtur quæ coram Deo Rosa est ac grandis quidem? veniet dies, qua vniuersi intelligent, quàm sit eximiè alta, quàm magna & spectabilis hæc Rosa.

Lorézana suppar Magister & primarius Cathedratius F. Ludouicus de Bilbao notauit eadem in Rosa dum eius confessiones excipiebat: nempe vario & ipse examine scrutabatur Virginis spiritum. Fassus est postea, multoties inter arcana illius fori alloquia se obmutuisse ad profunditatem & eruditionem solidorum discursuum, quibus Rosa promptè, facillimè, & ex ordine satisfaciebat quæstioni-

bus præarduis & abstrusis, ac subito se agnouisse spiritum altiorem qui in Virgine loquebatur. Sanè apud omnes (quotquot tunc Limæ vivebant) multorum opinione sanctimonix & perfectionis fama celebres ea sensim inualuerat constantissima opinio, Rosam spiritu Dei agere & agi, Dono sapientix abundare, scientia cœlitus infusa gubernari. Hinc Ludouica de Melgareyo, foemina sanctissima tanti Rosam faciebat, vt sicubi cum ea concurrisset, nonnisi flexis humi genibus exciperet repugnantem honorari; & si quâ transeuntem obseruasset, gestiebat animo illic os oculosq; affricare vbi Rosa vestigium fixerat; & si ad absentem litterulæ sibi formandæ erant, has nudo solo ingeniculata scribebat.

Præcipuè verò Castillus & Lorenzana de Rosæ vijs perfectissimis, aliquoties mutua collatione instituta concordantes mirabantur hæc duo singularissima: primum, quòd breuissimo compendio & quasi transsultu gradum illuminationum mox & vnituum possederat absq; eo quòd gradum purgatiuum vix obiter attigisset, quia nimirum ab infantia benedictionibus dulcedinis præuentam ij semper comitati erant purissimi affectus, in quibus nil terrenum, sorduerat operosius depurgandum. Alterum, quòd in illo horrendo solisq; inexpertis parùm formidabili obtenebrationum tormento ea fuerit Rosæ fortitudo, animositas, constantia, vt fragilis virgo non solum ferendo esset, verum etiam præmissa spontanea resignatione quasi cū Deo certaret, tristiùsne ille affligere an illa affligi vellet, dummodò per omnia Diuino beneplacito victoria ac triūphus remaneret. Cordatissima est, planèq; extrema hæc sui abnegatio, sed simul difficillima taliter amanti, cui felicius videtur non esse, quàm non amare. Immarcessibilem fateri oportet Rosam, quam eiusmodi spineta non suffocant.

CAPVT XV.

Rosa cum Christo, Deipara, & B.
Catarina Senensi familiariter,
iucundè, assiduè deliciatur.

A Nimo cui amarescunt terrena, dulcescunt cœlestia, seseq; vltro insinuant. Hoc Rosæ obtigit, cui tota conuersatio iu cœlis erat. Legebat quandoq; interdum libellos spirituales, & seligebat studiosè capitula præsentis affectui temporiq; magis accommodata; immorabatur cæcis per lineolis vbicumq; prædulce IESV nomen occurrisset, nam è singulis horum characterum apicibus quasi igniculos & amorosos aculeos in corde sentiebat. Neq; hoc satis: ipsemet paruus IESVLVS digiti statura vix procerior sæpe apparebat amanti Rosæ in eadè pagellæ planitie: stabat pusillus ac nudus amor, mox inambulabat passu leuissimo, ac interim obtutu serenulo, tenero, suauì abblandiebatur Virgini, ingerebat se, vtpotè *Verbum* attenta Rosæ lectione dignissimum, in quo omnes thesauri scientiæ & sapientiæ Dei. Familiarius est quod sequitur. Dum Rosâ nendo occupabatur in telæ consutura, en iterum Dilectû IESVVM nentis puluillo infantiliter & quietissimè insidētē, illic nutibus taciturnis loquebatur ad cor Dilectæ, huic arridebat, huic protendebat breues vlnas velut amplexum, offerens, hanc ardentibus ocellis ingiter adurebat, omniq; gestu, motu, flexu protestabatur amorem. Quis porro netrici inter hæc solatia fuerit sensus lætitiæ, æstiment quibus vacat, plus miror, tunc Rosæ oculos superfuisse quibus filum, acum, telam videret. Et videbat tamen, quia sic mul-

cebant hi fauores, vt ab exteriore opere attentionem nec totam auocarent, nec partem exdiuiderent. Has cum IESULO Sponso delicias Virgini frequentes obtigisse, imò fortasse quotidianas argumento est, quòd si ille tardabat interdum nec solito more adesset, Rosa querulis at submissis vocibus quasi secum perplexè sermocinans ita lamentabatur: *Hora est, & nondum approperat? duodecima sonuit & nondum adest? me infelicem, qua illo nunc careo! felicem animam qua penes se illum nunc distinet!* cumque Amor poesim doceat, Rosa pariter has querelas familiari metro illigarat, hoc ferè sensu:

Heu mihi! Dilectum quis detinet? Ecce, moratur:

Hora duodecima est, nec tamen ille venit.

Langueo, deficiunt oculi: præcordia frigent,

Implexas alibi dum trahit ille moras.

Accidit Rosam infirmari ex dolore gutturis, & en totus ille *Desiderabilis*, cuius guttur *suauissimum* prædicatur Cant. 5. apparet Virgini, inuitat ad ludum, vtrinq; victoriæ fructus relinquitur victoris arbitrio. Confestim iacitur alea, fauet sors Virgini, lucratur, vincit; nec mora, fructum exigit, memor fortasse ex Canticis quod ait Sponsa: *Fructus eius dulcis gutturi meo*. Quid multa? dolores sui gutturis mitigari poscit infirma, & impetrat. Verùm Diuinus collusor quasi iacturam non ferens redijt, ludum instaurauit, iactuq; feliciori victor euasit. Victoriæ præmium fuit Rosæ patientia, adauctis repente doloribus qui totam ei noctem fecêre insomnem. At Virgini placuit secum disquirere, primo an secundo lusu plus lucri-fecisset, cum longè ardentius faueret Sponso quàm sibi, unde tam victam esse quàm vicisse par gaudium fuit miranti Aeternam Sapientiam, quæ ludens in orbe terrarum protestatur delicias suas esse cum filijs hominum. Mater aduertens

Filiæ

Filiæ decumbenti pristinos redijisse dolores, & quidem cum auctario, suspicata periculum extimuit. Sed cordata Filia vt metum eximeret, blandè modesteq; detexit secretum, nempe merum hunc Sponsi ludum esse; dumq; verbis humillimis enarrat successum, visa est (: vt quondam Stephanus) vultu prorsus Angelico aliquamdiu radiare.

Alia vice, cum diutiùs ac ferè ad mediam vsq; noctem in solitaria horti cellula substitisset Rosa, inuasit fatigatam subitaneus languor ac virium defectio; sperabat transitoriam fore debilitatem, sed durabat vltra consuetam periodum. Sentiebat ægra incerti mali certa incrementa, sed sera nox erat, qua nec Medicum aduocare nec domesticorum vllum ad opem importunè lubebat accersere: agnoscebat electuario vel sorbitiuncula se indigere qua vtcumq; stomacho succurreret ac vires instauraret, at Sabbathum erat ac manè proximo ad S. Synaxim accessura cauebat ieiunio, si fortè medietas noctis iam præterierat. Quoquò se verteret, præuidebat aut virium defectu, aut sumptione cuiuscumq; fomenti impeditam in ne postridie S. Communione frui liceret. Quid hìc remedij inter saxum & sacrum? confugit Rosa familiari fiducia ad cœlestem Sponsum *adiutorem in opportunitatibus*, huius pharmacopeiæ se commendat, medicinam corroboratiuam petit, impetrat, nec aliunde quàm ex illo pretioso myrothecio vulnerati lateris vbi quondam S. Catarina Senensis auidè suxerat. Hanc nectaream sanguinis & aquæ mammillam non ori sed cordi Virginis benignè applicuit, hìc illa debilitati suæ pharmacum, hìc vitalem succum inuenit & traxit. Porro visionem neque cassam aut inanem fuisse, nec purè imaginariam, probauit effectus, nam Rosa mox conualuit, redierunt corpusculo vires, agilitas, robur, quo postridie Templum adiit, panem Angelorum manducauit, satur, vegeta, sana domū repe-

repetijt, vtique experta, quàm sint Sponsi vbera meliora vino, quàm fragrantia vnguentis optimis. Magna profectò Rosæ dignitas, Matris ac Magistræ Senensis fuisse, non modò Filiam ac discipulam sed & collataneam. Verùm ad alia.

In domo cuiusdam illustris foemina Rosa de more post sancta colloquia veniam petijt secedendi tãtisper ad orationem. Matrona honoris gratia secedenti comitem adiunxit septennem puellam è mancipio domi suæ natam. Hæc vbi Rosam meditationi implicatam reliquerat, clam sese proripuit ad matrem suam in vicino conclaui laborantem: inde post horæ spatium erepsit visura num Rosa ab oratione surrexisset. Et ecce vidit iuxta Virginem puerulum IESVM amictu polymito cærulei purpureiq; coloris decentissimè tunicatum, quem vt conspexit fulgida claritate circumdatum ac radijs vndiq; coruscantem, non ausa conuersationem irrumpere, substitit eminus, contenta permissione dulcissimi spectaculi, cuius arcana pro ætate nondum capiebat, nec ante quàm Rosa migrasset è viuis rem detexit. Idem in ædibus D. Isabellæ Mexia cōtigisse quæ vidit retulit Filia Isabellæ; nimirum procul inter secretiores ædium porticus ambulabat Rosa, & cum ipsa IESVS in statura octennis pueri sed amictus iam lumine sicut vestimento. Spatiabātur ambo pariter confertis manibus, gressu gestuq; tenerè amantium; miscebant secretissima inuicem colloquia, hærebant in mutuis vultibus tamquam rerum aliarum aut obliiti aut incurij; sed paruuli incessus grauior erat quàm puerorum esse soleat, maiestas inerat, & quacumq; fixisset pedem subitaneo lumine resplendebat pauimentum.

Zelus vt intensi amoris præco simul & explorator est, ita vel ipsummet Sponsum cœlestem curis sollicitat, riualem non patitur, ne flosculum quidem. Rosa nomine florebat & opere, nam vt altaribus nulla anni parte deessent flores

flores diligentissimè procurabat , discretis hunc in vsum areolis, quarum vni Basilicum (: plures Ozimum dicunt) implantarat . Hunc fortè colebat studiosius, quòd odore ac nomine Regius *Regi seculorum immortalis & inuisibili* aptius conueniret in tributum . Respondebat planta culticis industriæ, & quò prodibat lætior magis lætificabat. Verùm vt breue est à floribus gaudium , Rosa mane quodam inuénit Basilicum suum non modò siccum ac marcidum , sed radicitus euulsum ac mortuum . Cadaueri adgemuit Rosa & abiit, sed occurrit eunti visibilis Christus, blandèq; affatus Virginem, quid doles ? inquit, an non ego *Flos campi* melior tibi sum omni Basileo totoq; floreto Paradisi ? & vt scias me tuum esse Basilicum, ego alterum illum his manibus eradicaui, fregi, proieci . Flores, ac florem amas ? ecce me . Didicit Rosa vel ad zelytypiam vsque amari se à Sponso , & pro tantæ gratiæ crebriori experimèto facile exposuisset in prædam quidquid florum sibi residuum erat . Vtiq; plenam hæc fidem faciunt illi religiosissimæ cuiusdam mulieris extaticæ visioni, cui in raptu protestatus est Christus, se Rosam gestare in intimo sui Diuini cordis penetrali, cum sciret, vicissim in eius virgineo corculo se solum tranquillissimè habitare.

Porro quàm affabili, serena, frequentî apparitione Rosam suam dignata fuerit Augustissima cœlorum Imperatrix , sat inde conijcere fas erit , quòd ab vndecimo suæ ætatis anno ad extremum vsq; non defuerit vmquam Virgini hoc pretiosum assiduæ familiaritatis solatium . In Rosariano Beatissimæ Virginis Sacello Rosa planè domestica euaserat; illic totos hærebat dies, illic Ordinis sui habitû, illic *IESVVM* Sponsum nacta diuelli à loco non poterat. Ibi altaris ornandi curam, ibi totius nitoris œconomiam sibi deuotè assumpserat, ibi quotidianum sibi cum Deiparâ ex sedulo ministerio commercium erat ac mutuâ conuersatio.

fatio . At vicissim Angelorum Regina famulam suam eo honore dignata est vt ferè officia Cubiculariæ ipsi exhibuerit, manè Virginem excitando à somno . Tanti fauoris occasio hæc fuit: Rosam à multo tempore continuis integrisq; noctibus adeo destituerat necessarius somnus , vt valetudini suæ non parùm fuerit timendum si medelam respiceret. Hinc opus fuit Confessariorum imperio , qui Virgini præcepere vespertinum lactucæ ac soporiferorum feminum vsum , deinde & temporis spatium quo dormiret, horam qua mane surgeret præscripserunt . Conabatur obedire infirma, sed præualēte serotinarū vigiliarū assuetudine nō obediebat sōnus seu veniēdū seu abeūdū esset . Præsertim manè dum instabat surgendi hora, incipiebant soporifera modicum operari , somnumq; lentissimum vi attrahebant in cerebrum . Cruciabatur ingenti scrupulo Rosa , quòd exactè ad præscriptam horam euigilare non poterat vt summè cupiebat . Ergo luctam & afflictionem suam Deiparæ ceu veræ *Stella matutina* quæta est vt subueuaret . Subuenit illa, imò & venit: siquidem exinde, vbi imminuisset surgendi hora, en in puncto aderat conspicua Dei Mater, & voce melliflua compellabat sopitam Rosam: *Surge ad orationem Filia, surge, nam instat hora* . Sic placidè experrecta videbat cominus & (: vtî facta est) facie ad faciem illud gloriæ sidus gratiosum, illam frontem decora maiestate plenissimam , illum gloriæ & amænitatis paradisum, agnoscebat vocem , venerabatur præsentiam , tacitè secum disquirens : *Vnde hoc mihi, vt Mater Domini mei veniat ad me ?* ô gratum surgendi tintinnabulum.

Semel euēnit, quòd veniente Domina profundius dormiebat Rosa : primus hic somnus erat ac nonnisi paulò ante cœperat . Excitata Virgo respondit : *surgo Domina, nunc surgo ; confeditq; erecta in lectulo , sed prægrauante somni pondere, oculisq; caligantibus recidit misera in*

cerui-

cervical. Accessit denuo Augustissima excitatrix, & (: quod ante non consueverat) protensa nivea manu pulsavit latus dormientis, agitavit familiarissimo attactu resupinum corpusculum, iterumque ait : *Surge Filiola, ne pigresceris, rogasti me, & ecce ad solitas preces te voco; Surge inquam filiola mea, surge, iam hora sonuit.* Longè suavius erat Rosæ filiolam se vocari à tali Matre quàm Rosam. Cessit huius compellationis dulcedini somnus, at simul discessit suauissima excitatrix, nam vt Rosa diduxit grâtes palpebras, vt respexit, agnouit Deiparam sed à tergo, iam enim suspensis vestigijs abire cæperat, velut perfuncta amico officio. Heu tantilla soporis indulgentia quantam subinde iacturam infert! quàm doluit Rosa, pro illa vice Maternum sibi vultum ereptum fuisse dum cunctabatur! empyrei fauores delicati sunt, nî promptè strinxeris, elabuntur.

Ex quo semel à Christo (: vt compertum postea) B. Catarina Senensis cælitus Rosæ missa ac data fuit Magistra, frequenter hæc charam Discipulam visibiliter conuênit in terris, præsertim dum occupabatur in perlegenda Seraphicæ Magistræ Regula, quam sibi è Cusco (: procurante Fr. Ioanne Miguel Ord. Prædicatorum Religioso laico) transmitti demum impetrârat. Mutua harum Virginum conuersatio tam amica et crebra fuit, vt sicut Moyse post longam cum Deo in Monte confabulationem remansere, in vultu luminum vestigia, ita viderentur ex vultu B. Catarinæ in faciem Rosæ transiisse lumina, quæ hæc illi per aliqua oris lineamenta propemodum assimilarint. Hinc apud Limenses suos Rosa vulgariter altera Catarina Senensis appellabatur, præcipuè ab obitu, quando in mortuali feretro Rosæ facies liberius videnda omnibus patuit. Ceterùm de miris delicijs, fauoribus, officijs quibus hæc Seraphica Magistra demulsit Rosam suam, crebrior & commodior infra redibit sermo locis proprijs.

CAPVT XVI.

Rosa familiari tutelarís Angeli
 consuetudine fruitur. Variè
 luctatur cum Dæmone,
 semper victrix.

SANCTOS Angelos esse ipsissimum cor Dei sensit Bernardus serm. 12. in Psal. *Qui habitat: Vbi hæc verba, apponis. erga eum cor tuum.* Iob. 7. adaptat missioni Angelorum ad hominis custodiam. Rosa Angelum suum, non modò custodem, sed & congerronem habuit amicissimum, imò Pararium, symmistam, dinomilum, vt etiam hinc aduerteret, quam dulciter Christus apposuerat erga eam cor suum. Inde Virgini cum suo Angelo tam domestica fiducia ac necessitudo, vt illo soleret vti verdario, quotiescumque ad horam consuetam sponsus non comparebat. Metrico sui idiomatis rythmo tunc familiaris affabatur Angelum, hoc ferè sensu:

Vola Ephebe cælice: dic nostro Creatori,

Me sine vita viuere, me præstolando mori.

Cur ille tardet, Rosa dum ardet

Velociter inquirito:

Roga, festinet: cælos inclinet,

Ad me descendat, vultum ostendat,

Quia amore langueo.

Nocte quadam oclusis horti ianuis Rosa de more vigilabat

gilabat in angusta sui Eremitæ cellula, sensitque se viribus repente destitui, adeo ut grauem timeret syncopen, vnde in domum sese recipere ad Matrem constituit, collato prius consilio cum Angelo suo tutelari: Mater (: quæ horti clauem iugiter tenebat secum) ut notauit in vultu filia signa instantis deliqui, sine mora promptis è marsupio duobus denarijs iussit ancillæ adire subito viciniore propolæ apothecam, emere saccharum, carbonem, & libum indicum quod *Chocolate* vocant indigenæ, iam & Europæis tam vsu quàm nomine sat notum, quippe in aqua calida resolutum cum triente sacchari stomacho simul & cordi potenter succurrit. Filia ne sui causa is sumptus fieret, obnixè rogauit Matrem, affirmans, sibi non defuturam Chocolatam. Replicuit Mater, putasne in tota hac domo vel micam Chocolatæ reperiri? negauit Rosa, at subiecit, hanc breuè adfore ex domo Quæstoris. Infremuit parens, & aut nugaris (inquit) aut somnias, quis enim intempesta hac hora calentem Chocolatam ad te mittet? Vel vnde in Quæstoris domo procul hinc dissita innotuisse potuit, te subitanea debilitate languidam isto medicamine indigere? tu in horto occlusa utique non habuisti quem illuc mitteres, neque ex hac domo ullus abiit qui tuam necessitatem Quæstori indicaret; igitur vade ancilla, iussa exequere. Denuo suppliciter obstitit Rosa, certò asseuerans Quæstoris mancipium iam iam cum præparato medicamento adfuturum. Ità fuit, nam Matre adhuc disceptante cum filia pulsatur ad fores, seruus erat Quæstoris, intromitti petijt, adferre se à Quæstoris consorte quod Rosa traderet. Vas erat argenteum calenti Chocolate plenum. Obstupuit parens, at Rosa confestim seruum expediens heræ suæ renunciare iussit, opportunè beneficium venisse. Hic Mater confusa multiplici prodigio sciscitari, quid Gundisalui uxorem mouerit ut tali profundæ noctis hora vernam ædibus emitteret,

quisnam aut Virginis languorem illi Dominae, aut certum aduentum emissi mancipij nunciasset Rosæ. Tandem supremo obedientiæ præcepto adegit filiam, ediceret, unde sciuerit, tali hora è domo Quæstoris sibi adferri Cho-
colatam. Respondit subridens filia: ne mireris dulcissima Mater, nam sæpe huiusmodi officijs me dignatur Angelus meus tutelarior. Mox ubi in mea cellula cæpi deficere, misi Angelum, qui D. Mariæ de Vsatigui suggereret me illo quem vidisti succursu indigere. Perfecit ille, quod mandaueram, ac certa eram illum officio non defuturum. Hac fiducia cellulam reliqui, ad te huc veni, confedi, expectatura hic seruum Quæstoris, & cum parente beneficium diuisura. Mirata est Mater præsentaneum & velox Angeli obsequium, at magis, vt vidit filiam non mirari, vtpote his vlu ac frequentia dudum assuetam.

Alia vice in eadem horti cellula ultra mediam noctem expectabat, dum in ædes vocaretur pro more ad nocturnam quietem: solebat enim circa horam, quæ medium noctis antecedit, descendere Mater ad aperiendum horti ostium, vt filia inde abducta ad suum cubiculum sese reciperet. Verùm pro illa vice Mater, vel quòd crederet se filiam ab horto iam reduxisse, vel quòd alijs distracta minus applicuisset animum, oblita fuerat hortum ad horam consuetam exituræ Virgini aperire. Dum ergo se vidit frustra expectare, dum hæsitat quid agendum, prospiciens per fenestellam vidit cominus vmbra candidam, motu decoro agilem, aspectuque non iniucundam, quæ Virginem vt se versùs domum sequeretur inuitabat. Facile ex internis critirijs quæ à sancta Catarina Senensi didicerat, agnouit Rosa latentem sub vmbra tutelarem Angelum, itaque cum illo se fidenter in viam coniecit. Peruenere ambo ad horti ianuam quæ ad vmbra tactum mox sponte patuit sine clauis. Denique vmbra-ticus ille ductor sequen-

sequentem Rosam ante Genitricis cubiculum stitit & disparuit. Fortè hanc petebat umbram qui ambiebat à Domino custodiri ut pupilla oculi, & sub umbra alarum eius protegi; ne miremur lucis Angelos umbræ speciem assumplisse dum gerebant officium.

Occasio Angelicæ custodiæ exigit, sequentem historiolam hic subnecti; qua fortè patebit, non proprium dumtaxat, verum & alienos tutelares Angelos sibi ad nutum habuisse obsequiosos. Religiosus quidam per ardua, & per oliva itinera Prælatum Ecclesiasticum associaturus necessitatem suam Virgini aperuit, precum suffragia pro auertendis periculis flagitavit. Promisit Rosa, ut erat ad subueniendum proximis mirè liberalis & prompta, hominemque proficiscentem Deo & custodi Angelo impensè commendauit. Perrexit ille securus promissi, quod non ignoraret quid Rosa valeret apud Deum, & Angelos. Nec spei euentus defuit, nam è *Lima* vsque *Potosum* per varios casus per mille rerum discrimina iter habuit tutissimum. At exinde sensit simul oratione Virginis, & Angelica tutela se repente destitui; nam Truxillum petens in eius conuallibus grauissima quæque passus est, & vix euasit incolumis. Limam redux amarè questus est de Virgine, tandem & coram Virgine, quod in medio viæ ipsum destituisset orationum suarum præsidio. Non negauit Rosa id verum esse, tantum interrogauit vnde id nosset: Respondit ille, se *Lima* *Potosum* vsque vallante Angelica custodia feliciter aut calcasse, aut declinasse obuia quæque pericula; Verum *Potosio* Truxillum eunti aduersa fuisse omnia; ita ut aliud suspicari nequiuert, quàm Rosam ab oratione promissa, & Angelum suum à tutela commissa interea destituisse. Subiecit Rosa: non vanè coniectasti; at scito illa tibi accidisse incommoda, quia non ille eras qui esse solebas. Deinde fidentiùs ad specialia descendens monuit hominem de arcanis ipsi soli

foli notis, quæque à tanta distantia non nisi diuinitus aut Angelo internuncio Virgini potuerant innotuisse.

Quantum verò Angelicam hanc puellam amabant, am-
biebant, mulcebant SS. Angeli, tantumdem ei clam,
palam, vi ac fraude nocere conabantur furia infernales.
Torquebat Dæmonem illa hortensis cellula tot Cæli deli-
cijs plena, dolebat superbus illic se non timeri ab imbel-
li iuuenicula, imò ea solitudine ultro ad monomachiam
se prouocari. Itaque Virginem per tenebras aggressus est
tenebrius. Forma ingentis molossi erat, villosa, tetra, pic-
ea: lucem qua videretur dabant solæ rubentes flammæ
quas naribus, oculis, auribus affatim protrudebat. Hac
specie circuibat orantem Rosam latratu horrifono, rictu
immani ferociterque dentato, lingua fœdissimè exserta,
odore sulphureo, simulque pendulas aures, caudam, vil-
los arrigebat quasi impetum facturus; nec solum terrere
venerat, sed & nocere si posset, nam vt vidit ab immota
se despici, rabido morfu pertentabat virgineum illud
corpusculum; assultu, dente, ungue sæuiebat qua po-
terat, tandem ausu furibundo quam discerpere non pote-
rat, raptabat per solum, trahebat, versabat cœu lacerum
aliquod peripsēma: donec impauida, sed temeritatis per-
tæsa Virgo exclamauit ad sponsum, *ne tradas bestijs animas
confidentes tibi*. Nec alio fuste ad abigendum hunc Cer-
berum opus fuit; nam continuo elumbis, victus, fractus
resiliit, fugit, euauit, & Rosa prorsus illęsam indem-
nemque se admirata corde tranquillo ad orationem
rediit.

Semel à domestico Gundisalui Quæstoris oratorio ad
interius cubile se Virgo recipiebat: per viam adrepens ex
insidijs cacodæmon quanta vi potuit improuisum ei co-
laphum impegit, maiori tamen sonitu quàm nocumento,
subrisit enim intrepida Virago, insuper alteram maxillam
dare parata, si hostem conspicuum palam habuisset. Alio

loco & occasione in ædibus D. Isabellæ Mexiæ ignauus hostis Rosam à fronte, & cominus aggredi formidans, à tergo eminus rude saxum in eam librauit connisu tam impetuoso ac valido ut euntem solotenus prostrauerit. Rosa nec læsa, nec territa agilior surrexit quàm ceciderat, vilissimoque diabolo pudendam imbecillitatem exprobrauit. Ille victricis animositate confusus, rabiem qua puellæ nocere non poterat in eiusdem libellos spirituales turpissimè effudit. In his Rosæ eximiè charus erat Ludouici Granatensis codex, quo ad meditationum digerendos articulos diligentius utebatur. Hunc miser corripuit, lacerauit, ac procul in spurcitiarum sentinam abiecit, rem magnam se præstitisse ratus, quòd tantæ Amazoni quidquam saltim armorum furto ignobili sublegisset. Nihilominus Virgo & librum suum recuperauit, & pudefecit reduncum depeculatorem, quem non alio quàm improbæ felis aut *scabioso* nomine dignabatur.

Alia vice, postquàm in eodem oratorio preces absoluerat, incumbente vespero secretius in altissima ædium parte cubiculum adiit, solitaria meditatione dulcedinem ruminatura quam in oratorio gustarat inter preces. Verùm illic populosissima glirium orchestra imò hippodromus erat, procurrebant decuriatim, saltitabant, pugnant, sursum deorsum per muros, armaria, tegulas confuso venatu turbabant omnia, nec sperari quietiora poterant, cum fœdis ac lucifugis bestiis nox ipsa locique faueret conditio. Itaque Rosa mutato consilio in infimam domus partem descendit profundioris silentij quæsitura latibulum. Cella erat penuaria, ubi tunc instrumenta vindemiæ, canistra, lebetes, & id genus utensilia asseruebantur. Huc Rosa ut intrauit, arrectis horrore subito pilis agnouit, ibidem sese à *scabioso* ad pugnam expectari. Nec pauidi cedens mandauit transeunti illac ancillulæ candelam sibi adferri; qua allata dimisit ancillam, præcipiens

cipiens ne cui domesticorum diceret vbinam Rosa late-
 ret, nec se diutius solito ibi fortasse moraturam euocaret
 ad cœnam, donec ultro ipsa prodiret. Abierat ancilla,
 & Rosa vix ianuam clauserat, cum repente audiuit, simul
 à foris inducto pessulo sese à cacodemone velut captiuam
 oblerari. Mox intra penum occlusa animaduertit porri-
 ginosum hostem suum in prægrandi sporta, quam labri
 fundus occultabat, licentiùs tumultuari. Puduit genero-
 sam Virginem præsentis ibi luminis vti solatio, aut qua-
 licumque præsidio, candelam igitur ultro extinxit ipsa,
 statimque latentem inimicum è sporta in arenam prouo-
 cans, *heus tu (inquit) porce scabiose, adesdum, hic te ex-
 specto: prodi si audes; experire si quid vales, age in hoc vile
 corpusculum qua tibi Deus permiserit, certè in animam nil
 poteris, a caelesti sponso hac mihi securissima fiducia est. Con-
 gredere cornuta bellua, eya congredere.* Nec mora: profi-
 liit ferocissimus hostis gigantea mole qua contremuit cel-
 la (nil tremante Rosa) Virginem per humeros corripuit,
 strinxit, contorsit, quasi in minutissimas partes membra-
 tim laceraturus obluçantem, utque terrores duplicaret,
 fecit eam experiri contactu quàm pilosis, hispidis, eri-
 cinis lacertis esset, his inermem iactando, trudendo, pre-
 mendo miserrimè concutiebat, ut iam singula Virgini
 ossa viderentur commolita, luxatæ scapulæ, nervi distra-
 cti: at sub fragili carne vigeat infractus animus, & cor-
 culum in Deo fixum ridebat, despuebat, laxabat furen-
 tem cyclopis insaniam. Pluribus horis duravit obscu-
 rissima lucta, ingenti probro aduersarii, qui victoriam
 desperans, vel vnicum saltim gemitum, aut metus indi-
 cium extorquere tentabat, nec poterat. Interea Quæ-
 storis vxor familiam de Rosa interrogans, ab ancillula
 didicit quo ipsam loco reliquerat cum candela, quòdque
 disertè vetuerat euocari ad cœnam. Accessit, vidensque
 nulla ex parte promicare lumen, subduxit pessulum, ita-
 citè-

citèque abiit cunctationis exitum præstolatura. Tandem media nox dispescuit longum certamen, prodijt Virgo quàm lassitudine anhela, tam vultu hilaris, ac vltra morem latissima, vt nemo dubitârit magnum aliquid inter illas tenebras gestum esse. Postridie Gundisalui vxor non destitit, donec enarrante Rosa vniuersam rei seriem prolicuisset, vbi inter alia & hoc notatum fuit, quòd huiuscemodi còflictuum duri agones constantissimæ Virgini neque peregrini erant, aut minùs frequentes, nec vmquam formidinis sensum exprefferant.

Aliquando in hortum oratura processerat, cum de vicinarum arborum opaco vidit obuium sibi antagonistam non iam terrificum sed blandum, candidum, ac penè in Angelum lucis transfiguratum: nam species illi humana erat, sed formosa, decens, urbana. Doluit Virgo illic præter consuetudinem apparere hominem, vbi ipsa erat sine teste, sine comite. Interim cœpit eminus ille nutibus procum mox & procacem agere. Hic Rosa mendacem laruam sonoris vocibus detestata lemuri dorsum obuertit, & qua in ceteris còflictibus generosè steterat, in solo isto (quia de Castitate erat) à nobili fuga victoriam mendicauit, vt verò ad horti ianuâ volando magis quàm currendo peruenerat, in propinqua porticu substitit, correptâque ferrea catena nudas sibi scapulas flagris acerbissimis cruentauit, inter fluentes tum sanguinis, tum lachrymarum riuos Sponsò suo querula, quòd ipsam ad tempus destituerat, dum in eiusmodi angustias incidere, nunquam enim sibi præsentè ipso tam periculosam laruatæ impuritatis imaginem fuisse occursum. Sed confestim Sponsus gloriosus Virgini se stitit conspicuum, dixitque: *Audi Rosâ, ni tecum ego fuissèm, tunc victoriam reportasses?* Grande id fuit victrici solatiû, grandis & eruditione plenissima lectio. Simillima hæc sunt, & planè germana ijs, quæ B. Catarinæ Senensi in certamine haud

quidquam dispari contigerunt, quando videlicet huic respondit Christus: *Dum pugnabas, dum vincebas, intus eram, in tuo corde spectator aderam & fidus adiutor.*

Eminebat in Rosa (Confessarijs attestantibus) mirabile donum internoscendi sincerarum visiones ab illusionibus Sathanæ, & distinguendi sanctas inspirationes à versutis suggestionibus antiqui Serpentis, quod Apostolus *discretionem spirituum vocat.* Quodque admirare magis, à prima pueritia hoc insigni munere dotata fuit, quo sibi & alijs mirificè profuit, ut nulla umquam Virgini occurrerit tam fallax aduersarij tentatio, nulla tam fraudulenta seductoris vafrities quam non clarè statimq; primo in limine deprehenderit, arguerit, exarmarit.

Mirum, quot quantasque vno hoc telo victorias contra stygios dolos reportarit. Adhuc iuuenula exanimanti Confessario eruditè recensuit dignoscendorum spirituum regulas ab effectibus, aiebat illustrationes verè Diuinas esse cum in anima relinquunt humilitatem, affectum reuerentiæ, agnitionem propriæ vilitatis, ordinem ac unitatem cordis, gaudiumque in Deo. Ex aduerso contrarias his impressiones, tumorem, confusione diuisi cordis, complacentiam sui, & inquietudinem erga Deum nonnisi picem improbi auctoris

redolere. Id porro erat, quod Christus Bea-

tam Catarinam Senensem, hæc Rosam

absque alio Magistro

edocuerat.



C A P V T X V I I

Rosa persecutionibus, morbis,
ærumnis pressa, strenuè sese
ad patientiam exercet.

Rosis spinæ non tardè accedunt, sed connascuntur. Idem huic Virgini accidit, nondum primæ infantia cunas reliquerat, quando Rosarum speciem, nomen, spinas induit. Nonum ætatis mensem attigerat, cum lactanti Matri aruerunt vbera, lac defecit, & ne aliundè nutrix cōduceretur, obstabat res angusta domi, en primos infanti tribulos. Conabantur pulte liquidiori supplere lactis inopiam, sed perdifficilis ingestio os paruulum ductiōne cruciabat. Nec tamen plorabat Rosula, sed proprii pollicis inutili sucu famem tacita fraudabat, magis quàm solabatur. Adeo à teneris discebat pati prius quàm vagire aut loqui.

Creuit ætas, sed pariter cum ætate afflictio, nam vix ambulare ac fari cœperat, cum quotidie ob muliebrem Auia, Matrisque de nomine Rosæ controuersiam innocens puella vtriusque persecutioni se vidit miserrimè implicitam. Siue enim inuocata sub Rosæ nomine accurrisset domesticis aut Matri, frendens Auia in paruulam virgis sæniebat: siue ad Isabellæ nomen respondisset vocantibus, irata Mater expediebat virgidemiam, cædebat immeritam. Sic alternante foëminarum bile patiens Virguncula quoquo se verteret, incidebat in poenam, & ob hoc ipsum quod non peccarat luebat.

Quàm suavis erat indoles filiolar, tam aspera conditio Matris, ut penè videretur sola patientiæ biga par illud dissimillimum coniunxisse. Virginis modestia, sobrietas, deuotio, seculi fuga, silentium, vigiliæ impatienti Matri mera delicta erant, quibus castigandis non clamores, scommata, conuitia, non demum pugni sufficiebant, & calces, nodosus ex malo cydonio baculus persæpè ad manum fuit, hoc puellam iam grandiusculam frequentius delumbare solebat, præsertim quando comperita fuit exemplo Sanctæ Catarinæ Senensis rutilam sibi met casariam præcidisse. Nec mitiores in eam fuere domestici; postquàm nimirum innotuit eius vitæ singularitas, cælestium visorum frequentia & commercium, ac præcipuè illa humanis viribus euidenter superior abstinentia, qua faciliè arguebatur tam modico ac ferè nullo alimento iuuenulam naturaliter in vita sustentari non posse, timuerunt germani fratres, ne fortè propèdiem soror magno familiæ suæ dedecore ad S. Inquisitionis tribunal raperetur velut suspecta de imposturis ac fraudibus, aut sacrilegi mendacij sistæq; sanctimonix palam vel rea, vel conuincenda. Hos itaque timores quotidie ingerebant cum iurgio, his minis exagitabant vndique derelictam. Nec verebatur vltro improuida Mater publicè coram suis & aliorum confundere filiam proclamando uti hypocritam, fallacem, simulatricem, omnisque sinceræ virtutis inanem & vacuam. Accessit in persecutionis cumulum incredula quorundam Confessariorum seu oscitantia, seu ruditas, dum initio quod sibi persuaaserant, nitebantur & Virgini persuadere, videlicet ipsam itinere non recto aut saltem non tuto incedere, vertigine cerebri alijsque noxijs intemperijs laborare, friuolas illusiones esse, quas ipsa supernas illustrationes credebat. Hæc & similia, quamcumque aliam exanimassent, at minimè Rosam, cui intus patientia pro chalybe erat, còque ampliùs, quòd

ex huiusmodi præduris afflictionum cautibus deprehē-
debat manifestius, se per ipsissimas B. Catarina Senensis
vias deduci ad sponsi vñionem. Hinc vice quadam ab il-
lustri foemina interrogata, cur non rogaret seraphicam
Magistram suam, vt his ærumnis potenti illius suffragio
eriperetur, heroicè respondit: *quid, putas, ad ea mihi rege-
reret Seraphica Mater mea? quæstura utique, egone aliam
mihi exoptem semitam præter illam quam ipsamet gloriosa
calcauit? absit a me tam ignaua desidia.* Sciebant ambæ
quidquid Rosa à B. Catarina peteret, continuò impetra-
turam, idque patebit infra, sed generosa Discipula plu-
ris faciebat Magistræ dolorosa Stigmata quàm delicata
folatia, pudebat Crucifixi sponsam, vel per momentum
extra Crucem ac passionem repetiri.

Et sanè aut numquam aut rarò deerat grandi ei us pa-
tientix grandis materia, siquidem vacantem à Cruce ex-
terna grauior occupabat interna, cessantique foris perse-
cutioni agminatim corporis ægritudines succedebant. In
Canta ex dira neruorum attractione triennium lecto de-
cubuit cruciatu immenso, gemitu nullo, nisi quòd com-
passione acerbius quàm passione torquebatur ex illorum
incommodò quorum ministerijs carere non poterat; vnde
in hac alijsque suis infirmitatibus solebat dicere: *ò quàm
salubris, quàm incunda & felix fors foret crebriori ægri-
tudine diuexari, dummodò proximorum abesset incommodum.*
Sæpe Virginis guttur & fances ex inferiorum musculorum
inflammatione acutissima inuadebat angina, cui interdum
periculosior succrescebat cynanche: sæpius totis pulmo-
nibus & bronchis decertandum fuit cum asthma: sæ-
pissimè permolesta ischias vtrique coxendici grauius in-
cumbibat, non segnius interim costas vellicante pleuri-
tide. Stomachi, pericardij, intestinorum dolores sine lege,
sine numero frequentes conuulsiones inuehebantistiquē
morbi, qui prosterneudo cuius robustissimo sat erant sin-
guli,

guli, plerumque bini, terni, quaterni simul, ex diuersis oppositisque causis in languidulam irruebant, mirantibus interdum Medicis, vbinam in exsucco, arido, exhaustoque corpusculo tam diuersi ardores incendium fomitemque reperirent. Virgo sat peritè sentiebat, non tam à noxa vel intemperie humorum quàm à beneuola Sponsi manu hæc sibi agonalia festa prouenire.

Febres tum ephimeras; tum reliquas contumaciores ipsa assuetudo penè in iocum verterat, non item articulares illas manuum, pedumque fidiculas quibus notissima, (: attamen pauenda) chiragræ, podagræ, arthritidis nomina infederunt. Hic morbus, quòd vitæ minùs putetur infidari, pro quantitate miseriæ commiserationem, pro magnitudine doloris remedium nusquam inuenit aut leuamen, nec fortè alius est, qui diuturnam infirmi patientiam aut citiùs abigat, aut voraciùs absumat. Hunc tamen Rosa & hospitio frequenti æquanimiter excepit, & cum inuictæ tolerantia virtute pacificè vno communi lectulo coniacere fecit. Prodigiosum erat videre tenerrimam Virginem ardentibus iuncturis, tumentibus nodis, inflatis articulis, lancinantibus ex consensu musculis & ligaminibus inter extremos dolorum laniatus decumbere, quietam, serenam, placidam, nec gemitu ac leui suspirio cruciatùs suos accusantem. Si rogabatur quì valeret, nonnisi benè sibi esse respondebat, vel comparatione suorum scelerum permodicum esse quod patiebatur. Alijs de morbi atrocitate sciscitantibus aiebat, suaue ac melleum esse quidquid à manu tam dulcis Sponsi veniebat; alijs de inferorum pœna cogitandum esse, hac vna meditatione acutissimos quosque huius temporis dolores obtundi. Sæpius conuersa ad Sponsum: *Domine*, inquit, *auge auge dolorem, dummodo augeas & amorem.*

De his aliquando familiarìus deuotæ cuidam personæ collocuta, vniversam hanc morborum seriem inter pretiosos

riosos ac illustriores sibi à Deo collatos fauores recensuit, subiecitque, nisi hos ipsamet experta fuisset, numquam persuadere sibi potuisse, vnicum miserabile corpus tantorum ac tam multiplicium dolorum capax fore, neque putare se, vllum cuiuscumque partis aut membri superesse cruciatum, quem ipsa non senserit; nihilominus semper è Cælo sibi adfuisse præsidium & robur quo vniuersos imperturbatè sustineret, numquam sibi obrepisse impatientiæ motum quo vel latum pilum discesse à resignata conformitate ac amissi Diuinæ voluntatis. Proinde se sui pudere, quòd tantis Cæli beneficijs nondum vti par erat responderit, atque ex hoc capite se Creaturarum omnium quotquot per Orbem viuunt meritò ingratisimam esse reputandam, ex quo nimirum viderat eo se modo tractari à Domino, quo ipse nonnisi amicissimos suos tractare solet, nec tamen se pro dignitate redamare, tam amabilem, & amantem Deum: & forsan hic ei sensus erat, quando cū doloribus vnà augeri amorem flagitabat.

Huc planè referenda videtur celebris illa visio, quam inter diuiniore Rosæ excessus tanti fecêre graues mysticæ Theologiæ professores. Eam hic, prout ipsamet Virgo paucis ante obitum diebus Doctori Castillo ex fide pacta narrauit, nudo simplicique adtexam filo: suspensa (inquit) in vñituo quietissimæ contemplationis lumine vidi fulgorem admirabilis excellentiæ, decoris, ac Maiestatis, quem sine termino quaquaversus diffuderat omnipræsens ac subtilis immensitas. Huius amœni fulgoris centrum infederat arcus multicolor, splendidus, ac multiplici luminum pictura gratiosè variegatus, supraque istum alius extendebatur arcus paris cum inferiori pulchritudinis, ac maiestatis, & hunc in conuexi meditullio conspicuè exornabat gloriosa Crux nostri Saluatoris, purpurata, madida, locisque clauorum perforata, & Crucifixi titulo triumphali insignita.

Porro

Porro interiorem arcum impleuerat Humanitas Domini mei IESU Christi radiosa, clara, prælucida, tanto Gloriæ amictu circumdata, quantum in ea numquam aliàs fueram conspicata, placuitque ipsius dulci Bonitati conferre mihi vires extraordinarias, ac mirè viuaces, quibus acie irretorta liberrimè & prolixè intuerer Magnificentissimum Regem meum in toto decore suo; non enim vix aliàs ex obliquo aut solo capite ac pectore tenus, sed integrum ac totum cernebam à vertice ad plantas vsque, & ex directo facie ad faciem. Interrupit hic Virginem Doctor sciscitando, cuius coloris fuerint illi arcus? Respondit: multiplicis ac peregrini, adeò quod nulli prorsus color in Mundo isto visibili possit vel tenuissimè aptari comparatio, nisi quòd arcuum venustas omnium possibilem colorum varietatem, ac gratiam in se collegisse, videbatur cum infinita quadam excellentia & dignitate. Inde pergebat Rosa. Persensi ex vicina Christi humanitate suauiter in animæ meæ fundum defluere inexplicabiles flammæ & gloriæ stricuras, adeo quòd existimarem à Mundo corruptibili me penitus iam solutam, & ad perpetuæ fruitionis beata gaudia translata esse. Post hæc ille speciosus forma præ filiis hominum balancem & nescio quæ pondera disposuit in propatulo; mox populosæ Angelorum phalanges festiuo ornatu, ac nitore illustres accessere, decora cum reuerentia sese inclinantes Domino Maiestatis: accessere item copioso numero felices Animæ, similiq; adorationis ritu Saluatorem reuerite scorsim constiterunt. Angeli correpta balancæ ac pōderibus cœperunt onerare trutinā, afflictiones afflictionibus exaggerantes in cumulum, velut earum molestiam ad amussim exploraturi. At conantibus intercessit Christus, officiumque velut Angelico sublimius arbitrio sibi met assumens manibus proprijs stateram leuauit in æquilibria, & de cumulis impositis afflictiones distribuit presentibus

animabus, inter quas & mihi portionem seposuit grauissimæ aduersitatis. Deinde ponderibus denuo impositis cumulabantur exaduerso gratiæ super gratias; cumque accedentes Angeli pararent libram attollere, rursus intercessit Christus velut omnipotenti suo brachio dignam functionem accuratiùs peracturus; & ad proportionem distributarum afflictionum pretiosos illos gratiarum acervos inter præsentis animas attentissimè diuisit; neque præterijt, siquidem & mihi ad pondus concessæ aduersitatis gazam inæstimabilem supereffluentium gratiarum admensus est. Notavi adstantes animas eodem gratiæ thesauro tam distentas & ad summum vsque refertas, ut ore & oculis exundaret arcata plenitudo. His peractis sonoram decentissimè extulit vocem Saluator: *Nouerint* (: inquit) *uniuersi, quòd tribulationem subsequitur gratia; sciant absque pondere afflictionum ad gratia cumulos non perueniri: agnoscant iuxta ærumnarum incrementa augeri pariter charismatum mensuram. Nolint errare, unica hæc & vera est scala Paradisi; nec præter Crucem alia superest qua in cælum ascendatur.* His auditis (: pergebat Rosa) inuasit me validissimus impetus quem verbis effari nequeo, profiliendi in medium fori, ut publicè fortissimisque clamoribus vociferarer ad omnem hominum ætatem, sexum, statum: audite Populi, audite Gentes vniuersæ, ex ore Christi vobis denuncio, non adquiri gratiam sine præuia afflictione, ærumnis supra ærumnas concumulatis opus est, ut ad intimum Diuinæ naturæ participium ad gloriam filiorum Dei, ad perfectam animæ pulchritudinem pertingatur.

Idem me stimulus vrgebat impetuossimè ad prædicandam Diuinæ gratiæ venustatem, angebar, sudabam, anhelabam, videbaturque anima corporeo carcere teneri iam non posse quin eo relicto sola agilior erumperet clamatura per Mundum: ô si nossent mortales quid sit

Gratia, quàm formosa, nobilis, pretiosa, quantas in se complectatur diuitias, quas opes, iubilos, delicias, utiq; ambirent omnes affligi & pati, vltro postularent cuncti molestias, persecutiones, ægritudines, tormenta pro solo Gratia opulentissimo lucro assequendo, hoc sanctæ patientiæ mercimonium est & vtile fœnus: nemo quereretur de cruce, si hanc tantorum thesaurorum agnoscerent legitimam stateram.

Interpellauit Doctor, cupiens explorare magis, sub quali specie aut figura Virgini apparuisset Gratia? promptè respondit Rosa, nil eam cum corporeis figuris habere commune, at longè minùs cum colore aut quauis creata pulchritudine, naturam ei omnino Diuinam esse, attramen bene se obseruasse quòd Gratia res sit alia à Deo tametsi Dei imaginem mirabiliter contineat, animamque constituat Deiformem. Tandem interrogauit Doctor, quo genere locutionis intellectualem aut vocali Christus verba superius recitata protulerit? respondit Virgo, nescire se quo illa nomine apud talium rerum peritos appelletur, modum tamen locutionis hunc fuisse, quòd ab ore Christi promanabat clarus & purissimus sapientiæ conceptus, qui animæ fundum penetrans significabat intus quæcumque vellent intelligi.

Hæc illustris visio tempestiuè Rosam præparauit ad vltimos illos extremæ suæ paralyfis dolores qui præmaturam ei mortem intulerunt, proinde cum de felici

Virginis transitu agetur infra, opportunus de his redibit sermo: neque enim vnico

Capitulo tota Rosæ patien-

tia potuit explicari.

CAPVT XVIII.

Rosa varijs indicatijs ardentem erga Sponsum amorem prodit.

Quanta in Rosæ pectore flagraret Diuini amoris Actua, placuit Deo interdum visibilibus signis palam facere, dum ex vultu orantis iussit splendores & flammulas scintillare. Nocte quadam Rosæ dormiendum fuit in vno conclau cum socia Virgine, hæc circa gallicinium euigilans vidit per tenebras frequentia micare lumina in cubiculo; mox pauidè circumspiciens aduertit non aliunde esse quàm à facie orantis in angulo Rosæ, hæc enim lectulo suo clam ad fundendas preces in pauimentum sese demiserat, & vbi maximè in obscuro se latère credebat, prodebatur lucidis igniculis per os oculosque inter orandum euibratis, testante prodigio quantum incendium feruebat intus. Hoc-ipsam Rosæ insciæ pluries coram diuersis accidisse compertum est.

Nec minùs eiusdem ardoris indices ac fauillæ erant ignita illa suspiria, quibus veluti flabellis cor illud succensum & æstuans simul disflabat calores suos, simul eodem validiùs succendebat. Crebrum hoc ei in ore erat: *Domine ecquis te non amaret? ego verò mi bone IESV, quando te dignè amare incipiam? heu me! quàm pròcul disto à perfectà, intima, robustissima tui dilectione! necdum scio congruè te amare. quis pudor! ad quid mihi cor istud, si nondum id pro tuo amore totum disfluxit in cineres! nimi-*

rum propria hæc est superno amori hydrops, vt solum id sitiat quo magis abundat.

Hoc affectu calefcens Rosa pro impetrando Diuino amore ex ipsa Diuini amoris ignita pharetra nonnullas iaculatorias collegit in formam precatiunculæ, quam lubet huc verbatim transcribere, quia cunctis ea placuit, multis vsu profuit, amandique tum signis tum stimulis scatet. Hic ei tenor est: *Domine mi IESV Christe Deus & homo, vere conditor & Redemptor noster, quòd umquam te offenderim equidem mente discrucior, quia es qui es, & quia te amo super omnia. Mi vere Deus & Sponse anima mea, tota lætitia cordis mei: ego ego amare te desidero benignissime IESV, amore illo perfectissimo, amore efficacissimo, sincerissimo, ineffabili, intensissimo, incomparabili, incomprehensibili, irrefragabili, inuictissimo, quo simul vniversi ciues empyrei te diligunt. Insuper concupisco amare te ò Deus cordis ac vita mea, Deus delictum meum, amare te velim quantum te amat Sanctissima Mater tua, Domina mea Virgo purissima; quinimo te ò salus ò gaudium anima mea, te inquam opto amare quantum tu ipse mi Deus te amas. Concremer ego, deficiam ego, consumer ego igne tui Diuini amoris ò mi benignissime IESV. Rudis ista rhetorica est in auribus seculi, at schola Diuini amoris hic suam agnoscit reperitque phrasim.*

Nouerat ingeniosa Virgo ceteras in se virtutes abscondere, sola Charitas (: quia flamma est) premi ac celari nequaquam poterat. Hinc Rosæ colloquia, salutationes, responsa iugiter amoris diuini mentione condiebantur. Si cum familiaribus, Matronis, Virginibus sermocinandum, prima Rosæ vox erat: *amemus Deum nostrum, amemus*. Si de quacumque persona absente proferendum encomium, rem totam Rosa hoc absoluebat compendio: *Deum fortiter ac serio amat*. Quotiescumque sacramentaliter confessura procubuerat ad Confessarij pedes,

mu-

munita crucis signaculo erumpebat in hæc verba: *Domine tecum mi Pater. Deus sit amor noster. O quis donet totum perfectæ diligamur. Heu qui eum non diligit, bonitatem ignorat.* In omni conuersatione vnicum Rosæ oblectamentum erat ac solatium de amore Diuino aut audire aut loqui, inculcare supremam obligationem diligendi Numen quod tantopere nos dilexit & diligit, varios distinguere titulos, modos, stimulos huius dilectionis, denique omne aliud dissertationis argumentum quantumuis diuersissimum comi dexteritate huc inflectere, vt amor & amabilitas Dei in thema reliquorum discursuum succederet, quo obtento mirabile erat audire Virginem aliàs taciturnam verbis aprissimis at vehementer ignitis ratiocinantem de debito charitatis, de affabili bonitate Dei dignantis amari, de pulchritudine Maiestatis tam dignæ amari, tantum hinc Rosæ non deerant vocabula emphatica, hic solum abundabat fluida eius facundia, hic ei inardescibat spiritus, acuebatur vox, fulgurabant oculi, succendebantur præcordia, nemoque præsentium dubitare poterat, ex abundantia cordis os loqui.

At verò cum sola erat in recessu tugurioli, aut cum putabat à nemine se obseruari, tenerius simul atque liberiùs prosa, versu, sermone cantu ructabat solemnissima quæq; Seraphici amoris axiomata. Quæstor Gundisaluus vnâ cum vxore & liberis aliquando domi suæ clam auscultabat Rosam loco solitario Diuinos amores pijs clamoribus feruidius celebrantem; summa contentæ vociferationis hæc erat, sinuitabat per ordinem singulos creaturarum ordines ad amorem dulcissimi Creatoris, elementa, Cælos, Angelos, plantas, animalia compellabat, idem idem replicando: *amemus Deum, Deum amemus, amor Deus, Deus amor.* Nec perfunctoriè hæc dicebat, duabus ac interdum tribus horis vno defixa loco cælumque respiciens his vocibus immorabatur, eo calore & impetu, vt audientium

tium corda ad amorem & compunctionem ignara commouerit. Subinde non inueniens modum quo sibi inter hos feruores aut temperaret aut satisfaceret, citharam, (quàm pulsare nunquam didicerat) arripiebat de proximo pariete fortè pendulam, tactuque chordarum moderabatur impetum vocis, suauiter cantillando saucij querimonias amoris, vt omni ritu gestuque sese dilecto suo ostentaret amantem. Contigit aliquando citharæ omnes deesse chordas, nihilominus Rosa citharizabat, intenta magis interitis sonanti *decachordo psalterio cum cantico*. Videbatur sub his innocentissimis symphonie conatibus Rosa cum puello suo Amore repuerascere, & oblita omnium dolorum indulgebat simplici teneritudini intimorum affectuum: bulliebat corde, & existimans nullos è vicino sibi imminere arbitros, tantilla euaporatione feruentem spiritum solabatur. Accidit tamen quòd abrepta dulcore inrrantes & exeuntes domesticos non obseruauit. Vnde pluries de cantatis ore auditi sunt versus isti numeris Hispanicis illigati, quos vtcumq; latinè reddiderim:

En; inter *flores* pulchrescis, & inter *olinas*:

Iesule, nec molli spernis adesse *Rosa*.

Lepôres erant, quibus Virgo liberius adblandiebatur dignationi sui Dilecti, qui Rosam pauperem (: vtpote Matre *olina* & Patre *de floribus* natam) minimè fastidierat, ex quo ab ea se permiserat tam tenerè amari. Multa de similibus amantis Rosæ vaporarijs, de anteroticis ad Spôsum aspirijs, & eclogis dicenda superessent fortè non indigna relatu, sed properandum ad solidiora.

Vehementissimæ dilectionis comes & testis est zelus, nec huius in se ardores Virgo celare poterat; hinc tantopere vrebatur, sicubi priuatim aut publicè quidquam committeretur, quod Dei honorem vel in minimo viola-

ret;

ret; certè nec leuissima dissimulabat. In primis otiosas in Ecclesia fabulas (: nobilitatis rusticum malum) adeo detestabatur, vt quamquam timida verborumque parcissima continere se non posset, quin loquaces ob loci reuerentiâ, debitæ urbanitatis admoneret, ea tamen moderatione, humilitate, prudentia, vt obsecrare potius quàm corripere videretur. Domi quotquot de familia erant, cauebant ne quas coram Virgine proferrent ineptias, verebantur censorium Rosæ adhuc paruulæ supercilium, nouerant puellam ad suas tam atroces & crebras iniurias patientissimam ea sola tolerare nequâquam posse quibus vel tenuiter Deum offendi existimaret. Hic illi à prima pueritia sensus fuit, nam vbi ceteræ proles pro garrulo rudis ætatis genio aut sordes loquebantur quas nondum intelligebant, aut cantilenas amatorias aliunde forsan auditas innoxie repetebant, plorabat Rosa, fugiebat, puerile flagitium deferebat Matri, querebatur offendi Deum, quodque alia ratione castigare satis non poterat, in seipsa lachrymis amarissimis vindicabat. Mendacia, quæ puero- rum assiduis iocis & loquacitati abesse vix vñquam solent, tam dirè excrebatur, vt proprium suum apophtegma esset: *nec pro cælo nec pro terra mentiendum, quia Deus veritas est*. Hinc si quidpiam falsum etiam bona fide narrabatur ab alijs, pro accurato veritatis zelo placidissimè corripere referentem, interloquendo comiter, non sic sed tali modo rem accidisse, non istud sed illud factum, aut dictum fuisse. Accidit vnâ circiter hora ante felicem Virginis ad meliora transitum, venire illuc Religiosum quemdam Sacerdotem, quem illa videre ante mortem desiderauerat, huic intranti vna ex adstantibus foeminis bona fide dixit: opportunè venis ô Pater, iam enim Rosa vocari se iusserat. Audiit moribunda, deque veritate, scrupulosius sollicita attenuatum spiritum collegit in vocem, *non (: inquit) erremus; te quidem videre ante meum*
abitum

obitum desiderari, idque solum dixi, nil ultra. Nimirum tanta ei inerat cura veritatis, quia Deus est veritas. Lachrymas quia vnicè ad Dei ærarium pertinere didicerat, non patiebatur aliò à quoquam inutiliter profundi, cupiens has soli Diuinæ Maiestati in tributum ab omnibus reseruari; vnde quadam occasione videns plorantem Matrem, quasi Diuinæ Quæsturæ correpta zelo, hem (inquit) ô Mater quid agis? gazam prodigis soli Numinis thesauro inferendam? quin tu potius memineris pretiosum hunc liquorem deberi soli Deo in ablutionem nostrorum peccatorum. Tanta Virgini zeloti cura fuit, ne quid vel honori vel tributo cælestis Sponsi decederet.

Eiusdem amicissimi zeli genuina soboles erat immensum illud gaudium quo vernabat Rosa quotiescumq; Dei honorem & obsequium insigni aliquo successu videbat promoueri. Limense emporium fama impleuerat, quamdam mulierem Deo solemniter dicatam, fracto Religionis vinculo è Cantabria profugisse in Indias, ac sub virili habitu in ciuitate *Guamanga* diù errabundam, denique miro Dei beneficio rediisse ad cor, iamque in dicta ciuitate resumpto sacro schemate sub religiosa clausura inter Sanctimonialiales degere. Hæc vt Rosæ innotuerunt vidisses flammigerum eius zelum tot succendi affectibus, quorum species in diuersa sensum abripiebant. Doluit primum de sacrilega iniuria, qua Diuinus honor facinore tam foedo ac publico fuerat violatus, at simul ei tripudiat animus in victoria Diuinæ gratiæ: compatiebatur lapsæ peccatrici; simulque effusè lætabatur in ea miram Domini bonitatem ac Misericordiam publicè ab omnibus celebrari, huic triumphum, huic festum diem agebat Rosa, non sic lætatura si totius Americæ sceptrum sibi imperiumque sorte vel dono obtigisset. Denique metuebat simul ac sperabat conuersæ peccatricis constantiæ ac stabilitati, verum in solatij cumulum adfuit superna re-

uela-

uelatio, qua Rosam Christus ipse securam reddidit de se-
ria reductæ Monialis poenitudine, adiungens, eam non
modò perseueraturam, sed insignem quoque sanctimonix
gradum adepturam.

Nil erat quod satiaret Rosam amores suos Sponso testi-
ficari cupientem, vnde iugiter apud Confessarios lamen-
tabatur, ingrata se esse tam suauis Numinis in se bonitati,
nescire se modum aptè colendi tam excelsam amicitiam,
dumque agebat omnia, nihil se egisse querebatur. Ac-
cidit, vnum ex suis Confessarijs grauiter infirmari, ac tem-
pore quidem valde importuno, siquidem instabat propin-
quus dies, quo illi habendus erat solemnis ad populum
sermo. Misit igitur qui Rosæ nunciarent, improuisa ægri-
tudine se obrui, nec vires sibi futuras ad prædicandum,
dolere se ob notabilem defectum qui festiuitatem ex par-
te obscuraturus erat, maximè cum ingens illustrium per-
sonarum multitudo ad concionem (: de qua fructus exi-
mij sperabantur) fuisset inuitata. Rosa tristi nuncio ex-
territa post breuem deliberationem respondit: de Dei ho-
nore & obsequio hinc agitur. Eya itote, dicite infirmo,
certissimè ipsum statuta die prædicaturum, tempestiuè
adertunt vires vt possit, tametsi non sine conditione alteri
onerosa. Conditio autem hæc erat, quòd Rosa interea
sui Confessarij febres in se reciperet, prout olim S. Cata-
rinæ Senensi contigit. Nec dubitauit Virgo pacisci cum
Deo sub tali onere, malebat enim alienis febribus tor-
reri per omnes medullas, quàm quòd ex concionis de-
fectu gloria Dei in mutila festiuitate detrimentum pate-
retur. Euénit vt Virgo prædixerat, paucis ante concio-
nem horis Prædicator conualuit, officioque præclarè fun-
ctus est. Interea Rosam coquebat febris non sua. Nec
tam eni sermone abesse voluit, quia febrilem æstum facile
sup erabat exastuans Diuinæ gloriæ zelus.

Inquietissima vis amoris nihil non comminiscabatur

quo seruiret vnice dilecto . Compererat distante historia,
 S. Catarinam Senensem aliquando latenti sub forma pau-
 peris Christo dedisse vestem , excogitauit ergo & amans
 Rosa methodum ac rationē qua Christum indumento spi-
 ritualibus lacinijs operosè contexto deuotissimè amici-
 ret . Nusquam is sibi occurrebat pauperior quàm vbi in
 Bethlehem nascebatur paruulus , nudus , cum inopi Ma-
 tre extorris diuersorio , algens in stabulo , panniculis ob-
 uolutus in vili præsepio . Huc igitur artes artusque om-
 nes intendebat Rosa , vt piorum operum singulari ac pre-
 tiosa consutura dignos Amori infantulo vestes præpara-
 ret . Lubet hìc simplicius ex ipsis Rosæ pugillaribus reci-
 tare formulam , qua sibimet Virgo hoc opus præfiniebat,
 ac ne labente memoria quidquam præteriret, hoc ordine
 singula notarat in pagella . *IESVS . Anno 1616. fauente
 & auxiliante IESV Christo suaque benedicta Matre incipio
 parare vestimentum dulcissimo meo IESV nascituro tremulo,
 nudo , egeno in Bethlehem . Indusolum sunt 50. Letania ,
 9000. Rosaria, 5. dies inedia in reuerentiam SS. Incarna-
 tionis . Panniculi constanto 9. stationibus ad SS. Eucharis-
 tiam , nonem trientibus psalterij Rosariani , & 9. diebus ie-
 iunij , pro numero mensum quos in utero purissimæ Matris
 exegit . Stragulis, 5. dies esuriales, 5. stationes, totidemque
 integra Rosaria impenduntur pro honore sui Natalis . Fasciam
 præbento quinque Corona Domini, 5. dies inedia , totidem
 stationes in reuerentiam sue Circumcisionis . Fimbrias ac
 limbos tam straguli quàm fasciolarum ambiunto 33. SS. Com-
 muniones, 33. interuentus Missarum, 33. hora mentalis ora-
 tionis, 33. orationes Dominica , Angelicæque salutationes,
 totidem vicibus recitatio symboli Apostolorum, cum Gloria
 Patris & antiph. Salve Regina, item 33. trientes Rosarij Ma-
 riani, 33. dies ieiuniorum , & tria millia verberum in ve-
 nerationem sua ætatis quam vixit in terris . Denique pro
 crepundijs puerulo offeram meas lachrymas, suspiria , actus
 amoris*

amoris, cumque his animam meam & cor meum, ut nihil mihi remaneat, quia conuenit nihil me possidere.

Constat ex deuotæ Rosæ mystica officina pluries hoc vestimentorum genus prodijisse, nam subinde amicissimis personis eadem liberali dono cedebat offerenda, applicanda, circumponenda IESVLO nudo Amori suo. Et quid non egit ut is ab omnibus diligeretur? Placuit hic Rosæ ardor Saluatori, tantamque propagandi sui amoris solitudinem ingenti miraculo obsignauit Deus, quod Capiti sequenti seorsim narrandum sepono.

C A P V T X I X.

Rosa, ut Christum omnibus
amandum persuadeat, mani-
festum sudantis Imaginis
miraculum impetrat.

IN domestico Gundisalui Quæstoris oratorio inter alias sacras Imagines tum venustate tum reuerentia, celebris eminebat illa quæ virilem Christi vultum scitissimis coloribus ac lineamentis exprimebat in tela. Huic Rosa peculiari deuotione erat addictissima, hanc effigiem quotiescumque diducto velo prostabat in altari, fixis obtutibus, audivissimis oculis hauriebat ac ferè sorbebat intensissima contemplatione, nimirum sentiens cor suum concalescere dum illius aspectui inhærebat.

Anno igitur MDCXVII. die xv. Aprilis (: qui Sabbathum erat) ad vesperam circa pulsum Angelicæ Saluta-

tionis Rosa cum vxore Gundisalui & filiabus in prædicto Oratorio de more insistebant orationi: detecta erat venerabilis illa Saluatoris effigies, cui ad vtrumque latus binæ ardebant candelæ in altari, ac tertia procul inde lucebat seorsim in mensula. Hic Virgo ultra solitū cœpit vehementius succuti amoris stimulis, vt nec voci temperare iam posset quin erecta in pedes feruidissimè ac sonore affaretur sacram Imaginem, quasi sola in oratorio fuisset. Summa vaporantis alloquij hæc erat: Domine, ô quando te omnes diligant prout diligi mereris? quousque patieris hominum peccatis te irritari atque irreuerenter haberi? ô quis det, vt cuncti agnoscant, quali quantoque amore dignus sis? vt capiant, non poenarum seruili formidine, non mera spe mercenaria premiorum, sed propter te amandum te esse? eya fac Domine, fac te amari vt decet, excute pharetram, vibra quaquauersum ignita, purissimi tui amoris iacula, erumpant vbique luculenta cordium incendia, tibi tibi famulentur vniuersi, tibi sese enervet omne pectus præ violentia charitatis, tibi omnium affectuum sudent balsama, tibi inquam, tibi amabilissime IESV, qui tanto humani generis amore bullis & æstuas. Inter has similesque voces Quæstoris vxor clam ex oratorio in vicinum atrium se proripuit cum filiabus, ne fortè loquenti Virgini interstreperent, aut liberiores hos impetus respectu importunæ præsentiae impedirent. Vna tamen filiarum non abnuente Matre irrepsit quasi candelas emunctorio in Altari purgatura: statimque velut subitaneo pauore Rosam interpellans, quid video? inquit, en vultum Saluatoris totum sudor operuit. Audiuit hæc foris Mater, & confestim ingressa vidit copiosas sudoris guttulas instar minutissimorum vnionum tota sacratissimæ Imaginis facie conspicuas lucere ac prominere: subnascebantur aliæ alijs, & mutuo attritu resolvebantur influxum, diuersisque lineis per pictos capillos & barbam

stil-

stillatim decurrebant. Attonita spectaculo, nec causas propius accedere, misit qui maritum domo forte absentem citissimè aduocaret, is enim Secretarium Ioannem de Tineo tunc è portu Callaoensi Linam reuersum negotiorum causa conuenerat. Venerunt ambo, signari quid rerum ageretur: vixque oratorium ingressi, vbi vxor cum Ioanne de Benauides & Petro Chiandro familiaribus taciti expectabant, viderunt non sine ictu pietatis effigiem vndequaque velut roris antelucani guttulis confertim madidam & obductam, iamque stillæ ad ipsum vsq; marginem ligneum qui picturam includebat deflexerant, ac nouæ identidem guttæ à fronte, maxillis, oculis succrescebant.

Obest miraculorum fidei præceps credulitas, prodest circumspecta dubitatio, vt seueritate examinis ceu polituræ defricu simul exploretur soliditas & clarescat veritas. Ita hic euénit: nam Gundisaluis in primis Angelinum Medorium Romanum qui imaginem pinxerat, in ædes suas aduocauit, vt sudoris originem, si fortè à natura colorum esset inuestigaret. Adfuit pictor, limpidissimi humoris claritatem miratus, digito guttas aliquot delibauit, fricuit, naribus admouit, cumque nihil aut olidum aut oleaceum posset deprehendere, lustratis diligenter omnibus edixit, supernaturale sibi omnino videri quod in imagine gerebatur; coloris, odoris, tactus aliarumq; circumstantiarum experimenta neutiquam fallere, naturæ artisque industrias tali prodigio longè abesse. His minimè contentus Quæstor fidum hominem Andreám Lopez ablegat, iubetque è vicino Societatis Iesu Collegio accersiri nominatim Patres Didacum Martinez & Didacum de Peñalosa, sic tamen vt neutri ad quid ea hora vocarentur indicaret. Venit P. Peñalosa cum socio Francisco Lopez coadiutore, nam impeditus erat P. Martinez, & tertia noctis hora imminebat. Intrauit uterq; ac breui

oratione præmissa ad altare propior accessit, sudantem adhuc vultum diu attentèque contemplatus demum petito gossipio leniter humorem absterfit. Verùm quò plus detergebatur plus noui sudoris erumpebat, rursus ergo Peñalosa gossipium quàm siccum erat applicuit, rursus guttulis guttæ, riuis riuli successere. Dehinc chartam adhibuit, visurus an fortè ex coloribus oleo temperatis vnctiosa aliqua pinguedo humori inesset; commaduit charta, sed paulò post siccabatur, vnde purè aqueum esse collegit. Quatuor continuis horis & vltra durauit pium ostentum, cunctis per gyrum admirantibus, quòd nullo colorum aut venustatis detrimento vultus ille facerimus post sudores pulchrior viuidorque solito appareret. Nec adeo euauit hic sudor quin sub barba vsque ad oram marginis vestigia reliquerit multis post annis & lustris palam conspicua.

Supererat publicæ autoritatis legale examen & disquisitio, vt euidentius innotesceret miraculi certitudo. Itaq; Limanus Archiepiscopus D. Bartolomæus *Lobo guerrero* capiendis legitimis informationibus Iudicem constituit Doctorem Ioannem *de la Rocca* Parochum & Archidiaconum Metropolitanum, qui coram Notario Iacobo Blāca Presbytero auditis omnium qui spectaculo interfuerant vnisonis testimonijs rei gestæ seriem ex ordine totam excepit, ac tabellioni ritè in protocollum referendam commisit. Interea Gundifaluum, vxorem, familiam grauissimus inuasit timor, ne fortè ob aliquod suum aut domesticorum occultum scelus hoc in suis ædibus portentum accidisset, aut impendentem aliquam Diuinæ ultionis cladem miseris comminaretur. Verùm his facilè Rosa totius arcani probè conscia occurrit, voce tranquilla & placida iubens ne timerent, nihil terrificum, nil finistrum horridumue portendi, totum hoc quidquid fuerat miraculi eò dumtaxat spectare ac tendere, vt Saluator quàm

quàm enixè cupiat amari ab omnibus; ipsomet sudorifero vultu estuque præter ordinem luculentò manifestaret; proscænium istud solius fuisse Diuini amoris reciprocos hominum amores inuitantis: non vnico ore sed poris omnibus clamasse in imagine Redemptorem: *redamate amātem vos*. Quis enim perciperet laxari in hunc clamorem poros nisi cum sudant? Nondum Rosa loqui desierat cum Gundisalui vxori in memoriā recurrerunt ignita alloquia quibus Virgo Imaginem affata fuerat ante sudorem, conferebat anteriora postremis, & mirè inuicem consolare deprehendit. Nec minus apertè quotquot sudoris spectaculo coram frui erant, fatebantur, se sub illius intuitu novos, acutos, insolitos sensisse Diuini amoris stimulos, idque erat quod Virgo tam ardentè & anxie flagitārat. Non satiantur sic amantes orare iugiter: *flamme fiat igne charitas, accendat ardor proximos*.

Neq; hic stetit miraculum quin pattu noui miraculi & suā certitudinem assereret, & Rosæ brachium fidemq; liberaret. Paucis ante diebus (nempe feria 2. Paschatis) Rosa lapsu fortuito terræ allisa brachium grauiter offenderat; Chirurgi tumidis ac liuentibus indicijs territi iudicarunt aut Virginem deinceps mancā ea parte remansurā, aut saltim curationis laborem admodum prolixum incertumque fore, periculum longè minus fuisse intercessurum, si ossa in partes diffracta crepuissent; Rosa patiendi assuetudine ac desiderio fortis hæc quasi de alieno brachio dicta tranquillè excipiebat: nihilominus die quadam familiariter cum Gundisalui vxore de prodigio sudātis Imaginis conferens, repente se sensit excitari ad fiduciam recuperandæ sanitatis, modò gossipium quod prodigioso Imaginis sudore maduerat, contusis brachij sui neruis ac musculis applicaretur. Quæstoris vxor quasi de virginis ore verbum rapiens confestim gossipium attulit, fascias solui, floccos imponi iubet. Cunctabatur Virgo, metuens præ-

propere sibi dolores eripi, quos pro Sponsi amore diutius tolerare optabat, causabatur se citra Confessarij permissionem nil præsumpturam. Ne tamen oblatam remedij gratiam videretur aspernari, continuo ipsamet Confessarium adiit in Aede S. Dominici, candore quo solebat rem expoluit, nutum expectavit. Confessarius nil differendum esse edixit, iret, properaret, gossipium apponeret, seseque Diuino fauori submitteret. Factum ut ille imperauerat. Meridiei punctus erat, quando D. Maria Vlategui proprijs manibus Rosæ domum reduci, brachium nudauit, gossipium circumduxit, alligaturam reposuit. Mox Virgo in Oratorium se proripuit, ac inde post duas circiter horas egressa brachium vndequaue sanum & flexile ostendit. Causa Domina de modo ac mora curationis inquisit; cui Rosa: vix (inquit) in Oratorio ad preces coram S. Imagine me composueram, quando attractu præualido sensi redire ad sua loca distortos nervos, detumescere pulpos, distringi musculos, nec tamen prodire statim volui, donec cœlesti Medico grates ex debito persoluissim; in his nonihil me distinui; tolle iam gossipium, tolle fascias, quia in tuto sunt omnia. Beneficium tam, repentinum totas ædes exciuit in securæ gratulationis lætitiâ, mirabantur omnes, & præcipue Chirurgi qui pridie metuerant oleum & operam perdi, siquidem intractabile viderant brachium & in omnem medelam contumax, ut non vererentur tamquam de incurabili ambigue musitare.

Exinde grauior tempestas formidinis Gundisaluo incubuit sed nouo Rosæ solatio mox dissipanda. Serpebat incertus per urbem rumusculus, sacram Imaginem de priuato Oratorio auferendam iri, velut publico ac celebriori loco dignissimam. Torquebat hæc fama Quæstorem, confortem, filias, quod ægerrimè paterentur domesticum hunc thesaurum quotidiano suo ac suorum conspectui, deuo-

deuotioni, gaudio subduci, præsertim quia pluries à Rosa didicerant, gratiosam hanc Saluatoris effigiem toti domui salutarem esse; in eà Diuinam misericordiam secretius operari sua magnalia, frequenter ab illa benedictionem supernæ dulcedinis emanare. Sed animosa Virgo, vt comperit anxium Gundisaluum hac formidine cruciari, ne quidquam dubites, ait, mi Pater (: nam ipsum & uxorem parentum nomine honorare consueuerat) ne inquam timueris, non enim huiuscemodi ostenta nobis indulsit benignus iste Saluator tamquam propediem his ædibus abiturus; nobiscum ille habitare dignabitur, certus esto. Quòd si ob gratiam nuperrimi miraculi pictura, illa hinc auferenda est, totum simul oratorium cum reliquis eiusdem sanctis iconibus auferant necesse est, quia pleraque miris in nos beneficijs certant, scatentque arcanis prodigijs.

Ita esse pridem coniecerant ex affectu, deuotione, reuerentia, quam peculiariter modò huic modò illi ibidem Imagini Rosa impendebat, velut inde fauoris Diuini copiosior eam afflasset. Prostabat in Altari Oratorii imago IESV paruuli venustis coloribus adumbrata; in hanc Virgo sæpissimè iaciebat ardentes oculos, huic mittebat crebra ex imo pectore suspiria, hanc deperibat, nec toto cautissimæ suæ modestiæ velo sufficiebat intimos erga illam feruores abscondere. Obseruauit hæc tacitè Maria de Vsategui, prudentique solertia demum à Virgine per ambages elicuit quid rerum illic lateret. Fatebatur ingenuè Rosa ad omnem illius picturæ intuitum nouo se perfundi calore & gaudio, subsultare præcordia, inflammari spiritum, eò quòd Diuinus ille puerulus videbatur sibi nunc blandò arrisu salutem dicere, nunc suauis radiorum effluxu animam transfigere, aliquando etiam curta brachiola foras protendere velut in amplexum Rosæ iam iam vltro procursurus. Hæc narrans inardescibat, nec

cohibere se poterat quin fortius vocē attolleret in paranesis; eya, inquiebat, o Mater, æstimato hunc cœlestem paruulum, famulare huic Domino, cole, venerare, ama hunc Regem gloriæ, qui sine intermissione ex pusilla icone tam grandia in nos dona congerit, paratus maiora & plura effundere, modò velimus capere. Redibat inde protinus ad eam de qua supra virilem Seruatoris nostri effigiem, asserebat hac se medullitus instaurari ac refici, nonnullosque in anima & corpore effectus experiri simillimos ijs quos in sumptione Sanctissimæ Eucharistiæ percipiebat. Denique ingemiscebat querula, tam raros & paucos esse qui Dominum tam suauem toto ac puro affectu redamarent, hunc sibi dolorem videri prorsus intolerabilem, optabat sibi obtigisse sexum, facundiam, vires, quibus vniuerso terrarum orbi solum Iesv Christi amorem persuaderet; nempè idipsum olim Seraphica sua Mater ac Magistra optauerat, & tandem inter hos ardores increpabat seipsam quòd non arderet fatis.

C A P V T X X.

Rosam imago Deiparæ in SS. Rosarij Sacello creberrimè solatur, mulcet, instruit.

SVpra-dictis penè gemella sunt quæ hîc narrabimus; at prælibanda sunt ex multis paucula de singulari prærogatiua celeberrimæ huius Imaginis, quæ inde ab introductæ Christianæ Fidei primis initijs prima toti Per-

uano Regno per publica beneficia innotuit, & priuatim Rosæ nostræ tam eximiè chara fuit atque propitia.

Statua est ex ignoto ligno ad humanæ staturæ proceritatem affabrè sculpta in formosam effigiem Magnæ Dei-
paræ paruulum IESVM gestantis in vlna, manuque altera, Mundo Rosarium suum porrigentis. Hanc Christiani con-
quirendarum Indiarum auspicem ex Hispanijs secum ad-
uectâ inter prima Limanæ vrbs molimina primo ibidem
veræ Religionis Templo (: cui à Sanctissimo Rosario co-
æuum nomen est) solemnî ritu collocarunt, adstructo Fra-
trum Prædicatorum insigni cœnobio. Prosperrimum id
propagandæ illic Fidei nomen & exordium fuit, nam simul
in hoc Templo quod vnicum tunc extabat, sub tutelari
præsidio Diuæ Virginis ad titulum S. Rosarij constituta,
fuit Parochia, hic primus instructis catechumenis patuit
fons lustralis quo infideles ad veri Numinis cultû addu-
cti capere per S. Baptismi ianuam intromitti ad caulam,
ouium Christi; hinc demum ad alias quæ paulatim funda-
bantur sacras Aedes tota Sacramentorum administratio
promanauit, ac velut ex vno Augustissimæ Coelorum Re-
ginæ parthenico Roseto Ver nascentis Fidei in omnem
circuitum floridè se diffudit.

Anno 1535. iuxta *Caxaguanam* in Cusco ac finitimis
prouincijs gentilium Indorum plusquàm 200000. sub si-
gnis erant vt Catholicum exercitum sexcentis nō amplius
capitibus numerosum proculcarent potius quàm profligarent.
Aderant Christianæ phalangi aliquot Religiosi
ex Prædicatorum Ordine, ac implorata in opem Regina
Sanctissimi Rosarij, dum vtrîmque concurrunt acies, visa
est vtrîmque in aëre conspicua Diua Virgo sub suæ Limen-
sis imaginis notissimo agalmate, virgam distringens in-
hostes, ac nî cederent internecionem comminans. Per-
culsi superno spectaculo idololatræ pacem armorum ex-
perimento prætulerunt, & obstinatione vnâ cum ferro ex-

cussa certatim iugo Fidei cum gaudio succollarunt. Exinde creuit S. Imagini popularis veneratio, cumque famâ tanti miraculi Regnum ac vniuersam regionem perualit mirifica salutiferâ deuotionis propago.

Demum anno 1643. vj. Idus Maij Rex Catholicus Regnum suum Peruanum cœlesti Virginis Matris præsidio firmitus contra impêdientia pericula communiri exoptans mandauit hanc ab vniuersis incolis publico ritu eligi Protectricem, simulque ad aliquam huius sacram Imaginem (: quæcumque illa esset toti regioni celebrior ac de fama beneficiorum illustrior) publici refugij perennem tesseram communi voto collectam firmissimè stabiliri. Factum est cum Archiepiscopo Prorex & vterque tum Ecclesiasticum tum secularis Regni Senatus inito consilio collatisque suffragijs Limanain D. Virginis Sanctissimo Rosario præstantis imaginem elegerunt, & quotannis feria secunda post Dominicam *Quasi modò genti* instituta publica supplicatione (: cui tum ipsi, tum singulorum Ordinum Regulares & vniuersa tribunalium dicasteria interueniunt) eandem in suo apud FF. Prædicatores Sacello inuisunt. Eadem vbi festiua Processione effertur in publicum, (: quod annuè fit in die octaua Sanctissimi Rosarij mense Octobri) à dispositis per forum chiliadibus crepera scloporum displosione salutatur, fulgente in singularum cohortium explicitis vexillis nomine, tessera, figura imaginis Rosarianæ. Nec reliquum anni tempus vacuum est à perpetuo concursu, præsertim quoties aut terræmotus, aut epidemiæ contagium, aliaue seu publica seu priuata necessitas admonet ciues præsentanei sui asyli. Hæc obiter de Rosea imagine, nunc ad Rosam.

A teneris hic Rosæ quamquam nil minùs quàm ferreamagnes fuit ac siderites, adeo hac sacra Imago trahebat adeo firmabat virgunculam. Nonnulla attigimus supra: succedant alia. Quando in isto Rosarij sacello Rosa co-
ram

ram Virgineo hoc simulachro Dominici Ordinis habitum suscepit, adfuit publicæ functioni plorans Mater, viditque filiam blandos fauore Deiparæ eleuari in cœlum, vnde perfusa gaudio faciliè compescuit lachrymas, cœpitque tacito applausu felici puellæ gratulari. Sublime augurium & obseruatum dignum, nam quæ tanto suffragio dignabatur nouitiam suam, *excelsa supra sidera* hîc operabatur vt *felix cœli porta*. Quoties Rosa sibi aut alijs grande aliquod ac peculiare è cœlo subsidium postulare constituisset, supplex ad Aram Sanctissimi Rosarij procumbebat in preces, illic vultum charæ Imaginis speculabatur attentissima, & non sine ingenti fiducia post teneros affatus ab illius faciei pendebat oraculo. Sæpè Quæstoris vxor notabat Rosam à Sacello reducem aliquid noui solatii ipso premendi conatu prodere, plerumque enim bulliebat lætitiæ feruor vt familiarem & piè curiosam obseruatricem latere indicia aut fallere ex toto non possent, quare domestico necessitudinis iure audebat verecundam vltro compellare dicendo: *hodie è Rosa ut video rursus pluerunt fauores*; cui molesta Virgo, leui subrisu aiebat: *continuo affabilis illa cœli Regina fauoribus cumulat misericordiam hanc peccatricem*. Memor deinde, eandem Gundisalui vxorem affedissee examini de quo supra Cap. XIV. atque ex eo plura & potiora rescuiſſe de arcanis suis cum hac Imagine commercijs, visionibus, alloquijs, paulò fidentius deinceps huic Matronæ facta est magnam eorum partem quæ Examinatori suo pridem aperuerat eo candore quo debebat.

Inter alia de modo, quo Deiparam in hac Imagine sibi loquentem percipiebat, interrogata simplicissimè respondit, mirabile hoc genus allocutionis sine idiomate, sonitu, motuque labiorum purè sympatheticum esse, ac solum iconis vultum varia serenissimæ frontis eradiatione, velut quibusdam notis ac nutibus tam appositè, dextrè, & per-

perspicuè exprimere sensa & affectus pro re nata, vt nulla exquisitissimorum verborum facundia melius præstare id possit; eandem vultui Diuini Filioli vim inesse, vtrunque velut in viuo ac animato libro se responsa distinctè legere multò significantius, quàm si mutis characteribus descripta vel picta decerneret, his velut fiduciarijs intimorum conceptuum indicibus excitari in anima sua quamdam attentionem luminosam, qua sine discursu penetraret limpideque percipiat singula, denique in vtriusque figuræ labijs, genis, oculis quoddam velut arcana affabilitatis horologium inesse signorumque congruam diuersitatem nulla linguarum peritia explicabilem, humana tamen locutione longè certiorè. Fama erat, Rosam impetrare omnia, quæcumque apud sacram Imaginem ab Augustissima Rosarij Regina seriò flagitaret. Hinc sæpè rogata vt hoc illudue peteret, si videretur è re publicæ aut cuiusquam priuatæ salutis esse, curam in se haud grauaturè recipiebat, deinde à sacra Imagine rediens bonos successus tanta securitate pollicebatur, quasi concessæ gratiæ diploma recepisset.

Accidit permisso Dei, quòd inuidus sathan cuidam regulari Communitati Limæ inseuerat discordiarum zizania. Excrescebat infelix lolium, quodque initio nonnisi opinionum proelium fuerat, ipsa repugnandi ducedine, paulatim degenerabat in amarulentiam voluntatum, non sine scissura pacis & offensa Numinis, cui extra fines pacis habitare non lubet. Innotuit Virginis Confessario gliscens malum, isque Rosæ iniunxit, Sanctissimi Rosarij Sacellum adiret, ibiq; coram Deiparæ Imagine periclitantis illius Congregationis necessitatem Matri misericordiæ suis precibus commendaret, nec curam dimitteret quoadvsq; gratiam & succursum impetrasset. Paruit Virgo ad obsequia charitatis mirè procliuis, sacellum adiit, preces fudit, sed mœsta præter consuetudinem ani-

moq; faucia domum redijt. Postridie reuersa ad pedes S. Imaginis diutius procubuit, feruentius orauit, lachrymas addidit, proluxaue more æquanimi patientia fauorem expectauit à solo Deiparæ vultu pendula, nec surrectura de loco, donec exauditam se intelligeret. Tandem repentina hilaritate perfusa in pedes se erexit, & gratijs Virgini Matri deuotissimè persolutis læta domum properauit. Quæstoris vxor vtraque vice frontem Virginis domum redeuntis tacitè obseruarat, ac diuersitatem mirata, quid nouæ rei gereretur interrogauit. Huic Virgo succinctè quantum oportuit eam scire respondit. Verùm paulò post à Confessario sollicitius examinata, nec ausa quidquam reticere, totam ingenuè seriem exposuit, vt pridie inter supplices preces ytrumque tum Deiparæ, tum Filio-
 li vultum inuenerat non modò chalybis instar præ durum, asperum, inexorabilem, sed & seuerè minacem, austerum ac manifesta indignatione caperatum: vt frustra conata fuerat Filium emollire per Matrem, vt tristissima domum redierat post insolitam hanc repulsam. Deinde vt postridie multis demum lachrymis Dei Matrem flexerat ad intercessionem negante Filio placari se posse illi cœtui tam obstinatè discordi, vt tremuerat afflictum cor suum, percipi-
 piendo alternos Matris, Filijque affatus, quibus illa gratiam, hic iustitiam ac pœnas vrgebat, vt denique Matris suauissimæ præualidis gemitibus cesserat exarmata ira Filij, vt iste iam placatior benigno arrisu Matrem, deinde, & Rosam indulgētissimè respexerit: exinde gratiam in tuto iam esse, ne dubitaret Confessarius, breuì effectum manibus contrectandum. Ità euēnit: nam paulò post mirabiliter coaluerunt diuisi animi, euanuit pomum discordiæ, dissiliit sathanæ cuneus qui fissuras diduxerat. Notēt, quicumq; Religiosis communitatibus diuisionis machinas inuergunt, quàm abominabilē Deo, quàm gratam cacodæmoni, quàm perniciosam proximis operam præstēt. Sed ad
 alia.

Non

Non abs re fuerit paucis subnectere, quæ Rosæ cum alia Deiparentis imagine non sculpta sed picta in Gundsali oratorio contigerunt. Repræsentabatur coloribus in tela Genitrix Virgo dormientem partulum IESVM complexa sinu. Rosæ videbantur in hac imagine omnia spirare, ac vivere, sæpiusque fatebatur hanc apud se peculiariter magno in pretio esse quod inde suauissimis interdum solatijs fuerat delibuta, IESVLI somnum, & Mariæ vigiliæ ignem suis medullis iniicere, vt nec paruuli mansuetissimum soporem audeat interrompere, nec tamen vigilem Matrem possit sine canoro succensi cordis alloquio præterire; at sub hoc affectuum duello animam suam liquefieri ex arcano Dilecti alloquio, quasi dicat: *Ego dormio; & cor meum vigilat*. Accidit, quod in oratorio Maria de Vfatégui coram Rosâ, & duabus familiaribus instituta de beneficijs Beatissimæ Virginis spiritali collatione incideret in magnalia, quæ ad Imaginem Deiparæ in *Atocha* vicinâ Matritésibus vicino manus superna dignatur operari, Rosâ in præsentem Imaginem defixis oculis auidè quæ dicebantur auscultabat: sed cum Matrona sensim ad alia diuerteret, insolita verborum emphasi interpellauit Rosâ, perge (: inquit) ô Mater, perge de hoc argumento plura quæ nosti differere. Matrona facillè animaduertit inter Imaginem & Rosam singulare quidpiam geri; unde digressis alijs secretò extorsit à Virgine, cur interpellasset, vtique mysterium subesse, quod rescire sua intererat omnino se scire id velle. Rosâ, vt prodigium quod viderat non suo, sed Matronæ merito tribueret, inò (: ait) mysterium suberat, nam interea dum tu miracula narrabas absentis Imaginis de *Atocha*, hæc præsens edebat signa inusitatæ lætitiæ, mouebat in nos colubinos suos ocellos, attollebatur nouo corpulentæ typo extra telæ superficiem velut inde ad nos exitura cum sopito Filiolo, spargebat arcanas dulcedines, renidebat, radiabat augustior,

nunc

nunc paruulo suo nunc nobis maternè adblandiens . Et nonne sub tanta gratia dignum erat Reginae nostrae laudibus diutius immorari?

Sed redeundum tantisper ad Sacellum Rosarij, cui Rosa toto anno per omne sabbathum flores quos ipsa coluerat, fasciculatim aut mittebat aut deferebat . Mirati sunt, quicumque Rosæ hortulum norant, eius areolis numquam deesse flores quos Altari dedicaret; siue enim hoc germen alibi sustulisset consueta variantis anni temperies, siue ardentior Sirius vbique torrida siccitate hoc terræ solatium corruperat, semper in modico Rosæ viridario intacti vernabant pulluli quos in proximum sabbathum cœlesti Anthophoræ consecraret . Maluisset auro gemmisque rigentem cycladem subinde offerre sacræ Imagini florum loco, sed obstabat inopia . Verùmtamen & hanc suppleuit ingeniosæ deuotionis industria, nam vt quotannis Reginam in Sanctissimi Rosarij bis spiritali veste amicaret, materiam, artem, formam excogitauit lōgè pretiosiore, admodum quem supra Cap. XVIII. descripsimus . Vnius idea reperta fuit in Virginis pugillaribus, hoc tenore : *Memoria . Pro vestimento quod ego Rosa de S. Maria indignum mancipium Regina Angelorum ordior contexere Virgini Dei Matri auxiliante Domino . Primò Tunicam interulā conficiunto 600. Salutationes Angelica, totidemque vicibus recitanda Antiphona Salue Regina, cum 15. diebus ieiuniorum, in reuerentiam purissimi gaudiū ex nuncio Angelico, quòd in suis castissimis visceribus humana carne induendum erat æternum Patris Verbum . 2. Pannum huius amictūs contexunto 600. Salut. Angel. totidem vicibus Salue Regina, 15 Rosaria, & 15. dies ieiunij, in reuerentiam letissimi gaudiū, dum visitabat Cognatam suam Elizabeth . 3. Oras ac fimbrias huic vestitui circumdanto 600. Salut. Angel. toties Salue &c. (vti supra) in reuerentiam altissimi gaudiū, dum pariebat Filium suum Dominum meum IESVM Christum . 4. Fibulas*

apponunto 600. Salut. vt supra, in reuerentiam intimi gaudij dum benedictum Filiolum suum offerebat in Templo, 5. Collari impenduntur 600. Salut. Salue, ieiunia, vt supra, in reuerentiam felicissimi gaudij, dum amissum triduo Filiolum inuenit in Templo inter Doctores disputantem. 6. Ramusculum Virgineis suis manibus gestandum componunto. 33. orationes Dominica, totidem Salutationes Angelica, cum versu. Gloria Patri, Salue Regina, totidemque Rosarijs laudum Diuinarum, & rursus totidem Rosarijs de laudibus Virginis, in reuerentiam. 33. annorum, quos Dominus meus IESVS vixit in terris. Et paulò infra: iam hoc vestimentum confectum est; benedictus sit Deus, eiusque Mater Sanctissima praegrandi sua pietate suppleat defectus meos, & ausui det veniam. Laus tibi Christe. Simile at multò operosius vestimentum Diuæ Virgini consuere cœ-

pit prima die anni MDCXVI. in huius textura sumptuosa Dominicarum orationum, & Angelicarum Salutationum numerum Virgo non

iam centurijs (: vt supra) sed chiliadibus diffiniebat. Verùm

singula quæque

sux de-

uotionis exercitia minutim prosequi non

vacat, præsertim cum ex innu-

meris innotuerint pau-

ciora.

C A P V T XXI.

Rosæ in salutiferum Crucis signum religio. Imaginem S. Catherinæ exornans ab ea vicissim honoratur.

Solitariae in horto cellulae (: de qua supra) prima & ferè tota supellex Crux erat Virgine procerior altiorque; ut plenius tum Caluarie supplicium meditati ingereret, tum pijs novae Magdalenae complexibus commodius stringi posset. Illam quot osculis Rosa diffuauiarit, quot lachrymis humectarit, quot ignitis suspirijs adufferit, quam tenacibus vlnis ad liuorem vsque sibi interdiu noctuque adstrinxerit, quam crebra & supplici adoratione coluerit, non omnino domesticos latuit, qui interdum per rimulas insciam obseruabant. Sicubi in Templis, sacellis, ædibus frequens viuificæ Crucis simulachrum incurrisset in oculos, singula mæsto obtutu & calente gemitu salutabat, in omni familiari confesso, conuersatione, societate Crux (: si qua prostabat) Rosæ sol, ipsa Cruci heliotropium erat, ad huius aspectum cor Virginis pulsu validiori, & concitato videbatur in horologium transmutari. Præcipuè in maiori Dominicæ Passionis hebdomada, à Cruce fidelium adorationi palam exposita diuelli non poterat, huic assidebat immobilis, hanc dilapso frequentiori populo cominus tenerrimis basijs obterebat, in hanc eminus acclauabat oculos, nec alio vel ad momentum respicere

poterat. Quin usque adeo menti Virginis infederat Sanctæ Crucis Religio, ut ubicumque à fortuita trabium commissa, in fenestrarum clathris, in decussatis sepium bacillis, in ostiorum cardinibus, in vestibis, in ipsis demum festuacis ac paleis, aut alio quouis reiectaneo figura Crucis occurrisset, hanc sine attenta ac tacita veneratione nusquam præteriret.

Subinde Rosam ad sacras ædes processuram comitabatur honestatis causa germanus frater, doluitque toties sibi cum ea subsistendum esse quoties Soror ibidem ad stipulas de terra subleuandas sese inclinabat. Animaduertit fortuitas Crucis figuras esse quas in proiectis stipulis aura vel casus effinxerat, has autem Rosa iacere humi, & comitantium pedibus neglectim proculcari non ferebat. Hinc Ferdinandus (: id fratri nomen erat) tot morarum impatiens, ac velut superflue pietati fororis admurmurans, putasne (: inquit) decere Virginem, toties in publico ad leuandas paleas explicare faciei operimentum? quid cogitabunt, quid dicent obuij, hære te in plateis, ut transuersas ubique stipulas fatuo labore diuarices? Quod si hac ratione Crucis figuræ prospectum cupis, utique ingentem tibi sumpsisti operam, imò ridiculam, cui à prætereuntium fannis, ac sarcasmis totum sit præmium.

At grauitèr modèstèque replicuit Virgo: ah frater nimio dolore crucior, dum video, contemptim iacere solo & calcaneis proteri qualemcumque rudissimum typum illius adorandæ Crucis in qua innocens Agnus Dei suæmet vitæ inæstimabili pretio nos redemit. Scio hæc retributa sine scrupulo aut culpa promiscuè calcari ab alijs, horum incuriam nec damnare ausim, nec arguere præsumo, sed neque illis displicere meritò queat meæ deuotionis simplicitas. Denique subsannent, rideant, cogitent de me, ut lubuerit, ego quoad potuero, non cessabo à cura, ne Crux Domini mei, vel in abiecta, vilissimaque stipula
usquam

vsquàm conculcetur. Addebat (: mirum dictu) ad istud quod puerile, nimisque fœmineum alijs videbatur Crucis honorandæ studium se stimulis tam excelsis ac serijs excitari, vt repugnandi modus aut ratio numquam sibi ad manum sit; proinde & hoc inter alia complura condonandum esse ardori suorum affectuum, maximè si verum foret quod aliunde obscura persuasione acceperat, ex sacris Indulgentiarum thesauris aliquod repositum esse lucrum fidelibus, quicumq; hoc simplicitatis religioso obsequio S. Cruci reuerentiam exhiberent.

Rosa in suo hortulo plantauerat libanotim, Rosmarinus vulgò dicitur, eiusque tres arbusculas distinctis cespitibus ità in Crucis formam coegerat, vt singulæ glebæ scorsim accuratam montis Caluariæ figuram vndequaque exprimerent. Gaudebat inter flores & odorifera plantaria pariter & Crucem oculis suis continuò obuersari. Placuit multis nouum amœnitatis artificium, quod irrigante gratia sub hortulanæ deuotione feliciter adoleuerat. Verùm operante Magistro P. F. Alphonso Velasquez Rosæ Confessario ex tribus vnica dumtaxat Rosæ hortulo mansit residua, siquidem is alteram poposcit sibi, alteram Proregina dono eiusdem obtinuit, summaque cura penes se nutrire studuit, sed incassum, vix enim dies perpauci effluxerant, cum Crucifer cespes apud Proreginam funditus exaruit, manifesto indicio, propriam sibi defuisse Crucis & Caluariæ hortulanam. Narrauit Virgini Confessarius dolorem Proreginæ, at subrisit Virgo monuitq; huiuscemodi Cruces inter seculares Aulæ pompas & assidua Mundi commercia virere non posse: vetuit tamen emarcidum arbusculæ cadauer proijci, iussitque ad se remitti propediem resuscitandum. Vix in quantum diem exsucca plantula penes Rosam fuit, cum speciosior quàm ante fuerat vndique reuiruit, nouis ramusculorum comata pullulis, nouo radicularum ac medullarum succo rediui-

dtuiua , plexilique virgularum obedientia in pristinam Crucis figuram reformata ; cui Rosa in ornamentum extractabili ficulneæ medulla complusculos cœlestes genios ordine aptissimo circumposuit , & Crucis basi accubuant Sanctæ Mariæ Magdaleneæ icunculam peritè adiecit , sicq; renatam , ornatam , pampinatam remisit Confessarius Pro-reginæ , miranti libanotim suam sub Rosæ manibus tam celeriter , tam amoenè , tam plenè reuixisse . At Virgo id totum gloriæ Crucis tribuebat , quod & S. Catarinam Senensem iugiter fecisse meminerat .

Digrediendum nunc ad huius Seraphicæ Magistræ imaginem Crucis ac Stigmatum characteribus insignitam , quacum Rosæ plurimum fuit commercij , nec sine prodigijs . Limæ ab annis centum & ampliùs floret sub inuocatione B. Catarinæ Senensis deuota secularium Confraternitas : huic solemne est quotannis ter in publici circuitus festiuam processionem sublimi gestatorio efferre conspicuam Sanctæ suæ Tutelaræ statuam coronis , floribus , multoque gemmarum fulgore ac pretio decenter adornatam . Porro quæ statuæ ornamenta conquireret , tractaret , circumponeret , vna hac Rosa (: dum vixit) nulla reperiatur aptior , dignior , peritior , quia prototypo nulla aut deuotior aut similior . Ita cunctorum suffragio vni Rosæ delatùm hoc religiosæ pietatis officium . Ipsa diligenter collectis vndequaque monilibus , velis , torquibus , floccis , lemniscis , omniq; pretiosa supellectile (: cuius nulla vmquam pars amissa fuit quin tota rediret ad Dominos) operi strenuè incumberebat , assumptis fidissimis adiutricibus in laboris ac meriti participium . Sed dum circuibat charam Iconem , dum vestiebat , dum plicas distinguebat , temperare sibi à lachrymis , ab osculis , ab alloquijs præ ardore non poterat ; affabatur , venerabatur , dissuauiebat sacram Imaginem , ac si præsentem è cælis haberet Magistræ suam . Quâdam vice inter suspiria , exciderunt Virgini

gini (: at perfunctoriè , & submissè) hæc verba : nosti utique Mater mea dulcissima , quòd si 15. aut 16. *pataconum* mihi facultas esset , vestirem te pro genij mei dictamine , nouo candidiorique amictu . Et ecce post paululum sociabus nil minus cogitâtibus adfuit illustris foeminæ *Hieronymæ de Gama* ancilla Aethiopissa , cumque pecunia litterulas attulit , quarum hic tenor : *Salve Rosa Soror . Coniugio te nunc in exornando gloriosa Matris Senensis simulachro occupari : en 16. patacones quos penes me reperi , his utere ad Seraphica Imaginis ornatum , si opus est . Vale .* Suspexit in Coelum Rosa , & ô (inquit) suauissime IESV , quàm fidelis amicus es ! Mox niuei candoris Attalicam emit , nouamque Iconi vestem aptauit .

Dum Rosa oblongam trabeâ (:scapulare dicimus) Iconi amiciendæ consuit , mittit in Conclauē vbi hæc stabat , *Philippam de Montoya* conciuem suam vt inde serici filii glomerem sibi apportaret . Iuit illa , viditque Imaginis vultum insolito splendore fulgidiùs radiare . Expauit insperato gaudio , remque trepida ad Rosam in proximo cubiculo nentem retulit . Verùm hæc minimè admirans respondit paucis : numquid vidisti Soror , quàm sereno indicio dignatur approbare Seraphica nostra Mater quod agimus ? placet ei , quòd ambæ in elaborando ipsius scapulari iucundè occupamur . Alio tempore optabat Rosa caryophylli copiam ad manū esse , qua sacram Imaginem condecoraret . Abnuebat præsens anni temperies , quæ in illis Regionibus mense Maio id genus flosculorum ignorat . Quæsitum diu in Rosæ hortulo , sicubi fortè in caryophyllorum areola , vel noduli apparerent propediem erupturi in florem , at inuentum nihil . Iteratur bis ter frustrata perquisitio , sed eo vespere nec spes residua fuit . Nihilominus Rosa quod futurum erat spe bona præcipiens aiebat : potens est Dominus concedere quod optamus , quinimò hæc ipsa nocte in honorem Sanctissimæ Trinitatis vna hæc

hæc virgula (: digito monstrabat furculum nulla fœcunditatis nota tunc vsquam turgidum) tria nobis caryophylla protrudet. His dictis fœminas (: *Catarina & Francisca de Montoya* vocabantur) dimisit domum ridentes, quòd illo anni tempore ex languido, sterilique frutice caryophylla expectaret, imò promitteret. Postridie summo manè (: siquidem is Processioni decretus erat dies) properarunt ad Rosam, vt quod in ornanda Imagine reliquum erat, cum ea perficerent. Rosa tunc in oratione defixa venientibus innuit, hortum adirent, atque in nomine Sanctissimæ Trinitatis tria inde caryophylla confestim sibi adferrent sacre Iconi coaptanda. Replicuit Catarina: tu verò charissima non meministi, nos heri tecum inutili quæstione floris totum aliquoties hortum permeasse, nec vsquam vel nodulum in stylis aut denticulum reperisse in scapis qui huic integro Mense pubem vllius flosculi polliceatur? Verùm institit Rosa efficaciori imperio: itote Sorores, trinum quem dixi florem maturrimum, decussatum, repandum ocyus adferte; quid hæsitatis? quid cunctaminis? qui virgam Aaronis florere iussit, prouidit & nobis. Iuerunt, & vt Virgo dixerat inuenerunt, tria caryophylla de illomet quem pridie Rosa indicarat cauliculo trepidæ carpsērunt, apportarunt, suæque diffidentia veniam precatæ cum Rosa in gratiarum actionem Deo se prostrauerunt, insimul admirabundæ ac lætæ, quòd illa die sacra Imago cum ornatu tam peregrino in publicum erat proditura. Quodque mirabilius est, ab eo tempore quoad Rosa superuixit, eius hortulo nulla anni parte recentia caryophylla defuerunt.

Alia vice Rosa ad vestiendam Sanctæ Catarinæ Iconem cum alijs adiutricibus vocarat Mariam Euphemiam de Parejas viduam. Huic periculosè infirmabatur ancilla domestica Francisca nomine, quæ simul nutricisungebatur officio, & tunc quidem Viduæ filiolum Iosephum

lactabat, sed medicus vi crescentis morbi perterritus mandarat pridie, ne infans ab ægra lac sugeret. Attamen Euphemia ægram suam domesticis anxie commendans ad Rosam perrexit communi pietatis officio suam operam adiunctura. Finitis demum omnibus, ac Imagine decenter exornata Rosa fatigatis sociabus compatiens, ite (: inquit) respirate, lentaque deambulatione pariter vos reficite, nam lassæ estis. Respondit Euphemia: deambulare me iubes, cum non ignores quæ me domi meæ expectet afflictio? quin tu potius apud hanc Seraphicam Matrem qua polles & gratia, & fiducia, vitam ac valetudinem ancillæ meæ exora. Annuuit Rosa, statimque ad præsentem Imaginem amica, qua solebat familiaritate conuersa dixit: heus tu gloriosa Mater, num acerbam huius foeminæ afflictionem non vides? succurre huic necessitati, nec distuleris solatium, nunc experiar quàm chara sint tibi Stigmata nostri Redemptoris; per illa te obtestor, periclitanti Franciscæ salutem impetra. Dixit, viduamque consolata bene sperare iussit, Sanctam Catarinam Senensem cui modò ipsa famulata erat, famulæ suæ discrimini minimè defuturam. Rectà domum festinauit Euphemia, illic Franciscam suam depulso periculo conualescentem inuenit, adeo ut postridie iubente Medico rursus infanti nutritias: ut antè præbuerit mammillas.

Aliquando eadem quæ supra *Francisca de Montoya* Rosam in exornanda S. Catarinæ Senensis Icone per totam noctem adiuuerat, completoque opere dum non nihil quietura discedebat, ut post aliquot horas festivæ Processioni interueniret, Rosa digressam Beatæ Catarinæ impensius commendauit, rogans ut ipsam tueretur ab imminente periculo. Nec sine fructu abiit sollicita intercessio: nam dum gyrantem processionem hinc inde pro magnifico applausu vario fragore excipiunt sulphurata missilium ignium crepitacula, vnum istorum rectà Franciscæ oculum petiit

inque supercilium impegit, nullo tamen Franciscæ damno, non quòd deessent nocendi vires, nam idem à Franciscæ imperu obliquo resiliens aliam corripuit fœminam, eique cum togæ lacinijs intimam subuculam raptim succendit. Franciscæ sat certa se incolumitatem suam Rosæ orationibus debere, Virgini euentum retulit, ac pro beneuola cura gratias egit. Cui Rosæ: quidni curam tui peculiarem haberet Se raphica nostra Mater per totum hunc diem, posteaquam tu integram hanc noctem in eius obsequio mecum laboriosam exegisti?

B. Catarina in reliquas Imaginis suæ vestiarias & excultrices tam munifica utique in suam Rosam illiberalis non fuit. Vnicum paradigma dabo, & finiam. Anno M.DC. XVI. mense Augusto Rosæ Beatæ Catarinæ Iconem in præcipua S.P. Dominici solemnitate circumferendam de more vestierat, eandem transacto festo deuestiendam in domo Gundisalui Quæstoris exspectabat. Allata est, ac oratorio domestico illata, ut ibi pretioso ornatu quem commodatò à diuersis Rosæ acceperat exueretur. Verùm bi-duo vel triduo ante horrenda arthritidis dexteram Virginis manum per omnes articulos importunissimo cruciatu inuaserat, ut non modò operi vel tenuiter attingēdo prorsus inutilem reddiderit, verùm etiā pro immunitate mōstruossæ inflationis Medicum terruerit grauioris mali atheromata suspicantem. Intumuerat manus ad æqualitatem doliorum quibus mella selectissima ex Hispanijs Limam deferuntur, ut iam neque digitorum vllus moueri, multò minùs forcicem aut quiduis aliud tenere posset vel apprehendere. Dies erat Sancti Laurentij Martyris, quando sub vesperam Medicus inspecta manu purulentam meliceridem aut aliud quodcumque genus apostematis subesse ratus lenta cataplasmata decreuit a pplicanda, iussitq; in diem posterum distrahendo sanguini venam in læuo brachio aperiri scalpello. Gundisaluus, qui fortè cum Medi-

Medico aderat, tristi manûs spectaculo eger oratorio abscissit velut nimiae compassioni impar. Sed magis dolebat Rosa, quòd illo die, qui sibi anniuersarius erat assumpti Dominicani habitus, prohiberetur Seraphicae Matris suae festiuium habitum solito Religionis ministerio contrectare. Itaq; corâ S. Imagine (: quæ adstabat mēsulæ imposita) procubuit, breuiterq; orauit. Mox consurgens hilariori voce poposcit forfices ab vxore Gundisalui, quæ illic cū alijs ad opus substiterat. Hæc lusum aut iocū arbitrata subrisit, inter rogans qua manu hos arripere velit, sat sciēs in dextra sic timere digitos vt nullis forficum, ansulis immitti queāt; sicque velut per ludum angustiores quos reperire potuit forfices porrexit. Nec mora: hos Rosa digitis induit, opus arripuit, cœpitque sedulitate liberrima gemmas, torques, monilia suo quo adhærebant ordine disnectere, fila ligaminum aptè dissuere, nodos incidere, ornatum per partes concinnè deponere, Imaginem nudare. Exclamauit denuò Matrona: quid agis Rosa? parce manui ad ista iam inutiles; noster hic labor & cura esto. Pergebat alacris Virgo, nec aliud replicuit, nisi quòd idem ille, qui sibi manus dederat, quas vestiendæ S. Imagini impenderet, nunc dextram sanarat, qua eidem deuestiendæ famularetur. Post horulam superuēnit Quæstor, vidensque Rosam vtraque manu expeditissimè operantem adstupuit, ac leniter interpellans, itane (inquit) dextra tua valet vt ad ista sufficiat? cessa, videamus manum. Vidit, illamque sinistrae nihil ab similem reperit, sanam, valentem, agilem. Marcebat stupore lætissimo Quæstor, ac tacitè in vxorem respiciens pēdebat attonitus ab ore narrantis, vt Virgo se in preces ipso abeūte prostrauerat, vt breuissimo interuallo sana in pedes se erexerat, vt strenuè laborem forficibus postulatis fuerat auspicata. Maluit deinde ab ipso Virginis ore modum repentinæ curationis ediscere; respondit illa: se breui illo quo coram Imagine orarat spatio sensisse re-

ducem in articulos vigorem, illosque detumuisse statim violento spiraculo, vt solet aëre plena vesica dum premittur, sicque vnà cum tumore omnem pariter euauisse dolorem.

Accersitus postridie Medicus examinauit manum deinde Virginem, quæ quod pridie dixerat simplicissimè confirmauit totam rei gestæ seriem grato animo in suæ Seraphicæ Magistræ fauorem, & gratiam refundens. Accessit beneficio, quòd exinde nunquam in posterum arthritidis manum illam inuasit quoad Rosæ superuixit. Verùm præstantius fuit alterum, quod intus Rosæ animam, dulcorabat eodem illo momento quo foris conualescebat manus; fassa est, modico illo tempore quo cum sancta Catarina Senensi de curanda sua dextera supplex egerat, simul in intimos cordis sui recessus largum insolitæ

suauitatis rorem depluisse, qui etiam inde exundâ-

rit in corpus. Nec mirum si medicinæ cælestes

à centro ad superficiem soleant operari, ac

priùs animam quàm corpus attinge-

re. Sed mirum est hæc Rosæ

nequaquam fuisse mi-

ra, vtpote

cui à B. Catarina Senensi ceu Matre pe-

nè quotidiana erant ex mutuis

commercijs sola-

tia.



C A P V T XXII.

Rosæ feruidus in SS. Eucharistiam affectus, cultus, deuotio. Pro ea ad agonem Martyrij se accingit :

SI talia acciderunt Rosæ Virginem Senensem vestienti ex aliena substantia, longè mirabiliora accepit ab illo mirabili Sacramento, in quo Christum vestiunt aliena accidentia. Hunc cibum *parauit in dulcedine sua pauperi Deus*, attamen recolendum, cui dixerit : *Cibus sum grandium, cresce & manducabis me*. Rosa nondum ultra pueriles annos creuerat, iamque hunc manducabat, sed ipsam Confessarij iam spiritu grandem repererant, quando tam tenellæ suæ ætati permiserunt accubitus in sacro Conuiuio quod *præbet delicias Regibus*. Quinimò de illorum consensu bis quot hebdomadis puella reficiebatur Diuino hoc pabulo; maluisset frequentius, at tunc nondum ei licebat sine Matre adire Ecclesiam. Quàm benè mellissus Bernardus in suo exclamat Iubilo: *Qui te gustât esuriunt!* nam Rosæ à frequenti Communione adeo increuit pascentis Sacramenti esuries, vt paulùm adultiori sacra synaxis ter in singulas hebdomadas fuerit permittenda. Neque id satis erat, nam si qua interueniebat aut festæ diei celebritas aut solemnis statio, etiam quater, imò quinquies intra septimanâ diuino hoc edulio auidissimè fruebatur. Confessarij quò penitiùs animæ statum, nosse

nolle cœperant, facilius hanc ei frequentiam indulgebant, vnanimiter attestantes in Processu, tam limpidam se inuenisse in eius spiritu munditiam, tamque nitidam, innocentiae puritatem, tantam insuper Eucharistiae famem, tam robustum deuotionis calorem, vt exinde nunquam ausi fuerint à participatione tanti Mysterij Virginem distingere. Vnde facile obtinuit, vt tum in Paschate, tum in solemnitate Corporis Christi quotidie per totas Octauas sibi licuerit vesci hoc delicato Pane Angelorum. Qua in re vt humanum effugeret plausum nec de singularitate notari posset, singulis his diebus studiosissimè variabat horam, nunc maturius nunc ferius ad S. Communionem accedendo, cœlestis enim thesaurus (: monente Gregorio) absconditur vt seruetur: & qui facit quod nemo, mirantur omnes.

Hic verò notatu dignum est, quòd Virgo in tanta Communicandi frequentia, simulq; tanta immaculatæ suæ conscientiae serenitate nihilominus quotiescumque ad Diuinum epulum accedendum erat, toties sacramentalem Confessionem præmittebat, nec perfunctoriè, sed ea sollicitudine examinis, eo contritionis stimulo, eo gemituum ac lachrymarum apparatu, ac si per hebdomadas & menses vtroque Sacramento penitus caruisset. Pridie sacrae Communionis asperius emacerabat corpusculum flagellis & rigido ieiunio, vt famem animæ comitaretur esuries corporis: venturo Sponso adornabat secretum mentis thalamum affectibus reuerentiae, humilitatis, ac desiderij, accendebat piarum meditationum lumina præcipuè ex Ludouici Granatensis libello qui de Oratione inscribitur; vaporabat habitaculū cordis sui pretiosis odoribus ignitarum aspirationum, totamque omnium suarum potentialium ac virium familiam colligebat in obsequium chari hospitis postridie ad ipsam diuersuri. His verò exercitationibus tantum insumebat studium & curam, ac si per
totam

totam vitam suam pro illa dumtaxat vnica vice communicandum sibi fuisset.

Porro in ipso ad tremenda illa mysteria accessu quis fuerit Virgini attentissimæ deuotionis ardor, quæ vultûs gestuumque religiosa compositio, quod bullientis spiritus incendium, aliter describi non potest, quàm si ipsammet quis Catarinam Senensem Eucharistico bolo excipiendo procubuum huc transcribendo delineet. Verùm Angelico ad hoc opus foret tum calamo tum penicillo. Nec tamen omnino id latere permittit Altissimus, dum pluries in vultu Rosæ visibiliter scintillare fecit interioris flammæ indices euibrationes atque stricturas, tunc cum anima sumptione Diuinæ hostiæ succendebatur.

Quadam feria secunda Pentecostes in sacello Rosarij sacris operante P.Fr. Antonio Rodriguez Prædicatore generali, Rosa cum alijs fidelibus adgeniculabat cancello Altaris Eucharistiam receptura. Ad hanc vbi Sacerdos cum sacratissima Hostia peruénit, faciem Virginis totam flammeam vidit & medullitus expauit, nondum gnarus quid indicaret mira hæc & improuisa coruscatio. At postea ex crebriori eiusdem prodigij successu didicit Rosam esse, cui ad sacratissimæ hostiæ cōtactum interior subito micabat amoris rogos, tam viuus ac potens vt vel exteriorem faciem mutaret in facem. Magister Fr. Ludouicus de Bilbao post Missam in eodem Sacello dum Virgini S. Synaxim porrigit; notauit sæpius, vultum ipsius coelesti splendore perfusum, ita quòd præ fulgoris vehementia sibi tremuerint oculi velut impares illi sidereæ claritati, quam gratiæ venustas conspicuè accenderat, & panis Angelorum in Angelicam (: vt aiebat) pulchritudinem mirificè transformarat. Magister Fr. Ioannes de Lorenzana simillimo ostento feliciter percussus occasionem inde obtinuit penitiùs Rosam cognoscendi, quam illa tenus numquam de facie nouerat. Litarat & ipse in Rosarij Sacello, & post
sa-

sacrificium promiscuo populo ibidem communicaturo Sacramentum distribuebat. Ad Rosam ut venit, (quæ ut S. Hostiam sumeret, illo momento vultum orâ pallij reducta detegebat) vidit speciem humana formosiorē, claram, niueam, fulgentem, ac cælesti quadam pulchritudine obradiatam; Transiit, certus eiusmodi coruscum decorem à mortalitatis nostræ regione non esse. Mox cogitabundus ait intra se: quæcumque est hæc Virgo, sublimi apud Deum gratia polleat necesse est, utinam animæ suæ tam lucidæ ac flagrantis intimum statum nosse liceat. Factus est deinde voti compos, dum minimè cogitabat, nam superna providentia hunc postea Rosæ non modò Confessarium dedit sed & Præceptorem, cui Virgo obedientiam usque ad mortem velut regulari suo Superiori exhibuit. P. Fr. Bernardus Marques dum adhuc Novitius sacrificantibus in Sacello Rosarij subinde ministrabat, ac de more post Sacerdotem ablutionis scyphum communicantibus circumferebat, quotiescumque coram Rosa cum scypho substitit, sensit à Virgine tanquam è clibano aut fornace vaporare ardores, ut interdum putârit sibi manum cõburi qua pateram seu porrigebat seu resumebat. Verùm tunc mysterij ob ætatem ignarus, tacitèque mirari contentus præteribat, sed post annos 15. ab obitu Virginis iam Sacerdòs iudicioque maturior prodigium uti acciderat sub fide iuramenti enarravit, adiiciens ex eiusmodi sacris ardoribus sibi iuenculo rude cor nihilo minus concaluisse arcana veneratione præsentis Sacramenti, quod suscipi tanta religione & æstu viderat.

Voluit Deus per extima hæc & sensibilia utcumq; manifestari foris, quanta deuotionis pyra flagrabat intus. At huic cum accedebat corporaliter is qui *ignem venit mittere in terram*, non aliter atque inter Seraphim v' debatur sibi Rosa ceu tota empyrea ambulare in medio lapidum ignitorum. Hinc in ipsius anima mirabiles illi effectus

tamque isti Sacramēto connaturales ac proprii, quos nemo nouit, nisi qui accipit. Iubentibus Confessarijs obtemperans Virgo conabatur ex his nonnullos indicare, sed penè in singulis hærebat verbis, causata vocabulorum inopiam, nec aliter de ijs fari nouerat, quàm quòd ineffabiles dictitaret. Aiebat tamen, ex Virginea Dei carne in animam suam diffundi quamdam admirabilem mansuetudinem cœlestis Agni, simulque vegetari se inusitato robore ex nobilitate huius nutrimenti, instaurari ac refici vires per quamdam velut nouam transubstantiationem, sui spiritus in hoc Diuinum alimentum, suaue, succosum, potentissimum, interea clarescere in corde suo placidam altioris sphæræ serenitatem, pacem, temperiem nulla comparatione explicabilem.

Porro de immēsitae gaudij ex arcta vnione cum Sponso amicissimo, de fruitionis altitudine, de spirituali sapore veræ dulcedinis vbi gustatur in suo proprio fonte, de fructuum præstantia, copia, sagina, deque similibus pigebat tentare quemcumque sterilis elocutionis modum, fat erat in his, aut planè elinguem fieri, aut compendio protestari, nil esse iucunditatis, lætitiæ, iubili in isthoc mundo inferiori, quod vel umbra-tenus assimiletur gaudio istius pretiosi conuiuij, vbi infinita animæ fames incidit in pastum Deo dignum, in cibum filiorum, in mammillam Verbi Incarnati, quod solum *esurientes replet bonis*. Ex ore Virginis hæc audierat Confessarius P. M. de Lorenzana, qui adstans eidem iam moribundæ, dum pro extremo viatico sacram hostiam in extasi sensim deglutiebat, hæc pauca subiecit: Filia, nunc frui Sponso tuo, ac sola cum solo deliciare, quia verè dulcissimus est, pete vt more suo ijsdem nunc bonis te repleat quibus solebat. Alius itidem Rosæ Confessarius meminerat dicere solitam, quòd in Sanctissima Communione sibi videbatur ipsummet è coelo Solem in pectus recipere, nam quid-

quid Sol visibilis operatur in mundo, dum luce & calore omnia recreat, dum terram floribus & fructibus obornat, dum maria vnionibus, montium viscera gemmis ac pretiosis metallis ditat, dum auiculas cæli lætificat, plantas & animalia vegetat, omnesque vasti hemisphærij angulos diffusa amœnitate collustrat, succendit, deaurat, id totum in nudis animæ suæ spatijs efficere Dominicæ carnis realem præsentiam. Et forsitan ob id Virgini datum fuit diuinitus, quòd plerumque species sacramentales in eius stomacho ad septem vel octo horas perdurarèt, antequam ventriculi calore dissoluerentur, nempe vt interea sub hoc diuino Solè fortiùs incalesceret deuotum pectus, & viuifica Sacramenti coniunctione vegetiùs foueretur.

Ne isti Solares effectus omnino laterent abditi, prouidit Christus, dum ex ipsismet foras redundare fecit vsque in Rosæ corpusculum duo prodigia, robur & saturitatem. Robur ex S. Communione deprehendit in filia Mater, nam quotiescumque Rosa S. Synaxim receptura Templum adibat cum parente, ex pridianis ieiunijs, flagris, ac vigilijs tam fessa, attenuata ac debilis erat, vt sæpe per viam in angiportis hinc-iadc fuerit vtrique subsistendum quoad lassà Virgo recuperarèt anhelitum. Sed Diuinæ buccellæ refecta pabulo, cum à Templo redibat domum, præibat Matrem, & hortabatur sequi, velut si in fortitudine cibi illius vsque ad montem Horeb fuisset ambulandum. Corporalem verò ex Eucharistico pastu saturitatem ipsamet Rosa tum Confessarijs tum domesticis passa est. Nam reuersa domum & vixdum euoluta palliolo rectà properabat ad secretum cubiculi, ibi in seram vsque noctem se recludens meditabatur suscepti beneficij magnitudinem, neque in vllius prodibat conspectum aut conuersationem. Rogata cibum sumere, maximè quòd pridiano exhausta ieiunio videretur refectione indigere, meminissetq; diem dominicum à lege ieiunij exsortem esse,

respon-

respondebat, præ ingenti satietate à mensa Domini alium se cibum admittere nondum posse, adeo ut citra extremam vim & cruciatum nec panis bolum glutire, nec aquæ guttulam sorbillare se posse aduerteret. Ut ergo ita esse, re ipsa comprobarunt, desiere cibi mentionem importunè ingerere, sicque Virgo cum sua saturrime inedia usque in vesperam, subinde in sequentem usque diem perseverabat. Accidit, quòd Rosa per integram quamdam Octauam permissu Confessarij dietin Altaris Sacramento pasceret. & tunc quidem integro illo octiduo ab omni abstinuit corporali alimonia, eò quòd superna illa saturitas non, tantum reliqui edulij omnem abegerat appetitum, sed planè cuiuscumq; alterius alimenti reddiderat pro illo tempore incapacem. Simillima hæc sunt ijs quæ de S. Catarina Senensi prodit vitæ suæ historia, ut patèret euidentius, vno utramque spiritu excelluisse.

Ceterum quanta religione solita fuerit Rosa venerari hoc Sacramentum, sicubi aut immolabatur in Missæ sacrificio, aut prostabat adorandum in Altari, utcumque supra attigimus. Missas quidem auscultabat omnes quotquot in Aede FF. Prædicatorum celebrabantur; his intererat usque ad meridiem tanta quiete ac silentio, quanto nec lapis in suo defigitur centro. Et reuera proprium Rosæ centrum S. Hostia erat ubicumque eam poterat visu assequi, huc toto ferebatur amoris pondere, adeo ut horis integris vix (: aut fortè ne vix quidem) noctu vnico ciliis demisisset, multò minùs faciem vel ad momentum ab ara deflexisset notata sit. Noti ignotique ponè transibant coram geniculata Virgine, ac ferè incurrebant in oculos, nec tamen ipsa quemquam tunc nôrat, nec vel leuiter mouebat palpebras, intensissima ijs quæ gerebantur in Altari, quorum intuitum forsitan alieni obiecti intercurfus nec obiter eclypsoabat. Idem Virgini erat immotæ attentionis tenor, quando in hierotheca expositum vene-

rabile Sacramentum adorabatur à populo, vt fit in publicis 40. horarum supplicationibus : illic à manè vsque ad vesperam continua & prorsus immota geniculatione hærebat Rosa oblita prandij, neque vel aquæ guttulam acceptabat in refrigerium contenta iubilo atq; delicijs quas percipiebat ex corporali Sponsi præsentia. Sic per totam quæ festo SS. Corporis Christi appendet solemnem octauam integros illos dies transigebat coram patulo extantis Sacramenti tabernaculo, mirantibus præcipuè Confessarijs, vnde tam extenuato corpusculo vires suppeterent ad genuflexiones tam prolixas, continuas, arduas cum dierum inedia sustinendas. Videbatur fortitudo lapidum fortitudo eius, & caro eius ænea, id quod inuidissimus Iob sibi deesse querebatur. Porro quatuor postremis vite sue annis in maiori (:quam vocamus) hebdomada, quam diu sacrum Christi corpus adorabatur clausum de more in monumento, nec noctu inde recedebat affixa tumulo Rosa, nec loco vbi feria v. genua fixerat surgebat, donec postera die Parasceues Diuinus ille thesaurus (: cum quo semper erat cor suum) transferretur ritu solito ad tabernaculum.

Interim esurieci, sitis, lassitudinis immemor, tota occupabatur cum dilecto, ea quidem veneratione ac reuerentia, vt toto 24. horarum decursu nec sedere coram illo, nec muro contiguo tantisper acclinari præsumeret.

Neque segnior erat ad cultum huius adorandi mysterij, etiam quando extra conspectum erat. Quotiescumque in colloquio seu proprio, seu alieno ore nominabatur sanctissimum Altaris Sacramentum, Rosa capitis totiusque corporis profunda inclinatione reuerentiam testabatur. Sicubi audisset eminus campanis signum dari ad eius adorationem, vel *sacris* eiusdem *Solemnjs* tintinnabula præsonare, subitanea intimæ lætitiæ signa cohibere non poterat, quin cor & caro sua exultarent in Deum viuum.

fuc-

succendebatur viuidior in facie color, & exultabat spiritus eius in Deo salutari suo. Auscultandis verò de inefabili hoc Mysterio solemnibus panegyricis nusquam satiari poterat, illosque semel auditos penè verbatim post annorum interstitia recitabat mira felicitate memoriæ. Nullus ei manuum labor iucundior erat, quàm quo Altare, tabernaculum, aut in Maiori hebdomada S. Sepulchrum veniebat exornandum. Hinc tanto deuotionis studio suebat lintea quæ *corporalia* dicimus; mappas & pallas altarium, operimenta calicum, vela bombycina, & quidquid textile ad sacram hanc suppellectilem spectare poterat, omni pietatis ingenio, arte, elegantia conficiebat. Insuper viuus floribus neutiquam contenta pretiosiores è filis fericis fingeat versicolori artificio; addebat eiusdem sumptûs & operis ramusculos prasinus, porraceos, herbidos, omnique viroris amœnitate variegatos. Non probabatur Matri sumptuosa Filix deuotio, ægrèque ferebat tantum temporis subduci alijs Rosæ laboribus qui parentes & inopem familiam sustentabant. Itaque Virgo vt Matri satisfaceret, post diurni laboris pensum aliquam noctis partem conficiendis Altarium ornamentis seponebat. Verùm & hoc Patri spiritali (: forsitan suggerente & exaggerante Matre) visum filix vires excedere, sed huic grauius respondit Rosa: nolim haberi tam delicata, vt pro Sponsi mei ornatu vnica noctis labor aut nimius mihi sit aut molestus: quæ enim tam focors aut otiosa fuerit nupta, cui durum sit noctem impendere ornamento & cultui quo maritus eget vt postridie decenter in publicum prodeat!

Denique erga Sanctissimæ Eucharistiæ mysterium is Rosæ affectus erat, quo maluit pro illo sanguinem vitamque expendere quàm flores. Nec longè abfuit præsentanea occasio. Anno MDCXV. mense Augusto circa litora Peruana in Oceano *Pacifico* hostilis comparuit Batauorum

uorum classis, oramque totam improuisa exterruit. Vbiq; conclamatum ad arma, & interim Clerus vterque (: vt fit in publicis periculis) Diuina imploraturus præsidia Limæ per omnes Ecclesias SS. Corporis Dominici Sacramentum exposuerat palam ab imbelli multitudine adorandum. Tandem ipso Beatæ Mariæ Magdalensæ sacro peruiugio visa est formidabilis illa hæreticorum classis acie disposita in ipsum Limensis emporij portum (: *Callao* indigenis dicitur) rectà procurrere, velut in Urbis excidium militares suas copias effusura in terram. Mox tota vrbe trepidatum est, iussique cum Ciuibus Ecclesiastici arma corripere, siquidem certum erat, Caluinianum hunc hostem non solis incolarum fortunis & iugulis, sed & sacrorum profanationi, Templorum spolijs, Religionis exterminio sæuissimè inhiare. Inter hæc Rosa, quæ cum honestis Matronis in Ecclesia sancti Dominici exitum horum tumultuum expectabat, soli metuebat prostanti in ara Diuinissimo Sacramento, cui utique sacrilegæ manus perfidæ gentis paritura non erant, fortasse nec pedes, quin illud ausu horrendo protererent, humique proiectum rabie blasphemam proculcarent. Tristius interea nuncium superuēnit vsque ad Rosam, nempe inimicos Fidei ex alto nauium in lembos, inde in arenam prosultare manipulatim, & ad portas Ciuitatis globatim procedere. Inanem hunc rumorem ipsa publici timoris caligo pepere rat, sed tamen sexum inermem qui cum Rosa in Templo substiterat, sic perculit vt propemodum exanimaret. Sola Rosa tantum abfuit quòd sibi metueret fugamue aut latibulum circumspiceret, vt potiùs triumphanti similis ingentis latitiæ signa cohibere nequiuisset, rata nimirum adesse felicissimam torque suspirijs optatam horam, quæ posset pro honore prostantis ibidem Sanctissimi Sacramenti vitam animamque profundere. Itaque socias obiter secum in D. Hieronymi sacellum traxit, illic exporrecto in hila-

hilaritatem vultu pavidas hortari cœpit ad subeundum secum martyrium, occasionem hanc nimis pretiosam esse ac fortunatam, videlicet non quomodocumque sed sub ipso S. Hostiæ conspectu hostiam cadere, coram & pro Divina illa victima victimam cædi, pro exposito Christi corpore animam exponere. His facie rutilante prolatis exemit vaginâ forfices, sibi que vestem quâ longior in terram defluebat, alacriter præcidit, manicisque in cubitum vsq; replicatis quod reliquum erat tunicæ intra cingulum vsq; ad talos attraxit, cothurnos subere subleuatos exuit. Interrogata quid ageret, quid sibi vellet hac nouitate, ad agonem (inquit) me succingo, nolo mihi impedimento sint panni luctaturæ ac morituræ pro Sacramento: in breui hac veste expeditior cōscendam superiorem Aræ crepidinem, illic pro Christi corpore corpus meum vulneribus obijciam, nec cedam donec impiorum bipennibus vtriusque perfoſſa cadam; quinimò precabor hostes ne vno ictu repente me conficiant, sed lenta crudelitate articulatim corpusculum hoc totum deartuent, inque modicissima, frustula partes singulas comminuant, vt dum in me excarnificanda occupabuntur, differant saltem iniurias quas eheu! postea irrogabunt præſenti Sponſo meo.

Hæc ita pronuntiabat, vt ex oculorum scintillis, ex impavidi vultûs constantia, ex viuaci tono heroicæ vocis ceteroque gestu animosæ Viraginis facile conijceretur Rosam pro Eucharistico Altaris Agno leenam induisse: nec circumstantes scemina suismet credebant oculis, videntes Amazonem, quæ hætenus nonnisi viua mansuetudinis idæa fuerat. Mirabantur Virginem modestissimam in publico reuoluto circa humeros pallio, veste curta, proiectis crepidis, liberrimis brachijs, alto præcinctu, solisque Rosarij globulis precarijs ferociter obarmatam spe martyrij vltra lacesere fatalem horam, ac morti pugnacissimè minitari. Interim ipsa velut moræ iam impatiens

nunc

nunc experiri incessum, nunc ad Aram sacramque Hostiam, mox ad Ecclesiæ fores prospectare, si quæ venirent hostes quibus velocior ad Altare conuolaret, certa ibidem occumbere; iam venis arterijsque omnibus bulliebat Virgini sanguis effundi auidus, verum dum exspectat, dum agoni se præparat, dum socias exemplo, gestu, hortatu inuitat, nunciatur hostem longius abire à litore; & ita erat: nam Archithalassus morbo correptus receptui cecinerat, ac paulò post à suis in rupe portui opposita sepultus est. Rosa disploso aliorum metu cœpit verecundari ipsa de breuitate tuncatarum vestium, & vt decenter rediret domum, necesse fuit in prædicto sacello noctem expectare, cum dolore erepti martyrij, quamquam gratularetur patriæ liberatæ, ac præcipuè inuiolatæ Templorum religioni.

Defuit ergo non martyrio animus, sed animo martyrium toties & ante & postea votis ardentissimis exoptatum; nam crebrò desiebat sortem suam, quòd pro conditione sexus infidelium regiones adire non poterat pro Christo millies mortem quæsitura: dolebat se non illis temporibus, locisque natam vbi tyrannica persecutio Christianorum sanguine orchestras, fora, amphitheatra purpurabat; inæstimabilis sibi videbatur illorum felicitas, quibus datū fuerat vltima gutta sanguinis obsignare fidei characterem, sæpe cum gemitu dicebat familiari *D. Franciscæ Vrtado de Bustamante*: vtinam idonea ratio modusue occurreret adornandi fugam ad barbarorum, prouincias, vt illic ab idololatriis pro IESU Christo immanissimè trucidemur. Deniq; cum aliud nō poterat, oblectabat se imagine, ac meditatione suppliciorū, quæ sigillatim omnia pro Sponsi amore desiderabat in se experiri. Ità cupiebat cum sancto Martyre Ignatio mundus Christi panis inueniri pro illa charitate qua Christus *Panis Angelicus fit panis hominum*.

C A P V T XXIII.

Rosæ eximius pro periclitantium
animarum salute zelus.

QUæ tam masculè ardebat circa Mysterium quo verum Christi corpus velatur, non poterat mystica eiusdem membra negligere, sicubi videbat hæc ancipiti perdendæ salutis discrimini patère. Nouerat æstimare animas ex infinito pretio quo redemptæ sunt: hinc quoties ad interiora meridionalis Americæ montana flectebat oculos, cruciabatur medullitus, illachrymans perditioni tot barbarorum qui post illa niuosa altissimarum costarum iuga formicatum innumeras sed inaccessas conualles populabant, auitâ adhuc idolomania obcæcati. Deplo-
rabat inconsolabiliter vicinum Chili regnum, vbi diutim per myriades peribant animæ; ex quo feroces incolæ excusso Regis & religionis iugo redierant ad pristinæ gentilitatis vomitum. Nec solis suis occiduis Indis condolebat, sed quidquid nationum vastissimi Chinarum tractus, aut Orientis Imperia continent, Rosæ quotidiana plangendi materies erant. Optabat visceratim discerpi ac re-
tis instar obpandi latissimæ viæ qua tot miserabiles animæ ruebant ad infernum. Hic nimirum spiritus erat Seraphicæ suæ Magistræ, quæ & ipsa optauerat (: si fieri posset) suopto corpusculo obturari gehennæ fauces, ne tam populosæ animarum cateruæ illuc deinceps immigrarent, suæq; frustrarent lytrum redemptionis.

Accidit, vnum ex Rosæ Confessarijs tractare de sua missione ad annunciandum vicinis Barbaris Euangelium.

A a

Hunc

Hunc itaque ambire Virgo, hortari, stimulare vèrbis ardentissimis, obsecrare seriò, nil metueret, maturaret iter, subueniret pereuntibus, Deo acceptius obsequiũ præstari non posse, Apostolici pectoris & dignitatis id esse munus cui Diuina adfistentia deesse nequeat, denique in tanti sudoris mercedem ac solatium sat fore, si vel vnicum apud infideles infantem per Baptismi ianuam ad superos transmitteret. E contra ille experimentum quærens eius qui in Virgine loquebatur Christus, velut ambigenti similis extenuabat vires suas ceu tanto ministerio parùm idoneas, exaggerabat difficultatem operis, famem, sitim, ferarum pericula, æstum, lassitudines, exilia, demum & venena, quibus gens illa truculentissima minimèque hospitalis in externos Fidei præcones sæuire solebat. Verùm tamen subdebat, plurimũ se præsidij ac spei in Rosæ orationibus, ieiunijs, ceterorumque bonorum operum fido suffragio collocasse. Hic Virgo, tametsi de suis pijs operibus humillimè sentiret, nihilominus vt iturienti quantacumque poterat calcaria figeret, concepta ingenti fiducia promissit vniuerso exercitiorum suorum merito se illi in sancta expeditione succursuram, dummodo is vicissim pro rata ipsam participem vellet totius spiritualis lucri quod ex infidelium conuersione erat reportaturus. Annuit Confessarius, vtpote sat conscius quanta coram Domino spirituum ponderatore esset Virgo, cum qua de mutuo fœnore paciscebatur. Sic tandem vtrunque ex pacto conuentum est, quòd Rosa huic Confessario medietatem cederet omnium fructuum quos interea ex toto bonorũ operum exercitio se cõcumulaturam sperabat: ac vicissim ille dimidium lucri transcriberet Virgini ex conuersione animarum, quas sua prædicatione in viam salutis erat attracturus.

Eodem feruore spiritus nitebatur pia Virgo Religiosos viros (: quotquot aptos nouerat :) ad gentilium conuersionem

sionem succendere: præsertim sui Ordinis Fratres roga-
 bat, monebat, obtestabatur, huc huc suos in literis pro-
 fectus intentione tempestiua destinarent, hunc generosum,
 præclarum, sublimem studiis suis finem scopumque præ-
 tingerent, ut residuis Americæ plagis quidquid idolola-
 triæ usquam supererat profligant, ut in horreum Domini
 copiosos Indorum manipulos comportent, ut millenas
 animarum chiliades ab æternæ damnationis voragine eri-
 piant; non nimis hærendum esse in subtilitatum apicibus,
 non languendum circa inutiles vocularum controuersias,
 malè locari tot scholarum labores, tot noctes insomnes,
 tot disputationum clamorosas raucedines, si tantis parta-
 sudoribus eruditio proximorum saluti Fideique propaga-
 tioni non impendatur, si ad metam inertis otij, ad vani-
 tatem plaustumque inanis pompæ, vel in temporario lau-
 reatæ frontis honore prætumidè conquiescat, oscitet, de-
 spondeat. Assueverat graui sensu & impetu, se nisi foemi-
 nam natura finxisset, hoc primum in votis fuisse habitu-
 ram, ut decursa studiorum literariorum encyclopædia se
 totam missioni Euangelicæ deuoueret, cupida adire gen-
 tes ferocissimas, belluinas, anthropophagas; dummodo
 suis Indis adhuc gentilismo implicitis opè ac remedium
 sua catechesi, sudore, sanguine impertiret. Nec sinebat
 Virginem tantæ commiserationis affectus quiescere, unde
 rationem excogitauit, qua (: nisi morte præuenta fuisset)
 sperabat in Apostolicæ missionis negotio supplere per aliū
 quod per semetipsam præstare non poterat. Nimirum cō-
 ceperat animo adoptare sibi alicunde pupillum inopem,
 & vndiq; desolatum, quem à primis vnguiculis ipsa ma-
 terno studio ad virtutem & literas educaret ex pijs fami-
 liarium sibi Marronarum eleemosynis: huic puero mox
 à teneris proposuerat firmiter ac sensim implantare auida
 Euangelicæ missionis desideria cum paruulo gradatim
 adultura, ac interim providere ut in pietate sacrisque disci-

plinis accuratissimè formaretur, donec grandior factus ac Sacerdotio ritè initiatus iam cēseri posset idoneus operarius ad laborandum in conuersione gentilium. Tunc verò statuerat Virgo hoc vnicum ab alumno exigere diuturnæ alimonix maternæque solitudinis præmium, iret, properaret ad Gentes Christianæ legis ignaras, trophæum salutis in medio barbararum nationum erigeret, & quotquot posset animas à restibus diaboli strenuè explicaret. Hoc supplemento credebat Rosa vtcumque satisfactum iri generoso ardori suo, quo vltra foemineam mensuram ac modum auida sitiebat salutem proximorum.

Nec tepidior ei zelus & cura fuit erga periclitantes Christianos, si quos nouerat aut per culpam mortalem à statu Diuinæ amicitix infeliciter excidisse, aut capitali aliquo vitio ad certum interitum illaqueari. Pro his verè miseris quotidie cruenta sibi infligebat verbera, gemebat, suspirabat coram offenso Numine, nullique parcebat lachrymarum sumptui, vt talibus sinceram scelerum poenitentiam vitæque seriam emendationem à Deo exoraret. Aiebat, si quoquo modo sibi licuisset Predicatoris fungi officio, vtique se opertam horrido cilicio, nudipedem, squalidam interdiu noctuque per omnes Limensium viccos, & compita circumlaturam crucifixi Redemptoris imaginem, & vbique per fora, per triuia, per angiportus identidem clamore lugubri vociferaturam: resipiscite, ô resipiscite peccatores, recedite à vijs pessimis quibus pecudum instar ducimini ad macellum stygij Lanionis, fugite, declinate lubrica infelicissimæ æternitatis præcipitia qui vnico eoque incertissimo fugacis vitæ momento distatis à gehenna, agnoscite periculum cui vos implicuistis, misereamini vestrarummet animarum oues perditæ, quas bonus Pastor per spinas & tribulos, per sudores sanguineos, per vulnera & crucem requirit vt saluet; ô festinate reuerti ad hunc propitium Redemptorem quem si
nunc

nunc spernitis , nulla supererit in inferno redemptio. Hæc plerumque misericors Virgo tam luculento efferebat pectoris incendio, tantoque inflammati cordis affectu, ut non raro audientes compunxerit, neque iam Rosa priuatim inter familiares , sed Ionas inter Niniuitas videretur reipsa ordiri pœnitentiæ concionem . Aderat fortè P. Fr. Antonius Rodriguez titulo , gradu , officio Prædicator generalis : ad hunc conuersa Virgo pari tum feruore tum fiducia (: quam regebant modestia & charitas) sic illum affata est : Aduerte ô Pater , quod Diuina clementia te esse concionatorem voluit ut perditos ac obstipos peccatores ad frugem reducas . Igitur caueto , ne tuæ facundiæ diues talentum in plausibilibus acutorum conceptuum flosculis inutiliter consumas ; apage hos inanium argutiarum calamistros , facestant theatricæ ostentationis cothurni & phalæx, memineris à Domino te constitutum piscatorem hominum , robustius tibi laxandum est rete in capturam peccatorum ; hoc age obsecro , hoc vnicum stude & conare , ut quàm plurimas flagitiosas animas vorticibus eximas , ut ab ima vitiorum charybdi perituros euoces, & ad salutaris pœnitentiæ securum litus educas .

Euênit , dum adhuc Matri cohabitabat Rosa , iuuenem genere quàm moribus nobiliorem *Vincentium Montesum Venegas* in eadem platea haud procul à Rosæ ædibus fortiri domicilium . Is miratus Virginis eximiam pulchritudinem , at vnà certus nuptias sperari non posse, quærebat occasionem qua saltim oculos liberius pasceret in Rosæ pudicissima venustate . Igitur Matrem adiit, prætexens aliquot sibi ex tenui carbaso pretiosis collaribus opus esse , hæc se velle à Rosa confici , quam constabat eo opificio victum parentibus lucrari . Sedebat labori manuum cum puellis intenta Rosa , cui Mater innuit , audiret Vincentium , deque pretio ex more & æquo coram se conuenirent . Iuuenis coram Virgine sedere iussus comiter ex vr-

ba-

bano ritu sciscitari cœpit quì valeret, venisse se pro demandando opere conficiendorum aliquot collarium: petijt in singula quot vlnæ melioris telæ forent necessariae, quibus impendijs quo loco aptius emenda materies, intra quod tempus absolui possit opus. At Virgo diuinitus edocta secretum quod corde premebat Vincentius, effluctum misereri cœpit foetentis animæ, in qua stagnabant lubricæ iuuentutis impura desideria; oculisque cum gemitu in cœlum eleuatis, ô (: inquit) bone IESV! quàm longanimis est patientia tua! tu verò nobilis Vincenti ignosce, & locum da veritati quam tibi dictura sum: longè alias quàm de collaribus cogitationes versat cor tuum; vis ingenue tibi dicam ad quid veneris? at parco rubori tuo; iuueniliter agis, & doleo vices tuas. Dole etiam tu, ac resipisce. Mendacium est quidquid ad Deum non ducit, animam interim quidquid carni petulanti lenocinatur. Agnosce Vincenti periculum tuum, corrige animum vanæ oblectationis nimio venatu districtum, stude cautiùs ambulare in semitis mandatorum Dei ne pereas: en quidquid coneris tegere, non latuit Sponsum meum intentio tua. Hac improuisa Virginis concione ictus Vincētius deiecit oculos, seseq; introspiciens aliquantisper obmutuit. Denique iam mutatus ab illo qui paulò ante fuerat, sic Virginem affatus est: sentio in te loqui Christum, qui solus me tibi sic detegere potuit vt intima prauis cordis mei penetrares; cedo igitur pio & ignito hortatui tuo, sequar inuitantem ad meliora Deum, tu illum mihi propitiū fac reddas, vt quod hodie in me cœpit perficiat. Addixit Virgo suarū precū fida subsidia, comiterq; dimisit hominem, qui exinde iuuenilibus desiderijs valefaciens grauem ac sobriam viuendi rationem instituit, adeo vt singulis octiduis minimùm semel animam suam pœnitentiæ Sacramento expiare, ac Diuino epulo reficere adsueuerit, letus incidisse in Rosam, quæ & cœlitus infelicis animæ suæ sta-

tum

tum didicerat, & salubres aculeos seriae compunctionis nouerat opportunè suffigere minùs expectanti.

Prodigium erat si qua persona cuiusque vitio obnoxia Rosam accessisset nec ab ea melior discessisset. *Maria de Mesta* pictoris *Medori Angelini* coniux impatientiae ac praecipitis iracundiae pugnaci morbo iam penè sibimet ipsi facta erat intolerabilis: quauis re minima turbabatur ac turbabat, manu prompta, minax clamoribus, & sonora rixandi intemperie totarum aedium implacabilis tempestas. Detumesciente animi procella dolebat interdum, ac damnabat ipsamet suae ferocitatis effrenem impotentiam, at biliosa complexio & longa assuetudo callum vitio induxerant. Aliorum suasu an casu incertum, semel Rosam in hortensi cellula degentem inuisit. Confestim Virgo arrepta occasione grauem ac neruosum de tranquillitate animi sermonem instituit, breues ac salubres adquirendae mansuetudinis aphorismos praescripsit, æquanimi-
tatis ac patientiae apta consilia ingessit, sicque instructam à se dimisit. Mira res: foemina ab illo die fedatior ac mitior visa est induisse tractabile pacis ingenium, tolerabat corde quietissimo domesticos tribulos ac molestias, & si repètino aliquo flamine succendebatur bilis, hanc sola recordatione mansuetissimae Virginis mira facilitate lopic-
bat, breuèque eò peruénit in patientiae studio, ut iam vltro à Deo plùs ac plùs aduersitatum postularèt. Sanè Rosam verècundae taciturnitatis amantissimam solus animarum zelus disertam fecerat, nec vñquam ei facundia defuit qua sequelam virtutis fugamque vitiorum efficaciter persuaderet.

Virum quemdam professione Religiosum illa non minùs sordida quàm fatua ac monstruosa fumantis *Tabacci* ingluuies vsque ad praesentissimam corporis animaeque pernitiem deduxerat, ita ut de vtriusque remedio conclamatum ferè putaretur. Os homini intus omnino fuligineum

gineum, camini speciem referebat, olidæ nares mucebāt cremore fauillaceo, atra nebula vexatum cerebrum stiklabat in pectus, & obstructis pulmonibus raucum asthma vocalem obsidebat arteriam, nec tamen cessabat miser à noxio suctu accensæ fistulæ. Protestabatur Medicus, dissuadebant, rogabant amici, demum Prælati regulares feuerissimis inhibitionibus addidere multas, præcepta, dirarum ac censurarum fulmina, sed in cassum, quia contumax vitium triginta & trium annorum possessione ac mora nimium inualuerat, nec videbatur aliud pereunti superesse remedium, nisi quòd Rosa post tot aliorum hortamenta, consilia, inuectivas, post tot Superiorum correptiones, minas, clamores, suam exsereret ardentioris facundiæ mirabilem suadam, hominique loqueretur ad cor, & eius saltem animæ salutem omnipotenti Numinis dexteræ cōmendaret. Facile annuit Virgo miserta periclitantis, maximè quòd sciret, ipsum non iam obstinatione voluntaria, aut obedientiæ contemptu, sed sola infirmitate resistendi violento ac annoso vitio sic obbrutuisse in absurditate intemperantiæ omniū vecordissimæ. Et ecce, à Virginis alloquio vix quinque dies effluxerant, quando Virum inuasit omnimoda *Tabacci* nausea, mox & horror, ac vehemens abominatio, ita vt deinceps non modò facillimè sese abstineret forbitione tubi cretacei, sed neq; amplius sufferre potuerit odorem huius infaustæ fornaculæ, quam delicijs & cupedijs humanæ fatuitatis accensere is solus potuit, qui Iob 41. sic depingitur: *de naribus eius procedit fumus sicut olivæ succensæ*, & denique hic etiam per Europam inuenit qui secum fumos helluentur. Rosa in vnico sanauit hanc insaniam, curatura plurimos vbi ritè fuerit implorata. Neque hic stetit Virginis beneficium, simul cum vitiò inueteratum asthma pectoris, hæmorrhagiam, flatuumque tormina depulit, quibuscum miser illa per annos plus-minus xiv. fuerat colluctatus. Quin & vsque

vsque ad animam transijt energia saluberrimæ correctionis : nam mens illa ad sobrietatem mirabiliter reuocata, coepit tractare attentius æternæ salutis negotium , emundare conscientiam, reformare ignauos mores, veternum excutere, gratulantibus cunctis qui vmquam antea in tabe illius vitij putrescentem defleuerant. Nempe sic Rosam exaudierat qui nouit totum hominem sanum facere in Sabbatho .

Vnum addidero & finiam P. F. *Petrus de Loaysa* Dominicanus probè conscius zeli & charitatis qua flagrabat misericors Rosa in opem periclitantium proximorum, indicârat Virgini, decumbere in Cœnobio cumque mortis angoribus trepidè luctari N. eiusdem instituti Religiosum à Medicis pridie derelictum ; addebat torqueri agrum vrentibus scrupulis, affligi non certitudine vicinæ mortis, sed incertitudine vitæ melioris, cò quòd meritis se vacuum agnosceret, contremiscere pauidum, ac sudare ad continuam seueri Iudicis, quem aditurus erat memoriam, denique subuerendum esse, ne nimia formido grauiori periculo implicet desolatum. Intimè hæc faucibant cor Virginis prompto compassionis affectui tam flexile ac morigerum : vnde actutum iniunxit Petro, infirmum adiret, suoque ex nomine iuberet fidentiùs sperare de immensa optimi, & benignissimi Numinis misericordia: se quidem precaturam pro felici ipsius transitu, ac simul ex nunc offerre se de suorum piorum exercitiorum qualicumque censu quidquid moribundo ad suppleendam meritorum vacuitatem opus sit, imò totum is sibi vendicet, & si quod bonum opus à Rosa vmquā per totam illius vitā hætenus prodierat, integrè à se in agrum dono liberrimo translatum velle, hoc ipse velut suum Iudici exhibeat, desinatque interim abiectè & humiliter sentire de magnifica liberalitate Altissimi. His ad plenitudinem solatij adiecit, velle se (: modò Deus permiserit

ferit) ab obitu conueniri à defuncti anima, vt si fortè
 vltioribus suffragiis eguerit, statim adiuuetur. Fide-
 liter vniuersa ad infirmum retulit Petrus, & confestim,
 immodicus ille pauor gaudio latioris spei locum cessit,
 acceptauit æger munificam Rosæ largitatem, haud igna-
 rus quantum opulentiae in dono tot meritorum latèret,
 sicque munitus demum salutaribus Sacramentis con-
 ceptaque ingenti salutis fiducia tranquillum, placidum,
 serenum spiritum reddidit Creatori, pactus ante cum
 Petro, quòd tam ipsum, quàm Rosam à morte inuise-
 ret, si eam sibi facultatem Dominus indulgeret. Ve-
 rum post fratris decessum non leuis cura momordit Pe-
 trum, quid esset, quòd iuxta condictum defuncti ani-
 ma non comparebat. Sed exemit sollicitudinem Petro
 secura Rosa, dixitque cum defuncti anima feliciter ac
 bene agi, iam illam regioni lucis adscriptam frui peren-
 ni refrigerio, vt ei nequaquam opus fuerit redire ad al-
 terutrum, pro stipe suffragiorum emendicanda. Nimi-
 rum tanto viatico illam hinc abeuntem diràrat pro-
 fusa misericordis Rosæ liberalitas, cui nil
 tam pretiosum aut charum esse po-
 tuit, quod animarum sa-
 luti non impenderet.



CAPUT XXIV

Rosa pro modulo facultatum
 coporalibus misericordiæ ope-
 ribus proximos iuuare
 fatagit.

Mirabitur, quisquis legerit, Rosæ pauperrimæ fu-
 nus publicis mendicorum Limensium eiulatibus,
 thrænis, lachrymis fuisse celebratum, vociferante ege-
 norum turba, veram pauperum Nutricem ac Matrem fato
 acerbissimo & præmaturo sibi ereptam fuisse. Quid enim
 tenuium parentum inops filia partiri alijs indigentibus
 potuit vix sibi alendisque genitoribus sufficiens? & tamēn
 sibimet necessaria subtrahens dispersit, dedit pauperibus,
 ac memor cœlestis Lapidæ qui (: vt relatum supra Cap.
 XI. inter dotalia pacta sollicitudinem alendorum paren-
 tum à Rosa in se transtulerat, ipsa de consensu Matris
 manum suam aperuit inopi, & palmas suas extendit ad
 pauperem, cum his diuidendo eleemosynas, quas inspe-
 ratò receperat.

Semel cuiusdam occulta seu arcta necessitas ad Vir-
 ginem relata fuit, sed cum aliud vnde subueniret ad
 manum non esset, octo dierum alimoniam (: contenta
 interim solo pane & aqua) sibi detraxit pro egentis
 subsidio. Alia vice Gaspar flores Virginis Pater sat gran-
 de volumen candidioris telæ (: donatum an emptum ne-
 scio) domum attulit, vt inde coniux Maria de Oliua sibi

gregique tot filiorum de omnibus quæ ad munditiem spectant copiosius prouideret. Illa sciens filiam Rosam pro ægritudinum frequentia ac munditiei studio pluribus ex eodem lino indigere, seorsim huic notabilem illius telæ partem (xxxvi. vlnæ erant) attribuit, vt ipsamet sibi pro arbitrato ad vsus proprios sudaria, pepla, fascias, gremialia, vela, mantilia, tegmina, vittas, ceruicalia, mappa, omnemque necessariam candidi nitoris suppellectilem formaret ac sueret. Rosa, vel admirata munus tam copiosum & affluens, vel vt humilius parenti gratias ageret, mihine (: inquit) omnem hanc lini portionem donas Mater? respondit illa: Tibi filia, vt ere prout lubet, fac inde quæ vis. Arripuit Virgo postrema hæc verba, statimque nec palmo illius telæ retento sibi, totam donauit secretò duabus Virginibus tam genere quam virtute nobilibus, at pauperissimis, quasque nouerat clam domi ingentem rerum omnium penuriam pati. Mater vt vidit filiam nil minus quàm de conficiendis sibi linteis cogitare, suspicata quod erat, causam quæsiuit, cur traditam sibi telam candidam, subtilem, bonam tardaret suis aptare vsibus; respondit filia: iam aptata est vt aptari melius non possit, quinimò nunc primùm illa decorè canduit, ex quo in eleemosynam conuersa est. Replicuit Mater, at ego tuis impendi vsibus præceperam, sollicita ne quid desit quando infirmaberis. Subrisit Virgo, & nonne (ait) potestatem mihi disertè fecisti vtendi vt vellem? vsa sum, nec mihi deinceps vbi decubuero ex morbo, quidquam defuturum puta, Dominus abundè prouidebit. Ita planè accidit, nam paulò post à maternis adibus translata in Dominæ Mariæ Vsetagui contubernium pietate Matronæ linea supellectile adeo non eguit, vt etiam abundarit. De hac Virginis in diuinam prouidentiam admiranda fiducia seorsim Cap. seq.

Possidebat Rosæ Mater in suo mundo muliebri duas
pallas

pallas, seu oblonga & à vertice in terram vsque demissa pallia, foemineum ac decens tegumentum quotiescumq; proceditur in publicum. Horum alterum domi fortè in sedili à Matre depositum conspicata Rosa liberè corripuit & inopi cuidam Virgini donum fecit. Mater vbi frustra totis ædibus suum requisivit pallium, suspicionibus indulgit, pene vsque ad temerarium iudicium, quòd vicinorum aliquis clam irrepsisset domui, pallamque neglectim à sede pendulam sublegisset. Filia ne quos innocentes oneraret furti imputatio, lepidè affata Matrem, quid (: inquit) iacturam tuam incertumque autorem dubitabunda inculcas? ecce me pallij tui furem domesticam sed innoxiam, quia plus tibi proderit amissa palla, quàm si intactam possideres. Hanc interim ego donavi Montoyæ pauperrimæ, quæ quòd huiuscemodi veste careat, Ecclesiam decenter adire, missisque & concionibus adistere non potest. Tibi ô Mater alterum superest pallium nouum adhuc ferè intactum, quod priusquàm vel modicum veterascat, Diuina bonitas non vno sed pluribus te pallijs dirabit. Euénit quod Virgo prædixerat, nam exigui temporis interlapso vir illis in ædibus numquam antea visus nec aliunde cuiquam illic domesticorum notus intrauit, Rosæ Matrem poposcit, eidem xl. libras argenteas pro nouo pallio coemendo porrexerat, abiit. Similiter iisdem ferè diebus *D. Maria de Sala* vltro per famulum misit serici subtegminis aptam materiam quanta conficiendæ nouæ pallæ sat erat. Denique eiusdem materiæ totidem vlnas quæ pallio muliebri sufficerent, deuota persona obtulerat *Limano Fratrum Prædicatorum Conuentui*, hic Rosæ Matrem ea donauit: sic intra pauculos dies *Maria de Oliua* pro vnico suo pallio quod Rosa egenæ Montoyæ dederat, tria recepit noua ac meliora, didicirque animosius fidere tum vaticinio filiæ tum prouidi Numinis largitati.

Extra moenia in extremis Limanæ vrbis pomærijs habitabat *Ioanna de Bobadilla & Azenedo*, Virgo illustris parentelæ, sed orphana, ac virtute quàm censu ditior, nam amissis parentibus in arcto res erant, miseramque sat premebat occulta frugalis œconomix angustia. Accesserat in afflictionis cumulum vorax & purulentus sub mammilla cancer, qui liuidis ac tabificis incrementis vergebat in carcinoma, & tardante remedio exitium minabatur. Ioanna tam inops consilij, quàm periculo & calamitati impar non inueniebat rationem qua discrimini occurreret citra peius discrimen: nam vt eò vbi habitabat ultra amnem, quotidie accerferet ex vrbe Medicum, obstabat viæ longinquitas, nec enim tunc (vbi hodie) Limæ amplitudo vsque ad illa yltiora trans fluium spatia procreuerat; siue ad lentam curam migraret tantisper in Ciuitatem, deerant peregrinæ & inopi sumptus quibus semestre hospitium conduceret. Fuit qui gratis offerret ædes suas, at honesta & timida virgo se ignotam ignotis credere noluit. Demum oranti in templo sancti Domini ci Rosæ innotuere omnia, sibi que hanc desolatam & perplexam referuari mox intelligens, modum quo subueniret promptè inuenit. Ioannam secretò adiit, metum anxietatemque ponere iussit, vacare in maternis ædibus locandum pretio conclaue idoneū & vsui peropportunum, eò concederet, ac de menstruo locationis sumptu pacisceretur cum Matre, sibi deinde curam procurandæ solutionis totam relinqueret. Paruit Ioanna, & insperatum beneficium verecunda hilaritate acceptauit. Hilarior tamen fuit Rosa, quòd talem nacta esset cui tam occultè & piè viscera suæ misericordiæ impertiret: sicque fidens Diuinæ providentiæ reperit quod in singulos menses etiam Ioannæ adferret in exactam solutionem hospitij, pacta dumtaxat silentij fidem. Post menses quatuor aut quinque Ioanna integrè conualuit, suumque foris habitaculum

sana

sana repetijt, hoc vnum dolens, quòd hospite palam referre grates minimè liceret. Verum post Rosæ obitum soluta promissæ taciturnitatis vinculo beneficium liberri-
mè omnibus prædicauit.

Rosæ quoad Matri conuixit, nil iucundius accidere poterat, quàm si permetteretur cuiuscumque sortis aut conditionis pàuperes personas morbis afflictas paternis inferre ædibus, vt illic suismet manibus assidue ministra-
ret languentibus, nec solius tecti, cubilis, strati, sed & medicamentorum, ciborumque solatio egentes affatim reficere conabatur. Sicubi in vicinia aut nota domo resci-
uisset quodcumq; vile mancipium ex ægritudine decum-
bere ac negligentius haberi, sibi contestim illius deposce-
bat curam, multisque precibus exorabat Matrem, annue-
ret languentem in suas ædes deportari ad curam sollicitio-
rem. Recusabat interdum austera parens, quòd existima-
ret filiam rarò sanam ac iugiter valetudinariã priusquàm
in aliorum curam se intromitteret, debere charitatis or-
dinem à semetipsa auspiciari, suæque magis quàm alienæ
valetudini prospicere. Subinde tamen ne misericordem
immisericorditer contristaret, ei indulsit pro domestica
sua tenuitate operari quæ posset, non quanta vellet. Mox
illa primò obuium mendicabulum inuitabat ad lares pro-
prios, huic abstergebat, vngebat, alligabat purulenta vl-
cera, huius mundabat vestes, reficiebat laceros pludero-
nes, repurgabat subnatas plicatim sordes, lauabat pedes
& impetiginosum verticem, nulliq; ministerio deerat quo
illius fami, siti, pressuræ leuamen adferret. Nec (: quod
ferè illi regioni præter morem est :) vllum Virgini discrim-
en erat originis aut nationis, quin ex æquo & indiffe-
renter egentibus Hispanis & Indis, Aethiopibus, candidis,
mixtisque (: quas *Mulatas* vocant) prompta charitate suc-
curreret. Pari commiseratione vernaculas, peregrinas,
seruiles, ingenuas, notas, ignotas, agrestes, & indigenas
pro-

prosequebatur, solo euidentioris indigentiae respectu habito. Inter has verò mendicas ac miserabiles nulla tam pannosa aut sordida, nulla tam deformis aut vlcerosa, nulla tam aspectu horribilis aut intolerabilis foetore, quàm Rosa vel dedignari posset, vel prae nausea auersari. Nulla ægritudo tam putrida ac foeda, nullum vlcus tam tetrum aut saniosum, nulla scabies tam crustosa aut fluida, cui Rosa medelam, famulatum, curam offerre, cui virgineas admouere manus, dimouere spurcitiem, applicare, munda, dare, mutare emplastra defugeret. Hac ambitione pia Virgo obibat mulierum valetudinaria quotiescumq; honestae comitiuae aderat occasio, querebat per ambulacra infirmas prae ceteris horridas magisque porriginosas, his mira alacritate componebat lectulum, eluebat vasa, parabat edulia, neque tam vile, tetricum, abiectum obsequium commodari infirmis poterat quod non ipsa ultro prensaret.

Accidit die quadam, ab infirmæ mulieris cura Virginem tantisper ad maternas sedes diuertere: sensit curiosa Mater in veste filiae insolitam mucidi putoris graueolentiam; inde coniecto in illius togam attentiori oculo notauit hinc inde, respersim aliquid purulentarum sordium fortuitò adhæsisse pannis ex aliena sanie, quam Virgo in deterfione vlcerosæ mulieris inscia contraxerat. Indignata parens sub stomachabatur filiae, quorsum (inquit) hac tuæmet incuria? non quidem ad hoc tibi religiosus iste, candicat amictus ut eum alienis spurcitijs deuenustes, neque Te Rosam appellauimus ut sic oleres, quâdo te murinis ac suaueolentibus chirothecis vti iubebam. repugnasti paruula, at nunc adulta si musco fragrare non vis, musco saltim ne foeteas alieno. Subrisit Virgo, blandèque subintulit: Christi bonus odor sumus dum ministramus infirmis; charitas delicata non est, nec proximum fastidit, memor nos omnes ex eodem esse luto ac cœno; mor-

talitate hæreditaria cūcti putrescimus, nec est qui suæ corruptionis non circumferat sentinam: itaque Mater parum putato, quòd tunicam obiter maculaui improvida, longè foediùs ipsum Redemptoris vultum rheumata, sputa, salivæ turpium carnificum pro nostris sceleribus deformarunt.

Aliud in hoc genere vix imitabile præstitit Rosa quod silendum non est. Decumbebat in ædibus viduæ *D. Isabella de Mexia* quædam ex domesticis famulabus putri humore febriumque æstu prætumida; huius ministerium & curam utpote in familiari domo permissu Matris sibi Rosa assumpserat. Contigit ex medicinæ consilio ægrotanti phlebotomiam adhiberi, extractumque venâ sanguinem in angulo seponi dum Medicus ad eum inspiciendū rediret. Tardavit is ultra biduum, atque interea sanguis ab ipsa scaturigine iam notatus de putredine horridiùs obputruit, seroso virore, flauis nigrisque maculis ac ramosa sanie vndequaque pinguis & decolor. Tandem adfuit Medicus, obiterque examinato sanguine ac notatis in eo periculosi morbi critirijs foetentem massam de more proijci imperavit. Rosa pro compassionis affectu diligentius peluim qua coagulus sanguis asportabatur intuita, sensit ab imo fundo sibi euerti stomachum, alterari in faucibus salivam, totisque se visceribus in vomitum propendere. Dissimulavit ut potuit, famulumque properè cum pelui abeuntem rogavit hanc sibi ferendam tradi, se non tantum vacuaturam quod inerat, sed insuper vas ipsum, nitidè mundaturam. Facile consensit homo tali se putore exonerari: at Virgo sibimet indignata quòd horruisset, cū pelui clam secessit in angulum foras, ibique semetipsam durè obiurgans: itane (: inquit) strenuè ac seriò studuisti dilectioni proximi, ut nausæa tibi sit miserabilium infirmiras? hoccine te docuit Seraphica tua Magistra! sic nondum didicisti omni hac putredine te viliorem esse ac pu-

tridiorem? *veni delicata, veni tenellula, experire melius, disce plenius num te deceat sic fastidire miseram & coæqualem tuam, in qua non minus quam in te ipsa splendet imago tui Creatoris.* His cum fremitu in se prolatis (: obstrue nares lector:) peluim ori apposuit, totumque illum saniosum cruorem (: dicam, an cruentam faniem) ausu heroico sensim epotauit; mox panno, ne quid in labijs residuum notari posset, os absterfit, ac peluim elutam, defricatam, nitidam reportauit. Latuit eius Matrem generosum facinus, at Isabellæ (: Deo mirabiliter disponente) innotuit, quæ & pannum quo Virgo labia deterferat, fortuitò demum inuentum studiosius in facti memoriam asseruauit. Deinceps nemo (: opinor) dubitabit, Rosam, B. Catarinæ Senensis fuisse germanam Discipulam.

Hinc sanè credibilia fiunt, quæ sequuntur. Quæstori Gundisaluo tum communione officij tum pari virtutis & amicitia studio necessarius intimèque familiaris erat *Ioannes de Tineo Almanza* Regiæ (: quam vocant) Cameræ Chartophylax & Quitensis Tribunalis supremus Circitor, vir pietate ac religione spectabilis. Hic ut erat in Quæstoris ædibus frequens ac penè domesticus, ibidem ex negotiorum occasione Rosam persæpe viderat, sæpius de illius sanctimonia vitæque singularitate mira audierat, ita de Virgine sublimiter, ut dignum erat, sentiebat, præsertim quòd sciret, Gundisaluum Rosæ precibus meritisque pluries grauissimis infirmitatibus fuisse liberatum. Contigit Ioannem ex cruciatibus stomachi periculosè ægrotare, ita ut accito Confessario tamquam vitæ incertus animam per exomologesim duxerit expiandam. Interea memor viscerum charitatis quibus erga ægrotos nòrat Virginem abundare, summis precibus egit per Quæstoris coniugem, ut Rosam adduceret in tanto sibi periculo bene precaturam. Euicit tandem illa accedente Confessarij nutu, ut Virgo Quæstoris vxori se comitem fore promitteret ituræ ad
agræm

ægrum inuisendum. Obstabat, quòd Rosæ pro pudore virgineo durum & insolitum erat viri quamquam familiarissimi & infirmi subire conspectum, at superabat tum pia commiseratio quæ negare iusta solatia ægris nesciebat, tum humilis obedientia, quam Rosa *Maria de Vfatogui* velut secunda matri deberi agnoscebat. Itaque his tutæ præsidij cum honestissima Matrona & pedisequis inviam se coniecit, prius tamen ad Aedem Sancti Domini- ci Missæ sacrificio interesse voluit, ac interim præmisit qui nunciaret ægro, se, vti petierat, à templo mox ei cum Ma- trona adfuturam. Sensit infirmus illomet puncto temporis quò nuncium acceperat, dolores suos mitigari. In- travit deniq; Rosa iacentis cubiculum, salutavit ægrum sed ea cõpassionis ac misericordiæ dulci affluentia, vt nec circumstantibus sanis ambiguum fuerit loqui in modestis- sima Virgine Deum totius consolationis. Verùm Ioannes vultu Rosæ observato notavit in eodem maiestatem An- gelicam, tesseram pacis, & vivam spem incolumitatis. Nec mora; confestim omnis dolor evanuit, infirmum somnus qui omnino diffugerat, blandè corripuit, mox altum obdormiscens (: Virgine interim cum comitibus domum reuerfa) integrè sanus euigilavit. Compendium id fuit, quo Rosa celeri adiuta miraculo nec deesset operi misericordiæ, nec in alienis a dibus præter Virginum mo- rem diutius hareret. Nec minor ipsi cura fuit citissimè abeundi, vt plausum effugeret quem meritò timebat.

Plura huiusmodi curationum miracula in alium tan- tiusper locum tempusque differo, hic vbi de sola Rosæ mi- sericordia agitur, vnum adijcere fas esto, sed lepidum, nam vsque ad bruta animantia clemens Rosæ suavitas & tenera extendebatur commiseratio, siquidem teste Salo- mone Prou. 12. *Novit iustus iumentorum suorum animas, viscera autem impiorum crudelia.* Erat *Maria de Olina* in suo domestico gallinario miræ pulchritudinis pullus gal-

linaceus, ludebat in eius tergo, & alis versicolor & amœna striatarum plumarum varietas, collum quædam velut purpura decorè incinxerat, postrema corporis propennarum arcuata venustate in iridem videbantur desinere, denique toti domui vna hæc speciosa bestiola in delicijs erat, gaudebantque omnes hanc à Matrefamilias nutrirî, & asseruari in spem sobolis quando creuisset, nam sperabatur illi simillimos fore pullos; quos procrearet. Creuit pullus, sed ea inerat ventricoso pigritia, vt iugiter cubarit humi, & vix vîquam visus sit vltro in pedes attolli, numquam auditus cucurire. Pertæsa Mater, quòd crederet frustra ab ignauo progeniem expectari, in mensa coram marito, & filijs constituit illo vespere pullum, ceterà inutilem iugulare, ac postridie comedendum apponere. Hic adstans Iuencula Rosa miserta est bestię, & innocenti simplicitate conuersa pueriliter ad auem, *Canta* (: inquit) *mi pulle, canta ne moriaris*. Vix puella verbum protulerat, cum sub oculis omnium pullus repente assurrexit in pedes, alisque fortiter excussis canorè & hilariter cucurriuit. Mox altis ac prætumidis passibus totum conclaue perambulans ad Rosæ nutum pluries toto distento pectusculo alacriter cantauit. Risere quotquot aderant, reuocata subitò mortis sententia, plaudebat cantu repetito pullus cum plaudentibus, spatiabatur velut altè præcinctus, colloque arrecto stridulus idemtidem renouabat domesticorum acclamantium cachinnos. Exinde sæpius per diem sonoris cantibus impleuit viciniam, numerabat vices familia & nonnumquàm quindecies cantasse breui horarij quadrantis spatioprehendit. Neque spem Matrisfamilias fefellit, cui nimirum paulò post à pulcherrimo hoc gallo pulcherrimi fuere pulli. Tantum vel in bruti animalis salutem valuit vnica vox misererentis Rosæ. Profectò & hic quæri posset, *quis dedit gallo intelligentiam*, qua obediret sanctæ puellæ

læ iubenti iugulum dare cantui, ne daret cultro? sed ad grauiora.

C A P V T XXV.

Rosæ magna in Deum fiducia,
crebrò in suis suorumque ne-
cessitatibus explorata.

A prima pueritia Rosam suam præuenerat Christus in benedictionibus dulcedinis, edocens confidere in adiutorio Altissimi, unde per totam deinceps vitam securissima erat, se iugiter in protectione Dei Cœli commorari. Hinc tantopere afficiebatur initio Psalm. 69. *Deus in adiutorium meum intende, Domine ad adiuuandum me festina.* Hunc versum iugiter ferebat in ore, hunc inter labores manuum submissa vocola suauiter cantillabat, hunc sedens, stans, ambulans deuotissimè iterabat, nec satiabatur frequenti illius repetitione, præsertim cum aliunde rescivit postea, eundem versum Beatæ Catarinæ Senensi perpetim in usu, ac delicijs fuisse. Rogabat interdum Latinam horum verborum emphasim doctius ac profundius sibi enucleari, sed numquam in talem incidit interpretem qui melius ipsâ intimam faui huius dulcedinem aut experimento nosset, aut aptis indicijs explicaret. Interrogata, cur ex tot millibus vnicè hunc versiculum amasset præ ceteris, respondebat, Seraphicæ Matris suæ totum illo solatium contineri, singulas huius syllabas turgere quodam arcano succo familiaris in Deum confidentiæ, nec suo palato aliud his tam proprijs verbis sapidius posse occurrere.

Tria potissima erant, de quorum affecutione Virginem dubitare non sinebat cœlitus concessa fiduciæ certitudo. Primum æterna sua Beatitudo, alterum perpetua & numquam interpolanda Dei amicitia, postremum infallibilis ex alto succursus in quibusuis tum necessitatibus tum repentinis periculis. Transeundum per singula.

Quærebat Sponsi pietas occasionem, qua charam Virginem privilegio singulari securam redderet æternæ felicitatis, quapropter semel eam permisit nonnihil concuti pauida formidine circa prædestinationis suæ arcanum omni animæ tremendum. Angebatur innocens Rosa considerans perire se posse, caligabat trepida recogitans iudiciorum Dei abyssum multam; sed non tardavit festinus ad adiuuandum Dominus, quin cor illud contritum & humiliatum opportunè recrearet, blando affatu sic eam alloquens: *Filia, ego neminem condemno, nisi volentem condemnari; igitur ex nunc tranquillo animo esto.* Dicit non potest quàm sublimem, inuisitam, solidam fiduciam hæc paucula cordi Virginis impresserint; plus enim ipso proferendi modo quàm verbis sibi significari intellexit, nec deinceps eam permisit Sponsus in æternæ salutis anchora fixam yllo incertitudinis fluctu turbari.

Doctor Ioannes Castellus aliquando inter alia sciscitabatur ex Virgine, an Prædestinationis suæ certam notitiam cœlitus reuelatam accepisset? rudis iuuentula hæsit ad *prædestinationis* scholasticum vocabulum, cuius propriam vim, ac etymon haud satis assequebatur, nec de illo aliud audierat, quàm significari mysterium impenetrabile, nec temerè ulli mortalium perferendum. Itaq, simplex ac timida negavit tandem, quidpiam sibi innouisse de Prædestinationis subtilissima notione. Verùm ubi prudens examinador per idoneas periphrases dilucidius quid sciscitaretur explicuit, Rosa diffiteri amplius nec debuit nec potuit, superna illustratione admodum tem-

pe-

pestiuè se didicisse, quòd ab æterno electa erat ad coelestem gloriam, idque miro Dei beneficio se tanta certitudine tenere, vt limpidiorem huius reuelationem nequeat desiderare. Manifestiùs hæc patuere in vltimo Rosæ moribundæ decubitu, siquidem felicissimi sui transitûs ad beatam requiem adeo certa erat, vt etiam præscierit ab omni purgatorij mora immunem se fore. Cumque non nemo præsentium dixisset, prægrandem & omnino rarissimam esse hanc gratiam, sat prosperè agi cum animabus hinc migrantibus dum pro residua mortalis vitæ scoria, detergenda ad purgatrices flammâs mittuntur, se sibi id optare animitus: statim Virgo præingentis fiduciæ alacritate se ipsa robustior animosè respondit: ego verò Spôsum habeo qui prægrandia & rara dare potest, neque pusilla aut mediocria dumtaxat per diffidentiam ab illo speranda sunt. Hinc vicinam mortem non aliter ac certam Paradisi iantricem læta aspexit, nam vt primùm Rosæ denunciarunt medici naturam succubuisse morbo, nec aliud restare præter decretorium diem, impauida nihilumque, turbata respondit, oppidò se lætari tam grato nuncio, solum mirari se, cur metuerint citiùs expectanti indicare.

Memorabilius est quòd Rosam dum hortensem suam cellulam incolebat, salutis æternæ securam reddidit. Orabat Virgo, & in mentis excessu vidit circa se vndique solum conspersum rosis. Admiranti vnde ver tam repentinum adflorisset, en conspicuus adfuit paruulus Iesus purissimæ Genitricis innixus vlnis, ac Rosam blandè compellans iussit extemplò sparsas rosas in repandam sinuosæ vestis laciniam colligere. Collegit illa quas potuit, sinuque pleno se stitit Diuino puerulo; Is ex omnibus vnicam sibi in donum poposcit, qua gratanter accepta, subintulit: *hæc Rosa tu es, huius prouidam curam mihi assumma, tu de reliquis vt magis volueris disponito.* Intellexit Virgo

Virgo sapiens quorsum delicati Sponsuli verba tam seria ac pretiosa tenderent, gaudebat se teneri in dextera Salvatoris velut Rosam electam; meminerat de quibus ille promiserat, Ioan. 10. *Non rapiet eas quisquam de manu mea, ego vitam æternam do eis.* Porro præ magnitudine gaudij, quòd se videbat Rosam acceptabilem tutò vernare in pugillo Pariuli, nesciebat nec anxie quærebat, quid de reliquis ipsa Rosæ ageret, nisi quòd breui consilio subitaneum inde sertum confecit, ac cœlesti Infanti reuerenter imposuit, qui Virgini suauissimè affridens data benedictione disparuit. Suspiciata est postmodum, rosæ ceteris quas per terram sparsas viderat, significari pientissimas Virgines per Limam sparsas, quas tandem aliquando colligi oportebat in nouellum sanctæ Catarinæ Senensis Monasterium, vt illic religiosæ professionis nexu votiuo colligatæ Sponsum Virginum casto famulatu coronent, vicissim ab illo gloria, & honore coronandæ. Ità accidit, verum nonnisi post Rosæ obitum. Qua de re infra loco proprio Cap. XXVI.

Pari imperturbabilis certitudinis fruebatur solatio felix Rosa in securitate gratiæ, Diuinæque amicitia: nam præterquàm quòd post quindecennales illas horrédarum obtenebrationum eclýpses (: de quibus supra Cap. XIII.) quotidie in suo ad diuinam vnionem reditu noua illustratione comperiebat sese in Sponsi fauore confirmatam, alijs quoque vicibus Rosæ promissum fuit à Domino nūquam se permissurum quòd vel ad momentum dulci amicitia suæ fœdere excideret. Quidam ex Virginis Confessarijs dono tam inæstimabili tacitus adstupuit. Is erat P. Fr. Petrus de Loaysa Ordinis Prædicatorum, qui cupiens euidentius experiri, quàm firmiter in tantæ promissionis fide sibimet constaret Virgo, in quadam eius Confessione rem puerilem ac minimam coëpit attollere tamquam dubiam, ac sollicitiori dignam examine, visurus quid im-
pro-

prouifus nec fortè inutilis hic terror operaretur in Virgine, quam tanta (:vt nouerat). Diuinæ gratiæ fecuritas poffidebat. Mirabatur cordata Rosa inufitatum rigidi cenforis amphibolon, permifitque illum ad fatietatem loqui. At demum certa fe Dei amicitiam non violaffe, animaduertit quo tenderet illa ambigux explorationis occulta, induftria: vndè præfata veniam modèftè replicuit: iufte moneor cum metu & tremore falutem meã operari; atq; vtinam fic operer vti debeo; peccatrix fum, equidè fateor, & vt fatear hic prouoluor. Verùm; quæ Sponfi mei fumma eft benignitas intra me fentio tam infallibiles fuæ erga me non interruptæ hactenus dignationis fyngraphas, vt faciliùs mihi perfuaferit quiuis me faxum eſſe aut paleã, quàm quòd dulce Numen à me auerſum fit. Mi Pater, neque ſi vaſtos cælorum orbes quis huic telluri compli- cuerit, in eam me ſententiam flectet qua credere poſſim, Dei permiſſu me noxam mortalem commiſſiſſe; ſcio quid ille mihi tametſi indignæ pollicitus fit. Ego in Domino confido, non quòd ita præſeruari merear, ſed quia ille *fidelis eſt in omnibus verbis ſuis*. Adquieuit conſcius veritatis Confellarius, breuiter excuſans, quòd ſola probandi ſpiritus gratia cenforiam hanc diſceptationem excitat.

Eadem vis confidentiæ in Deum à prima ætate Roſam aduerſus quaslibet mortalis vitæ difficultates, pauores, incommoda præualidè obarmarat. Maria de Oliua Roſæ Mater ſingulari complexionis indole tenèbras & ſpectra metuebat, nec facile aut noctu prædibat, ad ſecretiora domûs, aut ad vefperam ſine comite ſeſe vel proprio fidebat horto. Idem pauoris genius Roſam filiam ex materna craſi velut hereditarius inſederat, nec tamen ideo puella orationi dedita ſolitudinem ac loca obſcuriora deuindabat. Accidit quodam vefpere in noctem procliui & magis ymbroſo, quòd Roſa adhuc tenera diutius moraretur in

horto, quò se ad meditandum receperat. Mater filiam quæstura venit, sed comite marito, quia vt dictum est ad nocturnos terrores timidissima erat. Rosa vt vidit eminus vtrumque parentem ad se venire, processit obuias, sed euntem occupauit calitus immissa cogitatio quæ deinceps omnem exarmauit formidinem, docuit fiduciam, infudit securitatem: en (: aiebat intra se) venit per hortum Mater nec more suo trepidat, hoc solo iam impauida quòd maritum suum ad latus præsentem habeat, & ego quæ iugiter & vbique Sponsi mei præsentia munior, ego quæ tam fidelem, sollicitum, fortem comitem non ad latus sed in corde circumfero, timebo in posterum à *timore nocturna* & confidit illa in homine mortali, didicitque ad illius fragilem adstantiam tantisper solitos metus ponere, & non confirmabit me pariter confidentia *in Deo salutaris* *mes*, vt nil vmbrosum deinceps expauescam? tam profunde animo iuuenculæ insedit robusta hæc cogitatio, tam funditus euacuauit congenitam formidandi procliuitatem, vt ex eo momento seipsam mirata sit Rosa, quòd noctu, interdiu, domi, foris, ad nullius periculi, monstri, belluæ pauebat occursum, vnico præsentis Sponsi præsidio animosa.

Nec defuit occasio qua manifestaretur illa heroica virginæ pectoris soliditas inter discrimina ardua ac repentina. Degebat in quodam Indorum pago cum parentibus duodennis filiola, vbi die quadam cum Matre ac fratribus domum rediens in patenti area obuium vidit Taurum ferocissimum, qui elapsus stabulo vinculisque partim ruptis partim raptatis cursu præcipiti illuc ruebat vnde veniebat cum comitibus Rosa. Exanimis subito pauore Mater cum filijs circumspiciebat fugam. Sola Rosa impauido gradu fixa perstitit, Matremque ne fuga periculum iam nimis propinquum irritaret hortata est, vnà promittens, immanem belluam innoxie transituram. Nondum Rosa

(: fixis

(: fixis interim in cœlum oculis) verba fœderat, cum ferox ac torosum animal terrifico mugitu instar rutinis præteruectum procul in alias personas impetum fecit, velut si Rosam eiusue imbellem comitatum ne vidisset quidem. Palpitabant ceteris anhela præcordia etiam post periculum; at Rosa nec mutato leuiter colore monuit sperandum firmitus in adiutorio Altissimi, & maxime tunc, quando periculi vicinitas omne effugium interclusit. Alia vice Limæ cum Matre ac honestissimis Matronis in quadriga reuertebatur à festiua celebris Ecclesiæ statione. Transeundum erat per amplissimum vrbis forum, vbi tunc metu dilapia etiamosi populi multitudo ferocienti Tauro spatium fecerat; confusaque vociferatione & lapidum iactu furiosam bestiam pro voluptate spectaculi sæuius irritabat. Proculu cursuque flexuoso dextrorsum laeuorsum properabat minax animal, cauda rigide arrecta, spumante ore, boatu horrifono, naribus ira fumantibus, arenas calcibus iactabat in aëra, & sicubi in truncum, pannum, aut studiosè obiectum pileolum offenderat, atroci & crebra impactorum cornuum vi infodiebat solo. Denique iam satis omnia terroribus impleuerat Taurus, quando venientem eminus rhedam conspicatus rectà in illam librauit cursum. Expalluerunt quorquor cum Rosa erant fœminæ, profiliere foras quæ citius poterant, spemque salutis in fuga collocabant, ipse auriga circumspexit trepidus qua parte tutius in terram descenderet seseque in pedes conijceret. Sola iterum Rosa oculis in cælum iactis & illic redactis exemit trepidis metum, sicut fugam, velut minimè necessariam, affirmans Taurum vsque ad rhedam neutiquam procursurum, sed via qua veniebat retrocessurum. Dixit & respondit euentus, stupentibus vniuersis non magis Tauri velocem absque nocuimento reditum, quam Virginis animum quouis metu superiorem. At ipsa in summis periculis summè secura oc-

cinebat coelesti Sponso : *non timebo mala quoniam tu me-*
cum es.

Cui tanta inerat Diuinę protectionis fiducia in vitę periculis, utiq; in necessarijs vitę sperandis subsidijs minor esse non potuit. Die quadam in paternis adibus defecit numerosę familię panis, neq; vel tēpus coquēdi supererat vel nummi ad manū erant ut aliunde procuraretur. Nunciatum fuit Rosę vacua esse penuaria, neq; vel crustam reliquam esse ab vltima pistura. Mirabatur Virgo tam celeriter absumi potuisse annonam quam pridie reposuerāt, utique in biduum suffecturam. At iam certior facta penurię, nihilque territa breui labiorum motu visā est rem Deo commendare. Mox ingenti fiducia panariam arcam aperuit, plenamque reperit panibus vltra domū illius morem candidis, azymis, ac saporosis, testante eorumdem figura illic inusitata ac peregrina, hos nequaquam à domestico panificio prodijisse. Alio tempore in eadem domo perneceffarium illis regionibus condimentum mel defuit, eiusque cupa fundo-tenus exhausta arefcebat. Maria de Oliua seu ignara seu immemor penurię bis ter in caueam misit qui de vase omnibus noto mel adferrent; renunciarunt singuli, nonnisi vacuum sese ollam reperisse. Compatiebatur Rosa communi tot capitum necessitati, & secretissimo instinctu iussa sperare optimē de Dei prouidentia dixit matri: si mandas, descendam ego in nomine Domini, visura num quid residui mellis inueniam. Descendit, ipsamque cupam inuenit vsque ad supremum labrum recenti melle plenam. Hæc. *¶* In spectaculo verē mellifluo tota domus attonita, eoque magis, quod nouo prodigio mel coelitus datum integris octo mensibus toti familię sat fuit in vsum quotidianum. Ecquis vidit vñquam, à Rosis suppleri apum officia?

¶ Gasparem Flores patrem Virginis premebat molesta ægritudo corporis, simul marcebat afflictus moerore ani-

mus ob 50. librarum debitum cui præ inopia soluendo non erat. Tristabatur perplexa mater, hinc importunitate creditoris inde necessitatibus domus, & cumprimis ægri mariti sensim impar. Vtriusque angorem vt rescivit filia, clauē qua solebat cordialis in Deum confidentiæ tentauit opulentum æterni Prouisoris gazophylacium; vixq; in Templo preces fuderat, cū inde domum redeuntē adstitit vir planè ignotus at vultu modestè decorus ac voce comis; hic Virginem obiter salutans, simul inuolutum strophio argētum porrexit, iubens illo præsentem necessitatem parentum subleuari; nec aliud moratus illicò abscessit. Videbatur ex pondere & permodico inuolucris tumore parum metalli inesse sudario, at vbi Rosa id domi explicuit, ipsam argentearum librarum, quinquagenam quam Pater debebat reperit, ægrique lectulum cum nummis adiens idētidem repetebat, plurimum Diuinæ bonitati fidendum esse, hanc modò succurrisse medio peropportuno, quantum sufficiat ad amolendam duri creditoris molestiam. Videbantur Gaspari narrari infomnia, donec filia explicato linteolo 50. libras vtī acceperat promptè adnumerauit.

Eiuscemodi peregrinis ac inexpectatis subsidijs pluries egenā domus recreata fuit, ne sanctæ filiæ constans ac robusta in Deum confidentia fraudaretur. Hoc nimirum suæ quondam nouellæ Sponsæ inter paraphernalia & antidōra pollicitus erat cœlestis Lapidā, de quo supra Cap. XI., adeo quòd Gundisalui Quæstoris vxor, quæ Virginis arcana præ alijs nouerat, rem in familiare adagium conuerterit, dicere solita: *numquid iterum empyreus Lapidā tuo monitu excussit loculos?* Quinimò erga locupletissimum hunc Sponsū ea erat Rosæ fiducia, vt ausu liberali Virgo pauperrima frequenter & palam in se receperit prouidere de toto sumptu ad excitandum à fundamentis nouum sanctæ Catarinæ Senensis Monasterium,

dum-

dummodo in diebus suis appelleret quod solū tunc de-
 rat Regiæ permissionis diploma . Verū ex quo in huius
 mentionem incidimus , scorsim Cap. seq. narranda sunt ,
 quæ circa fundandum illud Monasterium Virgini cœlitus
 & promissa & ostensa fuerunt: hic breuiter quod præsentī
 capiti sufficit superestque in coronidem, subnecto & finio .
 Domi Rosa cum deuotis virginibus mira ac seria fiducia
 sērmocinabatur de fundatione prætaçti Monasterij; at Ma-
 ter fastidio impar filiam quasi manifestè insomnijs rerum
 impossibilium delirantem obiurgauit coram omnibus, de-
 sine (inquit:) ineptire fatua, memento non esse plebeie
 sortis, aut patrimonij vulgaris negotium Cœnobija funda-
 re; tu verò eā præfidentia loqueris, ac si in tantæ fabricæ
 sumptuosa impendia tibi in promptu iam essent bis cen-
 ties mille libræ argenti. Humiliter replicuit modesta filia:
 vtiq; si ad mortalem opem, si ad hominum manus respi-
 cerem, faterer vltro impossibilia esse quæ tracto, at scito
 Mater, me altius collocasse fiduciam meam; illum-
 ipsum *in quo omnes thesauri, fidei inssorem habeo,*
 huius liberalitati diffidere mihi iam non
 licet. Successum videbunt hi oculi
 tui, lataberis, imò tu opte ex-
 perimento probabis
 quod dico.



CAPVT XXVI.

Rosæ diuinitus reuelatur effloriturum in vrbe Limana S. Catarina Senensis Cœnobiũ, tempus occulitur.

Iustrioribus Limensis emporij ornamenti demum accessit nobile, spatiosum, elegans Beatæ Catarina Senensis Monasterium, numeroſo ſacrarum Virginum collegio dicatum ſub regulari S. P. Dominici inſtituto. Anno ſalutis MDCXXII. (hoc eſt quinquennio poſt Rosæ beatum ad ſuperos abitum) fundatrice illuſtri & opulenta vidua D. *Lucia Guerra de la Daga* loco ſituq; commodiſſimo ſtetit in Lima celebre hoc Cœnobiũ, & introduc̃to candidi velaminis nouitio Gynæceo cœpere Diuina celebrari. Creuit ſubitis ac prodigioſis augmentis recens Parthenon, ita quòd hodie vltra ducentas numeret Sanctimoniales Sponſo Deo ſub inuiolabilis clauſuræ religioſa cuſtodia militantes. Viget in hoc caſto pietatis Sacratio diurnus & nocturnus Dei cultus, deuota feſtorum pompa, canonicus officiorum ordo, iugis virginei chori psalmodia, ſacræ ſupelleſtilis & Eccleſiæ accuratus nitor, apparatus magnificentia copioſa. Nec ab extimo decore quidquam diſſidet interior exactæ obſeruantia pulchritudo, orationum, mortificationum, exercitiõrum aſſiduitas, perfectionis ſtudio, vniformis morum puritas & ſanctimonia, diſciplinæ rigidus tenor, perque omnes angulos
viva.

viua & prorsus angelica virtutum omnium exemplaria. Porro celeberrimo tot illustrium heroinarum contubernio dignè aptèque respondet augusta nobilissimæ fabricæ amplitudo, fontes, horti, vireta, porticus, dormitoria, peristylia, officinæ, item possessiones, latifundia, seruitia, proventus annui & instructissima totius abundantix œconomia, sic quod inclytum hoc Monasterium intra primam annorum quadragenam tot cœli benedictionibus perpetim irrigatum exemplo, fama, splendore in eum profecerit gradum, quo possit grandioribus præcipuisque totius Europæ Monasterijs æquiparari.

Denique istud est, quod integro ferè ante fundationem decennio toties Rosæ nunc per symbola & figuras, nunc manifestè in propria forma ac typo fuit diuinitus præmonstratum. Istud est, quod Virgo tam securè, ac fidenter, tam crebrò & palam, tam libenter ac liberè dulci suæ patriæ vaticinando promittebat, ea quidem asseuerationis firmitate atque constantia, quasi illud iam constructum ante oculos habuisset. Sola temporis & anni quo construendum erat circumstantia ob altiores Diuinæ Sapientix fines Virginem diu latuit, seròque didicit se illud corporeis oculis non visuram: ceterà complures qui visuri essent digito monstrauit, personas quæ illic Deo famulaturæ essent (ac inter has Matrem propriam) designauit, numerum diffiniuit, locum prædixit, futuræ ibidem fabricæ plantam ac systema in tabella delineauit, primum incruenti sacrificij mystam nominatim expressit, quid multa? primam futurarum Monialium Præfectam (*Priorissam* dicimus) ex vultu agnouit, spiritu suo imbuuit, osculo pacis quodammodo initiauit. At pressius & seriatim currendum per singula.

Dudum expertus prophæta monuit, *intelligentia opus esse in visionibus*. Dan. 10. Hanc verò in negotio de quo agimus Rosæ non defuisse ad assequendum in symbolicis

præuisionibus genuinū ostenti sensum, patebit ex sequē-
tibus. Confederat solitaria in horro domestico colligendis
floribus intenta Virgo, iamque effrondibus rosis gremium
impleuerat, cum arrectis in cœlum oculis, & arcano in-
tus dictante spiritu cœpit non sine deuotis suspirijs iactare
in altum singulas rosas, velut superno eas hortulano com-
mendans. Superuēnit germanus virginis frater, ac foro-
rem innocenti ludo se oblectare nec serium quidquam
subesse autumans accessit familiariter, quidque ageret in-
terrogauit. Illa mysterium celans, hoc (: inquit) quod
vides me agere; perrexitque vt ante iactare in sublime ro-
sas. Germanus nil vltra simplicem iocum & animi oble-
ctamentum suspicans replicuit: spargam & ego rosas in
aëra, & fortē quā tu iaciam altius. Atticuit Virgo, sed
loqui cœpere prodigia, nam ecce quas frater sursum
proiecerat leuissimo delapsu mox reuoluebantur in ter-
ram, ex altera parte quas Rosa in sublime sparserat, hæ-
rebant in aëre, ibidem in conspicuam sanctæ Crucis fi-
guram aptissimè coibant, eidemque cruci à succedenti-
bus rosis decorus per circuitum formabatur limbus.
Mysterij *intelligentia* hîc fratri defuit, non item Rosæ,
quæ postea à conscijs prodigij interrogata, quidnam pu-
tarit hoc aerio rosarum suppendiculo portendi, respondit
candore impauido, his præsignificari futurum apud Li-
menses suos insigne Sanctæ Catarinæ Senensis Monaste-
rium, in hoc quā plurimas præstantis sanctimonix rosas
certatim commigraturas, vt in cruciformem arctioris vi-
tæ regulam coaptatæ è sublimi perfectionis gradu terram
despiciant, ipsisque hic mundus crucifixus sit, & ipsæ
mundo.

Alia vice oranti Rosæ diuinitus ostensum fuit miræ
amœnitatis pratum, vndique liliorum candore ac rosa-
rum purpura (: tametsi sparsum, & sine ordine) variega-
tum. Placebat Virgini bicolor tot vernantium plantula-

rum venustas & gratia, maximè vbi deintus responsū accepit, omnes & singulas vni *Dilecto candido ac rubicundo* feruari in coronam. At displicuit patère spatiosum ac nobile pratum cuilibet Viatori, imò communem, & publicum illic tam iumentorum quàm hominum quaquaversus commeantium frequentari transitum: proinde ferriò metuebat flosculos tam decoros, tam eximias terræ gémulas prætereuntium vestigijs improuidè conculcari. Sed simul timorem exemit superna irradiatio, Rosam erudiens, tempus fore, quo selectum illud germen floridæ propaginis colligatur in vnum Sanctæ Catarinæ Senentis *hortum conclusum*, septoque proprio segregetur à profani seculi commercio, rosas porro lilijque significari puras ac Deo dilectas Limensium Virginum animas, quæ quidem hinc inde per Urbem sine ordine sparsim habitabant, & suo tempore in cœtum claustralem fore congregandas, vbi tutissimæ sint ab omni secularis calcanei protritū, solique æterno Numini fragrent odorem suauitatis, donec inde translatae in Sponsi paradisum eidem nectantur in immarcescibilem gloriæ coronam. Dum his cœlestium decretorum arcanis auidissimè inhiat auscultatque Rosa, videbatur interim suis manibus floridum hoc sertum paulatim connectere, Sponsoque imponere, qui vicissim ostendit illud sibi gratissimum, & intimè charum esse. Rosam ingenti solatio perfudit hæc visio, quòd obliquè per eam intelligeret, suo præcipuè labori ac merito hoc donari à Deo, quòd Lima tali aliquândo sacrarum Virginum asceterio velut monili pretioso erat condecoranda. Et quotiescumque hoc suaue ostentum suis referebat, vnà testabatur florituras in illo Monasterio præclaras Dei famulas, quæ virtutum odore ac sanctitatis fama gloriosè excellant.

P. Magister Fr. Ludouicus de Bilbao Virginis Confessarius tametsi reliquis eius dictis plurimùm deferret, huic

tamen

tamen eiusdem vaticinio scrupulosius addubitabat, eò quòd ad humana respiciens ne quidem è longinquo videre poterat vel minimam verisimilitudinis stricturnam, quaranti moliminis vllum aliquando successum promitteret. Quin potiùs omnis vnde quaque tum ratio tum regiminis potestas videbatur inexorabiliter obstitura, præsertim cum pro conditione temporis abundè sat Monasteriorum esset in Ciuitate nouella, cuius tunc ætas primam annorum centuriam nondum expleuerat, plurimùmque adhuc distabat ab ea qua hodie tumet amplitudinis vastitate. Animaduertit Rosa Patrem incredulum de euentu ambigere, ac grandi fiducia sic eundem affata est: quid hæstas mi Pater! te viuo ac vidente stabit in Vrbe hac illud quod sepe dixi B. Catarinæ Senensis Monasterium. Pone, suppone vt volueris, obstitura, vetantium imperia, adde his in obnixum vniuersam hanc nostram Americam, imò totum potiùs terrarum orbem, adiunge per hypothesim totius orci vires, artes, potentiam, denique finge animo quidquid obstaculorum potes concipere, attamen te superstitè, te viuo & oculato teste Monasterium quod dixi exstructur, habitabitur, florebit. Locum tibi designaui, illic erit. Et te quidem aeterno suo decreto selegit Deus, qui primus ibidem Sacrosanciam litabis hostiam in solemnitate, qua primus illic fabricandæ Ecclesiæ lapis ritu celeberrimo collocabitur in fundamentis. Tunc memineris hæc modò fuisse tibi prædicta à vili muliercula. Totum euénit prout Virgo prædixerat, nam anno 1622. accedens ad eam functionem Ludouicus inter solemnia sub missa recordatus est vaticinij, peractoque sacrificio palam adstâtibus enarrauit, quàm asseueranter, clarè, disertè ante complures annos Rosa superstitès quod illa die locoq; gesserat, prænunciarit.

Aliquando coram domesticis inter familiaria colloquia, dum Beatæ Catarinæ Senensis tractabantur glorio-

sæ prerogativæ, & iusta encomia, sensim ad futurum sub
 eius tutelari nomine Monasterium devolutus est sermo.
 Hic Virgo primùm ingenuè fassa ac protestata est, se qui-
 dem illud mortalibus oculis minimè conspecturam, attam-
 en quotquot illic adstabant reliqui certissimè illius in-
 tuitu, præsentia, solatio fruituros. Res cum risu excepta
 ab omnibus, nec deerant quibus Rosa videretur præ ni-
 mio in Seraphicam Matrem studio insanire; maximè post-
 quàm is qui in se receperat exorare Matriti facultates
 Regias novæ foundationi necessarias, Liniam vacuus re-
 diit, ne spem quidem permissionis unquam obtinendæ se-
 cum apportans. Terruissent hæc quamcumque aliam, aut
 saltim eripuissent loquēdi fiduciam, sed Rosam nec terre-
 ri, nec timidiusculè filere permittebat ipsa supernæ reu-
 lationis firmissima certitudo, adeo ut quod verbis idoneis
 adstruere satis non poterat, expressis in assulâ notis archi-
 tectonicis conaretur euidētius adumbrare. Vnde arrepta
 coram incredulis tabella & cera, futuri Monasterij extē-
 poraneum formavit archetypon, ea tum peritia tum secu-
 ritate, ut spectantes rapuerit in stuporem. Describebat
 breui linearum ductu murorum ambitum, qui sub prima
 futuri Cœnobij exordia minus spatij complexurus erat,
 notabat angulos, flexas, confines, quo loco templum, quo
 situ porta, officinæ, porticus, dormitoria forent dispen-
 da, nec aliud dolebat quàm quòd ceteri non æquè ut ipsa
 totam Monasterij imaginem in viuo radio præsentem ha-
 bebant.

Indignabatur præ ceteris Rosæ Mater, nec æquo ferebat
 animo tam crebram, & seriam domi forisque mentionem
 fieri nouelli Cœnobij, quod filia tam assertè & imperter-
 ritè notis atque ignotis præfigurabat. Nullus apparebat
 negotij tam ardui procurator, nemo fundator, nemo fau-
 tor aut suasor, nullibi auspex vel patronus; abhorrere om-
 nes tanquàm rem humanitatis impossibilem, taxare Virgi-
 nem

nem tamquàm aut chymæris delusam aut affectui pertinaciter indulgentem. Ipsemet Doctor Ioannes de Castillo (: quem Rosa ob notam viri sanctimoniam tanti faciebat) conabatur Virginem ab hac persuasione diuertere, quòd opinaretur difficultates planè insuperabiles fore. Idem Quæstoris Gundisalui, idem Confessoriorum erat iudicium. Hinc Mater anxiosa, sibi & familiæ probrum metuens arguebat filiam, quòd contra tot prudentum arbitria plus sola ipsa sapere velit quàm oporteat, concordiam omnium peritorum sententiæ obstinatè refragandum non esse, Rosam ceu vanam prophetidem cum dedecore propediem vulgi fabulam fore, denique rationi non contumaciæ in his parendum esse, promissum Monasterium citius in Vtopia aut spatijs imaginarijs quàm Limæ constitutum. At Rosa tot contradictionibus alacrior voce humili sed læta replicuit: eya Mater dulcissima, hinc demum cessent verborum pugnae, tu magno tuo emolumento experieris quàm durum sit contra stimulum calcitrare, in Sanctæ Catarinæ Limensi Monasterio quod prædico tu-ipsa inter primas candidum Sanctimonialium indues habitum, illic tu velaberis, ibi solemniter profiteberis, ibi Religiosa vitæ reliquum consummabis. His auditis adeo exarsit Mater irritari se putans, ut filiam à cōspectu suo abegerit, altum vociferans, egone Monialis ero! ego ad quam regularis vitæ ac statûs nulla umquam cogitatio aditum inuenit, ego necessariæ dotis inops, cātandi ac psallendi ignara, curis secularibus innutrita, spiritu vacua, clausuræ impatiens, onusta prolibus, ego in claustrum me abdam? hac ætate velabor, profitebor religionem seueram, arctam, difficilem? apage, sat nugarum est, ad Calendas græcas hæc impleta videbimus. Initium anni MDC. XXIX. non vidit Calendas græcas, vidit tamen Mariam de Oliua Sanctimoniale in nouello Sanctæ Catarinæ Senensis Monasterio, vbi post mariti obitum

sexa-

sexagenaria re igitur S. P. Dominici filiabus deuotissimè aggregata, cum sacra Ordinis veste nomen Sororis *Mariae de S. Maria* assumpsit, exactoque probationis anno sollemnia vota emisit, ac plena dierum sancto sine quieuit. Carebat inops vidua dote legitima, quæ quater mille libris argenti in singulas ibidem velandas erat diffinita. Verùm ne Mariæ obstaret egestas prouiderat omniscuram Numinis, inspirans Fundatrici, vt in ipso fundationis programme reseruarentur loca nonnulla gratuita receptionis digniorum sed inopum personarum, eoq; priuilegio gauisa est Rosæ mater.

Superest de ipsamet Cœnobij Fundatrice ac prima eiusdem Præfecta memorabile ac luculentum Rosæ vaticinium. Illustri Matronæ *Isabellæ de Mexia* domi famula erat *Mariana* nomine, cui grauitè egrotati Rosæ (vt pote illis in ædibus pene domestica) more suo ex charitate ministrabat. Ea occasione honestæ foeminæ tum *Isabellam* tum ægram iauisuræ frequētes accedebant. Die quadam inter alias adfuit prænobilis nec virtute minùs quàm parentela & opibus clara *D. Lucia Guerra de la Daga*. Hæc Rosam (: de qua memoranda audierat) illic infirmæ Marianæ seruitio piè districtam conspicata, eidem cœpit deuotiùs affici, & captata affandi occasione, post mutuos vltro citroque vrbanæ comitatis ritùs impensè Virginem rogauit, sui meminisse vt velit in quotidianis ad Deum precibus sanctisque exercitijs, Rosæ iam intus moneri se sentiens, affectu reciproco Matronam vinxit, offerendo modicum id quod posset, illaque fortiùs instante promisit, se in singulas hebdomadas peculialiter certum diem seleturam, quo ipsam Deo commendaret. Lucia hoc solatio diues ac domum reuersa quiescere non potuit, dum Rosam planè iam suam denuo coueniret. Venit cum prætextu commendandi maritum & filiolum, nàm Virginis apud Deum suffragio tunc forsitan magis indigebant.

Rosæ,

Rosa, velut si Luciae cor penitiùs inspexisset, eamdem familiaritiùs quàm pridie cõplexa, nil de marito nil de filio-
la filijsue tunc respondit, Matronam verò nouo sibi benefi-
cio implicuit, ipsamque tandem nõ in lucrum vnica per
quot-hebdomades diei, sed plenè in omnium suorum
exercitiorum amicam communionem & participium ar-
cano Dei impulsu stimulata admisit. Necdum sat capie-
bat ipsamet, vnde aut cur ita ageret, donec p̃ster morem
oculis à terra in vultum Luciae attentissimè coniectis cœ-
pit exultare spiritù, suffundi colore inusitatae lætitiæ, pal-
pitare calidis præcordijs, ac demum hilaritate modestis-
sima Luciam deosculans, *Euge inquit, Mater, ingenti suo
operi te Deus reseruant.* Idque crebriùs liquenti gaudio
replicans simul decenti osculo attonitam minimèque re-
pugnantem dissuauiebat.

Dici non potest ex Virginis spiritu quos quantosque
mox spiritùs hauserit felix Matrona: dirigit, sensitque
Rosæ tum affatu tum afflatu mutari se medullis, serpe-
bant dulciter per omnes animæ suæ venas ignotæ flam-
mulæ, cor in varias deliberationes repente dilatatum eri-
gebatur totum ad cœlestia, quasi pulsu citatiori vocife-
rans: *Domine quid me vis facere?* Sic affecta domum re-
diit, per viam sic Deum alloquens: Domine, si ex tuo
æterno placito tuique nominis gloria est, quòd ego à se-
culari isthoc ad Religiosum aliquando statum transeam,
perge operari in me quòd mirabiliter cœpisti, en toto
cordis affectu meipsam tibi offero, vnà cum prolibus &
vniuersa mea substantia; tuum erit dimouere obstacula
quibus me tam ineluctabiliter nosci implicitam. Exinde
in mulieris animum velut connexo agmine immigrarunt
simul Religiosi statùs efficax desiderium, simul spes viuaci-
ssima, simul indubia certitudo pertingendi ad hanc me-
tam, euadendi retinacula, perrumpendi innumeros obi-
ces quos sola Diuina manus poterat dimouere, Nondum
tunc

tunc Lucia trigefimum ætatis annum excefferat, superstes erat maritus in plurimos (vtì videbatur) annos victurus, circumstabat matrem soboles numerosa, quatuor nempe filij & vna filiola, premebat magnarum opum, vasta œconomia, nec tamen hæc religiosæ vocationis certitudinem in animo Luciae seu conuellere potuerunt seu delibare, adeo quòd de sanctioris propositi executione cum sic tam securo tractare solebat, ac si dispositis omnibus de proximo velum sibi imponendum exspectaret.

Accidit interea, R.P. *Ioannem de Villalobos*, qui tunc Societatis Iesu Nouitiatui Limensi Rector præerat, ad ædes D. *Isabella de Mexia* diuertere, vbi in Rosæ colloquium incidens, postquàm de certitudine fururi Monasterij Beatæ Catarinæ Senensis varius vtrimque alternârat sermo, didicit à Virgine, se illuc pridie locutam esse cum *Lucia de la Daga* annis quidem iuvene, at maturitate indolis graui; de ea nunc plura se nolle dicere. Intellexit vir religiosus ac prudens quorsum Rosâ tunc loquendo tum reliqua subticendo alluderet, tacuit tamen, donec post Rosæ obitum Luciam pro more Sacramentali confessione, animam expiatura accederet. Hic Matrona Confessario detexit, se magni ac perardui moliminis opus animo versare, foundationem noui Monasterij sub Sanctæ Catarinæ Senensis tutela ac nomine, huc se impelli diuinis stimulis, quibus omnino parendum sit; huc se vires, opes, cogitationes omnes conuersuram. Vicissim Confessarius illo temporis puncto memor verborum quæ pridem à Rosâ audierat, Luciam edocuit, illud-ipsam esse, quod Virgo Matronæ promiserat, quando eidem prædicebat, magno cuidam operi ipsam à Deo reseruari. Proinde non diffideret vaticinio tantæ Virginis: rem tam arduam validissimis obstaculis, remoris, ac difficultatibus haud castrituram, verum-tamen in ipso tempestatum summo fu-

rore ac motu tranquillissimè sperandum fore in superno auxilio quod Rosa iam Sponso immortalī conregnans facillimè sit exoratura.

Ita fuit: nam Luciae maritum, paulò post & proles omnes ex ordine Deus ab hac luce euocauit, obstacula nouae foundationis vndeque innumera, & potentissima sustulit, duos repugnantium animos ad fauorem pij operis flexit: supererat Luciae nobilissima parentela, quae viduam generis, ætatis, opumque intuitu ad secundas nuptias ita vrgebat, vt penè adigeret. Verùm ipsa Rosæ prædictionis memor, & consilij tenax restitit, vicit, triumphauit, rebusque ex voto imò supra votum feliciter compositis nouo Sanctæ Catarinæ Senensis Monasterio auspiciando, struendo, dotando amplissimas suas facultates, denique & se ipsam dedit, & cum sacro velo nomen *Sororis Lucie de Sanctissima Trinitate* assumens prima nouelli sui Asceterij Præfecturam gessit, ac Religionis spiritum, quem ab osculo Rosæ pridem conceperat, hortatu, cura, exemplo mirificè in subditas Moniales propagauit, ac demum sanctimoniae fama celebris ibidem extremum clausit diem. Hunc successum habuit Rosæ prædictio, vnde factum est, quòd Sanctæ Catarinæ Senensis Monasterium Linæ ex euentu apud consciam plebem sæpissimè Rosæ Monasterium (: hoc est diu ante vaticinio Rosæ prænunciatum) promiscuè amet appellari.



C A P V T XXVII.

Rosæ alia complura Deo reuelante arcana pateſiunt.

IDem(:de quo paulò ante)R.P.*Villalobos*Societatis Ieſu iurata fide teſtatus eſt, ſuo ſe experimento ſpiritum propheticum deprehendiſſe in Virgine. Petierat à Roſa precum ſuffragium pro felici exitu occulti negotij, ſed ardui, quodque vt ſileretur à ceteris primus ſilebat ipſe. At Roſa (: quod numquam ſolita erat) in loquentis vultum oculis pauliſper defixis, velut ſi illic tamquam in aperto codice legiſſet arcanum, verecundè ſubriſit, ac taliter reſpondit Patri, quòd is haud obſcurè collegerit, illo momento cœlitus innotuiſſe Virgini totam ſecretiſſimi negotij ſeriem; vnde ſtupore attonitus ad P.*Antonium de la Vega Loaiſa* eiufdem Societatis Virum integerrimum, rem detulit, qui R.P. Philippo de Tapia Callaoenſis Collegij Reſtori ſimillimum cum Virgine accidiſſe palam aſſeuerauit.

Filia Quæſtoris Gundifaſui *Michaela de la Maſſa* ſecretam quamdam cogitationem verſabat animo, quam nullo mortalium communicarat, neque communicare decreuerat. Huic Roſa familiariter ſe applicuit, totamque illam cogitationem velut ex pugillaribus accuratè recitauit, ac ſaluberrimi documenti aphoriſmos miranti præſcripſit.

Maria de Meſſa Piſtoris *Medori Angelini* coniux cum ſolo marito nemine conſcio tractârat de vtriuſque profeſſione in Hiſpanias, deque neceſſaria pecuniarum quantitate.

titate ad vitam illic honestè & commodè sustentandam. Inde Rosam adiit collocutura de alijs, quæ sibi tunc pressius instabant. Virgo sermone obiter deflexo etiam ad id, quod latere putabatur, ita respondit, ac si de eo pariter fuisset interrogata; nempe approbavit proficiscendi consilium, commemoravit summam pecuniariam, quam foemina cum marito in reliquæ vitæ sustentaculum pari arbitratu constituerant, dixitque hanc ambobus (eò quòd prole carerent) sat fore; Mirata est mulier, fassa plus à Virgine dici non potuisse, si ipsa amborum secreto consilio tertia adsedisset. Longè mirabilius videbatur F. Ioâni Miguel Ordinis Sancti Dominici Religioso, cum è longinqua peregrinatione Limam reuersus, atque in D. Hieronymi Sacello Virgini seorsim colloquens, ab ea seriatim, & exactè sibi narrari audiuit quæ Fratri procul in aliena regione acciderant, nec humanitus inde potuerant in Rosæ notitiam peruenire; quin & abditissimas suæmet conscientiae latebras Virgini patuisse euidenter agnouit.

In templo sancti Dominici Rosa cum Matre honestisq; foeminis substiterat, Deo precibus commendatura extremum agonem *Maria de Vera*, quæ in ædibus *Didaci de Requena* Argentarij decumbens vltimam vitæ horam expectabat. Superuénit triste nuncium infirmam expirasse. Territæ mulieres dolenter respexere in Rosam, hæc in Cælum; at subito ad circumstantes reductis oculis, non plangamus (inquit) nam amica nostra mortua non est, viuit *Maria de Vera*, tantum oremus Deum, vt conualescat. Vixit, conualuit, sed alio Rosæ miraculo, de quo in Mantissa.

Cuidam Religioso Societatis Iesu, viro planè Apostolico summisq; virtutibus obornato infederat (nescitur unde) firma, tenax, & immobilis persuasio, illo se anno (qui erat 1615.) certissimè ex hac vita migraturum; cupiebat sanè dissolui, & esse cum Christo, vnde captata occasio-

ne dum semel Quæstoris coniugi loquebatur adstante Rosa, vtriusque orationibus humiliter & enixè commendabat suum ab hac vita transitum, velut ante proximi anni Calendas indubiè futurum; exhorruit Gundisalui vxor, at Rosa leniter subridens, nequaquam (: ait) mi Pater hic annus te nobis eripiet, ita tibi secura spondeo. Ille ex aduerso contendebat rem fore certissimam, nec aliud sibi accidere posse felicius, quàm si paulò post celebratum Missæ sacrificium iuberetur spiritum suo reddere Creatori, id vnum se ardentè optare, imò & sperare. Inualuit sensim apud optimum Patrem instantis sui termini concepta opinio, vt à Collegio ad Nouitiatum, seu Tyronum domicilium migrans non focijs tantum, sed ipsi quoque arboribus, muris, tectis valedixerit, velut domum priorem numquam reuisurus. Cruciabant hæc piâ Gundisalui coniugem, quæ tantum suæ conscientiæ moderatorem dolebat præmaturè amittere, proinde in Rosam, quotidie anxia respiciens quærebat millies, verane sint quæ illa prædixerat de Confessario suo diutius superuiçturo. Vicissim millies replicuit Virgo, & Matronam iussit securam esse. Nihilominus hæc trepidabat, quoties Missæ sui Confessarij intererat, metuens ne ille sui desiderij compos illâmet hora peracto sacrificio abiret è viujs. Denique in sacratissimo Diuini Natalis peruigilio dum Matrona confessura Patrem adibat, per ipsam Rosa eidem significari iussit, deponeret iam tandem inanissimam vicini sui obitus persuasionem, sciretque se grandioribus Dei obsequijs reservari non moriturum prius quàm foris cõplures animas operosa conuersione in viam salutis adduxerit, interque illas peculiariter eminere quinque præcipuas suo Apostolatu dignas, & verò Numini acquirendas. Hoc Rosa centies timidæ Quæstoris coniugi ad solatium occantârat, hoc ipse demum euentus plenè comprobauit, nam & Pater post Rosam annis nouem superuixit,

uixit, & in conuersione perditorum hominum, fructus quos illa prædixerat admirabiles reportauit, utpote qui ex viris sui instituti primus adiit montana, quibus hodie nomen *Sancta Crux* de la Sierra, ubi plurimas Dæmoni animas eripuit, ac demum Limæ anno MDCXXVI. sancto fine quieuit.

P. Fr. *Bartholomæus Martinez* Ordinis Prædicatorum Limensis Coenobij sanctæ Mariæ Magdalena Prior, & Rosæ Confessarius euentu ambiguo luctabatur cum morbo grauissimo, & extremè periculoso, iamque corporis cura ferè deposita Medicis suadentibus accelerabantur vltima migrantis animæ remedia. Inuisit ægrum P. M. Fr. *Ioannes de Lorenzana*, conceptoque repentinæ fiduciæ instinctu iussit infirmum bene sperare, eò quòd illo momento in Ecclesia viderat coram S. Hostiæ tabernaculo pro salute ægri luculentum ardere cereum, Rosam intelligens, quam illic ardentissimas fundere preces eminus obseruauerat. Vix verba finierat, cum superueniens Sacrista F. *Ioannes Fernandez* ait, à Rosa in Templo coram Sanctissimo Sacramento geniculatâ illuc se missum, ut Bartholomæum certum faceret, ex illa ægritudine quantumcumque iam cōplorata neutiquam sibi mortem imminere, bono proinde animo esset, valetudinem citiùs quàm sperari poterat redituram, eò quòd priùs ipsum oporteat Diuinæ gloriæ in quodam singulari ministerio strenuè famulari. Bartholomæus, cui Virginis anima intimè perspecta erat, nil hæsitans fidem dictis adhibuit, eadem hora metum, & morbum abiecit.

Magister Fr. *Ludovicus de Bilbao* itidem per annos 14. Virginis Confessarius sopitis quas extinctas crediderat febribus timere sibi desierat, cum velut ex insidijs morbus redijt multò quàm ante violentior, ac reciduum ad extrema reduxit pericula. Iam perplexi hærebant Medici, & pharmaca adhibere destiterant, iam æger (cui natura

tura vocem dederat sonoram, & liquidam) præ angustia obstruisti pectoris, viriumque languore vix quæ intelligerentur proferre poterat, nihilominus qua licuit vocis tenuitate ac nutibus mandauit indicari Rosæ discrimen suum, quidque ipsa de morbi huius successu, & exitu sentiret, sibi liberrimè renunciare iussit, vt si moriendum sit continuò præparare se possit ad momentum, à quo pendet æternitas. Ceterà Virginem obsecrabat, ne in hoc ancipiti se destitueret, aut quidquam salutis suæ congruum dissimularet, hoc si vllum aliud dicendæ veritatis tempus esse, nunc vel maximè ab ea se filialis beneuolentiæ sancta obsequia exspectare. Virgo tametsi spiritualis sui Patris angoribus condolebat, nihil tamen periculi commemoratione exterrita paucis at vultu alacri respondit: ad ferium illud vltimæ respirationis momētum omni annisu, cura, sollicitudine se parare nunquam intempestiuum, semper laudabile est ac salutare. Verùm tamen infirmitas ista non est ad mortem, conualescet infirmus, & in proximo Sanctissimi Rosarij triumphali festo coram vniuerso populo disertè è suggestu perorabit. Interim mittam illi medicum meum, hunc ad lectuli caput iugiter sub oculis habeat, nec de recuperanda valetudine diffidat. Misit deinde Patri quam vnicè habebat in delicijs breuem paruuli Iesv iconem decenter vestitam, suum (vti aiebat) medicum, quem deinde à conualecente repetijt, nuncians absq; hoc sibi nimium se solitariam videri. Credidit Rosæ vaticinio Ludouicus, Medicum deuotè coluit, vires omnium admiratione integerrimè recuperauit. Vnicum supererat in quo plurimum hæsitabat, nimirum haud videns quomodo sibi obuenire iam posset cōcionandi munus in propinqua Sanctissimi Rosarij solemnitate, quandoquidem pro illo anno hæ vices non suæ erant, sed sui Prouincialis M. Fr. *Gabrielis de Zarate*, nam huic per sortem (: vt ibi moris est) vno mense ante hoc sermocinan-

di onus obtigerat. Nihilominus & hoc in Ludouico impleri debuit, siquidem Prouincialis paulò ante festum ægritudine correptus prædicare non potuit, ignarusque vaticinij sermonem habendum Ludouico demandauit.

Limæ in sancti Dominici Cœnobio *Ioannes de Soto* Religionis habitum impetrarat, sed morbum comitalem cui obnoxius erat, silentio prefferat. In probationis anno fraus deprehensa *Alphonsum Velasquez* cœnobiarcham permouit, vt de Patrum cōsilio clam statuerit inutilem Nouitium honestè ad seculum remittere. Iam decreta erat executioni dies, & Nouitiorum Magistro *Petro de Loaysa* iniuncta dimissio, neq; humanitus quidquam horum Rosæ innotuisse poterat. Adfuit tamen pia Virgo primo diluculo, & per Fr. *Blasium Martinez* Sacristam rogauit vnà cum Priore Magistrum Nouitiorum ad se in Templum descendere, priùsquàm opus conceptum exsequeretur. Venère ambo, mirati quid Virgo hora tam insolita ac præmatura sibi vellet. Respondit illa, se occurrisse supplicaturam pro Nouitio iam iam exuendo, simulque rogauit decretum expulsionis rescindi. Substomachans ad hæc Patrum vnus replicuit: nescis Rosa quàm malè hoc intercessionis beneficium colloques, at scito iuuenem pro quo rogas, emittendæ professioni prorsus in idoneum esse. Aequanimiter hanc repulsæ asperitatem tulit mitissima Rosa, attamen subiunxit: Videbitur decretum Altissimi diuersum esse, vestroque fortius; nam Nouitius ille ad solemnem Professionem ritè pertinet, & Ordinem Pietatis ac Religionis exemplo insigniter illustrabit. Totum euénit vt Virgo prædixerat.

Tres germanæ sorores, *Philippa*, *Catarina*, & *Francisca de Montoya* Rosæ conuersatione & exemplo erudiebantur ad pietatem. Ex his *Philippa* & *Catarina* desiderabant spreto seculo Religiosum sancti Dominici habitum ac tertij Ordinis amplecti institutum. Sola *Fran-*

cisca

cisca paulò tenaciùs adhærescebat mundo; totisque præcordijs abhorrebat à seculi diuortio: displicebat religiosa vestis pannosa simplicitas, oblectabat nitidioris cultûs fimbriata ostentatio, tenebat venusti capillitij fœmineus amor. Coarguebat interdum Rosa nimium Franciscæ incrispanda cæsarie studium, ac dicebat: hos tuos, quos rãto nunc affectu colis capillos ego recisos aliquando visura sum, ne dubites. Demum prædixit apertiùs, Franciscam (& si tunc repugnantem) vnà cum germana sorore Caterina tertij Ordinis sancti Dominici Monialem fore, at Philippam quæ tunc eiusdem instituti flagrabat desiderio in oblatas tandem honestas nuptias consensuram. Respondit successus vaticinio, nam Philippæ ardens Religiosi status desiderium cunctis adstupentibus migravit in Franciscam, illa maritum, hæc sancti Dominici habitum vnà cum Caterina Sorore obtinuit, capillos, pompam, seculum feruore ac lætitia inenarrabili eiurauit.

Aliud nobile par Virginum, *Maria & Ioanna Vriado de Bustamante*, quamquam intima ac familiari Rosæ amicitia gauderent, nil minùs quàm de amplectendo Religionis statu cogitabant. Attamen cum his die quadam in domestico horto coambulans Rosa impetu superno ac repentino sic vtramque affata est: scitote bonæ Sorores, vos ambas vnà cum Auia vestra *Ludouica* Sanctimoniales fore in Monasterio quod dicimus SS. *Trinitatis*, & ego diem illum victura, ac visura sum. His tertia supererat germana Soror *Francisca* nomine quàm è contra tantum accenderat desiderium subeundi tertium Ordinem sancti Dominici, vt vix aliud cogitare libuerit, aut loqui. Communicato demum cum Rosa consilio responsum ab ea retulit, quod postmodum euentus comprobauit, nimirum ipsam nec sancti Dominici nec alterius Ordinis Monialem sed legitimi mariti coniugem fore: Ità accidit; nam anno MDCXV. nempe biennio ante Rosæ obitum binæ Soror-

Sorores Maria & Ioanna vnà cum Auia in Sanctissimæ Trinitatis Monasterio velatæ sunt, ac prior *Maria de la O*, altera *Ioanna à Iesu*, vltima *Ludouice à Cruce* nomen assumpsit. Francisca nupsit *Hieronymo de Villalobos*.

Ioanni de la Raya & Maria Euphemia de Parejas vnicus adolefcebat filius *Rodericus*, quem ipsi à teneris destinârunt sacræ militiæ Societatis Iesu tempore suo adscribendum. Creuit puer, at nullo religiosæ inclinationis indicio. Applicatus scholis manifestiùs tam Ecclesiasticum statum quàm litteraria quæuis exercitia abhorere visus est quidquid ex aduerso vterque parens seu palam cuperet, seu operosiùs suaderet. Afflicta mater delitescens in hortensi cellula Rosam adiit, dolorem exposuit, precum subsidia enixè flagitauit. Rosa, vt erat accelerandis mœstorum solatijs promptissima, statim quidquid suæ apud Deum orationes valerent Euphemie addixit. Mox aliquantulum cœlos intuens, postque breuem morulam in se reflexa, nil (: inquit) ambigito, Rodericus tuus post menses admodum paucos Religiosam induet togam, sed non illam quam tu vnicè volebas Societatis Iesu. Sauciarunt postrema hæc verba Euphemiam, vnde replicuit: ah quàm medullitus mecum tristabitur maritus meus, vt audierit filium nostrum illi Societati non fore aggregandum. Respondit blandè commiserans Virgo: quin tu potiùs adora Diuinam prouidentiam quæ tibi hæc tempestiuè constare voluit, vt sensim maritum ad iustam æquanimitatem disponas, ne frustra abstrigillet spiritui vbi vult spiraturo. Sinite in Roderico operari Diuinam potiùs voluntatem quàm vestram; & quàm primum filius tuus regulare institutum amplexus fuerit, vide me moneas, & vt Altissimo grates referam, pro beneficio quo nos affecit. Tres circiter abiit menses quando Rodericus inflammari se sensit impetuoso ac subito Religiosæ vitæ desiderio, iamque vltro parentes,

quandoquidem ita ipsis collibitum erat, incunctanter
 serioque agerent cum Patribus de sua in inclytam eorum
 Societatem admissione. Resciuit hoc Rosa, iterumque,
 dixit Euphemiae: certo certius Religiosum videbis filium
 tuum, atæquè certum est, ipsum Societati Iesu adscri-
 ptum non iri, rudior Seraphici Francisci tunica illum ex-
 pectat. Nil minùs tunc aut cogitabat Rodericus, aut op-
 tabat cum marito Euphemia. Quin potius cum primo-
 rimoribus Societatis iam pertractata, conclusa, parata,
 erant omnia, solè consensuri P. Prouincialis expectabā-
 tur litteræ, sed (: Numine sic disponente) tardarunt illæ,
 atque interea Rodericus clam parentibus Cœnobium
 Sancti Francisci adiit habitum petijt, admissionem obti-
 nuit, monitisque & demum flexis ad consensum parenti-
 bus octiduo post solemni ritu in pauperem Fratrum Mi-
 norum Ordinem adlectus est. Mater de Nouitij constan-
 tia mœstè anxieque subdubitans, quod delicatum puerū
 tantis metuebat austeritatibus vix parem fore, denuò Ro-
 sam adiit, sollicita, pusillanimis, inquieta, præsertim ex
 quo rescuerat filium inter Quadragesimales rigores nō
 nihil infirmari. Sed Virgo dissidentiam mulieris leniter
 perstringens, tam modicam (ait) fidem habes in
 auxilio Reginæ Sanctissimi Rosarij, cui nouitium Roderi-
 cum commendaui? scito illum in Ordine suo perseuera-
 turum, & suppone te illum iam videre professum. Quid

multa? Rodericus mox vt lineam subuculam cum la-
 nea commutauit, conualuit, exacto probationis anno
 solemnia vota emisit, diuque in Seraphica Religione pius
 & exemplaris Sacerdos superuixit.

Nobilis Hispani Leonardi de Roya mancipium Maria
 Perez cum hero clam viuebat in statu damnabili. Com-
 puncta demum, suæque animæ salubrius prospectura,
 cum modum non videret quo aut periculoso contuber-
 nio se explicaret, aut seruili conditione pressa ingenui

viri legitimas assequeretur nuptias, Rosæ calamitatem suam fidenter aperuit. Compassa Virgo ancillam bene de Dei misericordia sperare iussit, fore quod Leonardus ritè ipsam vxorem duceret. Credidit astricta mulier in spem contra spem, felicique experimento comperit, Rosam non ex vano prompsisse solatium.

Maria de Mesta Medori Angelini Pictoris coniugi duæ simul ancillæ Aethyopiæ domo aufugerant, earumque altera Antonia nomine etiam claues heræ tunc perneceffarias alportarat. Quæstæ est Virgini iacturam suam, quodque domum redieus aut arcam vestiariam cuiusclauis subducta erat vi effringere, aut in diem posterum aliunde necessariam vestem mutuò petere cogeatur. At subitò respondit Rosa: neutrum facies, nam reuersa ad limen tui domicilij priusquàm de sella prodeas, occurrerit tibi in ostio, qui Antoniam à fuga sponte in ædes rediisse nunciabit; alteram fugitiuam scito-cras ad te reducendam. Abijt *Mesta*, & in domus suæ limine, antequam gestatoria sella exscenderet maritum, in valuis obuium habuit nunciantem rediisse cum clauibus Antoniam. Vicissim marito reposuit *Mesta*: & crastinus dies alteram nobis restituet profugam. Vtrumque contextu Rosa prædixerat, vtrumque *Mesta* postridie impletum vidit.

Decreuerat Peruanæ Regni Excellentissimus Prorex Gundisaluum de la Masla Quæstorem implicare procul à Lima functioni honorificæ at perarduæ, quæque virum exigebat summæ tum experientiæ tum fidei ac integritatis. Misit igitur qui Gundisalui consensum elicerent Regiæ (: quam vocant) *Audientia* Senatorem, & Fiscî procuratorem, quibus honoris & auctoritatis gratia proprium suum adiunxit Confessarium. Quæstor legationis dignitate percussus, simulque tum seriam Proregis mentem tum negotij difficultatem probè intelligens, spatium quasi deliberaturus petijt, maximè quod tunc ob classẽ

propediem inde Hispanias petituram expediēdis infinitis litteris suisq; officij ratiocinijs distringebatur ne domo, vel ad vnum diem abesse posset: reuerā autem hac prætexebat, vt per longioris moræ inducias effugeret ipsum periculosa plenum opus alexæ. Profecta classe tres supradicti non iunctim sed singuli ad Gundisaluū redire, ac pluries quidem, premebat enim negotij grāuitas & Regis obsequium. Tandem 15. Aprilis quasi peremptoriē monitus, postridie hora præfixa sese à Prorege ad colloquium in palatio exspectari, facile agnouit iam nullum superesse exosa profectiois effugium, vnde illomet vesperē post coenam cogitabūdu ac tristis angorem sui animi solis coniugi Rosæque aperuit. Vxor metu dispalluit, sed neutiquam Rosa, quæ die postero ab Oratorio veniēs, Quæstorem iam iam domo exiturum ac Proregi sese stitutum vultu alacri affata est: vade inquit, nec formides, lætior ad nos redibis è palatio, quā hinc exieris; & ne superfluis te morer, securus esto, arduum illud negotium quod subuereris, in alium transferetur, tu planè immunis eris. Dubitanti Quæstoris coniugi idem bis ter constantissimè inculcauit, adiiciens: nec si videris vtrumque mariti pedem immissum stapedi, aut plateæ iam adequantem, credideris profecturum. Manebit is tecum Limæ, nec emittetur foras ad molestissimæ functionis periculum. Mira res: Quæstor subito intromissus ad arcānum Proregis colloquium, ab eodem varijs sermonibus detentus per horam & dimidiam, illo momento temporis quo iam adamantini decreti insinuationem pauidus exspectabat, comiter dimissus est, nec Prorex toto seriæ cōfabulationis spatio odiosam illam commissionem verbulo attigit, tametsi quatuor integris mensibus studuisset hanc per supramemoratos Quæstori inuito efficacissimè persuadere. Eadem longo post tempore sic alteri iniuncta fuit, ac si de illa numquam tractatum fuisset cum Gundisaluo.

Ferdinandus Flores de Herrera germanus Rosæ frater Patris exemplo militiam secutus vsque in *Chila* Regnum penetrarat, vbi & vexilliferi honore in sua centuria functus est. Huic leucis plus-minus quingentis *Lima* distanti Rosa soror epistolam scripsit, (: nam diuinitus didicerat, illum in *Chile* honesto matrimonij iugo succollasse). Hac sollicitè hortabatur fratrem, quandoquidem hunc statum amplexus erat, Christiani patrisfamilias obligationi inter militares strepitûs accuratè satisfacere haud negligeret, domum suam ad Dei timorem ac pietatis obseruantiam studiosè formaret, liberos quos illi superna benedictio data erat, optimis moribus imbueret, sanctèque educare satageret, ac primum quidem matrimonij sui fructum filiolum fore, à Deo peculiariter signatam in facie quam videlicet purpureus conspicue rosæ character esset ornaturus. Hanc itaque mox ab ortu parens dicaret offerretque Augustissimæ Deiparæ, siquidem hæc filiola puritate & innocentia vitæ multum placitura erat Altissimo. Ita euēnit: nam post biennium circiter nata est *Ferdinando* prima hæc soboles, secumque ab utero matris attulit rosæ typum in vultu tam bellè & accuratè effigiatum vt nec penicillo venustius depingi potuisset. Adoleuit cum hoc signo paruula, mirantibus quotquot Rosæ litteras pridem viderāt. *Didacus Gonzales Montero*, *Christophorus de Aranda Valdinia*, alijque centuriones ac Chilensis militiæ Præfeti certatim adibant *Ferdinandi* ædes, deuotò hoc spectaculo coram fruituri, nam & puella. (: iuxta Rosæ vaticinium) mirè à teneris propendebat in religionis ac pietatis exercitia. Tandem præmaturè utroque parente orbata remansit sub tutela pupillari, donec *Franciscus Lasso de la Vega* Chilensis Regni Gubernator & præfès ob Rosæ tunc defunctæ piam & vsque in Chile celebrem memoriam in se officium curamque suscepit ultro, vt orphanam suo sumptu è *Chile* *Limam* transmitteret,

teret, vbi *Auiæ Maria de Oliua* (: iam tunc Moniali) in S. *Catarinæ Senensis* Monasterio sanctissimè conuixit, ac singulari virtutum exemplo mirabiliter coruscavit.

Isabella de Mexia nobili Matrona ancilla erat Aetypissa, *Speranza* nomine, quod ultro sibi (: ac si Christiana esset) imposuerat. Hæc à promontorio *Africæ Hesperium* olim, nunc *Caput viride* appellatur, ab interiori *Lybia* per mare Atlanticum abuecta in *Indias*, primum quidem in *Isthmo Panama* seruierat, exinde *Limam* deducta iam à sexennio ancillabatur *Isbellæ*. Accidit eā grauius infirmari, quapropter supplex *Rosa* tum *Isbellam* tum suam Matrem exorauit, concedi sibi *Speranzam* in maternis ædibus suo ministerio cōmodius procurandam. Vt allata fuit, repente *Virgo* perplexum quid secum mūtans, demum apertè dixit Matri: sentio, *Speranzam* non esse baptizatam. Aegra ex aduerso malum pudōrem obfinatione peiori obarmans contendebat peruicaciter, in *Panama* se sacro Baptismo tinctam fuisse, & vt fidem conciliaret mendacio, fingeat nomina plurium quos interfuisse iactabat, comminiscabatur Patrilos numquam natos, locum, annum, ritum, omnia, præter veritatem. Perfacile ipsi fuit tum *Dominæ suæ* tum *Mariæ de Oliua* ceterisq; imponere, adeo vt *Rosam* velut importunè molestā arguerent. Verum ingemiscebat *Virgo* idemtidem suspirans ac palam deplorans infirmam non baptizatam. Superuēnit prouidente Numine post dies vndecim *Gundisalui Quæstoris* mancipium *Franciscus* qui *Speranzæ* ex *Africa Panamam*, inde *Limam* iugiter comes fuerat: is interrogatus respondit simpliciter, se semper credidisse, quod utique intra hoc sexennium *Speranza Limæ* baptizata sit, nam quod in *Panamā* Baptismus ei non obtigerit, habere se compertissimum. Hic tandem conuicta mendacij, sed admirans vnde id *Rosa* potuerit diuinare sic coram omnibus orsa est loqui: dum ex *Panamā* huc
in

in ædes Isabellæ veni, reliquæ ibidem Aetyopiissæ me per ludibrium *equam* appellitabant quòd baptizata nondum essem; at ego conuicij impatiens replicui audacter, æquè vt illas Christianam me esse. Abinde ne pudefierem mendacium meum pertinacia tueri conata sum vsque in hodiernum diem. At nunc à Rosa (nescio quo modo) deprehensam me fateor, & Baptismum flagito. Confestim Virgo acciuit vicium Sancti Sebastiani Parochum Licentiatum *Quixanum*, huic rei seriem infirmâ annuente, exposuit; baptizatur Speranza, moriturque postridie.

Nemo audebat interrogare lætam hoc successu Rosam, vnde arcanum Speranzæ statum didicisset, nam hunc ei non potuisse humanitus Limæ innotescere, apud omnes in confesso erat, ex altera parte Virginis coelitus infundi abstrusas notitias pridem constabat Matri, quæ inter alia legendi scribendique scientiam non acquisitione sed Diuina infusione irrorasse minorenni filiæ grato experimento compererat. Res demum ita patuit. Docuerat Mater filiulam Rosam vtcumque singulas nosse alphabeti literas, iamque in eo erat, vt de ijsdem insyllabas combinandis puellam instrueret, simulque in pagella rude exemplar dederat, vt inde calamo characteres formare disceret. Malebat Rosa totum hoc tempus orationi dare, sed Mater suspicans filiulam puerili more discendi tædium ac laborem defugere, induxit Confessarium vt coram se iuuenulam de neglectu redargueret. Fecit ille bona fide quod iussus fuerat, sed Rosa postridie oratione præmissa Matrem adiit librum oblatum expeditissimè legit, insuper programma exhibuit sua manu eleganter conscriptum; nempe meliùs docuerat Vnctio quàm *Oliua*, & idem qui Sanctæ Catarinæ Senensi artem legendi scribendique supernè infuderat, dignatus est & Rosam pari infusionis compendio diuinitus erudire. Porro ne his minutioribus immoremur, tandem hoc

Magistro suæ mortis diem, locum, horam edocta nemini dulcius quam sibi suoq; funeri felix vates præcinit. Verum id commodius proximo Capitulo seruaturn esto.

CAPVT XXVIII.

Rosa mortis suæ præscia grauem
ultimæ ægritudinis luctum
fortiter excipit, inuidè
sustinet.

DVriusne premat certitudo mortis, an horæ ac diei incertitudo, problema sit, illic decretum hîc secretum affligit mortales, nisi quod solis Dei amicis mori sit lucrum, & insuper nonnullis horum eximio fauore Numinis secretum diei & horæ reueletur. Hinc & Rosa, quotannis festum Diui Bartolomæi (: quo se morituram præsciebat) tam pretiosum & charum fuit; hoc studio singulari colebat deuotiùs, nec suo contenta ieiunio, aliquot innocentes puerulos induxit, vt secum in huius festi per- uigilio ieiunarent, hi verò etiam post Rosæ obitum perrexerunt eiusdem Apostoli recurrentes Vigilias spontaneo celebrare ieiunio, nec aliam norant piæ consuetudinis rationem dare, quam quòd sic à Rosa fuerant instituti. Mirabatur curiosa Mater, quid filia tam peculiare cum Sancto Bartolomæo verteretur, donec tandem audiuit à Virgine, hunc sibi diem aliquando fore nuptialem, quo ad Sponsi thalamum esset euocanda.

Adhuc

Adhuc mortalitati Virginis supererat circiter triennium, quando ex graui morbo decubua videbatur omnibus iam vitæ marginem extremum attigisse; nemo dubitabat intra pauculos dies è viuīs abituram: domestici velut iam mortuam plangebant, cum subinde nunc adhuc spiraret ambigerent. Adstitit inter alios Confessarius P. Magister Fr. *Ludovicus de Bilbao*, cœpitque voce lachrymosa affari Virginem ijs formulis quibus ad postremum agonem sollicitius animari solent moribundi. Audiebat quietè & auidè Patris spiritualis vltima solatia gemens Rosa, illiusque hortatui promptè se accomodans nunc contritionis actûs feruentissimos, nunc humillimæ resignationis tranquilla suspiria, nunc anhela supernæ Patriæ desideria facili conatu frequentabat. Verùm vt vidit circumstantes velut re perditā liberius singultire, ipsumque Confessarium lachrymas tenere non posse, cohibere nec ipsa potuit roseum commiserationis affectum, vtque cōsolaretur ceteros, ita allocuta est Patrem: depone metum, abige intempestiuum mœrorem, ac certus esto, me nequaquam ex hac licet tuo omniumque iudicio complorata ægritudine morituram. Heu! longius abest meta ad quam propero, attingam demum, sed non modò. Quòd si nunc morerer, bis mihi moriendum foret, nam qui vltimò lethum mihi allaturus est dies, procul distat, nec opinandum, hanc Sponsi voluntatem esse, vt bis moriar. Mirabatur Confessarius hæc tanta cum securitate ac fiducia proferri à Virgine, quam sciebat nec temerè loqui solitam, nec in re tam abdita quidquam asseueraturam, nisi diem sui transitûs diuinā reuélatione compertum habuisset.

Annum denique suæ ætatis trigessimum-primum Rosa attigit, quem minimè se finituram dudum prænouerat. Vnde quatuor ante obitum mensibus valens ac sana Gūdisalvi vxorem sic allocuta est: scito Mater, me quarto

ab hinc mense viam vniuersæ carnis certò ingressuram. Vltimè infirmitatis meæ dolores qui me conficient atrocissimi erunt, sed omnium erit immanissimum tormentum sitis, cui vt tunc subuenias, ex nunc obnixè & anxie te precor. Memento ne mihi torridis faucibus aridisque visceribus tua materna viscera imploraturæ lympham deneges qua indigebo. Pollicere hodie Mater, quòd in illo mortifero extremæ sitis incēdio me non destitues, quin poscenti aquam præbeas. Attonita his dictis Matrona, & Virginem attentè intuita, vt vidit tam seriò cernuèq; supplicem, promisit fide bona, se poscenti daturam quoties & quantum aquæ foret petitura. Interim dolebat tam prope imminere decretorium Rosæ diem.

Porro & locum (: sed integro anno ante) eidem Matronæ prædixerat: nam quodam vespere inter spiritualia colloquia subitò præter morem interpellans Rosa vultu amoenissimo modestisque latitiæ signis diducto in hæc verba erupit: scito Mater, me non alibi quàm hic in domo tua & hoc loco naturæ debitum soluturam, & si videris me in parentum meorum ædibus vltima ægritudine corripì, non ambigas, hìc non illic soluar mortalitatis nodo. Nunc ergo per omnia nostræ amicitiae iura te obtestor, ne quando hic expirauero corpusculum meum alijs foeminis committas vestiendum feretroque aptandum, soli tibi ac genitrici meæ hanc curam pro amore Dei assumito, vobis solis vltimum hoc pietatis in me officium supplex commendo.

In celebri arcuum visione (: de qua supra Cap. XVII.) pius Saluator tempestiuè corā fulgido innumerabilium Angelorum exercitu reuelauit Virgini totam seriem immanium dolorum quibus vltimò lancinanda ac præparanda erat ad beatam immortalitatem; hos tam acutos, sæuos, multiplices fore, vt ceteri quos illa stenus pertulerat istis collati vix nomen doloris mereantur, singula
exha-

exhausti sui corpusculi membra proprium habitura equuleum, vt nullum alteri aut succurrere possit aut cruciatum naturali consensu partiri, sitim eandem quæ in Cruce exanguem torfit Redemptorem arida Rosæ viscera faucesque occupaturam, intimas ossium medullas ardore intolerabili depascendas, nec vllum ex tot simul atrocibus morbis solitum naturæ ordinem, periodum, leges, aut interualla admissurum, eò quòd præternaturalis futura sit tot mortalium tormentorum exlex congeries. Rosa ne tantæ amaritudinis calicem expauesceret in Sacello Rosarij velut in horto Gethsemani sese tum voluntati Patris æterni, tum adiutorio Virginis-Matris ardentèr commēdauit, quando annuente Deipara ibidem apertiùs didicit prope adesse diem, quo totum hoc mortiferi promulsi-darij absynthium sibi strenuè sit epotandum. Superuenit fortuitò *Ioannes de Tineo Almanfa* familiaris, qui Virginem obiter salutans eius se precibus commendabat. Viciissim Rosa flammante vultu (: quem serium istud Deiparæ colloquium vehementer accenderat) precum subsidia ab illo flagitauit perplexè aliqua interserens, quæ Ioanni sat erant, vt intelligeret, tunc Rosæ præcisum vicini obitus sui diem fuisse reuelatum.

Denique triduo ante fatalem postremæ ægritudinis syncopem Rosa vltimò adiit parentum ædes, fortè clam valedictura suæ ibidem hortensi cellulæ tot secum cælestium deliciarum conscia. Illic se Virgo solitariam ac sine arbitris putans cygnæos exorsa est modulos, suæque morti iam propinquæ dulciter præcantillauit. Obseruabat insciam è vicino angulo Mater, audijsque filiam arguto fluidorum rythmorum iubilo blandientem Sancto Patri suo *Dominico*, cui impensè cōmendabat Mariam de Oliua Matrem suam, crebrò inculcans ac repetens; hanc breuì (: se moriente) mansuram solam; proinde huic orbæ ac derelictæ suam è Cœlo impenderet tutelam, quam

tandem adoptaturus esset in filiam. Percelluit Matrem, arcanus horror, & tunc quidem dissimulauit, fortè subdubitans non admodum seria esse, quæ metricè ac per cantilenam efferuntur non quia vera, sed quia obuia: donec tertius dies (: qui mensis Augusti primus erat) aperuit non poëtice sed propheticè cantatos fuisse migraturi coloris thrānos, nī maelis dicere iubilos.

Calendis Augusti Rosa sub vesperam sana ac vegeta, suo sese cubiculo incluserat, expectatura illic promissos vltimi sui accubitus dolores, quorum anteambulones ac strategos sentire iam coeperat. Et ecce sub noctis medium auditur miserrimè eiulare. Accurrit Quæstoris vxor cum filiabus & ancillis, inueniuntque ægram toto corpusculo extensam per solum; rigeant membra sine motu, sola, pectoris anghela palpitatio & languidæ vocis querula raucedo Virgini scintillam vitæ inesse arguebant. Instabat anxia Matrona, interrogabat, vbi quid potissimùm doleret, quid demum haberet mali, sed Rosa præ tenuitate spiritus tunc respondere aliud non potuit, nisi quod verbis intercisis diceret: malum quidem se nullum habere, at ipsissimam mortem in intimis viscerum suorum penetrabilibus liberrimè dominari. Interrogata, velitne aduocari Medicum? *Galestem* respondit, & obticuit. E terra, interim sublata in lectulum nec mouere se poterat nec quiescere, frigidus sudor stagnabat in pallida fronte, luctabatur velut ingenti mole pressa spirandi facultas, discordes artericarū temporumq; pulsus certabant de palma vehementiæ, & incertis interuallis nūc tumor nunc tremor exangue corpusculū oberrabant. Tantū in hoc Virgini bene erat, cum subinde libero suspirio *Iesv* nomen, tenerrimè Pronunciabat. Manè factō acciti Confessarij infirmę adstiterunt, mirantes viuum illud ac taciturnum omnium dolorum simulachrum. Adfuere & Medici, statimque explorata vi pugnantium morborum hærebant in

mutuo intuitu marcelli, fatentes acervum tot cruciatuum omni humana patientia superiorem videri, neque dolores illos omnino naturales esse, altiores hic sœuere paroxysmos quos artis suæ experientia nondum agnouerat. Nimirum hic ille calix erat quem Sponsus biberat, quem Sponsæ miscuerat, ac tam diu ante præmonstrarat.

Confessariorum vnus rogauit Virginem, saltem Medico exponeret quid sentiret; cunctantem adegit imperio, credens ab humili modestia non à tormentorum excessu prouenire silentium. Audito præcepto mox obedientia, doloribus robustior fuit, & quamquam Rosa creberrimis experimentis omnium penè morborum nomina didicerat, hunc tamen (: utpote peregrinum) nonnisi per similitudinum periphrases explicare valens ita respondit: scio me commeruisse quæ patior, at nesciebam tantum poenarum in corpus humanum cadere ac per singulos artus distribui posse; videtur candentis ferri globus mihi per tempora adigi, & à summo vertice vsq; ad infimam plantam dextri pedis ignitum veru transmitti, cuius me vehementia quodammodo in altum attollit: simili ardore transuersum à sinistro latere per meditullium cordis ignitus pugio me peruadit, (: obseruet lector in hoc duplici ac decussato ardoris tormento Crucis formam exprimi) caput meum candenti galeæ videtur inclusum, illic sine intermissione validis puncturis ceu malleorum ictibus vndique contunditur; ossa mihi sensim resoluuntur in puluerem, medullæ instar cinerum aruerunt, singulas iuncturas singuli obsident cruciatus quibus nec nomen, neq; tormentum cui eos comparem inuenio. His quidem ad extremam paulatim me deduci comperio, sed quia dolorum meorum intensiori accessura est certa in plures dies extensio, simul efflictim compatiar labori ac molestiæ qua domum istam diutius quam vellem oneratura sum. Cetera consummet in me Dominus totum quod

collibitum est sacrosanctæ voluntati suæ, ego neq; mortem nec morte diriora supplicia hæc recusabo.

Auxere hi sermones vertiginem Medicorum, fluctuabant in mutuo aspectu confusi, perplexi, attoniti, nam hinc notissima Rosæ virtus & sanctitas non sinebat quemquam de dictorum suorum veritate ambigere, inde aberant indicia quæ lethalis morbi suspicionem confirmarent, cum nec febrile quidquam pulsaret in venis, nec insolita tot simul alterationum vicissitudo vllum foras emitteret critirion alicuius morbi quem schola Aesculapij nosset. Ceterum Virgo clam suo Confessario P. Magistro de Lorenzana aperuit, frustra Medicos in exploranda huius morbi specie laborare, cum totus præternaturam esset, ac a foris immissus via multiplici vndequaq; à peripheria ad centrum tēderet, mutuisq; occurribus alij alios paroxyfmi summa affectionum varietate intersecerent, proinde non alia hîc quàm immedicabilis Iobi patientia sibi opus fore, vt quoquo modo singulos Crucifixi Sponsi sui dolores membratim experiretur. Ergo rogavit obnixè Gundisalui coniugem, sibi permitterent saltim, per aliquot dies sic iacere absque humano alloquio, fortè vt sub solitario hoc silentio quietiùs intimos & inexplicabiles suos dolores intingeret vltimis doloribus crucifixi Amoris, cui se membratim confixam in Cruce sentiebat. Verùm interruptit qualemcumque istam crucis quietem superueniens Rosæ Mater, quæ intromissa ingenti suo terrore infirmiozem reperit filiam quàm sibi fuerat nunciatum; itaque molestè & anxie vrgebat ægram, diceret qua parte grauiùs doleret. Breuiter respondit filia, omni ex parte sibi malè esse, hoc solo dempto quòd verè hi crucis dolores erant. Sed neutiquam hoc responso contenta Mater, ac fortè persuasa ex taciturnitate patientis filiæ retardari opem medicinæ, voluit exponi sibi minutim, singula, ydensque luctari infirmam, eò quòd nesciret
vnde

unde incipiendum aut quæ nomina danda morbo tam anonymo ac præternaturali, imperiosius per virtutem sanctæ Obedientiæ adstrinxit filiam eloqui secreta quæ non nouerat. Rosa memor nullibi quàm in Cruce amplio- rem obedientiæ patère locum, ab ipsa mutuauit loquendi vires & spiritum, perque eadem similitudinum compendia (: siquidem aptius non poterat) explicuit Matri, se velut oblongo ignito iaculo à vertice vsque ad calcaneum transuerberari miris ardoribus, quibus totum sinistrum latus videbatur eleuari, simillimo torre sese, transuersim penetrari à latere ad latus, hac vstulatione sibi ossa incinerari, (: nimirum Crucis holocaustum erat) medullas ac tendines frustillatim candenti forcipe euelli, passim per fibras oberrare acutissimum gelu, ipsâque tot flammularum antiperistasi sæuius irritari, mandibularum cardines tamquam filo chalybæo arctissimè strictos ad omnem oris motum luxari à iunctura, aures & tempora velut ingesto candenti orbiculo dispunctim torrerì, os & fauces interiùs hiantibus plagis cruentè vlcerari, guttur cum tunfillis instar pumicū emarcuisse præ ariditate ac siti, (: & quidni in cruce audiatur *Sisire*) craniū velut incudem ictibus creberrimis ac lacertosiss affatim contūdi, nec vllum ex omnibus his supplicijs vel ad momentum interquiescere. Hæc sunt (: inquit) Mater mea dulcissima, quæ tibi vtcumque adumbrare potui, vt obedi- rem, cetera ne ruditer quidem possum, nec si possem caperes. Fleuit turbata Mater, hoc maximè plorans quòd præter lachrymas non habebat quo filix dolores inungeret. Sed Virgo pietate faucia conabatur has inu- tiles afflictæ Matris lachrymas sistere, rogans cohiberi fletum, quasi Sponsi verbis diceret *Nolite flere super me*.

Illuxit interea sextus Augusti dies, Christi Transfigu- rationi sacer, at Rosam is non in Thabor sed in Calua-
ria

riæ monte inuénit, fortiùsque defixit. Videbantur intím Virginis dolores aduocasse in suum adiutorium reliquam naturalium morborum cohortem, ne aut vllum pœnarum genus tantæ patientiæ deesset, aut vltteriùs ambigetur infirmitatem Rosæ lethalem esse. Prima adhuc festum accita comparuit lateris sinistri paralyfis, qua totius corporis læua pars à summo deorsum eneruata in lethalem, inopore distabit, vt inde inciperet Rosa per partes emori. Sola lingua singulari Dei beneficio intacta ad pietatis vsum viguit vsque ad extremum halitum, reliqua ex eo latere membra sic obtorpuere vt numquam ad officium redierint, quidquid demum vnguentorum, defricationum, fomentorum magis ad cumulandam molestiam quàm ad conciliandum leuamen impenderetur. Ex solo pondere sentiebat ægra, adhuc se brachium pedemque alterum habere, ceterà, siue erigenda tantisper in lectulo, siue in alterum latus vertenda manibus egebat alienis, plus condolēs aliorum incommodo quàm dolens ex proprio. Successere aut potiùs accessere paralyfi varia minoris notæ symptomata, verùm 17. Augusti inflammata vtrunque costarum membrana notabilem adiunxit pleuritidem, huic se paulatim adsociavit raucum angustii pectoris asthma, vt ardorēs qui intus velut in clibano affabant viscerum reliquias, non sine nouo cruciatu leuamen admitterent rari suspirij. Pleuritidem auxit ischiadum acerbis dolor, cholica, hypochondriarum dira conuulsio, accensa in pede dextro nodosa arthritis; denique continuæ febris caustica intemperies reliquorum morborum confudit distinctionem, tamque potenti, varia, & concumulata vredine opus fuit, vt vnica hæc Rosa fatali demum marcori succumberet; mirum, non succubuisse citiùs, at gloriosissimum martyrij genus est lentè, imò articulatim mori.

Aceruatos tot dolorum ac morborum cumulos æstimabat,

mabat, acceptabat resignato animo serena, & constans
 Rosa, velut manu Christi admensos sibi ex illa mirabili
 statera, quam in visione Arcuum attentissimè obseruarat,
 secuta tantis afflictionibus successuros totidem cumulos
 gratiarum, nempe *aternum illud gloria pondus*, de quo
 Apostolus 2. Corin. 4. cui nomen *Gratia consummata*.
 Hinc illa inter acerbissimos cruciatus placida ac suavis
 animæ quies, hinc illud fiduciæ ac spei infractum robur,
 quod multos, ac præcipuè spirituales suos Patres abri-
 puit in stuporem, hinc illa festiua & blanda cum Dilecto
 soliloquia, *Domine plus, plus: imple adorandum & sanctum*
beneplacitum iustissimæ voluntatis tuæ, imple trutinam,
superaccumula doloribus dolores, at memento simul augere
meam patientiam. Suspirabat interdum, at sine gemitu:
Domine in adiutorium meum intende, nam sine illo nil
possum. Subinde cum laterum dolore vrgebatur ad san-
 guinis vomitum, familiari idiomatis sui rythmo alloque-
 batur Sponsum, *Domine, tantum ne in ira corripias me,*
nec arguas in furore, dum vis quod mea crimina detergam
hoc cruore. Audita est aliquando Crucifixum quem iugi-
 ter gestabat inter amplexus, dulci teneritudine sic affari:
mi lesu, quando à te poscebam dolores, credebam illos mihi
mittendos quibus à prima iuuentute me exercuisti, at nunc
aliter tibi visum est, benedicta sit abundantia tam copiosa
misericiordiæ tuæ. Cuidam ob rigidos paralyfis stupores
 sibi familiariter compatiendi mira vultus animique sere-
 nitate respondit: aliquando se tractasse cum Deo, de ado-
 ptando mendico puerulo, quem ipsa educaret in spem
 Euangelij inter barbaros propagandi (vt supra Cap. XX-
 III. narratum est) verum nunc binos sibi datos esse, quo-
 rum vnum sinistro genu, alterum læuo brachio exceperat
 portandum ac nutriendum. Hoc penè ioco indigitabat
 molem emortui genu & brachij, quibus grauiori ponde-
 re sua paralyfis infederat.

Paulatim subuerebatur (: nec sine causa) Virgo sapiens , ne tot simul morborum continua & atrox violentia sibi rationis vsum eriperet , totamque cerebri temperiem dissiparet ; maximè vbi tot dies noctesque planè insomnes , tot motuum vicissitudines , tanta occipitis inflammatio , ac temporum inquietudo certam ferè caliginem ac iudicij eclipsem minabantur . Itaque humilis Rosa voce tremula flebilique supplex obsecrauit domesticos , secum rogarent Deum , vt ex ea dumtaxat parte mitigaret vim morborum qua menti liberoque vsui rationis nocere poterant . Respexit humilitatem ancillulæ suæ Diuina pietas , illique integrum expediti iudicij & linguæ vigorem peculiari prodigio inter assidua exhausti cerebri deliquia immunem seruauit vsque ad extremum halitum . Attamen sæpè inter hos angores Virginem ab vsu exteriorum sensuum abduxit vel morbi vehemètia vel contemplationum excessus , adeo vt somno leniter sopita putaretur , vnde nonnullis etiam de infirmæ salute paulò meliùs sperare collibuit , quòd eam crederent pauxillum dormiuisse . Præ ceteris sollicita Mater laborabat persuadere filiæ , hæc reditura valetudinis signa esse . Verùm subridens , morique certa Virgo replicuit , nil minùs quàm soporem fuisse quod viderant , nec tales esse cruciatus suos , qui aut vnici momenti starent inducijs , aut cum somno possint vel tantillam inire societatem ; proinde non dubitarent breui se consummandam iri , at priùs amarum hunc passionis suæ calicem amore Sponsi ad imum vsque fundum sibi exhauriendum fore .

Crucis archipincerna sitis immanissimè Rosam torquebat imò torrebat in dies vehementiùs ; itaque in Gundi-salui coniugem obtutu miserabili , cernuo , lachrymoso , frequenter , languidè , dolorosè respiciens orabat supplex , tantillum aquæ ad refrigerium sibi porrigi , fel (: cui pridem assueuerat) cum aceto iam in delicijs reputatura , si

impetrari potuisset. Matrona quàmuis commiseratione efflictim saucia negabat id sibi per Medicos licere. Urgebat Rosa, meminisset datæ fidei, qua quarto ab-hinc mense promiserat valenti ac sanæ, quantum aquæ in ultima ægritudine flagitaret, se promptè daturam. At excusabat illa, se iam promissum implere non posse. Vnde Virgini cruciabiliter arescenti vnum id superfuit, cum moriente Sponso clamare: *Sirio*.

CAPVT XXIX.

Rosæ marcor extremus, suaue deliquium, & mors pretiosa.

ADfuit demum acceptabile tempus, quo Rosa non tam Sirij, quàm sitis ardoribus exsucca, dolorum spinas cum vita exueret in Sponsi Paradiso amoenius renascitura. Lethalia decumbentis signa dissimulari iam non poterant, erantque Virgini acceptissima, quòd his quasi fideiussoribus liberior sibi concedebatur campus submota corporis curâ tractandi de sola anima. Igitur crebriùs accitis Confessarijs tenerrimam conscientiam, exomologesi pluries iterata quàm-diligentissimè expiauit, semel quidem generaliter de tota vita sua, deinde frequentius at breuius, semper tamen cum sonoro poenitudinis intimæ singultu & lachrymis se accusans, ita quòd procul auditi gemitus non paucos compunxerint, mirantes Virginem in summis corpusculi tormentis adeo ge-

mendi parcam nunc in leuissimis animi morbis enarrandis tam amarè altùmque ingemiscere.

Posthæc triduo ante felicem transitum complicatis in supplicandi ritum manibus, voce flebili Diuinum Viaticum, extremamque Vnctionem petijt. Vt audiuit, epulum Eucharisticum sibi adferri, viuido colore suffusa coruscantis auroræ instar gratiosè rubuit, mox gaudio suo impar in altissimam extasim dirigit, attonitis quotquot aderant, quòd nihilominus aptè expeditèque responderet Sacerdoti qui de more Sacratissimam Hostiam manu tenens interrogabat quæ sub illo articulo solent interrogari. Suscepto Diuino Sacramento pallida & exanguis nullo vel minimo labiorum motu sic fixa hæsit, vt diu inter adstantes dubitatum fuerit, num Sacram Hostiam in stomachum transmisisset: denique P. Magister *de Lorenzana*, metuens ne fortè Virgo tam aridis morboque adstrictis faucibus glutire non posset, quæsiuit sollicitè quo statu res esset. Rosa ad Confessarij vocem repente sibi reddita respondit, iam Hostiam sacrosanctam per guttur ad intima descendisse. At ipse memor admirabilium effectuum quos instar solis operari solebat in Virgine, hoc viuificum Sacramentum, (: vt fatentem ipsam retulimus supra Cap. XXII.) breuissimè illam hortatus est, frueretur nunc Sole suo. Appositè; nam vno eodemque die in Zodiaco Sol mensis Augusti ex *Leone* transibat in *Virginem*, & Sol Eucharisticus verè Augustus vltimò Virginem Rosam virgineo suo corpore adimplebat. Certè & hæc Virgo inter morbum & mortem velut inter *Leonem* & *Libram* media erat, nam ille *quasi Leo sic contriuerat omnia ossa eius*, hæc æternum gloria pondus appendebat: Virgini in statera, de qua Cap. XVII: sed ad alia.

Quàm immobilis riguit dum sacrum Viaticum sumebat in extasi, tam alacri omnium sensuum officio Extremam Vnctionem moribunda excepit, verè *oleum latitie*, quo

quo sese potius ad triumphum quàm ad agonis confli-
ctum sensit animari, vtpote salutis adeo iam certa quòd
insuper nosset absque Purgatorij ignis contactu se recto
itinere ad Sponsi nuptias profecturam. Sapius coràm
adstantibus voce quantum potuit elata & clara ortho-
doxæ Fidei professionem replicuit, non sine iubilo ac pe-
ne addito cygnæo cantu protestans, se vti hætenus vixe-
rat ita iam mori filiam Sanctæ Romanæ & vniuersalis Ec-
clesiæ, se credidisse semper & credere quidquid creden-
dum proponit ac docet Magistra fidelium Apostolica Se-
des, numquam se (: dum sui compos sit) ab huius fidei so-
lidissima firmitate recessuram. Proxima huic cura fuit,
se palam ac deuotè S. P. sui Dominici sobolem profiteri,
vnde candidum sui Ordinis intersigne quod *Scapulare* di-
cimus, foris super stragulas coram se continuò & patulè
extensum videre ac videri voluit, tamquam proprium
religiøsæ militiæ vexillum, sub quo meruerat vsque ad
extremum spiritum, estque hæc vestis illa, quæ Virgo-Ma-
ter nascentem Fratrum Prædicatorum Ordinem ceu pa-
nis infantia suismet manibus inuoluerat. Porro gauisa est
Rosa, cum à P. Lorenzana suo Confessario quod nu-
quam sciuerat tunc primùm didicit hunc perpetuum in
Ordine morem esse, quòd moribundis Religiosis illò mo-
do sacrum Scapulare insternatur. Hinc Rosa moritura
teneriùs suum osculabatur scapulare, quo quasi *viam la-*
teant sibi signari ad sedes empyreas sentiebat.

Inuiserat Rosam morti vicinam P. F. Bartolomæus Mar-
tinez Prior Limensis Cœnobij ad Sanctæ Mariæ Magda-
lenæ, vir admodum religiosus & Dominicanæ ibidem
Obseruantia vigil zelotes, cui per quinquennium Virgo
conscientiæ suæ latebras solita fuerat aperire. Ab hoc
ægra humillimis precibus flagitauit sibi verbatim prælegi
formulam exquisitissimam summèque efficacem, quæ
moribunda veniam à Deo exoraret pro omnibus, qui Ro-
sam

sam in totius vitæ suæ decursu molestijs, damnis, vlloue genere iniuriarum affecerant. Annuit pius Pater, illiusq; præeuntis verba sequebatur Virgo Crucifixi iconem manu stringens, nec satiari poterat his verbis tenerrimis: *Pater ignosce illis*. His illanguibat tota affectuum dulcedine; horum repetitione inardescibat medullitus, nec fatigabatur orationis prolixitate, modò in eadem verba sapius recurreret. Expleto hoc pietatis officio blandè ac suauiter Patri gratias egit, quòd in opere tam pretioso ac serio aptam sibi methodum viamque recitando præiue-
rat, qua vtcumque imitaretur Diuinum in Cruce Agnū pro suis aduersarijs extremè deprecantem. Hinc in se reflexa domesticos Gundisalui Quæstoris acciri demissè petijt, & quamquam ex his neminem verbulo aut minimo vmquam nutu offendisset, à singulis & omnibus voce lachrymosa ac supplici orauit sibi condonari, si qua in re vlli nocuerat siue incòposito morum exemplo, siue tarditate obsequiorum, aut tetrica singularitatis molestia; dolebat se ipsis adhuc ferè per biduum oneri fore, rogabatque ne prope terminum amittere velint longanimitatis suæ fructum, ac patientiæ meritum, haud procul abesse horam quæ domū Gundisalui à foetidæ Rosæ longo fastidio inutilique pòndere liberaret. Nemo aderat, cui tantæ humilitatis verba lachrymas non excuterent, nam vt tenerrimè Rosam suam diligerent, sat fuerat singulis ipsam nouisse, eiusque sanctitatem, innocentiam, animi demissionem, candorem, & obsequendi affectum tantis experimentis comprobasse.

Sciebat Quæstor, Virgini (: prout sub Dominicani Ordinis habitu atque Obedientia vixerat) in votis esse, non alibi quàm ad Fratrum suorum pedes sepeliri, at metuebat vir prudens, ne fortè post Rosæ obitum de condendo tanti funeris thesauro lites inter Parochiam & sancti Dominici Conuentum exurgerent; nec tamen audebat hu-

humillimæ Virgini honorificum illud periculum aperire. Tandem ingenioso consilio suggessit Virgini, quòd legitimum obtinendæ apud FF. Prædicatores sepulturæ desiderium potius mendicando quàm testando notificaret per scripturam in hunc usum à Gundisaluo iam præparatam. Facile consensit ac subscripsit Rosa, existimans agi de solo humilitatis exercitio, cumque Ordinis sui morem esse. Aliàs de corporis sui aut cura aut loculo ne quidem cogitabat, intenta soli spiritui, adeo ut familiares Matronarum visitationes difficiliùs quàm noua dolorum austaria admitteret, siquidem ut illas tanquam onerosas ac superfluas honesta sæpius excusatione rogabat impediri, ita hæc magis magisque gaudebat cumulari. Hinc inter acutissimos ischiadum cruciatus vox illa frequens: *ure, preme, stringe Domine, ne parcas, quantumcumque pungas aut vellices, pro meo demerito parum est*. Notarunt plerique in Virgine, iisdem gradibus quibus debile corpusculum fatiscebat in mortem, attolli spiritum in vigorem & securam hilaritatem, adeo ut penè horaria lætitiæ incrementa nec voce nec vultu satis potuerit dissimulare, velut protestans cum Apostolo, *cum infirmior tunc fortior sum*. Quidam vir Religiosus diris eius torminibus compatiens hortabatur pati fortiter, terminum iam in prospectu esse, hoc æstu animam feliciter purgari à cruditate ut Sponsi palatum æternum oblectet. Respondit Virgo: at hoc ipsum est quod Sponsum rogo, ne cesset me exquisitis ardoribus excoquere, donec ei maturescam in fructum qui rectà hinc mensæ ipsius inferri mereatur.

Sub vitæ finem crebriora Virgini fuere dulcissimorum raptuum interualla quibus paratæ cælestis gloriæ saporis iam summis labijs prælibabat. Paucis ante obitum horis ab eiusmodi prægustu in se rediens ac suis gaudijs impar P. Fr. *Francisco Niceto* cum alijs iuxta ibidem vigilantibus ingenuè at secretò dixit: *proh! Pater, si residuæ*
vitæ

vita mea breuitas id permetteret, quàm excelsa, quàm pretiosa, iucunda; eximia tibi de Dei suauitate, de lata ipsius Curia, de regione æternitatis narranda haberem. I vado nunc cum tripudio ad perenniter contuendam pulcherrimam illam faciem, quam toto peregrinationis meo exilio quæsiui, toto desideriorum æstu concupiui. Aderat morienti filia afflicta mater, aberat Pater, quem lecto decubuum propria infirmitas continebat domi; attamen rogatu Virginis, quæ vltimam vtriusque parentis benedictionem exspectabat ad Gundisalui ædes portari se fecit: Hic ad primum conspectum attenuata & exanguis filia itum in singultus & lachrymas, nec vlli circumstantium ea fuit pectoris durities quam ista lugubris spectaculi teneritudo non emolliret in plorandi societatem. Interea fletuum nimbo vtcumque discussa Rosa placidè summaque reuerentia Parentis manum deosculata est, simul blâdè ac imperturbatè exposuit, sibi nunc modicissimam vitæ quam parens dederat partem superesse, in huius extrema linea sese amborum benedictionem supplici demissione præstolari. Hanc ubi obtinuit, pari obseruantia, in Gundisalum eiusque vxorem respiciens, quandoquidem & hos vti secundos parentes coluerat, pariter ipsorum benedictione voluit ad arduum illud iter communi-ri. Deinde propiùs accitis qui aderant duobus suis germanis fratribus seriam, grauem, ac sententiosam parænesim dixit, ac inter alia sollicitam parentum curam, honorem, obsequium efficacissimè commendauit; quasi ad Crucifixi Sponsi exemplum dixisset: *Ecce mater tua*. His expeditis aduocauit ambas Quæstoris filiolas quas ob innocentiam rectamq; indolem impensè amauerat, his energia mirabili inculcabat timorem Dei, virtutis studium, amorem parentum, quibus satagerent tranquillam & lætam conciliare senectutem. Nec minori emphasi reliquos per ordinem domesticos affata est, quemque decenter admo-

admonens officij & christianæ pietatis; videbatur non
fœmina sed Apostolus prædicare.

Tantus in Rosa concionandi spiritus ac vigor P. Ma-
gistro de Lorenzana Confessario persuaferat, ipsam ea-
saltim nocte haud morituram. Nox erat, & sancti Barto-
lomæi peruigilium, vnde Confessarius solemnî Matuti-
narum officio domi interfuturus parabat discedere ad
cœnobium, postridie rediturus. At Virgo sciens non in-
tegras quatuor horas sibi tunc superesse, postremam ab
eo benedictionem enixè flagitauit quasi paulò post ad
Dominum migratura. Sed respondente illo commodius
hanc differri posse in crastinum, tempus non defore, fac
tempestiuè se postero manè adfuturum, Rosa grauter
modestèque arridens subiecit: scito mi Pater, hac nocte
cum ineunte sancti Bartolomæi festo me abituram ad fe-
sta sempiterna, iam cœlitus inuitata sum ad splendidum
illud ac solemne conuiuium, iam præfixa est hora, & non
vis quòd vadam dum patent fores? Hæc vultu tam sere-
no ac gratioso, tranquillitate tam securo & hilari profe-
rebat, quasi iam in Paradisi vestibulo expectaret cum
lampade, dum *media nocte clamor fieret: ecce Sponsus
venit.*

Et reuera vbi medium noctis adfuit, Rosa hoc sese cla-
more sensit accersiri, candelam benedictam placidissimo
nutu petijt, crucis signaculo velut rem magnam aggres-
sura, frontem, os, pectus comuniijt, germano fratrî
quid ageretur adhuc dubitanti innuit se migrare, iussitq;
cervical subtrahi, vt capite ad nudum lecticæ lignum ac-
clinato sentiret in cruce se mori: denique sensibus planè
integris, pleno iudicio, fixis in cœlum oculis, nullo vel
minimo pauoris aut horroris signo in facie, dum postre-
ma hæc verba pronunciabat: *Iesus, Iesus, Iesus mecum sit,*
quietissimè expirauit. Nimirum vt Rosa infans ab his
verbis auspicata fuerat primam orandi formulam, ita his-

ipsis immortalia quasi tessera sua innocentiae ac infantilis simplicitatis ad Limen supernae patriae inuariatam reportauit, anni sui trigésimi secundi quinto mense vix inchoato.

Eodem festiuae noctis diluculo *Aloysia de Serrano* procul in adibus parentum matutino somno implicita resciuit deposuisse tunc Rosam cum S. Bartolomæo mortalitatis exuias. Inter vtramque pactum fuerat, quod quæ prima ex hac luce migraret, Deo permittente alteram sui transitus admoneret. Stetit promissis Rosa, & illamet nocte in forma corusci luminis *Aloysiâ* suauiter excitans sese ad lucis regionem tunc perrexisse indicauit. Verùm de luminosis Rosæ post obitum apparitionibus sermo copiosior Mantissæ reseruetur. Redeundum hinc ad virgineum Rosæ cadauer, quod respirare credebatur quando spirare desierat. Viuidus faciei color, labella rubentia modicèque velut in suauem risum diducta, oculi integri lucidaque amœnitate subfulgidi diu ambiguum reddidere præsentibus Rosæ mortem, donec adhibito speculo nullum in ea superesse halitum innotuit. Apud Rosam ut vltimus sic primus hic speculi vsus fuit.

Dum vestitur tractabile cadauer, dum aptatur in feretro, dum floribus inspersum effertur in anterius conclauem spectante Matre, ingerebatur vniuersis luctuosa plangendi licentia, nec tamen vlli præsentium libuit plangibus indulgere, siquidem repentino prodigio sic omnes peruasit arcanus quidam lætitiæ sensus, ut tota domus insperatâ metamorphosî deuotis turgere solatijs, ac nuptiali propemodum gaudio innatare videretur. Matri quid acciderit, iam superius in fine Cap. III. relatum est. Idem reliquæ Gundisalui familiæ, idem extraneis quotquot aderant intimæ ac secretæ iucunditatis inhæsit stimulus. Vniuersim decem & nouem personæ ingenuæ præter domesticam promiscui sexûs mancipia Rosæ morientis lectulum

Ium mœsto silentio ambierant, & ubi Virgo spiritum reddidit, singulæ occulta quadam spiritûs suauitate à plâ-
ctu in plausum vltro se adigi compererunt. Vna præsen-
tium vt viderat expirantis Rosæ grabatum numerosa An-
gelorum corona circumdari, ita notauit iam circa defun-
ctæ feretrum eosdem alternante concentu festiuissimè tri-
pudiare. Eadem Quæstoris coniugi clam facta est, aulam
per amplam in qua prostabat expositum Rosæ cadauer, vni-
diq; totam micuisse luminoso illapsu celestis gloriæ, item
iurato asseruit, religiosæ cuidam personæ triduo ante
felicem Rosæ transitum à Christo fuisse reuelatum, Vir-
ginis mortem fore admirabilem & sepulturam gloriosam,
insuper vetuisse ne Virginis funeri circumponantur pan-
ni atro colore lugubriter pullati, sed candidi, niuci, so-
lemnes, quiq; non exequias indicent sed triumphum.
Denique inualuit eòusque prodigiosa lætandi sympathia,
quòd dum exspectabatur diei ad radiantis diluculum, nō-
nullæ ibidem deuotæ fœminæ sacrorum hymnorum so-
noro cantu per vices liberrimè se oblectarint, protestan-
tes non lessio illic sed iubilo esse locum.

Illuxit demū clarior dies, & ecce Quæstoris palatium
subito hominū concursu plenū fuit nemine vocante. Mi-
rabantur domestici, vnde aut quo modo nūcium defun-
ctæ & calentis adhuc Rosæ tota Vrbe diffūdi potuerit ho-
râ tam intèpestiua. Nec publici præcones, si vicatim emissi
fora & compita stentoreis implessent clamoribus, primo
mane tam densum collegissent populū, quantus vltro ex
omni platea ad Gundisalui ædes confluit, nulla humana
diligentia excitus. Adfuit inter primos vir grauissimus *P.
de Lorenzana*, & in feretro similem dormiēti Rosam con-
spicatus vocem tenere non potuit, quin palā exclamaret:
benedicti genitores qui te procrearūt, benedicta hora que
te nascentem excepit, benedicta tu à Domino felicissima
Dominici filia, quæ nunc frueris vultu beatifico tui Crea-

toris; obijsti prout vixisti, baptismalem gratiam nullam
 vñquam lethali noxa interpunctam, immaculatam totius
 vitæ innocentiam, virginei candoris infantilem puritatem
 intulisti cœlo, sequere sequere nunc Agnum quocumque
 ierit. Interea circumfusi promiscuè nobiles, ignobiles,
 aduenæ, ciues, Indi, Hispani certatim Rosaria sancto cor-
 pusculo applicuerunt, flosculos religiosæ iacentis vesti in-
 stratos carptim vñdique diripere, hic manum ille pedes
 raptim deosculari studebat, nec deerant qui pio furto
 hinc limbum tunicæ, inde veli extremitates paratis for-
 ficibus modò clam mox palam inuaderent, vt breui stipa-
 toribus opus fuerit contra rapacem deuotionem. Qui re-
 motiùs substiterant, defixi hærebant in niueo & gratioso
 Rosæ vultu, quem florida corona velique candor venu-
 stissimè commendabat. Tentarant pluries familiares Ma-
 tronæ adductis palpebris oculos defunctæ Virginis obte-
 gere, sed frustra, nam sensim eò redibant vnde attractæ
 fuerunt, solamque oculorum medietatem operiebant,
 quasi Limenes suos etiam post mortem Virgo pupillis
 columbinis amaret dulciter intueri.

Creuit accurrentium multitudo & cum multitudine
 importunitas, vt nec ostia domûs sat laxa paterent con-
 fertim irrudentibus, nec abituri exitum in tanta pressura
 inuenirent. Omne atrium, ambulacra, angulos confusa
 turba impleuerat, vt Gundisaluo necesse fuerit, posticum
 suarum ædium aperire, quo per aliâ viam sese euoluerent
 qui venturis locum cedebant. Aliquândiu remedium
 istud profuit, donec etiam illa ex parte ingressum tentare
 coepit confluxus spectaculi auidissimus, qui neque in-
 gnioribus personis intromittendis aut emittendis spatium
 dabat. Igitur Peruani Regni Excellentissimus Prorex ar-
 mata suæ custodiæ prætoriam cohortem eò celeriter de-
 stinavit, portisque ædium adstare iussit, ne indigesta tor-
 agminum collisio exardesceret in tumultum. Mirata est

vniverſa ciuitas, tantopere ſe totam ſponte commoueri ad cohoneſtandum funus pauperrimæ Virginis, obſcuro-
rum parentum humilis filiæ, quæque dum vixit adeo ſeſe ab omnium oculis, notitia, plauſu occultarat; ſed imple-
ri debuit, quod cælitus prædictum erat, fore ſepulturam
illius glorioſam.

C A P V T X X X .

Rosæ funebris conductus, exſe-
quiæ, tumulus.

TOti iam Limæ buccinante fama innotuerat, Rosæ ca-
dauere ſub veſperam Quæſtoris domo efferendum
eſſe ad ſepulchrum, & ecce plateas, fora, vicos quâ tran-
ſeundum, aliquot horis ante impleuerat effuſa populi
multitudo. Viæ pro dignitate Urbis ſpatioſæ & amplæ;
à Quæſtoris domicilio uſque ad ſacram Aedem Prædica-
torum mille circiter paſſuum iter erat, nec tamen ſat ca-
piebant numeroſam plebem tempeſtiuè per omnia com-
pita agglomeratam, quam nec præco, nec templorum
excella tintinnabula, ſed ſola cuiusque ſingularis deuo-
tio inuitârat. Illuſtriſſimus Limæ Archiepiſcopus pro-
dierat funebri pompæ honorem ſuæ præſentiae imperti-
turus, ſed uſque ad Gundisalui ædes per denſiſſimas ſpe-
ctatorum myriades eluctari diffidens, permeatu fruſtra
tentato maluit ad D. Dominici Templum deſcendere, ibi-
que virgineum funus ſub valuis exſpectare. Interim non
ſecus atque ad publicam ſupplicationem longis agmini-
bus diuerſiſq; vijs ad ædes Quæſtoris confluxere pia va-
riorum titulorum Sodalitia, nemine aut iubente aut ro-
gante

gante, vel stipendium offerente; Processerunt & Religio-
 forum Mendicantium Ordines sub distinctis Labaris; mox
 & Metropolitanum collegium ultro adfuit præter exspe-
 ctationem & morem, cum aliàs numquam (nisi dum ef-
 fertur proprius Archiepiscopus,) soleat humãdis corpo-
 ribus interuenire. Accessit demum amplissima Senato-
 rum Curia ad obsequium, quod vix alteri præterquam
 suis Proregibus vita functis præstare consuevit. Cæte-
 rorum qui eadem spontanea deuotione confluerant il-
 lustrium ex omni equestri ordine virorum ratio aut nu-
 merus in conferta multitudine iniri non potuit; cunctis-
 que vnum fuit stuporis argumentum, illic se videre con-
 gregatos quò nullus conuocarat. Eadem Matronarum,
 cæterique foeminei sexûs ambitiosa pietas, ac visendi
 ardor: quacumq; funebri processio ducenda erat, vtrim-
 que palatiorum ac domũ fenestras, pergulas, arcus oc-
 cuparant numerosæ prospectantium facies, vnde quaque
 ex porticibus, muris, transennis eminus venturo specta-
 culo inhiabant centeni milleni oculi, ipsa ædium tecta
 leniter accubua sub imbelli ac populosa omnis ætatis
 turba procul nigricabant. Tanti nimirum erat, obscuri
 & vix noti militis pauperem filiam efferri ad sepulturam.
 Certè numquam aliàs sic visa est vniuersa Lima com-
 moueri.

Prodiit denique sub vesperum è Gundisalui laxatis
 foribus mortuale pretiosi pignoris feretrum, cui spon-
 rancos humeros primum supposuit Capitulum Metropo-
 litanum, eo honoris obsequio quod solis Archiepisco-
 pis vitâ functis præstare solet. Inde post emensam graui
 ardoque incessu primam plateam ventum ad quadri-
 uium, vbi feretro deposito successit in piæ sarcinæ baiu-
 latum Senatus Curie Secularis. Post hunc deuotissimè
 succollarunt primores Ordinum religiosorum, partien-
 do vices per vicos & terminos compitorum. Muniebant

vtrin-

utrimque portantium latera Excellentissimi Proregis armati stipatores, tum ut per densam multitudinem vi & clamore laxarent vias, tum verò ut à deuota rapacitate populi reliquias poscentis protegerent virgineum cadauer, nam ut singuli velut in tumultu Rosam acclamabant *Sanctam*, ita violentiores ac valentiores passim inhiabant sandapilæ, auidi paratique inde decerpere quidquid possent, nî hastatorum bipennes quasi sepem obiecissent. Certè si cupidissimæ huic turbæ quod libuit licuisset, periculum erat ne sacri corpusculi pars modica aut nulla ad Templum perueniret. Nec tamen sub tam vigili ferreaque custodia caueri potuit, ne vbi ad Valuas Ecclesiæ ventum est, cadaueri partes vestium, corona, & palma deesse notarentur, ibidemque pro ablatis alia fuerint reponenda.

Dum in Templi limine (; quod Rosa adhuc mortalis tam sedulò triuerat) mortua sistebatur, ad asperisionem lustralis aque quibusdam videbatur noua hilarescere iucunditate virginea facies in niueo veli candore rosea, inque purissimi amictus nitida serenitate formosior, collo totoque corpore flexilis, ut pene exclamaretur: *non est mortua puella, sed dormit*. Illatam Sacello maiori excepit tumulus gradatim à pauimento eleuatus, at illustriori ostento ibidem Virgo Deipara videbatur excepisse Rosam suam, nam sub ijs ferè motibus in alio Sacello prodigiosæ Imaginis cui à Rosario nomen est, repente splendidus vultus micuit spectantibus qui propius adstiterant vniuersis. Mox eò confluit torrens ingentis populi, & pauori gaudioque medius palam soluitur in lachrymas; inualescit supplicum clamor, ut non defuerint qui suspicarentur Imaginem portentoso insuper sudore commaduuisse; sed re diligentius explorata compertum fuit non nisi meros splendores esse, at insolitos, festiuos, benignos, quibus Virgini ea ipsa Regina Virginum publicè applau-

applaudebatur. Sed redeundum ad Rosam in suo iam tumultu spectabiliorem, & reciproca accensi vultus suauitate renidentem, huc enim totus populi refluxus incumberebat, sed opportunè tumulum circumfederalant cœnobij Patres dignitate ac senio grauiores, tum ne thesaurus illi diriperetur, tum vt eidem decenti ordine admouerent debiles & mancos, qui spe (: haud inani) obtinendæ curationis accedebant. Verùm de his in Mantissa. Paulò remotius constiterat hastatum Proregis satellitiũ, vt confusam molem irruētis populi distineret si posset. Vix tamen potuit, nam prementium tanta vis fuit, vt Lessi mortualis cantoribus in altaris crepidinem eluctandum fuerit ad lugubre officium vtcumque solito cantu explendum.

Assistebant ritui funebrium Limanus Archiepiscopus, Regius Senatus quem *Audientiam* vocant, Collegia Metropolitanum & Curiale, Regularium Prælati, & equestri ordinis nobilitas conspicuè numerosa. Itaque dispositis omnibus, dum inchoandum erat officium sepulturæ quo Rosæ corpus è Templo efferretur ad fossam in Aula Capitulari præparatam, subito per omnes latissimæ Ecclesiæ angulos tanta insonuit promiscuæ multitudinis vociferatio, tam inconditus ac flebilis deprecantium vlulatus, vt metu confusionis ac tumultus supersedendũ, funebrique processione abstinendum fuerit, admonito populo, vsque in posterum diem charissimi illius pignoris sepulturam differri. Sub huius promissionis ac certæ spei solatio persuasum multis vt domum secederent postredie ad tumbæ spectaculum commodius redituri. Sic agminatim & sensim dilapsa plebeia frequentia proceribus aperiri cœpit liber aditus spatiumq; accedendi propius ad venerandum corpus famulæ Dei, manũsque innocentissimas deosculandas. Rursus interea succreuit curiosa multitudo, rursus etiam circa tumulum conglomerabantur impetuosa turmæ, quas vt vidit Archie-

pisco-

piscopus, gestu, signis (: vox enim audiri præ sonoro strepitu non poterat) Patribus innuit, ut corpus Virginis in Sacristiam deportarent. Verùm nec ibi sat tutum fuit sequente ac premente turba. Igitur ad securiores pluribusque valuis disclusos recessus intra Nouitiorum adyta comitante cum paucis Archipræsule transportandum fuit; instabant sequacium agmina, vim portis illatura, nisi Religiosorum cunctis locique reuerentia intercessissent. Demum etiam inde ultimo simplicium Nouitiorum Oratorio illatum est, ibique sub excubitoribus à Priore constitutis pernoctauit. Hic tandem Archiepiscopus solitudine pium feruorem acuate in genua procubuit, manui Virginis reuerenter apprehensæ pluries deuota oscula fixit, eamque non solum in iunctura, sed in singulis digitorum articulis ac si viueret, tractabilem sensit. Aderant nonnulli è Senatorio ordine, magnæque felicitatis loco habebant, posse illic de genu fimbriam virginei habitus osculari, nec ulli horum ea fuit pectoris constantia, quæ lachrymas temperaret.

Postridie adliuente matutino crepusculo iussi custodes venerabile pignus è Nouitiorum domicilio in maius Ecclesiæ Sacellum ubi pridie consisterat retulerunt, inque eiusdem tumuli reclinatorium sublimarunt. Deinde laxatis templi foribus admissus populus undatim intruit, cancellos omnes, subsellia, pegmata, scamna confertim impleuit, felicem se quilibet arbitrabatur, sicubi loco editiori potuisset stationem occupare. Verùm ubi æs campanum solito maturius funebri Missæ & solemni exsequiarum officio signum dedit, subito reliqua templi capacissimi amplitudo superuenientibus angusta fuit, neque enim (: uti pridie) soli incolæ, sed & remotiores ac colæ à sex & amplius leucis accurrerant, nemine inuitante. Circumstetere denuo Proregis stipatores, at ij si pridie impetum plebis sustinere vix potuerunt, hac die

ne vix quidem potuere. Certatim omnis ætas & sexus
vrgebat aditum, hic calculos precarios, ille cerea Agno-
rum Dei amuleta, alius sudarium, numisma, coronulas
& quidquid charum ad manus erat, contingendo sacro
corpori eminus. cominus suppliciter prætendebat. Hinc
turba languentium aut mutili corporis vitio miserabi-
lium penè cum iurgio flagitabat accessum, vt feretrum,
contrectando speratam apprehenderet sanitatem; inde
infantes per obstantium capita sublimes mittebantur ad
salutiferum contactum sacri cadaueris. Nec tanta mili-
tum ac religiosorum cautela, vigilia, custodia sat fuit, ne
pluries Rosæ defunctæ vela, capilli, vestes frustillatim,
a solertioribus diriperentur captandarum reliquiarum
prætextu, adeo vt ante sepulturam de integro sexies fue-
rit reuestienda. Tota deinceps cura erat saluandi ex ani-
me illud corpusculum ne ante sepulturam importunis vel-
licationibus discerperetur, iam enim notatum erat,
vnum ei deesse digitum, ferro an. morfu occultè detrun-
catum, non liquet.

Inter hos motus collectis in chorum cœnobitis pro-
ceditur ad solemne Missæ sacrificium, adistente in Pon-
tificialibus ornamentis. Illustrissimo D. Petro de Valentia
Guatimalæ Episcopo, qui aduenerat (intrinmissus per
Sacristiæ posticum; nam aditus per oppletum multitudine
templum haud patebat) officium sepulturæ post Mis-
sam proprijs manibus peracturus. Resonabat vndequa-
que Ecclesia perpetuis vocibus Rosam *Sanctam* procla-
mantium, ita vt neque canentem Religiosorum Chorum
foris audiret populus, neque ad chorum pertingeret vox
Sacerdotis aut Ministrorum Altaris, pulsū ac tintinna-
bulis signum dabatur choro cum respondendum erat Sa-
cerdoti, sed frustra fuere omnia præualente secularium
clamore: tandem necesse fuit cantores choro egressos
ipsūmet altare vbi litabatur circumdare, vt è propin-
quo

quo vicissim audirent & audirentur. Sic ægrè demum inter sonoros templi strepitus quasi canoro quodam silentio ac ritu nutu consummata fuere Diuina mysteria. Deinde Antistes è throno progressus ad feretrum, thuris & lustralium asperfusionū ceremonias inter consuetos psalmodum & Responsoriorum modulos obibat decenti pōpa, velut mox ad vltimam efferendi humanidique sacri corpusculi processionem accingendus. At rursus nouis ac validioribus ingemuit clamoribus stipata turba, rursus densato cuneo vndique irrueratur in suggestum tumuli, Rosam suam alij vltimò cōtrectare, alij extrema eius manibus (: si possent) aut vestibus dare oscula, alij saltim postremo eam intuitu eminus salutare importunissimè contendebant, iterum laborabatur sub auido tot Rosariorum, crucum, numismatum affricu, denuo Virginis habitus tentabatur forficibus. Ergo prudeus Antistes vltioris violentiæ proclui metu conuersus ad Priorem, & grauiores Patres monuit diuertēdum esse præfens periculum hac altera dilatione sepulturæ, sibi nequaquam id tempus videri idoneum, quo possit sacrum illud cadauer per tot hominum globos ac manus integrum deduci in fossam. Assensere consilio Patres, statimque nutu, signis, vocibus persuasum vulgo, Rosæ sepulturam ex placito Illustrissimi Præfulis in horam commodiorem, consultò reseruari. Gratissimis auribus hoc nuncium admisit turba, maximè vt vidit Episcopum depositis omnino Pontific alibus ornamentis rhedam conscendere, ac domum properare.

Fauebat confirmandæ populari credulitati publicum argumentū ex constanti virginei cadaueris tum pulchritudine, tum suauolentia miraculosa, quæ duo veluti fide-iubebāt nullum fore seu deformitatis seu corruptelæ aut graueolentiæ periculum si vel in plusculos dies sepultura differretur. Omnium hætenus patebat oculis

uariata defunctæ Rosæ species qualis à primo exhalati spiritus momento fuerat; per triginta & sex horas idem perstiterat placidissimi oris decor, labiorum venustas, oculorum semipatentium viuax fulgor, & manuum candor; inter tot suffitus halitus & lumina, sub aëre tam humido, calido & ex concurrentium refluxibus puluerulento nulla Rosæ vultui infederat fuligo, nulla genas tingerat flauedo vel horridus pallor, in maxillis, in naribus, in palpebris nil flaccidum, decolor, triste, aut emaciatum, perseverarat eadem flexilium membrorum tractabilitas, eadem niuei vultus gratia & amœnitas, denique videbatur adhuc non mortua sed sopita. Porro mirificæ cælestis odoris, qui à sacro corpusculo spirabat, fragrantia ne quidem cessauit in sepulchro, nam post decem & nouem menses (: vt cap. seq. narrabitur) exhumata Rosa eundem seruabat ac præsentibus adhalabat odorem, quem quidem in die sepulturæ alij rosaceo simillimum, alij velut ex liliorum, rosarum, balsamorum totiusq. florilegij mixtura compositum perceperunt; verum cordatiores his altiolem, suauiolem, nobisque Paradisi exulibus peregrinum & incognitum iudicarunt.

Hinc populus dilationis iam securus imminente meridie à templo disfluxit ad ædes proprias. Euacuata utcumque Ecclesia de more adductæ pessulisque firmatæ sunt fores, nec alia sperari poterat tumultu Rosæ opportunior hora, quàm qua totus Religiosorum Conuentus regulariter pransurus existimabatur. Itaque vbi tantilla ab incurfibus libertas fuit, repente adornatur funebris processio, silent campane, at cantu submisso psallunt Fratres; deportantur in ædem capitularem pretiosa Virginis Rosæ lipsana, illic in præparatam è cedro arcam reclinata ferreis vndique clauis occluduntur, denique fossa obruratur, & cocti lateres tenaci calce reuincti inæternuntur. Sic tandem in tuto locatis Rosæ exuijs, om-

nique

inique precum & hymnorum ritu ex rubrica Ordinis peractum ad refectiōem . Verū non diu stetit vnda populi, quin post meridiem velut ex inducijs ad templum copiosior afflueret . Ast vbi illic quæsitum oculis charum pignus abesse conspexit, turmatim in claustrī peristylum irruit, ædem capitularem impleuit, & Rosam liberrimā vociferatione *Sanctam* inclamans, dum plus non poterat, puluerem sepulchri terramque reliquiarum loco certatim asportauit . Inde continuo rhedarum ordine & com meatu per mensem & ampliùs personæ illustriores proficiscebantur ad paternam Rosæ domum , visuræ ac veneraturæ hortēsem cellulam quam Virgo solitudinis studio inhabitarat; conquisitum vndique apud Rosæ parentes , apud Quæstorem Gundisaluū, si quid suorum vten silium , pannorum , aut pauperrimæ supellectilis obtineri posset, grata memoria asseruandum .

Augebatur quotidianis incrementis deuota populi frequentia circa sepulchrum , ob eximia quæ palam inde crebrescebant beneficia curationum, nec videbatur tantæ Virgini debitis honoribus satisfactum , quoadusque solemnioresexequiæ (: quibus ipse Prorex interessē poposcerat) nondum fuerant celebratæ . His igitur constituta dies 27. Augusti, velut quæ Proregi minùs videbatur negotijs suis impedita . Sed quia hæc Dominica erat, quæ (: nisi pro præsentī defuncto) lugubribus officijs interpolari facile non debet, hortatu Archiepiscopi eligitur dies vicinior minùs impedita . Verū hæc deinde non vacauit Proregi, sicque pluries inter hunc & Archiepiscopum variata die tandem ambo in quartam proximi Septembris ex abrupto conueniunt, quod vtrique postea tanto fuit iucundius, vbi intellexere hanc diem ex Romani Calendarij censu alterius S. Rosæ Viterbiensis anniuersario honori esse dedicatam, neque in illam se humano consilio sed diuino impulsu concorditer incidisse .

Ad-

Adfuere igitur ambo die præfixa, cum vniuerso tum Ecclesiastico tum seculari Magistratu. Rursum tota sedibus remota ciuitas Sancti Dominici ecclesiam impleuit. Dictum illic pro concione de felicitis Rosæ mirabili vita & encomijs, peractum pompa funebri Altaris ministerium, temperauit sonoras confusi populi inquietudines dolorifica sacri cadaueris absentia, sed nihilo segnius itum in vota, & dum ad Aram Sacerdos pio Numini commendabat defunctam Rosam, voce non impari sese populus commendabat Rosæ.

Quando hæc agebantur Limæ, celeberrima Rosæ fama rapido cursu totius penè Regni oppida, vicos, municipia permeauit, vbique festiuis applausibus ac publicæ latitiæ signis nouæ calorū ciui acclamatū. *Potosi* trecentis leucis à Lima distitum illa tenus Rosam neque de nomine nouerat, verū vbi beatum Virginis transitum percepit, totum repente impulsu altiori in communem gratulationis impetum efferbuit, sonuere in turribus æra campana, micuere luminaria, increbuerē voces & laudum acroamata. Sic passim regio Peruana (: etiam vbi Rosa dum vixit penitus ignorabatur) mortuam celebravit vniuersali iubilo, acclamatione, votis, quod sibi cuncti populariter ab ea solatium, tutelam, suffragium pollicerentur. Nec sefellit pia fiducia, vt in appendice Mantissa summatim recensetur.



C A P. X X X I.

Rosæ sepulchrum Ordinarij auctoritate mutatum solemni corporis translatione.

VLtimis Exequijs tam magnificè splendideque peractis credebatur, populum sensim à confluxu & importunitate destitutum, ut pleraque solent tractu temporis elanguescere: sed contra euenit; nam ipsa miraculorum celebritas & multitudo in dies ad inuisèdum Rosæ sepulchrum plures pluresque accersebat. Quin vulgaris tota Vrbe fremebat querimonia, sacrum Virginis corpusculum loco nimis abdito situm esse, ubi ob clausuræ leges nec omnibus horis nec ab omni sexu visitari poterat. Idem paulatim cum querula plebe censuere nobiles ac primores, demum & Ecclesiarum Prælati, Præfati Regularium, Senatores, alijque celsioris notæ priuatis suffragijs in eam conuenere sententiam, constantibus tam accolarum quàm incolarum votis condescendendū aliquando fore, de pretiosius pignoris in locum celebriorem Translatione iam seriò tandem esse cogitandum. *Rosam* communem Limensem thesaurum, piorum solatium, afflictorum remedium publico deberi. Sed expectandum erat Limensis Archiepiscopi officiosum arbitrium. Is verò de statu rei ardentissimoque omnium studio admonitus confestim eadem die 27. Februarij 1619. Decretum expediri iussit huius tenoris: *Coram Illustrissimo Dom. Bartholomæo Lobo Guerrero Archiepiscopo Limano Regia.*

Regia Maiestatis Consiliario &c. lecta & inspecta fuit petitio &c. Dixit, quòd attentis rationibus in ea relatis, universalique & publica acclamatione, qua in tota hac ciuitate & Regno Rosa de S. Maria monialis tertij Ordinis S. Dominici proclamatur Sancta, dabat facultatem, illius corpus è sepulchro quod nunc occupabat, transferendi in alium decentem locum intra S. Dominici Ecclesiam, ubi magis videbitur Patri Magistro Fr. Augustino de Vega dicti Ordinis Provinciali. Signatum ab eodem D. Archiepiscopo coram me Doctore Ferdinando Vecerril. Gratis.

Ergo Translationis actui designatur ipsum S. Patriarchæ Ioseph peruigilium, dies nimirum xvij. Martij; citius enim noui conditorij fabrica cum suo ornatu absolui non poterat. Vt obitus Virginis mortem Christi expirantis in Cruce per complura symbola exprefferat, ita & sepulchrum eius fore gloriosum diu ante fuerat reuelatum. Nunc verò etiam quædam Resurrectionis dominicæ reuiuifcebat imago, nam vt Christus parte feriæ vj. toto Sabbatho, & initio Dominicæ iacuerat in tumulo, sic Rosa parte anni MDCXVII. toto anno MDCVIII. & initio anni MDCXIX. quieuerat in sepulchro, in quo & datum ei fuerat nō videre corruptionem, & corpus æquè odoriferum inde prodijt sicut intrarat. Solæ Virgineæ manus tot osculis fidelium millies obtritæ, (forsan & aurorum ferro dentibusue vndique pertentatæ) nonnihil de primo candore remiserant. Hæc notata fuere ab ijs qui ipso Translationis die summo mane effossam Rose cadauer è veteri tumba lignea transposuere in nouam itidem cedrinam at intus forisque deauratam & duplici serrâ præmunitam. Igitur omnibus ritè ordinatis die qui supra domesticus Religiosorum cætus frequentissima vndique ceterorum Regularium caterua stipatus à Choro rectè processit ad Aedem capitularem, præeunte Crucis vexillo cum acolythorum quaternione, binisque chorbulis.

bulis, subsequente Prouinciali in sacra diploide cum sacris Ministris itidem pretiosè tunicatis. Adfuit paulò post Archiepiscopus cum suis, comitante S. Officij Iudice ordinario D. Feliciano de Vega Canonico Metropolitano, & Archipræfulis Vicario Generali. Recitatis de more Orationibus, dataque aspersione & suffitu sex Sacerdotes linteati stolisque ac manipulis decori Arcam cedrinam subleuarunt in humeros, itum ad Ecclesiam conchiliatis peristromatis, holosericis aulæis, velis byssinis à summo deorsum obpalliatam. Premebat baiulantium vestigia Archiepiscopus, inde reliqui ex ordine proceres Virique illustres, vbi sub templi foribus tumba deaurata promiscuæ multitudini in conspectum venit, festiuus vndique clamor ad astra increpuit, confusæque vociferationes plaudentium, lachrymantium, implorantium omnem reliqui cantus ecclesiastici auditum surripuerunt. Dum sarcophagus coram principe Ara in sublimem tumulum huic vsui sumptuosè adornatum, attollitur, Archiepiscopus ad latus Euangelij confedit in throno; Prouincialis assumpta *casula* cum Ministris ad altare facturus accessit, Phonasci & cantores ex dispositis odeis symphoniæ modulos inchoarunt, verùm populus vni Virginis tumbæ iconibus ac Rosarijs contingendæ intentus circa tumulum laborabat. Huius circuitum faces cereæ xxx. occupant, tumbæ verò gradatim circumstabant in xxi. argenteis candelabris totidem bilibres candelæ; totum deniq; contabulationis systema cõtegebant phrygij operis peripetasmata, & stragula auro turgido latè simbriata. Denique vniuersa hæc scena non tam funeris quàm triumphi videbatur.

Post decantatum Euangelium in editiori suggestu comparuit facundus prædicator dicturus ad populum; is erat P. M. Fr. Ludouicus de Bilbao primarius Limenæ Vniuersitatis Cathedra-
M m
ribus

ribus annis Rosæ confessiones exceperat, ita plūs ceteris illius spiritum, exercitia, arcana lumina, Sponsiq; fauores habebat exploratos. Vidisses mox omnes arrectis auribus diriguisse immobiles, & in multitudinis tam verborū frequentia repentinum silentium desertæ solitudinis quietem figurabat, solo ardentissimo studio auscultandi. Dictum ibi de Virginis baptismali innocentia nullo vquam mortali piaculo violata, de illibato mundissimę pudicitię flore, de pœnaliū exercitiōrū austerā duritię, de miris illustrationibus, de seraphicis ardoribus, & quidquid intra horarij sermonis compendiū substringi potuit. Rari erant, quos sub concione tum sacri cadaueris præsētia tum recens ac viuā gestorum memoria non medullitus compungeret, multis etiam lachrymę fluebant, ab omnibus reuerentię repetitum in suggestu Rosæ nomen patulo sed taciturno gestu excipiebatur.

Finita panegyri, & solemni sacrificio ad Aram consummato Archiepiscopus Pontificalem assumens habitum, cum pedo & infula processit ad tumulū, sacris Ministris & quatuor ex Metropolitano Collegio dignioribus medijs. Peractō ibidem reliquo precum, antiphonarum, psalidorumque ritu Prouincialis cum ceteris religiosorum Ordinum Prælati (: Sacerdotali singulos amiciente stola) tumbam ē tumulo demissam suscepit in humeros, sicque adstante Archiepiscopo, & circumstante diuersorum Tribunalium & ciuili Curię Magistratu illata fuit proprię cryptę ad dextram summi altaris affabrē in hūc vsum elaboratę, quę tota intus oblita auro reddebat fulgores quos arcuato sinu recipiebat à luminibus. Eandem foris muniebat ferrea crates itidem inaurata, & inclusi pignoris tam patula prospectui quàm raptui arcta & aduersa. Sanē deuoto populo nil hac translatione gratius potuisse accidere testatus est confluxus, qui exinde vt liberior sic quotidie numerosior fuit, adeo vt tandem

de alia translatione fuerit cogitandum, ne vicini summi Altaris ministeria inturbarentur quotidie immodesto concursu populorum, quos partim veneratio partim miraculorum & gratiarum frequentia attrahebat.

De Altari ad Altare tantisper se transire protestabatur S. Hieron. quando à suo Tractatu de altari thymiamatis transibat ad scribendam epist. 8. Virgini Demetriadi. Idem videbatur circa Virginem Rosam accurrentium sensus: nam ab ara maxima subito conuertebantur ad propinquum Virginis sepulchrum velut ad secundam aram, hic perpetuus tumultus erat offerentium vota, suspendentium anathemata, deponentium grallas & scipiones, denique aliter consulendum fuit reuerentiæ sacri Tabernaculi prostantis in ara maiori, ne huic assidue obuerterentur dorsa hærentium ad Virginis sepulchrum quod & locum presbyterij incommodabat, siquidem hoc in Ordine Prædicatorum *ad cornu epistola* (:vt vocant) constructi solet. Ergo collocandis Rosæ exuijs alius demum commodior electus est locus, ipsum videlicet B. Catari-næ Senensis Sacellum ab ara maxima ad læuam sat diffitum; Videbatur tam simili filiæ deberi iste sinus Seraphicæ suæ Matris ad quietem, si tamen quies dicenda erat, cui tanti quotidie strepitus & clamores deuotæ plebis circumsonabant, licet minori impedimento rituum Ecclesiasticorum, quibus solis aræ maximæ spatium esse liberrimum oportebat.

Interea Limam peruenere litteræ Apostolicæ, quibus auctorati Iudices commissarij nouum ibidem erexere tribunal ex formula à S. Rituum Congregatione præscripta, ad effectum examinandi Testes de Vita & gestis ancillæ Dei Sororis Rosæ à S. Maria. Itaque examini datum initium anno MDCXXX. die xvij. Maij, sed ob multitudinem Testium (: CLXXXIII. fuere:) variosque morarum obices vsque in Maium anni MDCXXXII. durauit

perquisitio: cui de mote ad complementum supererat visitatio tumbæ & reliquiarum famulæ Dei. Igitur deputati inspectores Ioannes de Texeda & Ioannes de Vega, Doctores Medici, Ioannes de Valenzuela & Bartolomæus de Tiunico Secretarij cum Aloyfio de Molina chirurgo. Hi coram P. Magistro F. Gabriele de Zarate tunc Prouinciali aperta arca lignea repperunt Virgineum corpusculum expleto ferè post obitum anno quintodecimo consumptis vndequaue indumentis, & ossibus integris; & adhuc sicca hinc-inde carne obductis. Porro odorem exhalabant nō qui cadauerum esse solet, sed quo fragrant siccata ad Solem rosæ; Iurauit tamen primus Medicorum, peculiarem simul interhalasse suaueolentiam, quæ præsentium non olfactum dumtaxat mirificè recrearit, sed & animos improuiso solatio perfuderit, atque arcano deuotionis sensu omnes demulserit. Hinc iidem inspectores aulam Capituli adiere lustraturi primum Virginis sepulchrum, è quo fideles certatim hauriebant puluerem ad varia morborum genera depellenda. Illic singuli successiuè manu immissa explorarunt cauam modicæ scrobis profunditatem, ex qua nonnisi quatuor aut quinque pondo terræ videbantur eruta aut asportata. Cæterum aliundè plurimis constabat testimonijs, complures pulueris modios ex illomet foramine (: quod vnicum patebat, vbi Virginis defunctæ caput iacuerat) fuisse illactenus effossos varièque per Regnum distributos. Vnde non leuis coniectura fuit, vt S. Raymundi ita & Rosæ veteri sepulchro hoc datum esse diuinitus, quòd in locum sublatis pulueris alius continua scaturigine perpetim subnascatur.

Accidit demum anno MDCXL. quòd Ord. Præd. in Romana Curia Procurator generalis litteris priuatis Limam scriptis admonuerit Patres, habendam esse rationem exactissimam Apostolicæ Cōstitutionis Urbani VIII.

anno

anno MDCXXXIV. die v. Iulij emanatæ, quæ incipit : *Celestis Hierusalem ciues &c.* Doluerunt Patres, integro ferè sexennij spatio nullum penitus exemplar imò nec tenuissimam famam huiuscemodi Constitutionis in illum usque diem Limensibus innotuisse : sed quid mirum in tanta regionum distantia, perque tot hostium classes, piratarum insidias, & naufragiorum crebra discrimina ? Verùntamen Patres ad primum saltim priu atq̃ illius epistolæ conspectum subito parendum rati, ex norma dictæ Constitutionis, quidquid intempestiuum Venerabilis Rosæ cultum sapere forsan videbatur, eadem nocte aboleuerunt. Repentina isthæc mutatio postridie deuoto populo visa est intolerabilis, quærebat loco solito Rosam, asylum ac solatium suum, reposcebat à Sancta Catarina Senensi alteram hanc Limensem Catarinam, impletur Sacellum questibus, & quæ vulgi sub pietatis obtentu esse solet suspicandi, iudicandique temeritas, spargitur, Rosæ veneranda lipsana aut furto inscijs Patribus subleuata, aut his conscijs clam in Hispaniam destinata esse. Inde credula & ignara multitudo densatur concursu, inualescit fremitus, nec leue imminuit periculum innoxijs Religiosis, dum rudis & impetuosa plebs iam ad conuicia & minas ferociter progressa primo affatu aut non capiebat aut abnuebat capere facti rationem. Tardè demum, nec sine labore persuasum est importunis, sic consulendum fuisse illustrioribus qui ab Apostolico throno sperantur Rosæ honoribus, nullum in Romanorum decretorum obedientia detrimentum esse, inobedientiam sanctæ Virgini placere non posse, huius pretiosas exuias loco tutissimo sub primi sepulchri custodia Limensibus adseruari, verùm circa illas (: Summi Pastoris mente in similibus iam percepta) nihil extra lineam SS. Rituum audendum fore vel permittendum. Aegerimè adqueiuit vis populi, hoc vno contenta, quòd acceperat, Rosæ suæ reliquias in tuto esse.

CAPVT XXXII.

Et vltimum.

Rosæ elogia ex pluribus
notiora.

ANno quo Rosa mortalitatem exuit, Prouincia Peruana Ord. Prædic. Limæ in Comitij suis congregata libello Actorum ibidem impresso apud Francum à Canto 1617. §. *Denunciationes*. hæc primo loco inseruit: *Denunciamus, admirabilem quamdam Sororem nostram obijssè, &c.* post pauca: *habitu tertij Ordinis nostri* (: anno vigesimo ætatis suæ decurrente) *recepto, ita vitæ monialis institutum in domo paterna manens, & Regula & S. P. N. Dominici constitutionibus inherens obseruauit, vt omnibus alia Catarina Senensîs* (: quam ab ineunte ætate totis viribus imitari conabatur) *in hoc terrarum orbe degens videretur.* Orta fuit celebris hæc Virgo pijs parentibus Lima anno Domini 1586. à quibus religiosè educata, & maxime à Diuino Sponso ita illuminata, vt quintum annum agens ad perfectionis culmen assidujs ieiunijs ac pœnitentia asperitate perungere conaretur. Persigit ergo mirabili abstinentia, pœnitentiaque insigni. Pro lectulo equuleo varijs testulis intertexto utebatur, argenteam coronam ad modum spinæ capiti circumpositam habebat; ferrea catena vsque ad sanguinis effusionem corpus singulis noctibus crudeliter affligebat. Patientia fuit incredibili, humilitate rara; puritate tam animæ quàm corporis insignis. Diuinis reuelationibus admirabilis, Orationi ac contemplationi

ita

ita semetipsam dedit, ut ad vitam unitivam summa cum animi tranquillitate & omnium admiratione perueniret; ad cuius orationis exercitium eam per multum temporis sacra Deipara Virgo singulis noctibus excitauit. Prædita fuit spiritu prophetico, quo multa futura prædixit. Ac tandem cæteris virtutum generibus insignita, præclara sanctitatis suæ relinquens exempla, feliciter in eadem ciuitate obdormiuit in Domino, die 24. Augusti. Humata est in hoc nostro Conuentu eiusdem Limensis ciuitatis in Capitulo Fratrum. Aduit Illustrissimus Archiepiscopus Limensis & Illustrissimus Episcopus de Guatimala; cæterisque Cathedralis & Secularis proprijs humeris feretrum Sanctissimæ istius Virginis magnæ animi deuotione portantes: cuius purissimæ corpus præ multitudinem gentis, languentiumque omnium incredibili & inaudito affectu illud tangere ac deosculari desiderantium biduo insepultum remansit &c. clarissimis miraculis illustratum.

Anno dein proximo, nempe MDCXVIII. Generalia eiusdem Ordinis Comitia Vlyssiponæ celebrata in suis Actis Hispali apud Franciscum de Lyra 1619. impressis, S. Fratres & Sorores qui gloriose obierunt, succinctè idem denunciant his verbis: *In prouincia S. Ioannis Baptiste de Piru obiit Soror Rosa de S. Maria tercij Ordinis, quæ in omnibus S. Catarinam Senensem ad vinum expressit.* Eadem ad verbum habet appendix Dominicano Martyrologio Indiculus Beatorum &c. pag. 103. S. Soror Rosa de S. Maria &c. Iisdem vritur Illustrissimus F. Ioannes Lopez Episcopus Monopolitanus in sua Historia Ord. Præd. par. 5. lib. 3. cap. 31. Rosam appellans *vinum cætypon seu effigiem vitæ ac Sanctitatis B. Catarinæ Senensis.*

Venerabilis Conuentus Limensis religiosorum PP. S. Mariæ de Mercede captiuorum, litteris ad Urbanum VIII. Pont. Max. prolixè at eleganter se diffundit in laudes huius Virginis: merebantur illæ (: cum alijs aliorum
haud

haud imparibus) totæ huc transcribi , sed ne in panegyrim videatur desinere Synopsis historica, sufficiet hic pauca excerpisse. *Rosam* (: inquit) *auream* Sanctitatis Vestræ manibus immittit quarta *Dominica* Quadragesimæ, ipsdē hodie *D. Dominicus Rosam* pariter immittit *auream*, quæ vt auro cælesti abundauit, *post aurum* terrestrē *non abyt*, *fecitque mirabilia in vita sua*. Hanc suo *Rosario* implantauit Deipara, promouendo eam ad gloriosum habitum Prædicatorum, in quo admiranda suorum heroicorum operum *mysteria* ipsammet in *Rosetum* aptè transformarunt, & (: vt de Eugenio dixit Cassiodorus) *gerebat nomine quam possidebat meritis dignitatem*; sicq; (: vt in B. Agnete quondam mirabatur Ambrosius :) *eius ne nomen quidem vacuum est luce laudis*. Sic totus hic nouus orbis sentit de benedicta Virgine Rosa, cui (quod terra non potuit) cæli dedere nomen *Rosa de S. Maria*, Crucem ipsius filo appenderunt rigores verberum, cilicia, clauis, aculei, zona ferrea, obsonia fellea. Tota illius vita pretestabatur cum Paulo: *absit mihi gloriari, nisi in Cruce Domini nostri IESV Christi*, siquidem nil ei iucundum erat extra crucem, in hac vnica cum *dolorosis* versabat *mysteria* tum *Gaudiosa* tum *Gloriosa*. Mirum; huic Rosæ tam humili sese inclinasse procerarum arborum cacumina, dum orabat in horto, sed mirabilius, quod eadem *sicut Palma exaltata* (: vel iuxta aliam lectionem *maritata*) fuerit *in Cades*, quando pronuba Cœli Imperatrice *Rosam* sibi in *Sponsam cordis sui* subarrhauit Filius Dei. Hæc filia *Oliua* numquam oleo caruit, *neque extincta fuit in nocte lucerna eius*, nam gratiam in Baptismo semel accensam vsque ad obitum nulla ei obtenebratio interpolauit. Prophetici sui spiritus æternum monumentum est Limense S. Catatinæ Senensis Monasterium, in quo deum & Mater Virginis (: vti hæc prædixerat) velum assumpsit. postea sacre clausuræ *horto concluso*, quem filia

optarat sibi, dum quinquennis votum puritatis virginialis emisit: at Sponsus maluit ipsam *speciosam in campis*, ut plurimas adolescentulas odore secum traheret ad sequelam. Lima Regū ciuitas felicissimā se arbitratur, dum Sanctitati Vestræ supplex hanc Virginē sibi dari flagitat Tutelarem, ambit habere Matrem, quam genuit filiam, Ciuitas Regum Reginam florum, ita huic Rosæ inscriptum nomen ciuitatis Regum lepidè soluet ænigma Menalcæ apud Virgilium: *Dic quibus in terris nascantur nomina Regū inscripti flores?* huiuscemodi floribus quidni sperare liceat *fructus honoris & honestatis?* nec tuis Beatissime Pater *gentilitijs Apibus* quidquam ad mellificandum offerri potest aptius hac Rosa, quam iustis Ecclesiæ honoribus insigniendo mira dulcedine fideles implebis vniuersos. Hoc orant

Præsentatus Fr. Didacus de Boerques Commissarius Prouincialis.

Magister Fr. Gaspar de la Torre.

Magister Fr. Ludouicus de Teca.

Anno MDCXXXI. literis prima Iunij Limæ exaratis Don Petrus de Bedoja & Gueuara suo & reliqui Limensis Magistratus nomine sic eundem Pontificem alloquitur: *Gratias immense Dei potentie, cui in his remotis Occiduarum Indiarum partibus quondam idololatria spineto obsitis complacuit plantare Rosam tantæ virtutis odore celebrem, quæ sub tertio Ordine Fratrum Prædicatorum, usque adeo horum irrigatione profecit, ut ad perfectionem seculo nostro rarissimam pertigerit, fidem in dies magis magisque faciente cælo, per noua prodigia quibus sepul chrisui terra coruscat. Debet natalem suam huic Ciuitati Regum Angelus iste incarnatus, & nos illius Urbani Gubernatores attenta tam ciuium nostrorum quàm vniuersi Regni communi acclamatione Sanctitati Vestræ humiliter supplicamus &c.* Eodem tenore ac publico nomine iterum

Limenſis Senatus anno MDCXXXII. xij. Iunij ſupplices ad Vrbanum VIII. litteras dedit.

Hoc pariter anno MDCXXXIII. die xx. Aprilis, Ordo B Ioannis Dei epiſtolam qua Roſæ apotheoſim efflagitat, ſic orditur: *Beatiſſime Pater, Venerabilis Roſa de S. Maria terrij Ordinis Sancti Dominici, nata in hac Peruana Metropoli, Virgo fuit tam admirabilis virtutis in vita, & poſt mortem tam miraculis illuſtris, ut ad omnes Lima incolas quâ ſeculares quâ Regulares pertineat eius procurare honorem & exaltationem &c.*

Eodem anno, 1. Iunij ex nomine totius Societatis Ieſu in Regno Peruano Nicolaus Maſtrillus Duran Prouincialis Apoſtolico throno ſic preces ſuas expoſuit: *ut communibus Urbis & Regni huius deſiderijs mea meorumque adiungam, obligatione trahor, ſingularem cum ceteris fauorem ac ſpirituale ſolacium in eo recepturus, ſi Virgo à Deo huic regioni data in peculiarem omnigena virtutis ideam, poſtque felicem ſuum tranſitum dotata calitus tot eximjs prodigijs per manus Sanctitatis Veſtre honorem Canonizationis ac titulum Limanæ Tutelaræ adepta fuerit, quo vigor ac ſtimulus addetur eiufdem patriotis, ut maiori ardore imitentur fidem & virtutem Sanctæ Virginis, &c.*

Eodem anno ac die Prouincialis PP. Eremitarum Sancti Auguſtini, hæc (: ſcribit :) *fertilis Roſa primus eſt parius, quem cum notoriæ ſanctitatis auctario hac patria cælo dedit, ceu fidei ſuæ primitias. Tameſi enim inter huius regionis vernaculos plurimum & porro inſignium Seruorum Dei veneremur memoriam, antecellit benediſta hæc Virgo in iure patria. Nata eſt in hac Peruana Metropoli, in eadem adoleuit & vixit approbante ſimul natura & gratia. Sanctitas in ea annorum prætergreſſa eſt terminos, ac moriendo in ætatis vere, demonſtrauit eximjs miraculis quantum curſus ſuarum virtutum temporis velocitatem*

ante-

antenerit. Ad eius sepulchrum infirmi & arumnosi vitam & salutem inueniunt &c.

Quinta Iulij eiusdem anni Minister Prouincialis PP. Minorum S. Francisci ex nomine sui Ordinis atq; Prouinciæ suis ad Vrbanum VIII. litteris hæc interferit: *Canonizationi ancilla Dei Rosa de S. Maria tertij Ordinis Predicatorum causas suggerunt vita eius tam inculpata, mors tam gloriosa, miracula tam numerosa & eximia, denique summa & incomparabilis edificatio huius Regni tam in Fide nouelli &c.*

Die xij. eiusdem mensis & anni epistola nomine Ecclesiæ Metropolitanæ Limensis eidem Christi Vicario inscripta sic orditur: *Iustum non est, vniuersali horum Regnorum acclamationi vocem deesse huius Aedis Metropolitanæ, pro apotheosi Venerabilis Virginis Rosa de S. Maria conciuis nostræ, cuius vita admirabilis & post obitum prodigiosa miracula tantum in omnibus his Regnis accenderunt deuotionis affectum, ut perspicuè appareat, velle Christum D.N. eandem pariter glorificare in terris, perq; liberalissimas manus Sanctitatis Vestræ dare nobis Tutelarem & Aduocatam huius patriæ suæ, cuius ex hoc primo fructu præclarus honor velut à capite harum amplissimarum Regionum ad singulas pertingat, &c.*

Anno MDCLIII. Antonius de Leon Pinellus in supremo Indiarum Regio Senatu Relator &c. Libro suo de Vita Serui Dei Turibij Alphonsi Mogrouedij Limensis quondam Archiepiscopi impresso Matriti sic de Virgine nostra commentatur: *Soror Rosa de S. Maria tertium Sancti Dominici Ordinem professæ mortalis, Virgo purissima, Lima patriæ suæ splendor, penitentiæ, orationis, exstasi, supernis illustrationibus admirabilis, cælo in eius vita ac morte grandia per ipsam prodigia operante. Obijt coronata virtutibus, opulenta meritis &c. Illius funebribus interfui, ubi is fuit concursus & acclamatio, qualis Sanctorum*

corpora solet comitari &c. Refert se deinde ad Didacum de Corduba in Theatro Limensis Ecclesiæ cap. 11. Bonauenturam de Salinas in memoriali Peruano cap. 5. & alios, qui huius Virginis cum laude meminerunt.

Denique huic tum Capiti tum Libro grauem ac decorum aptet epilogum honorifica Relatio facta per Eminentissimum ac Reuerendissimum D. Cardinalem Azzolinum in Congregatione Sac. Rituum habita coram S. D. N. die xv. Septembris, anni MDCLXIII. hoc tenore: *Serua Dei Rosa de S. Maria die 20. Aprilis anno 1586. Lima orta catholicos, honestos, ac pios parentes habuit Gasparem Flores & Mariam de Oliua. Nomen ei ex baptismo Isabella: sed propter roseam vultus speciem à Matre Rosa nuncupata, ex suo in Deiparam obsequio Rosa de S. Maria voluit appellari. Sexus atatisque ineuntis teneros adhuc sensus firmavit virtute robusta, & parentum monita simul ac vota adulta probitate, & multiplici pietatis usu præuenit puella, iuuenis excessit. Tantus enim eius amor in Deum, tantus in Deiparam cultus, tanta sensuum & carnis castigatio, morum & cogitationum munditia, ut argentea corona caput redimita, ad instar spinæ quam Christus passus est, ferreaque catena Virgineum corpus singulis noctibus dilanians, sicut lilium inter spinas virginitatem custodierit, quam cum se tota & Deo vouit perpetuam & seruauit.*

Annum agens vigesimum Sancti Dominici tertio Ordini nomen dedit, cuius institutum in adibus paternis mira pietatis & virtutum omnium exemplo coluit. Oratio, rerum Diuinarum contemplatio, ieiunia, corporis afflictio, Mundi contemptus, proximorum bonum, Deo per charitatem prorsus heroicam adhesio eius vita fuit, pro statu viæ perfectissima. Ac proinde prophetico spiritu, extasi, raptuque multiplici, signis, alijsque supernaturalibus donis à Deo aucta, in hereditatis suæ consortium tandem euocata, post prolixi morbi constantem in Domino tolerantiam, Ecclesia

clesia Sacramentis ritè pièque susceptis obiit die 24. Augusti anno 1617. insignem in ipsa morte suæ sanctitatis famam relinquens, quæ & in eius vita & post obitum plurimis fuit signis à Deo cœlitus confirmata.

De Sanctitate, Virtutum ac Miraculorum fama, Processibus autoritate ordinaria confectis, & referente bo. mem. Cardinale Peretto in S. Rituum Congregatione examinatis decretum fuit die 22 Martij 1625. posse si Sanctissimo videretur ad specialem inquisitionem autoritate Apostolica deveniri. Precibus inde Regis Catholici, civitatis Limanæ, & Ordinis Predicatorum prodijt Commissio fel. rec. Urbani VIII. & eius vigore data fuerant litteræ Remissoriales & Compulsoriales ad Archiepiscopum Limanum, eoque impedito vel absente ad Episcopum Guamangæ cum duabus Dignitatibus. Confectus itidem coram Archiepiscopo, Decano, & Archidiacono Ecclesiæ Limanæ Processus in specie anno 1632. die 12. Iulij, & 23. Iulij anni 1634. Sacra Rituum Congregationi Romæ exhibitus, servatis servandis recognitus, apertus, & per interpretem à Cardinale de Torres (: Peretto defuncto) subrogato explicatus. Verum superuenientibus anno 1634. nouissimis eiusdem Urbani decretis destitutum hætenus in causa.

Cum autem fama sanctitatis Seruæ Dei deuota in eam populorum studia, unà cum diuina signorum confirmatione in dies augeantur, per Procuratorem ad id specialiter constitutum humillimè petitur à Sanctitate Vestra admitti & signari Commissionem, quæ proponitur pro reassumptione Cause in statu & terminis in quibus reperitur, ad formam nouissimorum Decretorum.

Et videtur esse locus gratiæ, cum omnia afferantur ex iisdem Decretis prærequisita, nempe supplicationes

Novem diuersorum Ordinum, ac illustrium Virorum Limensium.

Tres Regis Catholici,

Tres

*Tres Reuerendissimi Cardinalis de Aragonia,
Bina Magistri Generalis Ord. Pradic.*

*Fides decreti Capituli Generalis eiusd. Ord. ad idem à
Sanctitate Vestra communi nomine petendum;
Mandatum Procura in personam F. Antonij Gonzalez
specialiter per solemne instrumentum constitutum,
à Generali Ordinis confirmatum.*

*Demum persenerantia & augmentum fame Sanctitatis,
Venerationis, & Deuotionis popularum, & Miracula su-
pra CXIX. ex processu Remissoriali in specie auctoritate A-
postolica confecto, inter que habetur sanatio à lepra, & plu-
rima à paralyti alijsque grauissimis morbis.*

(L. S.) D. Cardinalis Azzolinus.

Bernardinus Cafalius Sac. Rit. Cong. Secr.

Claudit Virginis Rosæ mortalem vitam annus ætatis
suæ trigessimus secundus, claudat pariter vitæ historiam
Caput trigesimum secundum. At liceat finire mellisfluis
Bernardi verbis, serm. de S. Malachia: O Rosa electa,
magna fuit super Te Diuinæ dispensatio pietatis, quæ Te
daruam fecit in oculis tuis, magnam in suis; quæ magna
fecit per Te saluans patriam tuam, magna fecit Tibi intro-
ducens Te in gloriam suam.

FINIS.

MANTISSA

Signorum, Gratiarum, Miraculorum, quibus
 Diuina Bonitas ROSAE Sponsæ suæ
 immortalẽ Gloriam dignata est
 mox ab illius obitu creberri-
 mē manifestare.

T *Empori tacendi tempus loquendi* ponē subiungit Ec-
 clesiastes cap. 3. Bonum factum. Ne de *Miraculis*
 Rosæ scriberem, huc-usque *tempus tacendi* attinuit cala-
 mum. Nunc Maiorum adnuto *tempus loquendi* successit.
 Ergo quod pollicebar in Prolepsi hic præsto, adiecta
 hac paucorum capitum Mantissa, quæ ex authenticis Pro-
 cessibus *Signorum, Gratiarum, Miraculorum* delectum
 exhibeat: non plenum catalogum. Dabunt alij copio-
 siora.

C A P V T I.

Rosa post mortem & sæpissimē
 & multis apparet Glo-
 riosa.

A Loyfia de Serrano (cuius memini supra Cap. XIX.)
 ut Rosæ adhuc mortali familiaris & chara fuerat,
 ita ab immortalī meruit frequenti apparitione familia-
 rius

rius honorari. Inter eas hæc illustrior fuit, qua vidit coram Diuino folio augustissimam cœli Reginam stantem, ac miri fulgoris coronam manu gestantem, velut nouam hospitem expectaret ad illius solij limbum solemniter coronandam. Parte altera niueus candidarum Virginum chorus mediam complexus Rosam tunc recens defunctam hilari & canoro agmine deducebat ad Deiparam. Singulis Virginibus singulæ erant in manibus palmæ, in verticibus coronæ, Rosa palmam deferebat vt ceteræ, at nondum coronam. Aloysia gaudio ac stupori impar dum reliquo inhiat coronationis spectaculo, disparuit visio. At postridie tertia Rosæ apparitio gaudium cumulauit. Nimirum vidit tunc Aloysia Rosam eodem quo pridie nuptiali ac festiuissimo Virginum agmine decorè circumdatam, nec sola iam palma, sed & immensæ gloriæ corona insignitam, cui seorsim applaudebant dispositæ Angelorum phalanges, & beata plurimorum Sanctorum caterua iubilo publico suauissimè gratulabatur. Aloysia sibi reddita, at sibi non fisa spiritualium suorum Patrum arcano examini vtramque visionem exposuit: hi verò ex effectibus concorditer decreuerunt, fuisse immissam diuinitus, omnique fallaciæ periculo caruisse.

Quæstori Gundisaluo de la Massa (: qui coram Apostolicis Iudicibus id verbo scriptoque testatum reliquit) secretò fassus est vir illis diebus mysticæ Theologiæ peritia & contemplationis sublimitate clarus, quòd intra tres hebdomadas ab obitu Rosæ proximas minimùm viginti & duabus vicibus conspicua sibi fuerit gloria huius Virginis intuitu nunc imaginario nunc intellectualem; at inter reliquas visiones vnam excelluisse purè intellectualem, qua puritatis suæ virgineus candor cum sua inæstimabili dote & floridissima aureola ostendebatur absque omni figura corporea, perque simplicem irradiationem

tran.

tranquillæ notitiæ . Hunc reuelationis modum vt planè defæcatum sensuque superiorem, ita ineffabilem fuisse, taliq; obiecto apprimè dignum existimauit, & vt par erat æstimauit.

Doct̃or Ioannes del Castillo Medicus, anno post felicem Virginis transitum quintodecimo iurauit coram Apostolico secundi examinis Tribunali, sibi per visionem imaginariam apparuisse Rosam in medio cuiusdam fulgidissimi luminis quod ipsammet Diuinæ Maiestatis claritudinẽ ac speciem referebat . In huius amœnissimo cẽtro comparebat Rosa amicta habitũ S.P. sui Dominici mirabiliter candente ac radiofo, cuius incomparabilem decorem protestabatur se verbis assequi non posse . Facies Virginis gratia ac splendore micabat infinito, corpus eiusdem vndique circumdederant rosæ candidæ atque purpureæ sine numero; manum dexteram occupabat ramus index nitidissimæ virginitatis, nec minùs è ramo quàm de rosis continuò scintillabant densa gloriæ fulgura . Quin & pluries sub eiusmodi visione Rosa suauiter affata est spectatorem suum, multa ac sublimia illi edisserens de felicitatis suæ excelso fastigio, quæ humanæ linguæ idiomate efferri non possunt . Quidam ex Virginis Confessarijs ab ore eiusdem Doct̃oris accepit, plus quàm quinquagies gloriosam beatæ Rosæ apparitionem sibi cœlitus illuxisse . Ipsemet ultro in postrema anni 1631. depositione coram iisdem Iudicibus persanctè asseuerat, integro sex mensum spatio interdium noctuque se diuinitus admissum ad tantæ Beatitatis spectaculum, ac toties, quoties mentem destinatis horis eleuabat in adyta contemplationis, ostensam sibi fuisse Rosam inter agmina Beatorum . Vt paulatim cessauit hæc apparitionum gratiosa frequentia, non cessauit tamen ex lege vrbanitatis Rosa per aliquot exinde dies cœlesti ephæbo suas vices committere : Angelus erat tenera duodennis pueruli

specie quotidie inuisens Doctorem ex Rosæ nomine, deque huius ineffabili gloria semper nouum aliquid edisserens. Sicque his demum visionibus comiter impositus est finis. Porro eandem Rosam videre in Sponsi sui paradiso vernantibus rosis floridè circumseptam, aureoque diademate redimitam pluribus à Deo concessum fuit, præsertim Viduæ cuidam fama virtutum tunc celeberrimæ, cui se Rosa sæpius in cælesti lumine stitit conspiciam, non sine officioso Angelicarum myriadum comitatu: Semel hanc in imaginaria visione sic allocuta est virgo: *Laborandum est ò Mater, nam permagna res est cæleste præmium. Mihi quidem hæc abundè retributum est pro eo quod laboraui.* Dixit facie in serenum risum festiuè ducta, ac niueo Dominicani habitûs sui nitore admodum speciosa: Interdum huic visa est Rosa in hortis empyreis iucundè spatari cum Christo, qui pauculis passibus ante se Virginem præmittebat. Aliquando conspiciebatur deliciari inter garyophyllos & lilia, velut cum ijs certans de floridæ amoenitatis immarcescibili prærogatiua.

Consideratione haud perfunctoria dignum puto, quod in his visionibus de Rosæ erga patriam affectu ac sollicitudine compertum lego. Vidua supradicta paucis à Virginis obitû diebus priuatim orabat in Ecclesia, ac Rosæ quam pluries in choro Beatorum conspexerat, Limanam ciuitatem & Regnum Peruanum supplex commendabat: mox rapta, intellectuâli visione conspicata est Rosam Diuina luce coruscantem; audiitque blandè respondentem sibi: *Planè sic fiet ò Soror, & quidquid consentaneum fuerit gloriæ huius dulcissimi Numinis qua fruor, me petente summa illa Bonitas concedet. Probè memini eorum que mihi ut peterem fuere commendata.* Concordat huic visioni altera, quæ ex depositione iurata Sororis, Caterinæ de S. Maria refertur in Processu: nimirum, piæ cuidam,

personæ sæpius (: at per soporem) apparuerat felix Rosa, edocens quàm iucundo bonoque statu res suæ erant. Bis tamen eidem solito clarior illustriorque apparuit, primò quando venerat illius animum confortatura inter aduersitates quas quidem tunc patiebatur grauissimas. Secundò, cum supra Virginis sepulchrum manifestè eandem vidit in aëre flexis poplitibus ritu supplicum intercedentem apud Deum pro Lima dilecta patria sua. Nec mirum, duabus his vicibus Rosam solito fulsisse gloriosiorē, nam vbi in priori de patientia agebatur, ostendenda fuit eodem quo Seraphica Mater sua *patientia speciali privilegio decorata*, in posteriori quæ patriam concernebat, debuit vtique ardentissimus erga conciuēs amor post mortem, luculentiùs rutilare. Porro vr visionis sincera assereretur veritas, in muliere comperta fuerunt à peritis vera diuinæ reuelationis critiria, profundior humilitas, agnitio sui nihili, alta mentis tranquillitas, gaudium spirituale nouis diuini amoris incendijs inflammatum.

Prodigiosus est, ac plurium signorum benefico concursu foetum quod referam. Decumbebat in Limano SS. Rosarij cœnobio, iamque extremis agonibus se præparabat P. Magister F. Augustinus de Vega Ord. Præd. tunc Prouincialis Peruanus. Conclamatum erat de vita hominis, cessatum à pharmacis, & ab omnibus Medicis desertus infirmus, sola Rosa sui iam in paradiso secura curam ægroti totam in se transtulit. Dormiebat procul suis in ædibus Christophorus de Ortega homo secularis ac fortunæ infra mediocrē; huic Rosa nocte concubia se clarè visibilem obijcit, mandat primo diluculo cœnobium, adeat, Prouincialem moribundum conueniat, ei denunciet, ex hac quantūmuis complorata infirmitate nequaquam ipsum è viuis abiturum, priùs illi sub Episcopali infula tantisper sudādum fore pro Dei gloria, antequam huius mortalis vitæ molestijs exuatur. His dictis glorio-

fa Virgo disparuit. At Christophorus tantæ præsentia mira dulcedine ac cœlesti gratiosæ dignationis affatu præproperè destitutus erupit in clamores : ah (: inquit) Sancta Virgo Rosa nunc nunc à me recessit . Expergefactus hac vociferatione filius Thomas de Mesa qui propè dormiebat , à Patre totam rei gestæ seriem percepit , sed incredulus multis obtestatus est Patrem vanitati insomniorum temerè ne crederet. Replicuit Pater , se verò non per insomnia , sed expeditis liberrimisque sensibus & vidisse & audisse Rosam hæc sibi seriò præcipientem . Instabat filius , saltim interea quieti ac sopori se redderet . Negauit se posse Christophorus , ac visione ruminanda intentissimè occupatus vigili impatentia diem expectabat . Ut illuxit , monita à filio coniux omnia dixit egitque , ne maritus visionem relaturus domo abscederet , nunc obsecratione nunc iurgio Virum interpellans , ne ludibrium sibi ac familiæ ineptissima fallacis somnij narratione accerferet ; nil fore certius , quàm ipsum febrilis entusiasmi aut delirij arguendum iri . Verùm Christophorus tam propositi sui tenax quàm de nocturni spectaculi veritate indubius hilari fiducia cœnobium adiit , infirmum salutauit , imperata exposuit , ea frontis constantia , animique securitate , vt breui vel sola dicentis alacritas omnem ambigentibus excusserit credendi formidinem . Mira res , non tardarunt manifesta experimenta conciliare dictis integram fidem , nam ab illo ipso momento quo Christophorus loqui desierat , caput æger Prouincialis morbi discessum lentis indicijs aduertere , deinde Virgini Rosæ se commendans totus conualuit , denique ad Episcopalem mitram assumptus in Paraguay satur vite in Domino obdormiuit .

Doctor Balthasar de Padilla Metropolitanæ Limensis Canonicus & Pœnitentiarius de mandato sui Archiepiscopi domum viduæ cuiusdam adierat cum Notario ,

sub

sub iuramenti fide excepturus quæ de Rosæ vita ac prodigijs afferrentur. Dum igitur examen peragitur, apparet viduæ fulgida Rosa, vultu hilari ac familiariter iucundo, gestu verò ac nutu hortatorio, velut mulieri animum faciens ad dicenda quæ poscebantur, & singula approbando ratificans quæ de suis encomijs in tabulas referebantur. Seorsim id postea anno 1630. Vidua Iudicibus Apostolicis aperuit, addens, Virginem tunc quidem sibi fuisse conspicuam eo vestimentorum schemate quo viuens dignosci ac tegi consueuerat, facie tamen multò lætiori & exporrecta, quasi quæ pro obsequio gratiam spiraret.

Alteri personæ spiritualibus exercitijs gnauiter addictæ obtigit alibi conspicari visione imaginaria Beatam Rosam eo loco quem tunc deputati Iudices excipiendis testium de ea responsis ac depositionibus destinârât. Videbatur ipsamet Virgo conclaue perambulare, cum cura omnia circumspicere, suis candidis manibus ordinatè singula disponere, polire, adornare, simulque indicabat ista se agere, quòd illic iusta honoris ac veritatis tributa à mortalibus eo die erat receptura. Simillimum est, quod refert D. Maria de Vfatèguì Gundisalui Quæstoris vxor, hoc addens, gloriosam Virginem in ea functione visam alacriter ipsa graphiaria instrumenta Notarijs disponere, chartamque digerere, protestandò gaudium, quo ex Diuinorum in se beneficiorum iuridica in terris comprobatione mulcebatur. Verùm an hæc visio à superiori diuersa sit an eadem, haud facile discreuerim.

Hic verò subticendum non est, quod anno 1631. Mariæ de Bustamante in Limensi Sanctissimæ Trinitatis Monasterio professæ Moniali accidit, ipsa iuratò id referente. Bona fide hæc coram Apostolicis Iudicibus in causa Venerabilis Rosæ explicarat omnia quæ norat. Verùm ut sexus iste ad seueram publici iuramenti religionem facile

cile trepidat, ac velut inter fulmina censurarum suæ conscientie metuit, post examen anxiam Mariam graues inuolare scrupuli, ne fortè aut per imperitiam respondendi, aut per linguæ memoriæque cespitationem plus vel minus quàm exacta veritas & rigor illius Tribunalis exegerant, distitasset. Fluctuabat misera inter saxū & sacrum; hinc urgebat animi inquietudo ad nonnulla ex dictis seu moderanda seu retractanda, sed ynà cum reluctante summa, verecundia obstabat, quòd determinatè quid in suis dictis corrigere teneretur nesciebat; inde distabat animus nulla opus esse retractatione, at interim delicatæ conscientie deerat secura tranquillitas. Inter has angustias dum nocte quadam in sua cellula solitaria obdormierat, sensit alieno se motu & imperio (: at absque terriculamento) blandissimè à somno excitari. Excitata consedit in lectulo, totoque sopore facile discusso tacita & attenta mirabatur, ad quid, vnde, aut à quo illa hora fuisset in vigiliam reuocata; dumque sic omnia versans animo auscultat & hæsitat, ecce vox lenis ac dulcissima sedenti allabibitur ita inquires: *nihil dubites Maria, neque angaris, etenim Rosa verè sancta est*. Mirum dictu: eodem momento sensit Maria se scrupulo suo liberatam, euauit inquietudo & timoris anxietas, rediit cordi suo tranquillissima malacia, ita vt noctis residuum potuerit sub placido lætæ securitatis silentio transigere, certa tantam tamque repentinam animi quietem aliunde quàm desursum infundi sibi non potuisse; sciebat præterea, scrupuli sui morsus nemini præterquam sibi ac cœlo notos fuisse, cumque maximè nocturnis horis soleret ad omnem peregrinum strepitum expauescere, sub voce præmemorata non tantum nihil expauit, sed planè refecta est.

Plura huius generis superessent, at coronidem imponat Didacus Hyacinthus Pacecus Hispalensis, qui Limæ ex quotidiano hypographice artis lucello victitans à

Didaco

Didaco Morales in Causa Venerabilis Rosę Notario exēplandis transcribendisq̃ Processuum seu Actorum voluminibus adhibebatur. Itaque iussus fuit in Causa prædicta bis mille folia intra certum temporis spatium scribendo absoluerē, eo quidem pacto ne illo cui semper assueuerat caractere vteretur fluido, laxo, faciliq̃, sed alio morosiori, quadro, & adstricto, quem illic *nothum* appellat amanuensium vulgus. Paruit scriptor, at primo die quò laborem orsus est, præ difficultate insueti characteris desperavit se vñquam tot folijs exarandis parem fore, siquidem (: vt disertè ipsemet coram Iudicibus Apostolicis sub iurata fide deposuit) adeo sibi inter scribendum lassabantur digiti, stupebat brachium, diuaricabantur nerui, vt sæpius exclamarit, vereri se, ne ex tanta fatigati pulsus attractione citiùs ipse deficeret, vñumq̃ manus perderet, quàm iniunctum opus absolueret. Igitur die quadam, cum à primo diluculo vsque ad vesp̃ram scribendo laborasset, enormiter fessus, totoque brachio dolens cubitum se recepit, dubius ne fortè postri die vltiori scriptioni inutilis surgeret. Sub eo tædio obdormiscens vidit felicem Rosam ad se intrantem gradu placido ac festiuo, vultu propitio ac lato qui terrere nequaquam posset; & vt certiùs nosceretur quæ esset, illa effigie, habitu, ornatu apparuit, prout ipsam in tabula scitè depictam aliquot diebus ante Scriba noster conspexerat. Tacuere ambo, sed Rosa leniter accedens dextrum iacentis brachium inter cubitum ac pugnum comiter arripuit, validè at successiue strinxit, diuq̃ sic attinuit, nec nisi post moras admodum prolixas placidissimè dimisit, simulque disparuit. Euigilans Paccus, ac mysterij ignarus voluebat animo quid sibi voluerit hæc dulcis apparitio, quid brachij apprehensio, quid illa diuturna & tenax constrictio? an fortè (: inquiebat) conscia meæ instabilitatis, & indolis, qua facile

ab vna ciuitatè in aliam, de Regno in Regnum transcurrere soleo, constantiæ me admonuit, firmitatem imperauit? Inter has cogitationum vicissitudines sese vestiens sensit dextrum lacertum solito agiliorem, at necdum suspicatus quid rei esset, prosequendæ scriptioni vt pridie se denuo totum applicuit: Scripsit ab aurora vsque ad Salutationis Angelicæ pulsus vespertinum nulla digitorum lassitudine, nullo neruorum cruciatu, brachio leuissimo ac supra morem expedito. Agnouit ex tunc salutiferæ apparitionis opportunum beneficium, perrexit totos reliquos dies scriptioni laboriosæ citra laborem impendere, comperit infatigabile robur manui suæ inditum ex imaginariæ visionis contactu virgineo, sicque consummauit opus bis mille foliorum, quæ amodò pauca sibi videbantur præ admirabili scribendi facilitate. Finito volumine obstupuerunt omnes quotquot

Pacecum nouerant, eiusque quadrum characterem festinè, fluidè, indefessè tot characteris illitum considerabant. Hinc ad grandiora miracula transeundum.

†



CAPVT II.

Rosa à morte in peccatorum subitis conuerſionibus & obſtinatione cordium emollienda mirabilis .

Q Vale quantumque Diuinæ omnipotentix molimen & opus ſit Conuerſio peccatoris, & quàm altè cœli terræque creationem excedat, item quando ipſa miraculoſa cenſenda ſit, legat qui voluerit apud S. Thomam, 1. 2. q. 113. art. 9. & 10. Ex his ad Roſam, celebrem Peccatorum apud Deum cauſidicam vt conuertantur & viuant .

Præſentatus P. F. Nicolaus de Agaero in ſua encyclica ad totum Ord. Prædic. Prouinciam Peruanam (: cui tunc vti Vicarius generalis præſidebat) ſcripta die primo Septembris 1617. dum admirabilem Roſæ vitam, obitum, prodigia ſtriſtim ſuis denunciat, inter alia refert, ad ſolum Virginei corpusculi in feretro contactum quàm plurimos repente compunctionis ſtimulo ita fuiſſe percuſſos, vt ſtatim ibidem coram vniuerſa multitudine cœperint elatis vocibus deteſtari ſua ſcelera, deplorare vitam ante actam, reſolui in gemitus ac ſingultus, humiliari coram Altiffimo in lachrymoſam criminum confeſſionem, audiente, ſpectante, mirante innumera circumſtantium turba . Nonnulli (: vt fit) liberioris vitæ, ſolo curioſitatis ſpiritu adducti vt defunctam pulcherrimam Vir-

ginem propius cum alijs contuerentur in sandapila, ad istum primi intuitus exarserunt in subitum intimumque dolorem peccatorum, rigarunt ora lachrymis, protestantes alio quàm venerant spiritu se iam recedere, posthac emendationi vitæ ac emundationi morum se operam daturus efficacem. Forsitan idcirco prouiderat Deus pater misericordiarum, quòd toto ferè biduo palam prostraret in tumultu inhumatum Rosæ suæ corpusculum, vt eius spinæ tam multis fierent in salutem, nam iuxta mellissimum Bernardum felicius numquam pungeris quàm vbi compungeris.

Mater Virginis Maria de Oliua anno MDCXVIII. xv. Februarij coram deputatis Iudicibus inter alia recensuit, post exequias filiæ successiuis interuallis ad se venisse, complusculas etiam ex regularium Ordinum familijs detortas personas antea sibi penitus ignotas, quæ vt suam notoriam egestatem liberali aliquo subsidio subleuaturæ accesserant, ita singulæ profitebantur, hac ratione se mera gratitudinis tributa pendere Virgini Rosæ, cuius intercessionibus vitæ suæ optimam se mutationē debere sciebant, latæ nunc alias se esse ab eo quod fuerant, eoque felicitatis nonnisi post imploratum Rosæ in cœlesti curia, interuentum se pertigisse asseuerabant. Certè operosius & fortè rarius miraculum est languidum ac tepentem in Dei obsequio spiritum repente ad seria religiosæ perfectionis studia erigi validèque succendi, quàm criminofum ab enormitate sceleris ad qualemcumque frugem reuo cari, siquidem hic plerùmque nouit periculum suum, ille inertiae ac securitati altius indormiscit.

Admiratione præ multis dignum est, quod de quodam insigni peccatore ijsdem Iudicibus eodemque mense & anno ex certa sua (vti protestatur) scientia aperuit P. F. Bartholomæus Martinez Rosæ quondam Confessarius & Lincunæ cœnobio FF. Prædicatorum ad S. Mariæ Magdalenæ

Præ-

Praefectus. Quidam profligatae conscientiae vir assidue quidem cum alijs viuificae Poenitentiae & Eucharistiae Sacramenta frequentabat, sed nonnisi in animae suae mortem & exitium, numquam enim toto sacrilegae vitae suae decursu rite integrèue confessus fuerat, ac longissima annorum serie in hoc luto computruerat. Accumulabantur sceleribus scelera, at videbatur omnis occalluisse, synteresis, imò in dies obbrutescebat magis, & prolapsa vsque in profundum impietas contemnebat. Non defuit tamen aliena pietas, quae miserrimum Rosae recens tumulatae commendaret. Mox ille quasi ab annoso lethargo euigilans cepit sentire intus sibilum illius aurae tenuis at potentissimae, qua Deus afflat corda obstinatorum vt instar cerae liquecant. Exhorruit infelix ubi se circumspexit immersum labyrintho tam caenoso & ineluctabili, verum Diuina bonitas vna cum acutissimis poenitentiae stimulis misericordiae fiduciam ingerebat. Quid multa! generalem de totius vitae suae delictis exomologesim amarissimo doloris sensu perfecit, ex horrendis omnemque modum ac numerum supergressis flagitijs nullum subtrahit, & conscientiam quam callus obduxerat, timor Domini in eam emolliuit teneritudinem, vt deinceps minimos quosque excessus tamquam praegrandes pauidissime senserit atque eluere festinarit.

Idem P. Martinez in eodem examine sanctè asseruit, sibi non tantum proprio in excipiendis Confessionibus experimento, sed & aliunde ex concordi plurimorum Confessariorum testimonio constare liquidò, post imploratum Rosae in coelis auxilium innumeros tum Limae tum in vniuerso Regno ex infima scelerum abyssò emeruisse in portum verae poenitentiae, sinceraque confessione & lachrymis animam expiasse. Iam ante (nimirum 11. Decembris anno 1617.) idipsum Iudicibus indicarat P. Antonius de la Vega Loayza Societatis Iesu, quondam San-

At Officij Commissarius, diuersorumque Collegiorum
 successiuè Rector, qui & singulariter ponderandum esse
 monuit, hoc genus beneficij inter validiora & excellen-
 tia solidæ sanctitatis argumenta ex communi SS. Do-
 ctorum sententia meritò computari. Eidem relationi di-
 fertè in illo Tribunali subscripsere P. Fr. Franciscus Nic-
 to, & Magister Fr. Ioannes de Lorenzana, ambo Virgi-
 ginis olim Confessarij, de quibus supra. Consonat his per
 omnia P. Fr. Petrus de Loaysa, additq; duo notatu digna:
 primum est, paucis à Virginis obitu diebus tantam fuisse
 eiusmodi conuersionum frequentiam, quòd Limæ in
 publicis officinis vbicumque tortilia disciplinarum fla-
 gella, setarum cingula, & variæ sortis cilicia vendeba-
 tur, subito defecerint hæc mortificationis ac pœnitentiæ
 instrumenta, ob emptorum multitudinem. Alterum,
 quòd ipse ex plurimis ad seriam pœnitudinem tunc con-
 uersis duas nouerat insignes peccatrices, quas probrosæ
 vitæ deuia nodosis inferni retibus tenacissimè implicue-
 rant, sed ambæ ad odoriferam Rosæ famam compunctæ,
 eiusque validis coram Altissimi throno precibus commē-
 datæ nodos impuritatis feliciter exuerunt, & in calle vir-
 tutis constantem fixere pedem. Non pōtuit, vt in mira-
 culosis corporum, ita in his animarum curationibus an-
 notandis procedi vsque ad singularia personarum nomi-
 na, imò nec decuit, sat esto Limenses alioque in vni-
 uersa Peruana regione Sacramentalis pœnitentiæ admi-
 nistros communicatis generatim indicijs adstupuisse tan-
 tæ morum mutationi in populo, à die qua Rosa in Sponsi
 sui paradiso capit agere suorum ciuium aduocatam: vi-
 distes certatim foëminas abiecto vestium luxu simplicio-
 ris modestiæ habitum domi forisque ostentare, audiuiſſes
 in regularium peristylijs & claustris nocturno tempore
 per omnes angulos cruentis flagrorum ictibus pœniten-
 tiam velut tympanistriam acedix ac tepori bellum indi-
 cere.

cere, comperiffes Confessariorum vbique fedilia planctu & gemitibus obsideri . Denique tam publicè notum tamque populariter crebrum fuit hoc prodigium, vt prænominatus Martinez vir grauiffimus & religionis pietatifq; fama inter eximios clarus neutiquam in dicto Tribunali dubitarit iuratus afferere , videri fibi , quòd à tempore quo Peruuia nostris detecta patuit , nullus vmquam clauerit prædicator , qui tot ac tantis ftimulis gentes illas ad virtutem impulerit, tamq; vniuerfalem pœnitentiæ spiritum , tam luculentum deuotionis incendium excitârit . Mira res, tantum valuiffe vnus Rosæ falutiferos aculeos ad tantorum compunctionem .

Accidit (i. referente apud Iudices coniuge Quæftoris Gundifalui) duas Matronas cofedere obiter ad confabulandum . Harum altera correpto qui fortè patulus adiacebat libello vidit fuccinctè in eo vitam , gefta, obitumq; Virginis Rosæ contineri . Cœpit ergo per otium lectione aufcultante altera ; fed huic ferè euênit quod olim duobus aulicis vitam Sancti Antonij Abbatis fortuita curiofitate legentibus: nam dum altera quafi fallendo tempori lectionabat, hæc velut fubiectis cœleftium flammaram tædis fuccendebatur, sentiebat tam inufitatis at planè Diuinis ardoribus paulatim fe imparem fieri, diffimulauit tamen , ne pretiofæ lectionis ignitam dulcedinem intempeftiuè abrumperet . Succreuit interim flamma charitatis, nec celari vlteriùs potuit arcanum incendium; exclamauit mulier, haud affueta fic in Deo liquefieri & bullire . Mirantur ambæ , in rofeis illis breuium pagellarum foliolis tantum latuiffe ignitabulum , fed Rosam meritò dici *Lampadem amoris* non fat intellexit qui primus dixit Philoftratus .

P. Ioannes de Villalobos è Societate Iefu , Rector Limani Tyrocinij feu Domus Nouitiorum vir in afcetica palæfta exercitatiffimus de femetipfo hæc recensuit eadem

dem Iudicum Tribunali: se Rosæ ultimos spiritus trahenti adfuisse prope mortem, eaque occasione clam petiisse à meribunda, confestim ubi ad Sponsi cœlestem thalamum pertigisset, satageret impetrare sibi à Numine gratuitum illud ac singulare donum quod ipse tunc mente voluebat. Spopondit intrepidè agonizans Virgo, ac paulò post quàm exspirasset comperi (:inquit) manifestis indicijs, spiritui meo donum illud ob Rosæ in cœlis interuentum fuisse mirabiliter impertitum. At Quæstor Gundisalvus sacramento affirmat, sibi fassos esse complures tum seculares tum Regulares quibus rogata Virgo idem in agone promiserat, statim ab eius felici transitu se ex superno Sancti Spiritus myrothecio sensisse, arcanas cordis sui vnctiones, supernorum luminum stricturas insolitas, noui nominis calculos candidos, quos (: vt mone-mur Apocal. 2.v. 17.) nemo scit nisi qui accipit. Nimirū apophoreta hæc erant quæ Rosa promiserat, dum moriēs ad solemne conuiuium se dixerat euocari. Confirmat ista (: sed breuiter) laudatus supra P. Antõnius de la Vega Soc. Iesu, alijque. Sed ad emollitiones cordium obstinatorum Rosæ mediatrice factas reuertamur.

Francisco & Alexandro de Coloma germanis fratribus matertera erat Maria de Xuara mulier prædiues & opulenta, sed animo in consobrinos implacabiliter auerso & obstinato. Alebat idē Franciscus suis impendijs Limæ sex cōsobrinas, & duos cōsobrinos, sed neq; illarū nec horum ulli afficiebatur pertinax fœmina, adeo vt neq; dignaretur alloquio: quinimo ubi testamentum suum condidit, per-quàm studiosè cauit, ne quid ulli prædictorum (:tameſi posteriores oſto notoriè indigerent.) de suis facultatibus legaret, sed ne meminisset quidem. Accidit demum Francisco & Alexandro necessitas aliò tantisper proficiscendi relictis interim Limæ tot inopibus consobrinis. Hic Franciscus suis orphanis acerbè condolens, & quò se

verteret ignorās, Rosam vnicam suæ perplexitatis Ariadnam implorauit, inuenit; ipsa videlicet proximā ante discessum nocte Virgini (: cuius effigiem coram habebat) totam miserabilium ærurnam anxie commendans obsecrabat, suo apud Omnipotentem cordium domitorem interuentu emolliret saxeam illius auersi cordis duritiem, sanguinis ac humanitatis sensum obstipæ materteræ inderet, innocentibus ac pauperiei lubricitate periclitaturis succurreret. Mira res: postridie summo manè Francisco matertera accersit, quem toto xvij. annorum spatio videre noluerat, venienti exposuit noctem se duxisse in quietissimam, tristem, insomnem, iugiter sibi ante oculos obuersante suorum consobrinorum desolatione; quos considerarat omni humana ope tam indigos quàm destitutos: itaque domum quantocyus repeteret, totam horum calamitosorum cateruam in conspectum suum adduceret, velle se omnes amplecti ex ordine, domique sue honestè alere.

Insuper Francisco iniunxit, vnà publicum Notarium aduocaret, aliud se coram eo testamentum rescisso priori condituram. Franciscus tot simul gaudia non capiens, inque matertera matrem Rosam tacitè deuenerans paruit festinus & lubens, cateruam miserabilem adduxit, hic itū in oscula, in dulces lachrymas, in teneros amplexus, recipiuntur in domesticum contubernium octo inopes, mutatur è vestigio inofficiosum testamentum, consobrinæ cum consobrinis totius opulentiae scribuntur ex asse hæredes; ipsi denique Francisco (: nam ordine presbyter erat) Capellania titulo 140. Patacones (: quos vocant) in annum redditum assignantur certis adibus trāscriptis in hypothecam. Rosæ ad corda subigenda, mulcenda, concilianda vim philttri inesse obscure inuuit Dioscorides, clariùs offendit Rosa nostra Limana.

Ludouica Barba nil minùs versabat animo quàm candi-

didum S.P. Dominici assumere habitum. Eius confessorio Rosa dum vixit, aliquando prædixerat certòque assueverat, Ludouicam omnino illomet habitu fore amiciendam, imò hunc ardentissimè ambituram. Hoc vbi Ludouicæ ex ore sui Confessarij innotuit, cœpit vaticinij euentû anxia metuere, habitû ipsum cordicitus abhorere: imò si qua eminus illius suscipiendi aut præteruolaret mentio aut illaberetur cogitatio, velut ad Medusæ conspectum obrigescebat pauida, repugnabat animo, cor obdurabat. Interim Rosa clausit extremum diem, & quasi mors vatis mors esset vaticinij, cœpit Ludouica euacuare inutilem metum, secura numquam suæ menti incidere posse huiusmodi propositum, faciliùs Poëtarum fabulosas metamorphoses quàm talem obfirmati sui cordis mutationem reipsa euenturam. At fefellit mulierem ipsa resistendi fiducia ac pertinaciæ certitudo: ecce enim subitò à morte Virginis elanguit illud contumaciæ robur, evanuit annosus horror, patuit vltro cordis ianua cælesti inspirationi. Exclamauit cum Paulo, *Dominè quid me vis facere?* Inde Rosæ sepulchrum adiit, Virgini causam supplex commendauit, obtineret sibi à Sponso salubrem electionem illius status qui maximè ipsam aptaret Diuinis obsequijs, promoueret in via æternæ salutis. Nec mora, exaudiuit Ludouicam Rosa, Rosam Deus, ac repente illius cordi impluit ignitum at peregrinum desiderium sacri habitus Dominicani. Aestuauit repente mulier, bullit, arsit illo affectu quem semper fugerat, & si vmquam timuerat de eo vel leuiter cogitare, grauiùs nunc timebat pij propositi exequendi opportunitatem sibi aut elabi aut retardari. Diseruciabatur suspicioso angore, quasi non posset appropinquare felix hora, quæ ipsam voti cōpotem efficeret. Igitur Confessario suo eminus conspecto festina accurrit, cor effudit, multisque lachrymis obtinuit accelerari gratiam, qua confestim adhuc illamet die

die in numerum Sororum Tertiariarum adlegeretur, assumpto nomine *Ludouica de S. Maria*. Porro vt primum in candido S.P. sui Dominici habitu se circumspexit, solatijs ex alto copiosis tota permaduit, nec sufficebat explicare animi sui contentissimam voluptatem, hoc vnum dolens, quòd tantæ felicitati diu obstiterat corde pauido & obstinato.

Ludouica de Mendoza coniux Alphonfi Gonzalez de Sancto Martino paulò post Sanctæ Virginis obitum videns eandem populariter tot encomijs celebrari, incredula, seu pro foeminea resistendi dulcedine seu pij affectus contumaci algore fidem sanctitatis eius concipere aut nequibat ant nolebat. Quantulum enim (: cogitabat) perfectionis gradum spatium vitæ tam exiguæ assequi potuit fragilis puella annum ætatis trigesimum primum vix nuper egressa? vnde Rosæ inter plebeios natæ & educatæ, manuum suarum labore sustentatæ, in seculari domo domesticè moratæ ac mortuæ tantarum virtutum schola partuit, aut scala tam sublimium contemplationum in promptu fuit? clament miracula, at Ludouica dubitabat, acclament populi, magis ipsa obsurdescebat: ergo quæ ita cor suum ne crederet obloricarat, validiori pulsanda fuit ariete vt se dederet. Repentino angore correpta est vt manibus pedibusque se putarit demutilatam; neque id satis, grauiorem sensit in suo spiritu procellam, caligo, pauor, tempestas mentem obsederant, cor turbatum, quodam velut terræ-motu succutiebatur. Hic demum illa euidenter agnoscens ab vnica sua pertinaci incredulitate hos esse paroxysmos, subitò manus dedit, duritiem posuit, animoque trepidè in Deum eleuato supplex protestata est, se credere, se corde toto fateri, quòd Rosa verè Sancta sit. Et en repente conquieuit horrida commotio, siluit tempestas, redijt serena tranquillitas. Sic pro

Sponsæ honore zelabat ille Sponsus cui venti & mare obediunt. Verùm à spiritualibus ad corporalia Beneficia tandem hìc descendendum.

C A P V T I I I.

Rosæ defunctæ attactu, odore,
veneratione, mors, mor-
bi, pericula depel-
luntur.

TAmetsi P. Antonius de la Vega Loaysa Soc. Iesu in suis facundissimis Responsis disertè ac sæpius monuerit deputatos Iudices, totam Rosæ vitam à primis incunabulis vsque ad extremum halitum continui perpetuique *Miraculi* loco censendam atque habendam esse, attamen visum ipsis progredi ad specialiora, quæque micuere post eius vitam in beneficio alieno.

Primum in his meritò sibi deposcit locum resuscitatio mortuæ filiolæ semestris, Magdalenæ de Torres. Huic pater erat Gregorius de Torres agricola, mater Ioanna Michaela, ambo victitantes opere rustico in suburbanis Limæ ad viam *Melambò*. Hi dum anno 1627. mense Octobri prope Urbem rusticabantur in prædio Balthasaris de la Cona, ibidem febris cum diarrhæa tenellam filiolam inuasit, demum & extinxit inter materna brachia. Nil profuerant adhibita pro illius ætatis capti remedia, nil
matris

matris sollicitudo & lachrymæ, charæ prolis animulam mors delibavit in vlnis afflictæ genitricis. Iacuit ab illo vespere vsque in claram postera diei lucem exanime corpusculum, sine calore, sine motu. Iam ad effodiendum tantillo cadaveri sepulchrum paratus adstabat sarculus, comportabantur flosculi nectendi in modicam corollam. Sed mater ipso noctis illius conticinio memor aliquid penes se esse reliquiarum quæ Rosam attigerant, inopiæ suæ scriniola excussit, particulam vestis cum ramusculo Ginestræ (: cui Virgo olim indormierat) inuenit: cum his properavit ad algidum cadaver, cæpitque longis & anxijis precibus Rosam inuocare in auxilium, denique fide iam robustior ac velut Rosæ viuificos è reliquijs odores perlicitura, patellæ carbones, his ramusculum & alterius particulæ aliquot filamenta imposuit, mox defunctam filiolam suffumigauit. Fumo viuî occludunt oculos, mortua aperuit, nam ecce illo momento quo suffitus infantem attigit, hæc reuixit; & diductis ocellis quos dolens mater pridie occluserat, latam respexit. Interfuere spectaculo infantis pater, soror, aliusque iuuenis, qui iunctim in genua prouoluti, suoque gaudio ac stupori impares sublati in cœlum vocibus laudarunt Dominum in sua Rosa tam odorifera. Interim paruula Magdalena pauxillo aquæ, cui mater puluerem sepulchri B. Rosæ insperferat, auidè epoto sana consedit vbi supina iacuerat, nec præteritæ infirmitatis vllum in ea superfuit vestigium.

Anno 1631. Antonius Bran mancipium Domine Ioannæ Barrettæ decumbebat ex febribus & angore pectoris, iamque per tres menses & amplius morbi contumacia variorum medicamentorum vim omnem eluserat, ac parum spei residuum erat. Obseruabatur ab vxore & consobrino, qui dum noctu circa infirmum excubabant, repente notârunt ambo Antonium iacere sine motu, sine respiratione vlloque vel minimo signo vitali: inuocabant

ægrum ex nomine proprio, vellicabant, pulsabant, sed nonnisi responsa mortis extundebant à corpore iam gelido. Vxor horrore ac mœrore grauis cucurrit ad heram, & cum eiulatu breuissimè indicauit maritum suum efflas-
se animam. Exterrita Domina lecto exsiliit (: nam iustè media nox erat) cumque D. Ludouica Baretta sorore sua germana ad Antonij cubile properauit, illic Antonij cō-
sobrinus ad caput lectuli plangebatur mortuum, & intran-
tibus fœminis mœsta voce occurrit: nolite (inquiēs) vos incommodare, iam enim Antonius noster spiritum reddi-
dit Creatori. Accedit propiùs Ioanna, explorat, tangit, occlamat; sed vt extensum, frigidum, rigidum inuēnit, velut suæ iacturæ sat certa sorori dixit: *iam & hunc mihi seruum tam utilem & necessarium Deus abstulit, sit nomen eius benedictum.* Inde conuersa ad caput lectuli vidit ap-
pensam Venerabilis Rosæ chartaceam imaginem ex ijs quæ Romæ superiorum permissu excusæ & in Indias de-
latæ fuerant. Hinc ingenti concepta fiducia cœpit inuo-
care Rosam sonoris vocibus, ac liberè flagitare resuscita-
tionem sui mancipij. Mox correptam imaginem reueren-
ter pectori iacentis imposuit, cumque tribus reliquis ibi-
dem tristi silentio euentum exspectauit. Sic horæ dimi-
dium tacitis circa lectulum votis exactum est, cum ecce
Antonius, qui integro duarum horarum spatio algidus,
pallidus, immobilis iacuerat, alto cum suspirio (: quale
admodum lassorum esse solet) oculos aperuit, circum-
spexit, ac miratus heram illo noctis incommodo tempo-
re sibi adstantem, interrogauit quid rei ageretur? mox
percepto quid acciderat, animatus consedit in lectulo,
nec solum incolumem, sed & sanum se vegetumque sen-
sit, nec febris deinceps rediit: attamen vrgentibus quæ
aderant fœminis medicinam ante præparatam tamen si
iam superfluum sumpsit, quieuit, ac post biduum lecto
doloris valedicens Rosæ sepulchrum adiit, totumque ibi
diem

diem in gratiarum actione transegit.

Elyzabeth Duran vidua Iacobi Carlos à multo tempore siccum & inutile brachium gestabat fascijs obuolutum, cuius non solo inerti pondere sed & iugi dolore vexabatur. Vt ergo audiuit, Rosæ virgineum corpusculum in Aede FF. Prædicatorum feretro impositum parari ad sepulturam, plena fide, ac duabus stipata filiabus eo properauit vt potuit, circumfusæ multitudini vltro se inuoluit, si quo modo ad tumulū Virginis penetraret: peruenit, filiabus alijsque viam aperientibus, iisdem auxilijs ægrè in tumuli gradus eluctata brachium vultui Rosæ bis terue applicuit, mox eodem temporis puncto exclamauit: *euge brachium meum sanatum est, reuixit brachium meum*. Vtque miraculo fidem faceret, lacertum, tum quaquauerlus iactauit expedite, viuide, & celeriter, spectante ac plaudente confertissimo populo. At præ omnibus vehementius obstupuit Melchior de Amulgo Medicus, qui in turba fortuitus aderat, multoque tempore diuersas sed frustraneas mulieris brachio medelas applicuerat, fassus illud humanitus curari non potuisse. Porro Elyzabeth successu lata exinde per complures annos palam visa est brachio suo vti ad quæuis officia, quasi numquam languisset. Miraculum istud inibi tot habuit testes quot Rosa tunc in suo feretro spectatores.

Licentiati Didaci Ayala seruus Aethiops (: nomen expressum nusquam reperi) dextri brachij manusque vsum ex plica & neruorum attractione dudum perdiderat; audita fama defunctæ Virginis ad Ecclesiam Sancti Dominici cum alijs contendit, Rosæ precibus se commendauit, statimque in signum obtentæ sanitatis brachium altè sublatum & exporrectum toto templo circumtulit reiectis vetustis pannorum inuolucris; spectabat vniuersus populus, & dum hinc vna vox omnium erumpit in publicas Dei laudes, dum inde mixti consurgunt gratulan-

tulantium clamores, nonnulli qui feruum familiarius no-
uerant, manum eius festiuè arreptam deosculati sunt co-
ram turba, piaque curiositate lustrabant vetusta signa,
vbi attractio manum Aethiopis cum brachio in plicas te-
nacissimè quondam curuauerat.

Verùm à dextro ad brachium sinistrum. Presbyter
Georgius de Aranda Valdiuia ante Clericatum in bellis
Chilensibus contra Infideles complura sinistro brachio
exceperat vulnere, quæ deinde malè curata paulatim san-
niem, conuulsiones, tumores attraxerant, ut iam præ in-
flatione brachium neque extendi potuerit nec plicari.
Vique in digitos proferperat molestissimus tumor, ut af-
flictissimus Sacerdos in Missa nec Diuinam hostiam com-
modè satis tractare, nec sine alterius brachij suffulcimen-
to alterum potuerit eleuare. Igitur ipso die quo Rosa se-
pulta fuit, sub vesperam à Religioso germano fratre adiu-
tus irrepfit in ædem Capitularem, orauit ad sepulchrum
Virginis, implorauit opem, subitoque obtinuit: nam re-
pente frigido sudore madidus, dum successiuè digitos,
manum, brachium motu lenissimo pertentat, omnia san-
na, vegeta, flexilia reperit. Mox religione ac latitia tre-
mulus in Ecclesiam (: vbi tunc fortè P. F. Christophorus
de Azeuedo Prior Panamensis cum plurimis seculari-
bus substiterat) se proripuit, ibique coram Altari SS. Ro-
sarij elatis vocibus in gratiarum actionem procubuit. Ac-
currunt spectaculo qui propiores aderant, atq; inter hos
Bartolomæus de Toro Regius tabellio. Nec multum ro-
gari se passus Georgius, coram his (: & plerisque notissi-
mus pridem erat tum ipse tum brachij sui stupor) fideli-
ter totam rei seriem exposuit: simul rogati Notarius & te-
stes, priusquàm aliquid in tabulas referretur, miraculum
penitissimè explorarunt, iusserunt Georgium in pedes se
erigere, inspexere brachium omni tumore liberum, quod
presbyter sursum, deorsum, dextrorsum, lævorsum & in
omne

omne latus pari qua dextrum agilitate rotabat sine dolore, manum aperiebat claudibatque promptissime, digitos stringebat, diducebat, motitabat celerrimè, nequoad vixit, in his vllum pristini languoris vestigium notauit.

Alphonfus Diaz mendicus, toti Limæ tunc notissimus humili nixus fulcro, manumque & pedem ex attractione inutiles per solum trahens non gradiebatur sed serpebat humi, stipem per domos flebiliter quærens. Hic ipsa die, qua Rosam sepulturæ fossa operuerat, ad Aedem S. Domini ci anhelus venit, in ea aliquâdiu amarissimè lachrymatus: ac de loco sepulturæ sciscitans, demum vt potuit in aulam Capituli prorepfit, Rosæ sepulchro pronus incubuit, per horam sic orauit, gemit, fleuit, denique sudauit, ignarus se iam curatum esse. Superuenit is cui cura erat Virginis sepulchrum: latere costili obtegere: iubet Alphonsum loco abscedere, negat iste se posse, contendunt ambo, sed prior ille integris viribus Alphonso robustior hominem circumplectitur, & repugnantem abstrahit, sensimque at molliter in pedes erigit. Hic primum sensit Alphonfus se curatum esse, nihilominus ob longam standi desuetudinem proximo parieti accclinis breuiterque miratus seipsum erectum ac sine fulcro, simul in clamores simul in lachrymas erupit, iubilans atq; vociferans: *Benedictus Deus, valeo, sanus sum, quod à quatuor annis circiter numquam potui nunc possum, meis insisto talis, plantas qua terram nosse desueuerant, humi nunc figo; laudetur Dominus in Sanctis suis.* Interim toto corpore sudabat adhuc, & quia sub plantis pro callo mollior caro succreuerat, terram passibus nonnihil suspensis calcabat: idque alij infirmitatem rati euntem subiectis brachijs iuuare nitebantur. Renuit ille, protestans, se iam sibi abundè sufficere. Fit concursus & inter plaudentium hymnos Alphonfus in Ecclesiam reducitur spectandus

ab omnibus. Proceffit grauitèr, qui numquam aut festi-
uor aut spectabilior ambularat.

Dum Rosæ cadauer prostabat in tumulo, adrepfit puer
Aethiops duodēni maior, ac de attractorum pedum vitio
quàm de nomine per urbem notior; dumque sub feretri
tabulato orat, (: siquidem nec palmum à terra se erigere,
nec ad sacri corpusculi attactum in gradus potuerat elu-
ctari) repente prodijt alacer, erectus in pedes, quos ante
non nisi reptans miserrimè per terram traxerat, dum ne-
quidem grallis uti, sed dimidio corpore dumtaxat solum
verrere licebat. Exsiliit deinde sanus, medijsque se tur-
bis fidenter immiscuit; Rosam identidem suam liberatri-
cem altis vocibus inclamans. Inde per oetiduum visus
est quotidie adire sepulchrum Virginis, ad gratias palam
& ex debito persoluendas.

Huius exemplo alius puer itidē Aethiops simillimaq;
pedum inualetudine calamitosus (: nisi quòd grallis ut-
cumque se librabat à terra, non tamen à parietum subsidio)
post humatum Rosæ funus accessit; iuxta fossam in
angulum Capitularis aulae se proiecit; orauit, & ultra
duarum horarum spatium ibidem supplex accubuit; tan-
dem in conspectu multitudinis quæ aderat, lentè se ere-
xit; vociferans: *Sanus sum, videor mihi posse incedere, sen-
tio tibias meas carere impedimēto, quinimò in cursum pra-
uriunt.* Respondit quidam ex vicinioribus: si ita est surge
in pedes; ambula; & obtentæ gratiæ fidem facito. Nec
mora; neglectis grallis surrexit puer, stetit, ambulauit,
neque præ lætitiâ seipsum capiens subsiliit, tripudiauit,
denique turbam densissimam rogauit, tantisper in par-
tem secederet, sibi que spatium currendi daret. Obtinuit,
ac susque deque per aulam ceu leuis caprea cucurrit. Vix
suis credere oculis qui puerum antè nouerant, attol-
luntur in sublime voces laudantium Deum, accurrunt
Religiosi, abducunt puerum in Ecclesiam, totoque
per-

perfonant templo canoræ gratiarum actiones.

Ioannæ de Castillo Viduæ filiulus erat bimus Franciscus Fernandez de Sigura, catalepticis palpitationibus ab anno integro frequenter ac periculosè diuexatus. Cassa & irrita fuere humana remedia, donec recursum fuit ad Rosam tunc recens tumulatam. Huc igitur afflicta mater paruulum suum detulit, ad sepulchrum stitit, orauit. Filiulus interim vltro se sepulchro instrauit ore prono, ibidem mox hilarescere cepit, cumq; post sesquihoram interrogaretur à matre, num iacendo lassus erigi vellet ac abduci, petijt adhuc paulisper ibi relinqui. Demum surrexit sponte, sanitatis indicijs lætus, neque ex eo tempore vsque ad ætatis suæ annum 17. (: quo vnà cum Matre hæc apud Iudices Apostolicos testificatus est) hac aut alia quacumque infirmitate impetitus fuit.

Rufina Braua filiolum genuerat Petrum Tamayo: vix quintum-decimum à natiuitate diem infans attigerat cum deprehensus est hernia miserabiliter laborare. Magis in dies laxabatur lacerum peritonæum, propendebant viscera, nec nisi magno labore atque periculo retrudebantur introrsum mox iterum proditura. Vagiebat continuo paruulus tanto dolori impar, ac sæpè toto triduo nauseabundus vbera nutricis omnino respuebat. Biennium ferè applicandis remedijs insumptum est magno impendio, profectu nullo. Denique biduo postquàm Rosam vita functam terra exceperat, ad illius sepulchrum delatus ferè per duas horas quietus insedit, dum Mater cum cognatis fœminis in Templo hæsit Deo & Virgini Rosæ sobolem commendans. Redditus Matri filiulus occluso reticulo visceribusque repositis inuentus est sine hernia, solum in beneficij memoriam conspicua remanserat cicatrix, quæ tamen etiam firmabat reparati peritonæi integritatem ne amplius rumpi posset.

Petro de Vega grauitè à quatuor mensibus filiulus

quinquennis decumbebat ex febribus, neque mitius deuenustabat, paruulam asperrima quædam morosæ indolis conditio cum annis in vitium periculosè aditura. Hanc febrientem parentes anxij detulere ad tabulatum vt Rosæ nondum sepultæ virgineum cadauer attingeret: attigit, statimque pulso febrili paroxysmo coram omnibus conualuit, nec relata domum nouis morbi accessibus tentata fuit: quin & illa congenita indolis asperitas eodem simul correctâ miraculo in summam transijt mansuetudinem & suauitatem.

Videbatur his prodigijs Rosâ clamare de tumulo: *finite paruulos venire ad me*. Veniebant vtique, ac certatim porrigebantur de manu in manum vt ad salutiferum Rosæ contactum infirma pertingeret pupulorum innocentia, cum salute ad suos reportanda. Inter hos Frânciscus Cardoso nouem mensium tenellus infans cōtinua febrium vicissitudine à tribus mēsis nunc rigēs nūc æstuās, subitò vt sacro cadaueri admotus fuit, planctū simul & febrim posuit mirâte populo. Neq; id solū, sed & postridie Aethiopissæ ancillæ vlnis implicitus infans nutu gestuq; indicauit velle se in terram deponi: vix plantulis humum attigerat, cum cœpit ambulare solus per atrium, neque ab illo die indiguit ope aut vlnis baiulæ. Nimirum tantas pridie vires adhalauerat Rosâ puerulo tam diuturnis febribus cocto & medullitus exhausto. Certè ex ore infantium & lactentium perfecit sibi laudem. Ad adultos reuertamur.

Anno ante Rosæ obitum Petrus de Vega lapsu præcipiti ac graui luxarat iuncturam ossis in scapula, simulq; exinde vsū brachij ex eâ parte amiserat, nec nisi ad dolorem & onus lacertum sibi superesse iugiter querebatur. Demum nocte quadam recordatus, sibi in domo esse Rosarium, quod paulò ante in feretro exanime Rosæ corpus attigerat, illud vbi acutior doloris sensus erat deuotè ap-

plicuit. Illico cessauit cruciatus, quietè obdormijt Petrus, ac manè euigilans aduertit inutili brachio redijisse vires, quæ nullo alio adhibito remedio sic creuere, vt intra dies paucissimos perfectè conualuerit; nullumque inter sinistri ac dextri brachij agilitatem senserit residuum discrimen. Eundem Petrum alia vice inuaserat ischiadum atrox tormentum, ac simul dolorifica inflatione tumuerat altera tibiæ: Pressus his malis nec cibum sumere nec somnum capere infelix potuit. Tandem Rosæ & Rosarioli sui memor loca dolorum offricuit, quieuit, posteroq; diluculo expergiscens vndequaque se sanum inuenit, tibiæ verò molestus tumor ita defecerat, vt iurasses hanc numquam tumuisse.

Helenam Aethiopissam Ioannis Merini mancipium, continua & copiosa subnascentium lumbricorum (: quos vocant *de Guinea*) scaturigo septenni fluxu ita viribus, egesto cruore, exesis visceribus exhauserat, vt actum de illius vita omnino putaretur, maximè quatrduo ante Rosæ obitum, quando tot morbis ardentissima febris & (: mortale signum) inflatio talorum ac tibiæ accesserant. Toto septennio omnifaria tentata fuere medicamina, sed hæc morbum irritando noua in dies pernicië non ægram sed ipsam ægritudinem adiuuuabant. Denique, hera utilissimi mancipij iacturam non ferens Helenæ suavit ac persuasit, ad Rosæ biduum ante sepultæ monumentum *Nouenam* exigeret; ita nouendialem cum certis precibus stationem vulgò appellant. Infirma vitæ ac valetudinis percupida maiori animo quàm viribus aggressa est opus, at quarto mox die se perficiundo imparẽ protestata est: nam diuturno lassata morbo, exanguis eripientis & crebris egestionibus, perusta febri, destituta anhelitu, pedibus tumidis adire se posse reliquis diebus Rosæ sepulchrum omnino diffiderat. Nihilominus hinc spe inde hera animante resumpsit spiritum, ac residuis diebus

accessum quamquam difficillimum continuauit modo quo potuit, nullo interim conualescentiæ signo vel eminus comparente, quin potius maiorem in dies lumbricorum vim effundebat cum sanguine. Donec tandem vltima nonæ diei statio ad Rosæ sepulchrum in momento simul vniuersam tot morborum cacochimiam fūdītus absterfit. Redijt domum Helena planè altera, nempe lumbricis ad vnum vacua, pedibus sana, febrium ignara, sanguine, vigore, corpulentia mirabiliter instaurata, nulliusque deinceps ex his symptomatis conscia valetudinem possedit integram ac diuturnam.

Nauigabat cum P.F.Dominico de Leon Ord.Præd. famulus & comes itineris Ioannes annorum 14. adolescēs, oppressus quartana febris, quam ipsa deinde maritima iactatio periculosius accenderat, vt die quadam paroxysmi violentia animam puero extudisse crederetur: nam subito clamore Dominicus ex superiori naui tabulato deorsum vocatus vt moribundo suo famulo adstiteret, dum in opertum nauigij sinum descendit, obuium habuit virum coniugatum Franciscum Flores, qui Ioannem iam exspirasse asseuerabat. Perrexit tamen sollicitus Pater, at famulum sine loquela, colore, spiritu supinum & immobilem reperit, dubius num viueret, pluries vtramque iacentis auriculam validis clamoribus tentauit, at frustra se vitalia signa exspectare videns ad Rosæ confugit præsidium, vitam puero supplex petijt, Nouenam promisit: & ecce illo momento respirauit Ioannes, resedit, cibum sumpsit, attonitis qui spectaculo interuenere viris religios P. Agnello de Oliua Soc. Iesu, P.F. Laurentio de Texeda Ord. S. Francisci, & secularibus vtriusque sexus non paucis. Stupere quotquot in naui erant, præsertim vt viderunt paulò post comparentem in superiori tabulato sanum, incolumem ac sine humano remedio integræ valetudini restitutum.

Beatrix Gaues continuo quadriennio vexabatur molestissimi humoris iugi stillicidio, idque remedijs peius irritatum spem curationis sustulerat. Ergo inops consilij penetrauit cum reliqua turba in ædes Quæstoris Gundisalui, vbi tunc Rosa prostabat in feretro iam iam efferenda; illic se Virgini toto cordis affectu commendauit, loculum tetigit, domum sanè redijt, nec vmquam deinceps ea de fluxione se sensit infestari.

Anno post Rosæ felicem transitum Fr. Ioannes Miguel Ord. Prædicatorum causa Oeconomix ac negotiorum obsequitabat vallem *de Xauxa*, sed transeuntem iuxta pascua vaccarum circa locum *Verafiguè* improvisò erumpens Taurus ferociter insecutus est. Extimuit, adactisque calcariis fugam iniit Ioannes magnis vocibus periculum suum Deo & B. Rosæ commendans; at Taurus velocior iam prope aderat, nec ultra quindecim passus distabat ab homine. Perditus erat nî Rosam denuo & multò ardentius inuocasset. Mira res, ad Rosæ nomen immanis bellua ceu fulmine retroacta substitit, Ioannem lassitudine ac pauore exanimem toruè intuens, nec loco se mouit, donec is procul abijisset.

Eidem aliud sed lepidius accidit in amne qui locum *Misque* præterlabitur & piscibus (: maximè autem Bocis seu candidioribus mœnis) abundat. Huc ille cum socio religioso F. Hieronymo Iambrano alioque Indo piscatum ierat. Iaciebant pariter sua retia Hieronymus & Indus, atque hic prædam aliquam traxit, ille vacuo reti adfremit. Hortabatur Ioannes vt iterum iaceret, & ad singulos iactus elata voce *eya* inquebat *in nomine benedictæ Rosæ cadat feliciter*. Parebat Hieronymus sed non pisces, siquidem plus quàm duodecies iacto reti nullum prendidit. Hic Ioannes id quod erat suspicans, *obsecro* (: ait) *mi Hieronyme dic liberè, nonne cor tuum hæsit incredulum circa sanctitatem Virginis Rosæ?* affirmavit ille, substo-

machans tot certos extare Coelites quorum nomini vtilius dicari potuissent hi iactūs, nec ad incerta nomina, fuisse confugiendum. At Ioannes replicuit: *Tu verò mi frater de sanctitate Rosæ fidem indubiam fac concipias, si que in eius nomine iterū at seriò rete immerge, & mira conspicias*. Fecit, iecit, ac subito Bocarum & Armadillo-
rum tantam vim traxit, vt pondus impleti retis vix potuerit sustinere.

Liceat hinc breuissimè diuertere ad piscationem hominum. Anno 1630. intra Limense Sanctæ Claræ Monasterium ancillabatur Christina Angela, inuitum mancipium. Contigit, huic ad fugam patuisse fortuitò posticum cœnobij, quo ceu elapsus nassâ pisciculus tacite se proripuit, & foris in Vrbe se occultauit. Raphaëla, de Esquiuel monialis tunc ianitricis munere fungebatur, quæ fugæ istius damnum, offendiculum, dedecus vnico simul confuso metu complexa, cum post plurium dierum quæstionem profuga nusquam reperiretur, ad Rosæ opem confugit, suamq; illi commendans angustiam, Monasterio perditum mancipium restitui flagitauit. Porro eadem nocte Raphaëla per soporem vidit Rosam candido amictu facieque præfulgida gloriosam, dicentem sibi: crastino manè Christina recuperabitur. Monialis à gaudio pulcherrimæ visionis euigilans, iterum (: concepta iam ingenti spe) Virgini rem deuotè commendauit, rursusque dormiuit. Manè facto ancilla circa horam quintam ante meridiem inuenta, rephensa, reducta est.

Non minori quamquam dissimili Rosæ beneficio rem amissam germani fratres Alexander & Franciscus de Coloma recuperarunt. Quingentorum coronatorum censum annum Guamangensi Sanctæ Claræ Monasterio ritè persoluerant, ac de more apocham solutionis testem ab Oecono-
mo receperant. Post interuallum temporis illudmet debitum rursus exigitur, obtendunt solutionem

germani fratres , quæritur apocha, sed nusquam apparet. Certus erat Franciscus illā se reposuisse in tali loculamēto sui scrinioli, extimuit ne forsan inde aliena fraude sublecta disparuerit; itum reditum centies ad idem scrinio- lum , chartæ omnes sigillatim excussæ, protractæ, reposti- tæ, aderant omnia præter apocham. Anxius itaque Fran- ciscus breui oratione recurrit ad sibi notissima Rosæ præ- sidia , dehinc spe plenus Alexandrum rogat, noua vlti- maque diligentia scrinio- lum oculis vndequaque perua- dat : respondet iste, operam perdi. Instat alter; flagitans suo id saltim dari solatio vt iterum quærat. Quæsiuit o- biter velut re desperata, & ecce in illomet loculamento vbi ambo toties quæsierant, supra reliquas scripturas in- propatulo reperitur Apocha pulcherrimæ inscriptioni peregrinæ manûs decenter inuoluta, non secus ac si illo momento clam ad scrinium fuisset relata. Sed reuertend- um ad valetudinaria.

P. Fr. Didacus de Arrasia Ord. Prædicatorum è Pana- mensi ad Limañum Conuentum in summo æstu proficisc- ens ex mutatione climatis duplicem tertianam contra- xerat, quæ ipsum per compendia breui stitit in mortis ve- stibulo, iubente Medico accelerari Sacramenta, maximè quia & venter infirmi ex nimio aquarum hauſtu altum extumuerat, & quidquid medelæ seu ventri seu feбри ad- hibebatur, morbum augebat. Itaque ægrum extremi pe- riculi admonuit P. Magister Fr. Gabriel de Zarate tunc Prouincialis. Verùm Didacus occultè supplices ad Ro- sam preces, ad Deum vota conceperat, iamq; altius spe salutis, quā aquis tumebat. Tentādum supererat vltimum subducendo ventri remedium sed violentum & acre, cui perferendo Didacus se parem fore idiffidens Rosam de- nuo ac instantissimè implorat. Et ecce omisso illo reme- dio detumuit venter, abscessit duorum mensium posses- sione

flone radicata febris, & cum stupore omnium Didacus ad vota sua implenda lætus exiit.

Isidora de Montaluo ætate grauis insuper ab octo mensibus grauabatur febris continua & admodum violenta. Negabant Medici, vetulam tot annis onustam ac viribus effectam per methodica remedia morbo liberari posse. Ergo ab ijs derelicta ad Rosam pro vita ac valetudine appellauit, & illo temporis puncto integerrimè conualuit, diuque incolumis superuixit.

Iosepham de Torres torrebat toto corpore volaticus ignis ex putrido sanguine febribus inflammato: surgebant vndique lucentes bullæ, triumque hebdomadarum spatio infirmam eò adduxerant, vt coram domesticis sine loquela sine arteriarum pulsu iacens immobilis putaretur efflasse animam. Circumstantes exterriti Rosam pariter implorarunt, obtineret Iosephæ spatium quo saltem accito iam Sacerdoti possit sua peccata confiteri. Verùm plus Rosa præstitit quàm rogabatur: nam subito ægra in se rediit, exomolegesim ritè peregit, ac breui integram valetudinem recuperauit.

Mariam Indam puellam duodennem è Chilensi Regno oriundam, ac Limæ in Monasterio Incarnationis famulantem rigores, tormenta stomachi, demum & spasmi, gutturis angustia, conuulsiones eò redegerant, vt nec cibo potuue refici, nec minimum quid potuerit deglutire. Desperata à Medicis muniebatur vltimis morientium Sacramentis. Verùm sub ipsa extrema inunctione à presbytero & monialibus admonita fuit, Virgini Rosæ angorem fide ac affectu quo posset maximo commendaret. Paruit, ac sine alio quocumque humano remedio coepit ex illo momento conalescere, intraque pauculos dies ad consueta sui famulatûs officia rediit.

Antonio de Vmbela operario annosa paralyfis brachium

chium manumq; attraxerat, vt nullis vñquam remedijs potuerint explicari. Auditis quæ ad Rosæ sepulchrum quotidie coruscabant prodigijs, eò demum se contulit, brachium sepulchro imposuit, breuiter orauit, statimque manum diu clausam suauiter aperuit, mox & brachium explicuit, suæque artis exercitia sanus repetiuit.

Mariam Sanchez nouennem fortuitus in terram lapsus ita affligerat, vt exinde attractis tibijs, omniq; erepto pedū vsu nec stare nec sedere vsquam potuerit, quin continuò iacendum fuit in lectulo. Totum triennium frustra datum remedijs. Demum vterque parens Nouena ad Rosæ sepulchrum promissa filiolarum eò faciunt deportari ac virgineo monumento pronam insterni. Adueniens nonus dies puellæ salutem parentibus gaudium attulit, nam vt sepulchro de more incubuit, repenti sana in pedes se erexit, ambulauit, cucurrit ad patrem, qui manu apprehensam diu circumdūxit per Claustum, inde domum. Præcurrebat ultro filia, quasi numquam pedibus languisset.

Maria Farfan triennis puella, dum anno 1617. indigestis cruditatibus periculosè oppilata curatur à Matre, infusione argenti viui, (: quod alia foemina suggesserat) inflatis mox tibijs gressum perdidit, adeo quòd ab umbilico deorsum velut emortua solis manibus reptaret tractis per terram cruribus. Sex menses integros sic dimidiata languit, donec in templo Sancti Dominici exaltato in sandapila Rosæ corpusculo illuc deportata fuit, vbi vt defunctæ Virginis faciem bis terue attigit, repenti inflatio detumuit, & paruula suis parentibus reddita post biduum per ædes sana cucurrit, nulla interim alia medicina adhibita.

Agnes de Figueroa (: Rosæ, dum viuebat amicißima) immani cruciatu lancinabatur in coxendicibus, & ignara quid mali esset, iam eò deuenerat, vt toto triduo vesti-

eam exonerare non potuerit. Longa dolorum acerbitas pene mentem foeminæ euerterat, quando suggerente marito se se efficitim multisque cum lachrymis coepit charæ suæ Rosæ intercessionibus commendare. Statimque, velut substratis prunis insideret tota feruidissimè æstauit, ac subito infra vnica Salutationis Angelicæ moram enixa, est calculum magnitudine nucis auellanae punctim vadique cuspidatum. Eodem momento cessauit dolor, consopita quieuit Agnes, quæ diu neque dormire potuerat nec iacere. Chirugi & Medici quotquot viderunt calculum testati sunt, illum haud aliter quàm vel morte vel miraculo potuisse extrudi.

Ludouicus Rodriguez Mexicanus opificio sartor in ædibus Viduæ Ioannæ de Vargas dolorifica neruorum attractione laborabat, ita vt nec incedere, nec pedem humi figere per duos menses vmquam potuerit. Adducti Chirugi postquàm viliora remedia sine profectu applicuerant, protestati sunt, hominem non aliter quàm vnctione magistrali (: quæ sumptu nō mediocri paranda fuisset) curari posse. Flebat amare Ludouici Mater, conscia tantis impendijs longè imparè fore suam filijque inopiam. Itaque vidua suggerente cernua sursum respexit in Rosam, promittens vnà cum filio Nouenam peragere, ad sepulchrum, quam vbi exorsa fuit postridie, domum rediens inuenit filium pedi attracto iam solidè insistere, & aliquatùm ambulare. Nondum vltimus nouenarij dies illuxerat, & Ludouicus iam perfectè sanatus exhibat domo, Virginiisque sepulchrum inuisebat.

Simillimo beneficio & ipsa prænominata Vidua ex vtriusque pedis dira inflatione & cruciatu repentè conualuit, mox vt Rosam auxiliatricem flebiliter innocauit, promisso simili dierum seu stationum nouenario, quem & postridie votiuis onusta donis est auspicata, sanisque pedibus alacriter pereggit.

Isabellæ Morales parienti (: iamque partum effuderat) secundæ remanserant in vtero. Expauit obstetrix, nullumque omisit remedium vt membranam eliceret. Tribus horis laboratum frustra, rebusque iam desperatis Isabella se mori sentiens ad lectum reportari petijt decētius illic moritura. Adfuit vocatus interea Confessarius, cumque omnia in peius vergerent, monetur Isabella ad Rosæ præsidium recurrere in discrimine tam complorato. Paruit, & illo temporis puncto omissis alijs remedijs vltro secundæ prodierunt, totumque subitò discussum est periculum.

Christophorus Perez Aulæ criminalis Secretarius cum vxore & domesticis ad prædium suum in valle *Lurigancho* secesserat, hinc die quodam ad vicinos colles virore amœnissimos iter faciens, tellure ex pluuijs madente, & lubrica cum equo in fossam xvi. palmos altam prolapsus est. Accurrit cum domesticis pauida coniux, viditque marito equum incumbere. Secuta fuerat labentes mollior terra, & pene vtrumque operiebat. Dum equus (:vt erat generosus & iuuenis) terram nititur excutere, dum magnis conatibus tētat surgere, Christophorum grauius premit relapsu, & nonnumquam calcibus improvidè ferit. Per quadrantem horæ sic iacuit Perez, neque vt erat manibus pedibusque ex arthritide nodosus ac debilis, quidquam iuuare seipsum potuit.

Interim supra fossam eiulabant domestici, plangebat vxor, denique omnes Rosam in subsidium aduocarunt. Audiit Christophorus, cœpitque & ipse sub equi terraque pondere Rosam inuocare. Et en cōfestim surrexit equus in pedes homine intacto, descendunt in fossam vernæ, extrahitur Perez incolumis, quem alij iam mortuum, alij intra horam moriturum liberè clamitabant. Ipse verò solius Rosæ beneficio tam se illæsum professus est, vt nec

phlebotomiam nec quidquam fomentum sibi adhiberi permiserit.

Antonij de Terrabian grandæui mancipij vt lapsus miserabilior, ita mirabilior fuit subleuatio. Huic in extremo ferè agone laboranti Maria de Oliua Rosæ mater concubia nocte assidebat sola. Antonius dum conatur fessum mutare latus, ex lectulo perangusto in pauimentum decidit. Anxia mulier, quòd nec seruo moribundo nec sibi vires essent quibus denuo in lectum subleuaretur, filix Rosæ validum è calis implorauit auxilium, statimque fide plena vtrumq; ponderosæ sarcinæ brachium supposuit, Antonium senem, corpulentum, semianinem, ac si trium mensium esset infantulus, è solo sola sustollit in lectum, accõmodat, operit, ac tum demum admirabunda suomet operi tota adtremit, experta suam sibi Rosam adfuisse.

Claudat hoc Capitulum Rosæ veneni coelica exantatrix. Limæ crudelis foemina (cuius nomen in Processu vbique subticetur) maritum suum extremè oderat, & vt ignarum è medio tolleret, clam ei toxicum in potu commiscuit, sed præualidum quod antequam possent remedia circumspici breui mora hominem extingueret. Vix maritus pestem hauserat, cum intercepto anhelitu tympani instar extumuit, mox deliquio abreptus aluo in fluxum soluta sudauit algidus, tremuit, distortisque oculis nil nisi mortis vltimos spirabat angores. Verùm sic per horæ quadrantem periclitanti opportunè incidit Rosæ memoria, & dum virus per viscera cordi adserpebat, extremo conatu se colligens erupit clamorosè in has voces: *Sancta Rosa succurre, & Nouenam polliceor*. Expauit ad Rosæ implorationem vxor venefica, iamque veneni sui effectum desperans seipsam lethali vulnere fauciauit. Maritus absque alio alexipharmaco venenum elu-

Status, postridie lectum deseruit, ac promissi memor ad Virginis sepulchrum properavit.

C A P V T I V.

Rosæ defunctæ cingulum, vela, particulæ vestium, ægris, parturientibus, debilibus medicinam distillant.

A Sanato morbo. capitis Capitulum istud ordiamur: Eleonora Ruiz de Saudosa discraciabatur atroci cephalæa, sed ne iubilæi lucrum amitteret, à Rosæ (que pridie sepulta fuerat) sarcophago rectâ ad ædem Metropolitanam sibi eundum fuit. Iuit, sed prius infirmo capiti particulam ex Rosæ vestimentis imposuerat, subq; huius galexæ fiducia iter ingressa postquàm in summa Aede nonnihil confederat, aduertit omni se capitis dolore penitus liberatam.

Philippa de Vargas ex intolerabili æstu febrium simul toto fincipite diris velut aculeis incessanter dispungebatur: tandem ex Rosæ reliquijs particulam vertici applicuit & obdormiuit: euigilans non solis doloribus capitis sed & tota febrium vexa se reperit penitus liberatam.

Luciam à SS. Trinitate Sanctæ Catarinæ Senensis Monasterio Præfectam à dextro tempore grauis torquebat cranij dolor, cum intemperie cerebri & guttosa defluxio-

ne:

ne: sed vbi modicam ex Rosæ habitu laciniam affectæ parti applicuit, illomet instanti distillationem stitit, dolorem fugauit. Eadem sub noctis conticinio quondam repentinis stomachi vulsionibus torta, ac penè exanimis, subito vt dictam particulam pectori affricuit, tormina sedauit.

Marina de S. Ioseph Excalceata monialis improuiso in terram lapsu oculorum neruos vtrunque grauitè offenderat, vt neque dextrorsum neque leuorsum oculos potuerit conuertere, simulque in iisdem continuus sauebat dolor. Tandem ex Rosæ reliquijs frustulum arripuit, & experiar (: inquit) num reuera ea sit sanctitas Rosæ quæ passim deprædicatur. Idem temporis momentum fuit, quo frustulum oculos attigit mobilesq; & sanos reliquit, neque vel stupor illis, vel dolor vnquam redijt.

Virgo Lucia de Montoya ab ineunte pueritia foedo ac fluído marcore oculorum non sine excæcationis periculo lippiebat. Aciei infirmitas ac palpebrarum iugis dolor puellam nec in apicum diei prodire nec candelarum, lumini propiùs accedere permittebant. Augebat morbum perpetua cephalæa; quibus incommodis dum solito molestiùs die quadam grauaretur, à Rosæ indumento remedium ingenti fide quæsiuit & reperit. Habebant domi inter pretiosiora cimelia particulam pallij quod Rosam adhuc mortalem amicierat; hanc Lucia capiti reuerentèr admouit, eadem oculos defricuit, & illo temporis puncto simul cum lippitudine omnem capitis dolorem absterfit, inque miraculi fidem ipso adhuc suæ curationis die acum arripuit, & ante vesperam subtilioris telæ quatuor quadra consuendo absoluit: imò exinde oculos semper tam limpîdos clarosque habuit, vt videretur nunquam antea lippuisse.

Apud Isabellam de Mendoza tenebrosius cæcutiebat triennis paruula Margarita nomine. Hæc altero oculo-

rum

rum (: cui nubecula infederat) omnino cæca , altero ob-
 scurè & vix modicum nictitando videbat ; collyrijs nil
 proficientibus credebatur paulatim omni videndi facul-
 tate carit ura. Eius hera (: nam puella seruilis conditionis
 erat) sæpius protestabatur , Margaritulæ suæ mortem
 quàm vitam vtiliorem fore, siquidem ab anno & amplius
 claræ lucis impatiens clausis plerumque oculis per ædes
 oberrabat. Quodam vespere cubitum ituram domesticae
 foeminæ coeliti Rosæ commendarunt, & particulam virgi-
 nei indumenti fascia inter oculos puellæ alligarunt, sicq;
 fasciatam composuere in lectulo. Manè factò, dum redu-
 cta fascia oculos Margaritæ inspiciunt, primò notant eua-
 nuisse nubeculam, deinde in altero oculo miratæ sunt
 claritatem: denique compererunt hinc cæcitatem inde
 visus debilitatem prorsus ablatam, paruula enim acie v-
 trimque firma & irretorta sudum exinde aërem lucemq;
 intuebatur cum voluptate.

Ioannæ de Velasco mordax è capite falsugo gingivas
 impleuerat, inde acerbissimus dentium dolor miseram
 nec somnum capere, nec vllò patiebatur loco consistere.
 Dilatabatur crescens malum, angebatur languens Ioan-
 na; donèc recordata particulam ex Virginis Rosæ lineo
 velo se habere, eam ori applicuit, & subito omnis ab-
 scessit dolor, successit somnus, & euigilans manè Ioanna
 se sanam demirata est.

Viduae Ludouicæ Faxardo morbus caducus binas
 proles, masculam annorum xvij. foemellam mensium x.
 extinxerat. Superfuit trimus filiulus nomine Franciscus
 de Contreras, quem idem morbus simili parabat exitio,
 nam puer interdum continuis xv. horis iacebat sine lo-
 quela & sensu, spumans ore, brachijs ac tibijs immane
 palpitans, interdum & occiput solo illidens. Anxia ma-
 ter, iamque omni humano dissisa remedio ad coelicam
 Rosæ pharmacopœiam vltimò recurrit. Particulam scapu-
 laris

laris aliunde quæsitam obtinuit, arbitrata filio profuturum quidquid olebat *Rosam*. Et sanè profuit: nam vt particulam Francisci tunc sedè spumantis tremulo pectori imposuit, in istu oculi conquieuit puer, in se redijt, confedit in lectulo, haustum aquæ petijt, conualuit, nec deinceps vmquam hoc morbo tentatus fuit.

Septennio circiter post felicem *Rosæ* transitum euoluto Aloysiam de Escobar Sanctæ Claræ monialem tormento instabili discruciat ignis volaticus, nunc tempora, mox genas, inde oculos aliasque partes non sine periculo oberrans. Variè diuque sudatum est in remedijs, at maiori semper damno, frustuque prorsus nullo. Denique Abbatissa seruata ex *Rosæ* tunica particulam de scrinio protulit, ac vultui decumbentis præmissa oratione molliter illigauit, sicque per eam noctem quiescere iussit. Postridie fasciam soluens, totam Aloysiæ faciem ardore ac tumore vndequaq; non secus ac manuum volas reperit liberam, nullo vel minimo vestigio hesterni mali residuo. Eidem Aloysiæ tertiana febris aliquando diros ac vehementissimos stomachi dolores inuexerat, adeo vt præ conuulsionum angore mortem sibi crederet imminere: sed confestim, vbi alio quocumque omisso medicamine ad *Rosam* confugit, dictamque particulam stomacho applicuit, simul cum dolore febris abscessit.

Eandem priùs opem aduersùs erysipelam senserat Maria de IESV Excalceata Carmelitana; huic facies tota, hoc inflammata morbo tumuerat, simul reliquum corpusculum febres exurebant. Denique vt ægrotanti modica ex *Rosæ* indumento laciniola fuit applicata, desedit tumor, tepuere infesti calores, vt infirma mox somnum capere potuerit, è quo sana extinctis cum erysipela febribus euigilauit.

Anno quo Rosa in coelestem Sponsi paradysum transplantata

plantata fuit; Ioannem Rodriguez Samanes pictorem asthma inueteratum pene stringendo suffocabat. A triennio ferox malū pulmonibus & bronchis pōderosē tenaciterq; infederat, nec nisi per tusses & raucos sibilos ægerimam spirandi facultatem oppresso pectori indulgebat. Opportunē Maria de Mesta quasdam Rosæ reliquias (: à quibus ipsa pluries salutem hauserat) infirmo suo domestico obtulit, quando arctius laborabat. Has pectori deuota fide adhibuit iuuenis, dormiuit quietissimē thorace libero ac sine ronchis; expergestus sensit laxata vndique pulmonum vincula, nec vllam deinceps grauioris anhelitus in se comperit molestiam aut pressuram.

Fr. Ioannes Garzia laicus Ord. Prædicatorum quarto post Rosæ obitum die superiorum iussu hortensem Virginis cellulam intrarat, asportaturus inde modicum scabellum, cui Rosa dum vixit insidere solitaria consueuerat. Verū ostioli angustia videbatur scabello negare exitum, vnde laicus mucrone quem attulerat, assulatim cœpit obstantia ligna incidere, sed dum festinus instat operi, ferrum incautus sinistræ manui immerfit, ea profunditate, vt vnā cum cute lacera caro penderet à iunctura. Exterriti circumstantes atrocitas vulneris, nam, vbertim manabat cruor, & ex hiatu ambiguū erat spectantibus, num quid fortē neruorum aut venarum vnā truncatum fuisset. Solus non expauit faucibus Ioannes, præsentis remedij conscius, &, habeo (: inquit) efficax certumque cataplasma, quod illicō mihi sanabit manum. Simulque è sinu protulit recisam ex lineo Rosæ velo particulam, qua sinistram exemplō obuolutam adstrinxit fascijs, ea fidei securitate & constantia, vt inde mox in cellulam redierit, reliquum operis perfecturus. Vix horulam illic exegerat, cum rursus ad expectantes prodiens vltro dissoluit fasciam, ostendit manum vnde quaque fa-

nam, incolumem, nec iam alterius chirurgi ope indigentem.

Pictoris Angelini Medori coniugem Mariam de Mesta viginti circiter diebus exhauserat copiosi sanguinis fluxus admodum periculosus. Memor tandem, se ex Rosæ candidis indumentis reliquias possidere, has reuerēter deosculans & Virginis intercessionem efflictim se commendans periculum euasit, pristinis viribus acutum restituta. Eisdem alias fluida è capite distillatio scapulam immensis cruciatibus vellicabat, nec segnius in occipite sauebat cephalæa, sed eiusdem particulæ beneficio post imploratum Rosæ auxilium morbus vterq; fugatus est. Grauius aliquando foeminam afflixit inflati cruris acutus dolor, vt per quindenam & amplius nec interdiu vsquam potuerit consistere, nec somnum etiam breuissimum noctu libare; recursum ad solitum *Rosæ* virtutis emplastrum, & applicitis cruri Virgineis reliquijs cessit inquietudo & dolor, successit cum placidissimo somno perfecta & stabilis valetudo.

In conuallibus Chinchæ Magdalena Chimaſso Indæ ex Regulorum Chincensium (quos *Caciquos* vocant) nobili profapia viro Hispano Francisco Morales matrimonio copulata triennium & amplius ab umbilico deorsum adeo languebat attractione corporis, vt nonnisi lanato velleri potuerit insidere, nec aliter quàm cum eo huc-illuc raptanda fuerit, & ad necessaria corporis officia manibus domesticorum deportanda: numquam sine his mutare latus, numquam se sponte erigere visa est. Denique post ingētes sumptūs frustra in remedia erogatos è Chinchæ Limam in ædes Petri de Vega se fecit transportari, quod illic speraret Medicos peritiores. Nec fefellit opinio: vix enim per mensem Limæ sic decubuerat, quando Rosæ tunc recens sepultæ odor sanctimonie, & publicæ
mira-

miraculorum fama quotidie grandior ad ægram hanc penetrauit. Concepta exinde fiducia supplex nonnullas Rosæ ad se reliquias deferri petijt. Allatus fuit pertenuis ramusculus ex palma quam Virgo in mortuali suo pegmate gestarat exangui manu, item binæ candidi scapularis & veli particulæ. Hæc vnâ cum sepulchri modico puluere Magdalena fide ac deuotione qua decuit sibi arctissimè circumligauit. Sic repentè sopitis doloribus etiam ipsa placido sopore totam noctem quietissimè præter morem exegit. Euigilans tamen vegetas in rediuiuis partibus sentiret vires, dimouere tamen reliquias noluit, velut salutiferi effectus plenitudini quietem reliquæ illius diei perlubenter indulgens. At postridie, quidquid repugnarent famuli, quidquid reclamarent domestici, lecto se robusta proripuit, vestes petijt, Rosæ beneficio se integerrimè sanam constanter asseuerauit. Dum adstantes horror ac frigidus stupor defigit immobiles, iam Magdalena suis insistebat pedibus, mox nemine iuuante liberimis passibus incedebat per conclaue. Demum vt vestimenta (: quibus pene desueuerat) impetrauit, domo cum honesto comitatu exijt, rectâque ad Sancti Dominici Aedem solidis gressibus properauit, vbi visitato Rosæ sepulchro domum, inde post mensem ad suos in patriam alia quàm exierat redijt.

Mariam de Morales viduam Marci Antonij non solæ nervorum attractio, sed insuper varij aliorum membrorum cruciatûs integro quinquennio acerbissimè diuexabant; nec hilum profuere remedia quæ plurima tanto temporis ærisque impendio conquisierat. Tandem particulam ex Rosæ indumento sibi residuam alacri fide manuque arripuit, hac subitò nervos attractionis vinculo exsoluit, inde per reliqua membra eandem circumferens quò successiuo ordine loca dolorum obibat continendo, languor & cruciatus illico fugiebant, donec ad

extremum se vndique totam mirata est sanam.

Alphonſi Braui legitimæ coniugi Andrea de la Maſſa, tuſſillas & guttur atrox angina, reliquum corpus ardentiffimæ febres periculofè inflammabant: Acceſſerat vehemens prurigo, qua ſemper vaguis in vlcere, numquam ſomnus comparebat in oculis. Habebat domi villoſam pelliculam quæ quondam Roſæ apoplecticum obuoluerat brachium. Hanc igitur fiducia reuerenti corripuit, moleſto pruritui vbi fortiùs vrebatur applicuit, toto hunc corpore ſucceſſiuè depulit, eodemque ſimul affricu tam febrium quàm anginæ ſuæ incendia re ſtinxit.

Vxor Baſilij de Bargas, Francisca del Pulgar à partu repente marifcarum vlcerofis tuberculis grauiffimè torquebatur. Nec malo inueniebatur remedium, nec à malo requies. Demum anulo oſſeo quem à Roſa acceperat, ſalutem debuit, hunc enim vt digito indidit, confefſtim morbus euauit, nec in reliquis partibus (: nam ſæpius deinde peperit) ulli marifcarum mordacitati ſubiucuit.

Didaco de Requena domi æger decumbebat filius, æſtu febrium & continuo ſincipitis dolore pene exanimatus, parenti ad manum erat Roſæ cingulum quo Virgo poſtremis vitæ annis tunicam adſtrinxerat. Hoc filio præbuit ſæuiente paroxyſmo temporibus circumponendum. Paruit iſte, caputque vbi acutiùs diſpungebatur cinxit, & vnico hoc ceromate febrim ſimul cum cephalæa abegit.

Andreæm Lopez à multo tempore permoleſta quamquam occulta premebat infirmitas, nec morbi genus in Proceſſu exprimitur, niſi quòd multum diuque ægrum afflixerit. Verùm vt ad Roſæ opopanaceam confugit, eiufque calceamenti ligulam præuia oratione ſibi applicuit, è veſtigio morbus abſceſſit.

Prouinciæ de Gnailas in Regno Peruano Gubernator præ-

præerat D. Antonius de Contreras, eoque titulo vicum *Lungai* cum vxore Blanca de Zuniga incolebat. Hæc in octauum mensem grauida. sensit manifestis indicijs fœtum in vtero suo immobilem desijisse viuere. Dum inter ca. discrimina ac pauores Blanca in quintum vsque diem miserrimè distabescit, opportunè marito Gubernatori adferuntur è Lima nonnullæ ex Rosæ vestimentis reliquiæ, quas veteri amico Didacus de Cãtoral mox ab obitu Virginis dono miserat. Has subitò Antonius periclitanti coniugi apportans vt (: præmissa Rosæ deuota imploratione) ventri imponeret facile persuasit. Vix mulieris vterum reliquiæ attigerant, cum intra breue spatium, quod recitandæ semel Angelicæ Salutationi sufficeret, enixa est infântem mortuum ac putrido virore totum subliuidum. Paulò post effudit etiam secūdas, comite fœtore qui adstantes penè exanimabat. His sarcinis planè mortiferis exonerata Blanca respirauit, & quæ suscepto poenitentiae Sacramento iam sese morti certissimæ præpararat, intra pauculos dies abacta febris lectum deseruit, integræque valetudinis beneficio diu potita est. Eadem alia vice, cum partu infeliciori fœtum quadrimestrem abortiuisset, retentis in vtero secundis, per duos menses & quinque dies tantam vim corrupti sanguinis protrusit aluo, vt prope actum de sua vita existimarit. Memor itaq; opis quam aliàs Rosa præstiterat, rursus ad eam supplici deuotione respexit, nouenam ad eius sepulchrum Limæ peragere, & vtrumque miraculum publico euulgare testimonio pollicita. Et ecce, postridie cum ingenti fœtidi cruoris profluuio vnâ prodire secundæ iam putrefactæ, sensitque Blanca, iterum se morti ereptam, & Limam profecta votum exsoluit.

Feliciùs Rosæ obstetricantem sibi in partu experta est opem Bernarda de la Sierra, vxor Ioannis de Quixano Zeuallos. Hæc ad portum *Callao* marito cohabitans, ipsa die

die exequiarum defunctæ Rosæ anno 1617. cœperat angustis puerperij doloribus, quorū vi proles in vtero transfuerimasta, dum neque retineri neque emitti potest, senā cum matre præsentissimæ mortis laqueo implicabat. Iam foras prædierat intestinum (: euidens imminentis lethi indicium :) & adhuc detorta infantis obliquitas suæmet obstabat genesi, propiusque exitum quàm exitum reperiebat. Frustra pauidæ obstetrices vltimum suæ artis tentarant quò prolem aptarent ad egressum; iam Bernarda inter summos cruciatus tam sibi quàm soboli illum diem ominabatur extremum, quando improuisus Ioānes de la Massa Bernardæ maritum domi conueniens dixit se Lima pauculas ex Rosæ vestibus adferre particulas. Confestim tota domus in spem erigitur, parturientis germana soror Maria de la Sierra susceptis reliquijs periculo aduolat, Bernardæ quid ferat raptim exponit; concipitur firma in Rosæ opem fiducia, funditur brevis precatio, imponuntur ventri periclitantis allatæ particulae, & subito nullis obstetricum suppetijs dirigitur sponte in vtero proles ad enixum, nascitur facilitate prosperrima, vixit, valu it, adoleuit, pueroque in baptismo nomen fuit Petrus de Quixano. Nec silendum, quòd in dextra nascentis palpebra conspicuè apparuit rosa ad viuum effigiata, diuque velut beneficii indelebile sigillum remansit.

Mercator Basilius de Vargas Hispalensis dum negotiorum causa ab emporio Limensi Potosium tendit, per viā grauatur ex sincipite iugibus stillicidijs, quorum acrimonia sensim naribus cancrenam minabatur, & iam quinque mensium spatio mordax humor eò vsque inualuerat, vt os nasi perfregerit, cœperitq; cartilaginem nō sine cruciatu depascere. Nec vllum voraci malo inueniebatur remedium, donec ad Rosæ pharmacopeiam anxia pulsaret deuotio. Habebat vxoris dono Basilius modicum lanæ ex puluillo in quo Rosa nere aut flores acu pingere con-

sue-

sueuerat. Hanc rudi papyro obuolutam vt fronti obli-
gauit, fontem corrosiuæ defluxionis funditus exsiccauit,
& plenè conualuit. Erat huic Basilio collybistes Dida-
cus de Burguinas natione Cantaber, qui anno 1619. in
eodem vico Potosij quadam ignoti defluxûs intemperie
sensit sibi guttur intus adstringi & foris extumescere.
Nullæ proderant vnctiones, nulli tenacissimum phlegma
findebant gargarysmi, quin nocte quadam propemodum
intercluso anhelitu suffocaretur. Ergo à Basilio pugillum
lanæ (: de qua supra :) petijt, collo circumligauit, & in-
uocato Rosæ auxiliō reliquū noctis quieuit. Manè à con-
tubernali suo repertus est iugulo catharris liberrimo, tu-
mor omnis defecerat, respirandi patula redierat facultas,
statimque Basilio sua restituta est lana, de qua illud inter
alia dignum est notatu, quòd cuius-nam aut villi aut vel-
leris ea sit discerni haud possit, natiuo colore nec

bombycem refert nec gossipium, sed sparsis au-

ri fulgoribus filatim interlucet, denique

creditur ex eo puluillo esse, in quo

nenti Virgini pusillus IESVS

aliquando familiariter

solebat affide-

re.



C A P V T V.

Rosæ sepulchro exemptus pulvis dyfenteriam, fynanchen phrenesim, cancrum, herniam, febres, papulas, aliaq; id genus cacofyntheta mirabiliter curat.

Altius nonnihil hîc repetenda sunt aliqua. Limensis SS. Rosarij Conuentus vt Religiosorum abundat numero, (: plures trecentis plerumque numerantur :) ita sepeliendis tot Fratrum successiuè decedentium cadaueribus nimis arctum foret vnica capitularis domûs spatium, nisi de industria talis aliunde terra illuc fuisset illata, quæ citissimè funera sepulta absumat, vt subsequuturis locum concedant. In hunc vsum procul ab agro Panamæ nauigijs aduecta gleba totum illius Capituli pauimentum profundè infarsit, terra mollicula, tenuis, soluta, & arenosa, sed innato calore subtiliter vorax; quo fit, quòd illata corpora mox depulpet ossiumque duritiem, extemplò resoluat. Talis erat quæ ibidem virgineum Rosæ corpusculum excepit. Sed mirum dictu, vnico totoq; illo spatio vbi sacrum istud cadauer immissum fuit, gleba mutauit indolem, ac ferè pumicea soliditate in se coacta obduxit, vt solum ibi digitis leuique manu teri aut fran-

gi nequeat, quin ferro opus sit vt excauetur. Non sic reliqua illius cemeterij suburra, tritu facillima, tractabilis, fluida.

Porro in hoc Rosæ cenotaphio ad perenne humani generis beneficium viuam salutiferi pulueris latere scaturiginem, id argumento fuit, quòd anno 1632. post exportatos inde totoq; Regno distributos terrarum cophinos (: & quidem ab ea dumtaxat parte foueæ, vbi caput Virginis collocatum erat:) vix tria vel quatuor pondo cauo scrobiculo eruta videbantur: & cum P. F. Bernardus Marques pauculis ante diebus totū immisisset brachium foramini, paulò post succrescente intus puluere vix manum immergere totam potuit. Nunc ad curationum historiam.

Decennem Aethiopissam, 50. argenteis Rosa emerat pro parentum domesticis seruitijs. Mater abhorrebat inutile mancipium, vtpotè varijs languoribus ac præsertim crebræ dysenterię obnoxium. At Rosa bono esse animo iussit, adfore tempus, quo puella Diuino beneficio integrè conualesceret. Aduit certè, verum post Rosæ obitum, quando petitus de Rosæ cenotaphio puluis ancillulæ datus est cum frigida epotandus. Bibit, & continuò à morbis omnibus sanata est.

Sexenni virgini Iosephæ de Zarate musculos gutturales atrox vndique inflammabat synanche, vt nec cibum glutire nec os sine tormento potuerit aperire. Aduocatur chirurgus Ortega, qui vlcere inspecto cancrenam se plagæ insinuassee deprehendit, negauitq; puellam curari posse, nam erosæ carnes frustillatim vlceri excidebant, atque in dies serpebat malum. Anxia mater filiolæ salutem opidò comploratam Rosæ ardenter commendauit, inde pauxillum terræ quam de Virginis sepulchro in hunc vsum, auia Iosephæ attulerat, in aqua dissoluit agræque adhibito cochleari infudit. Puella vnico haustu facillimè tra-

iesto statim liberrimo hiatu os diduxit: iamque bene sibi esse affirmavit, ac cibum petijt. Mater vt cum auia patulas fauces diligentius inspexit, cancrenam mortificatam reperit, plagæ magnitudinem demirata. Interim Iosepha esculentis (: quæ alacriter glutiebat) refecta sine alterius medelæ adminiculo conualuit, promissamque Nouenam fideliter exsoluit.

In Limensi Sanctæ Claræ Monasterio Soror Grimaneæ de Valverde duplicis tertianæ ardoribus, & copioso sanguinis profluuiο post insomnem xv. dierum & noctiū inquietudinem sibimet erepta miserrimè delirabat, solum exspectabatur lucidum mentis interuallum vt extremis communicetur morientium sacramentis, nam Medici vitæ horas nonnisi octo ei residuas esse constanter asseuerabant. Igitur Abbâtissa Habella de la Fuente ad cœli præsidia confugiendum rata in vniuersi Rosæ thaumaturgis fauoribus spem fixit, corrales de Virginis sepulchro pulueres ingenti fide produxit, Confessori innuit, vt eos in puram lympham excussos infirmæ bibendos porrigat. Factum est, & en Grimaneæ repente sibi reddita primò sensit aruisse penitus cruenta profluvia, inde & febres deferuescere, sicque nullo alio tentato remedio post placidum soporem postridie mente & corpore sana fuit.

Ibidem Soror Raphaëla de Esquivel æstu bilioso torrida, & insuper arctata faucium angustijs. dū nimis phlebotomijs, & euacuationibus exhauritur, vnà iudicij metisque sanitatem perdiderat. Desperata à Medico iussa est e communi valetudinario in aliud conclaue deportari, vt à frequentiori alloquio libera vltimis Sacramentis percipiendis (si fieri posset) quietius aptaretur. Illic pulverem e Rosæ sepulchro dilutū aqua bibendum porrexit sollicita custos, & subito discussa phrenesi resipuit Raphaëla, cibum petijt, liberisque faucibus alacriter manducavit, ac sine alio remedio integerrimè conualuit.

P.F.Ferdinandus de Esquivel Ord. Prædicatorum Limensis cœnobij ad S. Mariæ Magdalenæ Subprior ab utroque peritonæi latere diram passus rupturam, hernia-
 (: quam enterocelam vocant :) acerbissimè vexabatur, ut nec prædicare, nec iter agere potuerit, quantiscumque subligaculis ac fascijs conaretur dependula in scrotum viscera coarctare. Hoc ærumnoso tormento semilacerat non minùs fide alacer vespere quodam Rosæ rumbam adiit, deuotè orauit, terramque inde arreptam inguinibus applicuit, nec ab illo temporis momento pristini doloris vllum notare potuit vestigium; quin resumpto prædicationis officio ad laborem vegetior induruit, equitaturus à terra in sellam agilissimè se librauit, quatuor millia leucarum terra marique sine impedimento aut herniæ sensu robustè confecit, liber à ligaculis, vbi quotidianæ precis votiuo penso se illigarat.

Virginem Annam Cortes ex continua duorum mensium febris simul in costarum membrana pleuritis, totoque sparsæ corpore liuentes papulæ (: quas dicunt enpinyctidas :) lethali-ter dispungebant: omnem cibi potusque orexim grauis nausea peremerat; soporis & quietis spes aberat, laxis passibus ibatur ad mortem. Mater cum filiarum altera Laurentia Cortes humanis remedijs frustra tentatis respexere demum ad cœlestia: puluerem (: quem olim dum è sepulcro Rosæ collegerat, suauissimè fragrare notârât :) protraxit è scrinio, eandemque tunc suauiculentiam denuò percipiens in spem obtinendi auxilij fortior assurrexit. Ante infirmæ lectulum procubuerunt ambae in genua: & in honorem Rosæ orationem Dominicam cum Angelicâ Salutatione recitarunt. Inde mater infusos aque pulueres languenti præbuit exhaustiendos. Hâusit; plus solito incaluit, quieuit, ac postridie discussa pleuritide, abacta febris, deterfis papulis Anna incolumis surrexit.

Costam Stephano de Cabrera fortuitus lapsus perfrēgerat : tumebat infirmo quassatum latus, feruebat per incrementa somnumque adimebat horribilis dolor. Sed statim vt Rosei sepulchri terram offensæ parti imposuit, placidè consopitus totam noctem quieti indulxit. Manè vt se doloribus liberum sensit, inspecto ac palpato latere omnem pariter fugisse tumorem latus deprehendit.

Catarinā de Sancta Maria Ordinis S. Dominici monialem Tertiariam diuersa grauium morborum genera penè membratim à quadriennio occupant. Costarum tormento accreuerant dolores ischiadum, cor quotidie septies vel octies suis cruciatibus laborabat, stomachus bis per diem flaccescebat in deliquium, vt subitò ad auro-ram festinato ientaculo fuerit instaurandus, reliqua viscera torrebat lentus calor, ac præcipuè caput crebris accendebatur ardoribus, denique ex profunda melancholia cōtumax & adusta grauedo sensim vergebat in tabem. His malis pressa Catarina tertio post Rosæ depositionem die accessit ad tumulum, preces fudit cum lachrymis, pulueres scypho intritos ebibit, primòque sensit depulso melancholiæ tabifico pondere cor suum hilarescere & confirmari, mox & capitis restingui ardores quos tunc patiebatur intensissimos, demum eadem hora totum illud multiplicium morborum collegium cessit Roseo pulueri, foeminamque reliquit valentem & perfectè sanam.

Simillimam ab his pulueribus experta est opem Isabella de Peralta in Limensi SS. Incarnationis Monasterio professsa monialis, quam ab annis xx. præter assiduos præcordiorum dolores apoplexia (maximè brumali tēpore) quotidie exagitabat; sed illico vt cordi palpitabundo modicum illius terræ applicuit, utroq; morbo se explicatam deprehendit.

Ibidem Beatrix de Montoya Sanctimonialis stomachi dyspepsiam annis xx. passa demum conuulsionum atrocitate

citate

citare ad extrema properabat, iamque ultimis sese munierat Sacramentis, certa mori, nisi traiecto in stomachum terræ illius hauſtu ſimul omnem inueterati doloris equuleum miraculo perfregiſſet.

Presbyter Mauritius Rodriquez diſti Monasterij Confeſſarius importuna vexabatur capitis vertigine ac cephalæa, nullumque è pharmacopeia omiſit remediorum genus: at tandem didicit morbo ſuo vnicum Roſæ ſepulchrum pharmacopeiam eſſe. Inde igitur allatum puluerem non modò hauſit, ſed & vertici infricuit, ynàque & vertiginem & dolores fugauit.

Virgini Lucie de Montoya hiabat profunda in vmbilico plaga magnitudine argentei philippi: at huic ubi Lucia modicum terræ è ſepulchro Roſæ inſperſit, tridui ſpatio plaga coaluit, reliſta ſola in beneficij memoriam cicatrice.

In Cuſco P. Fr. Blaſio Acoſta Luſitano Prædicatori generali commiſſus fuerat ſermo funebris ob felicem Roſæ tranſitum (qui ibi tunc innotuerat) prædicandus. Huic, dum incautus thema concionis habendæ ruminat, inter prandendum tranſuerſus in epiglottide bolus ſpiritum intercluſerat. Accurrerunt periculo P. Fr. Ioannes de Aguero Præſentatus, & P. Fr. Thomas Marcos; cumque nec liquidorum infuſione, nec valida ſuccuſſione dorſi quidquam dimoueretur bolus, ſemianimem Reſectorio extraſtum hortati ſunt ad edenda pœnitentia ſigna vt ſacramentalem abſolutionem reciperet. Procubuit ille in genua conatus conſiteri, interim Aguerus pauxillum huius ſalutiferæ terræ anhelò in aquæ vaſculo obtulit, quo ſumpto ſtatim fatalem bolum exſpuit, ac mortem cuius frigido ſudore iam permauerat, excreando euasit.

Catarinæ de Artiaga anno 1618. die 21. Martij in plurimum matronarum præſectia riuſ ſanguinis fluxu prodigio-

so scaturiebant è naribus; videbatur nonnisi cum vita finiendum profluuium, adeo latè pauimentum incessabilis cruor purpurarat. Denique vna foëminarum terræ illius pugillum fronti Catarinæ illigauit, & illo momento ad primum sacri pulueris attactum stetit sanguis, exaruit scatebra, nec deinceps hoc malum redijt. Adlittere miraculo Notarius, vnusq; ex Iudicibus ad examinanda Rosæ prodigia ab Archiepiscopo deputatis.

Anno 1631. in SS. Incarnationis Monasterio ancillabatur puella Aethiopissa annorum plus minus xxiv. Huius fauces angina accenderat, carnem totam operuerant liuētes papulæ, insuper toto corpore vultuque inflata, tympano quàm foëminæ similior extumuerat, ore, naso, oculis vbertim foëda sanies profluebat, & si qua parte leniusculè attingebatur, decoriabatur, lacera pelle manum sequente. Sic putrescenti nulla spes vitæ supererat, vnde confessione expiata, sacroque munita viatico & vincta, oleo solam exspectabat horam qua per tot vlcera emitteret animam.

At Confessarius in se beneficiorum Rosæ cōsciū horitabatur infirmam tantæ coeliti vt se commendaret, missurum se eius sepulchri pulueres, ab his ope Virginis salutem speraret: missos ægra liquore superfuso deuotissimè hausit, & in ipso mortis vestibulo conualuit.

Limæ puella innupta carnis voluptatem pudori malè prætulerat: instante partu vix vni Matri suæ delictum falsa, dum caret obstetricibus vt celaret crimen, discrimen vitæ subiit, nec parere valens nec retinere. Pauida Mater binos Religiosos illac fortè transeūtes rogauit, num quid pulueris ex Rosæ sepulchro secum ferrent. Allatum puluerem filia dolorum ac moræ impatiens siccum abliguriuit lambendo, eodem temporis puncto sobolem effudit; crediditque discussum omnino vitæ periculum. Sed Mater secundas in parturientis vtero remansisse aduerterat.

Ergo

Ergo recursum ad eosdem pulveres, & statim puellā etiam secundas enixa est, sibi & infanti gratulata incolumitatem.

Ibidem (: at longo post tempore :) Aethiopissa olitrix multis horis euentu ancipiti ac pene complorato laborabat in partu: casu id rescivit Mauritius Rodriquez Presbyter per forum olitorium transiens, suavitque Eleonore de Villa forti, vt periclitanti sociæ terram è Rosæ tumulto petitam celeriter apportaret. Factum est, statimque vt parientis ventrem terra imposita attigit, foetus breui ac facillimo nixu erupit, matremque periculo simul & onere liberauit.

Anno 1631. FF. Antonius Montoya & Ioannes de Estrada sacris Ordinibus initiandi mitrebat̃ur *Guamangam*, per viam hospitij causa ad Præfectum loci *Guando* diuerterant. Et ecce quarta circiter post meridiem hora quidam ex incolis præcipiti cursu adfuit, ac sonoro ciulatu rogabat Fratres, (: quos credebat iam esse Sacerdotes :) citò accurrerent *Cacique* Indæ vicinis in ædibus animam agentis, vt moribundam saltem poenitentiae Sacramento expiarent, neq; enim aliud tunc in oppido Sacerdos aderat. Doluerunt Religiosi, nondum se illo ordine insignitos esse cui absoluendi potestas annectitur, nihilominus cum aliquot secularibus Hispanis Indum secuti sunt, vt saltem (: quando plus non poterant :) agonizanti mulieri adsisterent, Letanias, preces, commendationem animæ super migrantem recitarent, demonumq; insultus aqua lustrali abigerent. Ingressi domum repererunt Indam sine loquela aut motu supinam, obrigidam, sanguinea labiorum spumâ horribilem, ac mortuæ quàm viæ similiorem. Frustrâ videbatur omne consilium, plangebant circumstantes Indæ, singultiebat maritus cum afflicta familia, sed Fr. Antonius memor penes se esse nonnihil pulveris ex Rosæ cenotaphio, præfatus ad astantes paucula

de Virginis apud Deum valore & gratia, de crebris eiusdem prodigijs, de concipienda præsentaneæ opis fiducia, demum arrepto cochleari dilutam terram decumbentis ori:(quod ferro violentè aperiendum fuit:) operoso conatu infudit & abiit, suadens domesticis, Rosæ interea succursum ardentius implorarēt. Post duas horas ad infirmæ habitaculum reuersus cum socijs, maritum cum tota familia reperit in iubilo: ingressus cubiculum vidit Caci-quam hilariter insidentem lectulo, & auidè manducantem; fatebatur ipsa disertissimè, sibi insciæ Rosam salutis fuisse, huic se vitam debere, nec alius tam extraneorum qui cum Antonio accesserant, quàm inquilinorum sensus fuit.

Aliam in Panamensi emporio inflammata exulceratorum viscerum putredo cum sanguinis excretionem propè ad extrema deduxerat: remedium aliunde nullum supererat; haussit eosdem pulueres, & in ictu oculi sese integerrimè sanatam vidit.

Didacus de Moreno Costilla Quitensis olim in bellis Chilenibus ab impacta ferrea claua immane vulnus capite exceperat, cui paulatim ex cura imperita spasmus, suppuratio, stupor innascebantur. Limam itaque veniens vt melioribus chirurgis se subderet, in S. Andreæ Nosocomio per sex menses frustra sub varijs vnctionibus & emplastris laborauit. Demum excitus fama prodigiorum, quæ ad Rosæ sepulchrum quotidie coruscabant, eò accessit, fusisque de genu deuotis precibus tegmen cum fascijs à capite resoluit, detracto malagmate terram ibidem excauatam vulnere insperxit, meliusque ab eo momento se habere sentiens domum alacer properauit, ac post bidduum solidè vulnus coaluisse, sanamque induisse cutemprehendit.

Abbatissa Monasterij Sanctæ Claræ in ciuitate Truxillo ab annis circiter xx. miserrimè torquebatur ex inflatione

triferi puluēres; alternos immittere fecit pedes; deinde etiam domi singulas eius corpusculi iuncturas eodem puluere defricuit, sicque Virginis intercessioni commendatum in lectulo composuit. Manē paruulus exiliuē sanus, ambulauit, expeditēq; percurrit domum, ac si nunquam pedibus languisset.

Isabellam de Peralta pluribus annis ex acriscapitis illucido cruciabat immanis gingiuarum dolor, præcipuē ē molaribus vnus cum crepuisset medius, nec chirurgis ad eum euellendum ars animusque sufficerent, interdiu noctuque vexabat miseram vt nec dormire nec cibum masticare potuerit. Monitu sui Confessarij dictos pulueres denti, cum maximē furebat dolor, admonuit, & illico dimouit omne tormentum, liberisq; gingiuis solida quæq; esculenta manducauit.

In Monasterio SS. Incarnationis Nouitia Ioanna de Vloa probationis anno prope expleto dolebat anxia, se ad solemnem professionem pertingere nō posse, eò quòd durus Pater (:qui procul degebat in *Poros*;) cunctabatur circa filix dotem sese resolvere. Sæpē Ioanna per litteras monebat Genitorem, vrgebat, instabat lachrymans, sed ille Marpesia caute durior aut responsa denegabat, aut punctum cui respondēdum fuerat obscuris inanium verborum ambagibus solertissimē declinabat. Inops consilij Ioāna postremò confugit ad Rosam, inde arrepto calamo cum vltimam Patri scripssisset epistolam, Rosæ monimenti pulueres magna fidē inspexit: paginæ, vt si paternum cor exarata illic argumenta non emollirent, præstaret officium iniectus puluis. Mira res, subito ex *Poros* responsum quo suauius desiderari non potuerat, adfuit, dotem & quidquid filia postulauerat, concessit emollitus Pater, longaq; dilatione feliciter abrupta monialis quòd ad solennia vota emittēda pertigerat, modico puluere se debere agnouit.

Porro

Porro febricitantes, quos eorundem puluerum haustus à vitæ periculo interdum extremo reuocauit, hic singillatim distinctis paragraphis recensere prolixum foret, sat est summariè & obiter nomina perstringere. Ioseph de Castro confestim vt bibit, noxias cruditates omnes euomuit & valuit. Petri de Vargas cognata Ioanna de Mendoza cum filiola hoc remedio febres abegerunt: eiusdem ancilla dentiū acutissimos dolores fugauit: P.F. Didacus de Palomino Ordinis Prædicatorum duplicem tertianam depulit, Maria Velasquez vxor centurionis Didaci Ruiz de Campos febrim continuam vnâque sanguinis fluxum mortiferum euasit: Vrsula de terra *Feluppa* ancilla Marianæ de Sca febrim cum diarrhæa, Francisca ancilla Angelæ de Aguirre tertianam cum inueterato asthma in termino peremptorio incunctanter proscripserunt: Ioannem de Palomares tertiana cum asthma morti destinabat, paulò post eiusdem coniugem à septem mensibus grauidam ideoque pharmacorum iuxta medicinæ canones incapacem idem corripuerat malum cum frequenti vomitu; denique vnico post partum mense filiolum Hieronymum idem morbus stitit in vitæ limine, at successiuè his singulis eorundem puluerum haustus repentinam salutem reddidit. Ea mdem opem puer Ioannes Ascensus, Virgo Beatrix de Zuniga, adultus Antonius de Vmbela effectū vniformi at locis diuersis comprobauerunt. Quindecenni puellæ Catarinæ Indæ febrilis æstus omnem ademerat sensum, loquelam, & spem vitæ, insuper constrictis mandibulis aditum cibo intercluserat, ferro ad hiatum os diducendum fuit vt vltimum remedium puluis è Rosæ tumulo sumptus infunderetur ne scienti quid fieret. Postridie summo manè respirans Catarina tot simul malis se ereptam experta & fassa est.

Denique vt multos globatim consarcinando compendium & finem faciam, sacramento coram Iudicibus fir-

mauric Ioanes Lobo Presbyter se diuersissimis locis Chu-
quislaquā, Potosij, Oruræ, alibi flagitantibus promiscue
omnis ætatis, sexūs, conditionis infirmis præbuisse huius
vniuersæ terræ potum, vnicoque isthoc catapotio palam
in omnium conspectu tot fuisse curata languorum gene-
ra, tot quotidie febrientes integram valetudinem repor-
tasse domum, vt nimia horum multitudo omnem supera-
rit annotandorum nominum diligentiam, cassumq; red-
diderit catalogi laborem. Exclamet hic præ stupore Rex
citharædus: *numquid confitebitur tibi puluis, aut annun-
ciabit veritatem tuam?* aio, & pergo.

C A P V T V I.

& vltimum.

Rosæ imagines contactu lepram,
apostemata, impetigines ab-
stergunt, arthritidem, hydro-
celam, anginam sanant, den-
tium, stomachi, cranij dolo-
ribus medentur.

Perfidis nostri seculi iconoclastis hoc Caput capiti-
tauium esto. Fidelibus Peruanis commune studium
fuit, in prodigiosa virtutis memoriam passim per ædes

Rosæ

Rosæ effigiem habere, nec Limæ dumtaxat sed toto Regno inualuit vsus non inutiliter; nam in primis Vidua Aloyfij Nugnez Maria de Vera profluuiò, febris, dolor stomachi, & lethali vomitu ad ipsum mortis deducta vestibulum vltimis Sacramentis ad emigrandum se paraauerat, iudicante Medico in diem posterum minimè superuicturam. Interea à vicina sartoris coniuge Mariana Inda (: quæ cum Rosâ à teneris educata fuerat) Virginis pictam in tela effigiem petijt, allatam vultui applicuit, osculis deuotè libauit, demum in eius amplexu dulciter confopita dum manè expergiscitur, se vndequaque sanam mirata refectionem petijt, lectoque exiliijt, ac imaginem festiuiss deuenitura arulæ stratæ decenter imposuit accensis luminaribus; nempe credebat hoc debetum priuato beneficio, tum communi latitiæ illius dici, siquidem illo manè solemni totius Urbis iubilo, in ædibus Metropolitana publicabantur litteræ Apostolicæ, quibus vndique Fideles ad testificandum de notis Rosæ prodigijs *compellebantur*. Et ecce imago quæ pallentem Rosæ vultum semper retulerat, illo momento venustè in genis rubuit velut publico ciuitatis tripudio serenè congaudens. Attersitur vnâ cum Apollonia coniuge Didacus de Requena; tamque conspicuo miraculo diu adstupuit.

Simillimum in portu Callao eadè die circa aliam Rosæ imaginem accidit: hanc Virgo Petronilla de Quisano in ædibus centurionis Aluari de Lugares circumpositis lemniscis ac floribus exornarat, vtpote illa die comparituram in principis Ecclesiæ pulpito dum supradictæ litteræ *Compulsoriales* collectæ multitudini prælegerentur. Vsq̃ue in illam horam vultus imaginis is erat, qui Rosæ in suo mortuali feretro pallentis fuerat, sed repentè exanguis pallor in viuidum colorem sub oculis spectantium transijt, omniumq; animos hilaritatis sue blando fulgore accendit. Pulchrius tamen eadè totæ agnorum beneficio vbiq; immicuit.

Anno

Anno 1631. mense Decembri nouenni puellæ Mariæ de los Reyes anno prope integro saniosa ac fœda porri-
go totum vndequaque verticem occruiarat; remedijs diu in cassum tentatis demum in Aedem Sancti Domini-
ci adducitur, illic coram lignea Rosæ icone procumbens lineam calanticam suo detractam capiti admouit sup-
pliciter Virgineo simulachro, ac rursus capiti imposuit. Post biduum domi Melchiora de los Reyes caput filiolæ detegens nullum in eo reperit impetiginis obduratæ ve-
stigium, nitebat sana vndique cuticula, densum fulge-
bat capillitium, videbatur puella non tam carere porrigi-
ne quàm semper caruisse.

Eiusdem anni mense Nouembri aliam Mariam decem-
mēsiū infantem orphanam Hieronymus de Soto Alua-
rado in suis alebat ædibus deformi lepra toto corpuscu-
lo horridè maculosam; in ea curanda omnis ars medica
desperarat; sed ancilla domestica Bernarda in thauma-
turgo Rosæ myrothecio efficax infanti malagma inuenit;
in æde S. Domini siccarum rosarum foliola per lineam
Rosæ iconem sparsa collegerat, his domum allatis clam
singula leprosæ paruulæ operuit vlcera, sicque diligenter
fasciatam in lectulo composuit ad soporem. Manè Hie-
ronymum Bernarda admonuit puellam ab omni lepra
mundatam esse. Aduolauit attonitus, nec suis credens
oculis teneram Mariam Apostolicis Iudicibus coram ex-
hibuit intuendam, ipsamque in perenne beneficii monu-
mentum deinceps *Mariam de Rosa* appellari iussit.

Michaël de la Massa cum dirum sub brachio succre-
uisset apostema, chirurgi cantharides intriuerunt; mulier
quamquam mordacissimo dolori impar horis non minus
xxiv. tormento subiacuit: verum vbi postridie ad eosdem
cruciatus redeundum fuit, arrepta chartacea Rosæ ima-
gine (ex ijs quæ Roma in Peruiam allatæ fuerāt) dolenti
plagæ apposuit, & exinde quidquid acrimoniæ insper-

batur, omni doloris sensu caruit, tamen pluribus adhuc diebus curæ illius acerbitas fuerit continuanda.

Marianam de Requena opprimebat intolerabilis præcordiorum dolor, cui perpetuus erat fomes ab inordinata quadam mœstitia, sanguinisque melancholici ponderosa grauedine, quam sequebatur & suspiriorum violenta frequentia, & respirandi pœnosa difficultas. Irritum cadebat quidquid subleuandæ molestiæ ingesserat medicina. Donec correptam Rosæ imaginem deuotis osculis dissuauiatam, eâdem arcto complexu adstrinxit cordi. Exinde sensit alijs sibi remedijs opus non esse, nam vnica Rosæ effigies & detergebat inueteratam mœstitiam, & dimouebat cardiagliæ cruciatum.

In Limano S. Catarinæ Senensis Monasterio Soror Angela de Haro continuis tribus mēsis lancinabatur cardo gmo seu conuulsione stomachi, sed cum desperato omni alio medicamine appressit pectori eandem imaginem, abscessit dolor.

Seruilis conditionis foemina Francisca eodem correpta morbo, & insuper febrium onusta auctario rugiebat noctibus, impar tormento: dumque ipso conticinio noctis grauius torquebatur, surgens hera detractam parieti Imaginem languenti attulit, stomacho superponi iussit, ac Rosæ opem implorauit. Francisca post imaginis amplexum somno obruta cū horis duabus quietissimè dormiuisset, sana euigilauit, nec deinceps hoc malo infestata est.

Sebastiana de Vega aliquando cum marito Doctore Cypriano de Medina Regij tribunalis Aduocato peregrè *Succagaram* profectura dum stapedi insistens sellam niritur conscendere, mula recedente varicauit, ac osse circa inguinem luxato intolerabiles dolores passa est, vt neque in lecto mutare latus, neque robustiori cuiquam operi manum adhibere potuerit. Nocte quadam, acrius læuiente, ossis cruciatu papyracea Rosæ

imaginem Romæ Superiorum permissu excusam ac inde multiplicatis exemplaribus Peruiæ importatam sibi ocysus adferri petijt: hanc dum affectu religioso circumplectitur, obdormiscit inter preces, & manè experrecta, miraculum subito clamore testata est, marito indicās perfectè se doloribus liberatam esse.

Ancilla Elyzabeth Biafora prægna ac vicina partui dispungebatur immani costarum pleuritide, ardebat febribus, cruorem & saniem vomebat ore, & demum à Medicis derelicta ac munita Sacramētis properabat ad mortem cum extremo foetus maturi periculo. Tandem vt è S. Catarinæ Senensis Monasterio chartaceam Rosæ obtinuit imaginem, tota nocte dolenti lateri obpansam tenuit. Manè redeuntes Medici, vt desperata Matre saltem nascituræ proli quoquo modo si possent consulerent, ancillam reperiunt sanam, valentem, cibosque sibi afferri postulantem. Inde vbi vegeta lecto se proripuit, tertio post die feliciter infantem enixa est incolumem.

Anno 1632. Angela de Albildo coniux Francisci de las Cuentas grauida portabat vtero gemellas, at vbi ventum est ad partum die Dominica 16. Maij duabus horis ante meridiem, altera prolium erupit sola, remanentibus intra puerperam secundis vnà cum foetu residuo. Hoc parturienti mortale esse iussitabant circumstantes foeminae, iamque maritus vltimum vale dicturus charissimæ coniugij petebat aditum, sed impeditus planxit foris. Sub hac perplexitate calamitosa infertur Romanum Rosæ eclypon sed in tela, sistiturque ex aduerso periclitantis infirmæ, vt commodè ab ea videretur. Vix Angela conceptis mentis supplicibus precatiunculis imaginem deuotè respexerat, cum subito nouis pressa doloribus partu celerrimo residuam sobolem cum secundis effudit in lectum quocuiacebat, deficiente spatio temporis quo obstetricem putu accerseret. Gemellæ erant filiolæ, sanæ, formosæ, corpus

len-

lentulæ, ac in Baptismo Mariæ & Franciscæ de Rosa nomen sortitæ sunt in beneficij memoriam.

Anna Maria filia Viduæ Mariæ Morales onustum foetu mortuo gestabat vterum, ac prius sepultum quàm natum anxia circumferebat. Irruerunt dolores partûs, at proles sine motu exanimis, frigida, ponderosa obstabat naturæ conatibus, matremque vltimo vitæ discrimini pariter implicabat. Sic misera per biduum suis colluctabatur angoribus, lentèque se mori sentiens animam pœnitentiæ sacramento expiarat. Iam vultu pallida distabescebat lethali bus deliquijs, omnis arteriarum pulsus interquieuerat, spes vitæ exciderat, quando afflicta Mater promptam è scriniolo chartam Rosæ effigie ruditer lineatam attulit moribundæ filiæ. Itum deinde in preces & lachrymas, & ecce in momento Anna mortuum puerulum, denique & secundas effudit, illicoque discusso periculo respirauit. Foetus corpore grandiusculus, cranio molli, pectusculo flaccido, nigris pedibus iam cœperat membris extremis putrescere, ac foetorem exhalabat intolerabilem, extincturus indubiè matrem nî Rosæ imago subuenisset.

Puellam Aethiopissam Mariam nomine in ædibus Didaci de Requena impetuosissimus apoplexiæ defluxus totam à summo deorsum peruaserat, neruis stupentibus brachia & crura immaniter palpitabant, iam à quatrIduo loquela exciderat, sensus aberat, ac opinione medicorum vitæ vltima imminebat hora. Sed mater familias paginam itidem chartaceam cui Rosæ imago inerat produxit, hac faciem infirmæ operuit, simulque Rosæ implorauit auxilium. Et en subito conquieuit pedum manuūque distorta agitatio, surrexit reddita sibi puella, comedit, totamque morbi vim euanuisse indicauit. Hanc sacræ Imaginis virtutem admirans Didacus eiusdem in se experimentum fecit. Sub dextro poplite dolorificus ipsi obduruerat humor, quo multum impediabatur gradiendi

facultas: igitur illammet Rose in aginem dolori leniter imposuit, & ad primum attactum è vestigio se liberum sensit. Didaci coniux Apollonia non alio quàm isthoc simplicissimæ Imaginis cataplasmate stitit mordacissimum capitis stillicidium, quod sibi dentium ferè radices vtrunque eroserat. Eadem moniali Annæ Mariæ à IESV aduersus diuturnos & acutissimos dentium dolores medicina fuit.

In Autumno anni 1630. Franciscus Gutierrez Magan, Hispalensis presbyter graui coxendicum dolore pressus, dum calidis emplastris nimium fudit, irritatum humorem descendere in dextrum pedem coëgit, vbi arthriticum, quo laborabat cruciatum vehementissimè succendit; turgabant venæ, rubebat, ardebat tumida & dirè inflammata tibia, vt nec stragulum, nec lodicis tenue operimentum valuerit sustinere: & quia insimul cruenta dysenteria exhauriebat miserum, extrema Sacramenta petijt Medico annuente, nam actum esse de vita vterque persuasum habebat. Flagitauit æger vltimo suo solatio apportari ex S. Catarinæ Senensis Monasterio (:cui erat à sacris confessionibus:) pictam in tela Rosæ imaginem, allatam iussit appendi intra lectuli sui conopeum, & attractis cortinis ita in præsentem effigie absentem Rosam affatus est: Virgo sancta & gloriosa, quæ tantum vales apud Altissimum quo beatè fruëris, respice in me, qui si aliud de te numquam merui, saltim Genitricis tuæ sum Confessarius, illi vt in Monasterio ad sacrum habitum susciperetur opportunus adiutor fui, illius solemnem Professionem nigri veli benedictione auctorauì. Tu ergo Sponsum tuum exora, vt mearum inmemor culpârû me valetudini qua ipsi quæ famulari restituat. His dictis magna vi at robustiori fide vtramq; supposuit manum tumentì tibix, & veniam præfatus vsque ad picturæ marginem subleuauit ægerimum pondus; postque breuissimi contactus morulam demisit

lenitè

lentè in culcitram, & (quod dudum non potuerat) placido sopore per dimidiam horam quieuit. Euigilans hilari vociferatione accitis domesticis pedem fascijs euolutum ostendit podagra, tumore, rubore vacuum, sinistroque pedi nihil dissimilem. Valetudo redierat integra, neque in posterum seu a arthritidis Francisco vt antea scipionis vsus imperauit.

Idem Franciscus patrinus erat Ludouici Cortes filioli Marianæ de Sea. Hunc mense Augusto anni 1631. quinquennem puerum excoquebant febres, exanimabat pleuritis. Adhibitæ vnctiones, phlebotomiæ, cucurbitulæ, clysteres, potiones magis puero obfuerunt, nam inde spuebat ore sanguinè, dolebat costis, auribus, stomacho, iecinore. Intrauit Medicus Franciscus Ximenes, primoque aspectu indilimulâter paruulû habuit pro deplorato. Superuenit Franciscus Gutierrez, allataque Rosæ imagine præiuit ægro Ludouico verba quibus se Virgini efficitim commédaret. His quanto potuit conatu pronuntiatis infirmum dulcis corripuit somnus hora circiter dimidia, quo discusso petijt admoueri sibi propiùs sacram Imaginem, quòd osculo eam cuperet reuereri. Admotam innocenti basio deuotè salutans illico recepit vires, cessauit pleuritis, euacuare febres, ac breui temporis spatio nulla alterius medicinæ ope perfectam recuperauit sanitatem.

Catarina de Vera continuis viginti diebus atrocissimos cerebri temporumque sustinebat aculeos vt nec cibum nec somnum valens admittere breui putaretur mortis faucibus immigratura. Hoc Proregis Archiater, aliisque Medicus Rocca sentiebant. Itaque peracta sacra exomologesi Franciscum de Coloma presbyterum obnixè rogauit Catarina, tantisper sibi afferret quam domi suæ habebat Rosæ effigiem. Attulit, intraque lecti cortinas prope infirmam collocauit. Mox illa vt potuit reuerenter picturam deosculans, dum ei successuè, ceruicem,

tempora, vultum admouet, somnum (:quo i r. ferè dierum hebdomadibus caruerat) cumque somno dolorum inducias, denique perfectam valetudinem attraxit à sacra Imagine.

Anna Maria de Torres non secus ac si torrem aut suam ignitam cranio operiret, affligebatur acutis in capite doloribus: obtenebrabatur oculorum acies, pulsabant accensa tempora, videbatur ardere cœlum, neque mulier sat sui compos remanebat. Nihilominus premente necessitate ceu conscia periculi hoc sapuit, vt omni alio medicamine omisso in sola Rosæ imagine medelam quæreretur. Inuenit, ac præsentaneam quidem, nam vbi cætypon amplexa est capitique applicuit, repente liberata est.

Anna de Herrera quantum olim incredulitate obstinata pugnarat aduersus Rosæ miracula, tantumdem postea explorato in semetipsa beneficio eorundem tuba & buccinatrix fuit. Diu assueuerat gratias ac quotidiana prodigia quæ ad Virginis monumentum crebrescebant, aut contradicendo eludere, aut spernendo exsufflare. Sed correxit pertinacem nocturna in somnis visio: putabat horrifono terræmotu totam ab imis fundamentis eueri Limam, interque hos pauores vel inuita se Rosæ commendabat præsidio, ac tanta quidem contentione vocis, vt de solo vociferandi conatu fuerit expergefacta. Tum verò patentibus oculis vidit Rosam (: quam ex visis hinc inde imaginibus nouerat) in genua procubuam orare pro Urbis suæ incolumitate. Dehinc Anna in Virginem animæquior, pristinumque errorem deprecata illius se protectioni religiosius commisit. Nec diu capillata occasio defuit. A sinistro tempore diuexabat Annam vehemens ac dolorosa defluxio quæ sensim adeo caput obtudit, vt per triiduum somni expers de statu mentis se prolapsaram aduerteret, ni Rosa succurrere festinaret. Igitur huius arreptam Imaginem sinistro tempore bis terue induxit, mox

in cervical recidens obdormiuit, ac media nocte euigilans omnem fugisse dolorem comperit.

De febribus id compertum est, ad Sacrae Imaginis tantum, imò conspectum citius abscessisse, quam fluat cera à facie ignis. Doctori medico N. de Rocca duodennis erat filiola Maria nomine: huic febres & papulae denuntiabant prematuram mortis sententiam, at eandem rescidit apportata Rosae effigies, mox ut sub agrae conspectum venerat. In *Panamà* P. Fr. Ioannes de Figueroa Ord. Prædicatorum ex indigestis stomachi putredinibus lethali correptus febre, totius urbis Medicis desperantibus extrema migrantium Sacramenta piè susceperat, iamque morituri lectulo circumfusi Religiosi signum ultimi agonis vigiles expectabant, ut secundum Ordinis ritum Deo & Coelitibus abeuntem animam commendarent. Vno horum suggerente affertur Imago Rosae ex Prioris cubiculo, quam ut æger aspexit, ut impacto osculo deuotè salutauit verticique reuerenter imposuit, actutum sensit corroborari neruos, redire vires. Mox & sepulchri mirificos pulueres ut cum iusculo ebibit, totius indigesti marcoris corruptam massam simul excreuit, inde febris destituta fomite ultro extincta est quando ægrum extinctura credebatur.

Alphonso de Yta Monasterij S. Catarinæ Senensis Limæ administratori vxor erat Maria de Aspitia, quam duplici tertiana bullientem Medici extracto quinquies sanguine alijsque præualidis euacuationibus penè exanimarant. Iam infirma cibi somnique incapax ad vltimum vitæ marginem festinabat, sed stitit præcipitem allata ex Monasterio Rosae effigies, quæ ut iuxta *Aspiciam* aspicienda in lectulo collocata fuit, eodem adnutu prostrauit febres, erexit infirmam. Idem Philippo Aegidio tertiana duplici molestissimè aggrauato præstitit chartacea Rosae imago, sub ipso rigoris paroxysmo capiti tremantis imposita. In por-

tu *Callao* Licentiatum Ioannem de Quisado continuis xl. diebus torrebant æstuosæ febres, neque ab humanis remedijs spes vlla reparandæ salutis affulgebat. In fertur decumbentis conclavi picta Rosæ effigies, quam Ioannes vt præuijs deuotis basijs capiti imposuit, pectorique fortiter adstrinxit, febrim extrusit, locumq; reduci valetudini statim cedere compulit.

Claudat historiam ipsa quæ Rosam genuit Maria de Oliua. Hæc pauculis diebus postquam S. Catarinæ Senensis Monasterium velanda intrarat, tota penè facie in erysipelatem deformiter exarsit; à naso vsque ad dextram auriculam ebullijt inflammatus tumor, inde per caput & maxillas oberrabat inquieti vlceris velox incendium, cui febris, dyspepsia stomachi, aliaq; cognata symptomata facile accesserunt. Sic afflicta per octiduum lecto decubuit, quotidianis tot morborum incrementis haud leuiter adtremitiscens. Monasterij Præfecta vt Rosæ matrem amabat tenerrimè, sic febrientis mœsta periculo, dum nocte quadam stipata monialibus infirmam visitat, post dulces affarus sensim de apportanda Virginis benefica imagine, quæstionem interiecit. Nec ægrè assensit egra, quin adductam lecto exciperet. Digressæ Moniales post horæ dimidium redierunt, videruntq; Mariam dulci sopore victam, at simul copiosissimo sudore madidam. Postridie lecto exiliens dum Missæ sacrificio interuētura ad Odæum properat, Præfectæ occurrit miranti ac sciscitanti cur & quò iret, præcipuè autem quò valeret. Hic fassa est Maria sibi disfluauiatâ pluries filix sacra Imaginè obrepssisse somnum, at sub noctis gallicinio vigilem innataffe sudoribus; hinc tentatò pulsu deprehendisse febrim absentiam, denique per faciem ducta manu nullum adusti tumoris palpasse vestigium, iamque se & integerrimè valere, & viuaciter esurire.

Aliud. Eidem Mariæ de Oliua iam velatæ angusta inter

ter reliquas Nouitias obtigerat cellula, & hanc insuper
 sat incommode occupabat ingens lectica lignea catasta
 ad modum armarij, quam optabat à pavimento altius sub-
 leuari & quatuor hypostylijs imponi, vt subtus caperet
 tres grandiores arcas, quæ cellulam aliàs reddebant mul-
 to angustiore. Verùm & machinæ pondus obstabat ne
 fœmineis viribus attolleretur in hypostylia, & lata subie-
 ctæ crepidinis sponda, ne saltim loco quæ semel infederat
 moueretur. Promiserat Isabella de Cataño Nouitiarū Ma-
 gistræ, se proxima quaq; die curaturam vt intronissis qua-
 tuor robustis mancipijs super dispositos lateres attollerer-
 tur moles, & laxaretur tam Maria quàm cellula impor-
 tuna angustia. Verùm præuenit decennis ancillulæ pia
 diligentia, nā vidēs nouitiam Mariam ingiter affligi, eā ad
 Chorum cum ceteris digressā manum audacter admouit
 operi, & Rosæ opitulante effigie perfecit. Redijt à Choro
 Maria, vidensque machinam appositè eleuatam, & ar-
 cas sub ea commodissimè dispositas, obstupuit, capere
 non valens cui in toto Monasterio ad talia breuissimo tē-
 pore peragēda sufficere vires & animus potuerint. Agnes
 (: id ancillulæ nomen erat :) liberè se solam peregisse to-
 tum professā est. Accurrunt moniales curioso spectaculo,
 iubetur edicere puella, rem tantam quibus tandem vi-
 ribus effecerit. Respondit: ibidem se prius ante pendu-
 lam Rosæ imaginem procubuisse in genua, postulasse
 auxilium & robur, demum se lecto qui cum catasta mo-
 uendus erat reuerenter imposuisse imaginem, mox faci-
 li conatu in partem retracta machinā se quatuor illis lo-
 cis ordinasse lateres, & denique in Rosæ nomine dorso
 fidenter subiecto ligneam ijs molem imposuisse, quam
 dum attollebat, putasse nō grauem machinam sed leuem
 paleam se portare. Mirabantur attonitæ moniales sub sa-
 cræ Imaginis valido præsidio id vnicam potuisse decen-
 nem puellam, quod vix quatuor robusti baiuli credebantur

tur sine sudore præstituri; sed creuit admiratio, quando Nouitiarum Magistra (: quæ iuxta in suo cubiculo, reliquis ad chorum euntibus remanserat :) affirmauit, se vigilem sub tanti operis vicino molimine strepitum ne minimum quidem percepisse in tam alto dormitorij silentio. Rogauerunt Agnetem adstantes, denuo ipsis præsentibus tentaret vires suas, num eleuandæ machinæ sufficerent. Tentauit, sed ac si montem tergoce excepisset, conatu irritò ridiculoque mox lassata destitit. Fas sit & mihi, hic desistere, dum tamen apud mellificæ (: Bernardi) verbis mellifluis Rosam alloquar Oliuæ filiam, fauorum matrem.

O stirps Oliua fructifera in domo Dei ungens & lucens, fouens beneficij, coruscans Miraculis, fac nos eius qua frueris lucis suauitatisque participes. O odorifera ROSA, in æternum ante Dominum germinans & florens, spargens ubique viuificum suauitatis odorem, cuius apud nos memoria in benedictione est, apud Superos præsentia in honore, decanantibus te tanta plenitudinis participatione non fraudari. Denique lætemur & exultemus, quia cælestis illa Curia ex nobis habet cui sit cura nostris, qua suis nos protegat meritis, quos informauit Exemplis, Miraculis confirmauit.

FINIS.

INDEX

INDEX CAPITVM

- Cap. 1. Rosæ patria, Natales, Cunabula. Pag. 2.
- Cap. 2. Rosæ Crepundia, indoles, educatio votumque Virginitatis. 5.
- Cap. 3. Rosæ erga Parentes mira obedientia, pietas, solitudo. 9.
- Cap. 4. Rosa B. Catarinæ Senensis vestigijs ad sequelam provocata tertium S. P. Dominici Ordinem amplectitur. 19.
- Cap. 5. Rosa præiacto solidæ humilitatis fundamento securè inædificat reliquarum virtutum molem. 27.
- Cap. 6. Rosæ mira abstinencia; prodigiosi ieiuniorum excessus. 35.
- Cap. 7. Rosa tenerum corpus cilicijs, flagris, catenis domat. 43.
- Cap. 8. Rosa capiti aculeatam coronam circumdat, impri-
mit, infigit. 51.
- Cap. 9. Rosæ lectulus, ceruical, nocturnæ vigiliæ. 58.
- Cap. 10. Rosæ domestica solitudo, fuga publici, cellula per-
angusta. 68.
- Cap. 11. Rosæ mira cum Christo desponsatio pronuba Au-
gustissima Imperatrice Angelorum. 79.
- Cap. 12. Rosa perpeti orationis studio miram assequitur cum
Deo vnionem. 88.
- Cap. 13. Rosa desolatorijs visionibus exercetur, ac horrendas
alterius vitæ poenas degustat. 97.
- Cap. 14. Rosa Doctorum examen subit, vt probeatur spiritus
an ex Deo sit. 103.
- Cap. 15. Rosa cum Christo, Deipara, B. Catarina Senensi fa-
miliariter, iucundè, assiduè deliciatur. 115.
- Cap. 16. Rosa familiariter tutelaris Angeli consuetudine fruitur,
variè luctatur cum Dæmone, semper victrix. 122.

- Cap. 17. Rosa persecutionibus, morbis, ærumnis pressa strenuè sese ad patientiam exercet. 131.
- Cap. 18. Rosa varijs indicijs ardentem erga Sponsum amorem prodit. 139.
- Cap. 19. Rosa, vt Christum omnibus amandum persuadeat, manifestum sudantis Imaginis miraculum impetrat. 147.
- Cap. 20. Rosam Imago Deiparæ in S. Rosarij Sacello creberrimè solatur, mulcet, instruit. 154.
- Cap. 21. Rosæ in salutiferum Crucis signum religio; Imaginem S. Catarinæ exornans ab ea vicissim honoratur. 163.
- Cap. 22. Rosæ feruidus in SS. Eucharistiam affectus, cultus, deuotio, pro ea ad agonem se accingit. 173.
- Cap. 23. Rosæ eximius pro periclitantium animarum salute zelus. 185.
- Cap. 24. Rosa pro modulo facultatum corporalibus misericordiæ operibus proximos iuuare satagit. 195.
- Cap. 25. Rosæ magna in Deum fiducia, crebrò in suis suorumque necessitatibus explorata. 205.
- Cap. 26. Rosæ diuinitus reuelatur effloriturum in Vrbe Limana S. Catarinæ Senensis Cœnobium, tempus occultitur. 215.
- Cap. 27. Rosæ alia cōplura Deo reuelante arcana patefiunt. 226.
- Cap. 28. Rosa mortis suæ præscia grauem vltimæ ægritudinis luctum fortiter excipit, inuictè sustinet. 240.
- Cap. 29. Rosæ marcor extremus, suaue deliquium, & mors pretiosa. 251.
- Cap. 30. Rosæ funebris conductus, exequiæ, tumulus. 261.
- Cap. 31. Rosæ Sepulchrum Ordinarij autoritate mutatum solemni corporis translatione. 271.
- Cap. 32. & vltimum Rosæ elogia ex pluribus notiora. 278.
- MANTISSAE CAPVT PRIMVM.
- Rosa post mortem, & sæpissimè, & multis apparet gloriosa. 187.

- Cap. 2. Rosa à morte in Peccatorum subitis conuerſionibus,
& obſtinatione cordium emollienda mirabilis. 297.
- Cap. 3. Rosæ defunctæ tactu, odore, ueneratione, Mors,
Morbi, pericula depelluntur. 306.
- Cap. 4. Rosæ defunctæ cingulum, Vela, particulæ veſtium,
ægris, parturientibus, debilibus medicinam diſtillant. 325.
- Cap. 5. Rosæ ſepulchro exemptus puluis dysenteriam, Synan-
chem, phreſim, cancrum, herniam, febres, papulas, alia-
que id genus cacofyntheta mirabiliter curat. 336.
- Cap. 6. & vltimum: Rosæ Imagines tactu lepram, apoſte-
mata, impetigines abſtergunt, arthritidem, hydrocelam, angina-
nam ſanant, dentium, ſtomachi, cranij doloribus medentur.
348.

SPHALMATA TYPOGRAPHI GRAVIORA SIC CORRIGUNTUR.

Pag. 41.	lin. 29.	affixo	lege	affixa.
Ibid.	lin. 18.	conciaui	lege	cruciatui.
Pag. 93.	lin. 10.	laudere	lege	laudare.
Pag. 128.	lin. 26.	laxabat	lege	laſſabat.
Pag. 140.	lin. 21.	conſumer	lege	conſumar.
Pag. 156.	lin. 32.	hac	lege	hac.
Pag. 164.	lin. 16.	fororis	lege	ſororis.
Pag. 170.	lin. 23.	immunitati	lege	immanitati.
Pag. 188.	lin. 5.	ſolitudinis	lege	ſolicitudoinis.
Pag. 192.	lin. vltima	illa	lege	ille.
Pag. 195.	lin. 20.	ſeu	lege	ſed.
Pag. 231.	lin. 18.	occurriſſe	lege	accurriſſe.
Pag. 232.	lin. 3.	religioſa	lege	religioſæ.
Pag. 233.	lin. 28.	abſtrigillet	lege	obſtrigillet.
Pag. 235.	lin. 22.	Vtrumque	interſere	vno.
Pag. 239.	lin. 14.	Virginis	lege	Virgini.
Pag. 240.	lin. 13.	Rosæ	lege	Rosæ.
Pag. 244.	lin. 27.	artericarum	lege	arteriarum.
Pag. 248.	lin. 1.	intim	lege	interim.
Pag. 276.	lin. 9.	&	lege	at.
Pag. 286.	lin. antepenultima	daruam	lege.	paruam.
Pag. 334.	lin. 5.	prædierat	lege	prodierat.

Cetera beneuolus Leſor aut excuſabit aut emendabit.

PROTESTATIO AVCTORIS.

LECTOR aduerte, ut si qua in recensendis elogijs, ac gestis tanta Virginis Sponsæ Christi hoc libello complexus fui ultra mores illius, ac vitæ sanctitatem, & Populorum erga eandem obsequia, superantia vires humanas, qua miracula videri possint, & ad futurorum prasagia, reuelationes, & alia beneficia in mortales collata quoquo modo trahi valeant; Illa tibi propono, ut nolim accipi, tanquam ab Apostolica Sede examinata, & approbata, sed ut ea, quæ a sola authorum suorum fiat pondus obtineant; nec ideo aliam quàm humanam historiam sapiant. Quare etiam inharendo Decretis felic. rec. Urbani VIII. cum declarationibus ab eodem editis quoad venerationem, & cultum, firmiter testatum volo, me hisce lucubrationibus nolle quicquam venerationis aut cultus maioris eidem Virgini Rosæ tribuere, vel famam, aut opinionem sanctitatis eiusdem augere, nec illius existimationi aliquid adiungere, vltimumque gradum facere ad futuram quandoque illius Canonizationem, aut miraculorum comprobationem, sed omnia à me relinqui in eo statu, quem hisce meis lucubrationibus seclusis per se obtinerent, non obstante quocumque longissimi temporis cursu. Hoc tam sanctè profiteor, quàm decet eum, qui Sanctæ Sedis Apostolica obsequentiissimus filius haberi cupit, & ab illa in omni sua actione dirigi.

J. Rog.

